

Zaburu

Pogau bhaa-bhaana

Boku *Zaburu* satotuuna sagaa minaaka i Kitabi Momangkilo momembalina boku lagu-lagu tee boku do'a. Boku incia sii aburia manga pande burina puisii i nuncana wakutuu momangengena mpuu. Manga lagu tee manga do'a sii arombusakea miana Israel tee apakea i nuncana sambaheana manga, kasiimpo apapesuaia i nuncana Kitabi Momangkilo. Manga kabhantina agama sii apegiau-giu: dhaangia lagu kapujia tee dhaangia lagu to tasomba Aulata'ala; dhaangia o do'a taemani tulungi, peulusa tee kasalaamati; do'a taemani amponi; lagu kasukuru roonamo barakatina Aulata'ala, tee do'a mamudhaakana o musuna atohukumu. Manga do'a incia sii dhaangia mokosifatuna to karota samia, dhaangia uka mokosifatuna to saangua lipu. Pia-pia giu minaaka i do'a sumai a'ibaratiaka namisina samia-samia i nuncana ngangaran-dana, sainamo mosagaanana apogauaka ifaraluuna tee namisina bhari-bharia uumatina Aulata'ala. Manga *Zaburu* apakea Isa, aalea minaaka i manga pande buri Pojanjia Bhaau, tee apamembalia boku sambahea aharagaangia mpuu i Gareja Karasiteni minaaka i auwalina.

Antona

I - 150 *Zaburu* abagea i nuncana lima kolompo atawa o boku, mboomo incia sii:

Boku bhaa-bhaana: *Zaburu* 1--41

Boku i rua anguna: *Zaburu* 42--72

Boku i talu anguna: Zaburu 73--89

Boku i pata anguna: Zaburu 90--106

Boku i lima anguna: Zaburu 107--150

BOKU BHAA-BHAANA:

1

ZABURU 1--41

Kasanaa Sa'umuria

1:1-6

- ¹ Amasanaamo mia
inda moosena kaadharina mia madhaki,
inda aose mia mokodosa
tee inda aposabhangka tee manga mia pande
pogauakana mia,
- ² maka mopeeluna moosena hukumuna
KAWASANA OPU,
tee audhania malo tee eo.
- ³ Mia incia sumai bheakohasili i nuncana opeapo
ikarajaana.
Incia mboomo puuna kau ipombula i bhi-
wina uwe mosiwulu,
akobhake wakutuuna akawa bulaana,
tee o tawana inda amalau.
- ⁴ Maka o mia madhaki inda mboo sumai.
Manga incia mboomo kulina bhae ipo-
lakaakana ngalu.
- ⁵ Sababuna sumai o mia madhaki bheahukumua
Aulata'ala wakutuuna ato'adili,
mboomo uka o mia mokodosa inda bheapa-
pesuaia i nuncana uumatina mobanara.
- ⁶ Sababuna o KAWASANA OPU ajagani mia moba-
nara,

maka o mia madhaki bheabinasa.

2

Raja Ilantina Kawasana Opu

2:1-12

¹ Opea o sababuna manga lipu atobungke,
tee manga ra'eatina lipu ahaejatiaka
parakara mosia-sia?

² Manga rajana dunia sii apasiapuaka karona,
tee manga mokenina kuasa apomufakatimo
gauna aewangi KAWASANA OPU tee raja ipilina.*
Pogauna manga incia,

³ "Mai tabhotukia o kabhokena KAWASANA OPU
tee raja ipilina,
tee tabhanakea o rabutana manga incia mi-
naaka i ingkita!"

⁴ Incia mokokauncuramakana i sorogaa apotawa,
Kawasana Opu aele-ele manga incia.

⁵ I wakutuu incia sumai Kawasana Opu bheafiri-
mani i manga incia
tee apatokidha manga incia tee pamuruna,

⁶ "Iaku padhamo kulanti rajaku i Sion,[†]
i gunuku momangkilona sumai."

⁷ Iaku bhekupogauaka opea mopadhana ipatota-
puakana KAWASANA OPU.

Incia padhamo afirimaniaku, "Ingkoomo anaku,
i eo sii Iaku kupamembaliko anaku.

* **2:2 2:2** *raja ipilina*: Saro incia sii asusuaka to Isa Al Masi. † **2:6**
2:6 *Sion*: Saro kaabhi-abhina Kota Yerusalem, tampana Baitulla.

- ⁸ Emanimo i Iaku,
Sumaimo bhekudhawuakako manga lipu to
amembali tinaurakamu,
tee saangua alamu kupamembalia
pewauamu.
- ⁹ Ingkoo bheupahancuru manga incia tee katuko
ase
tee upasakia manga mboomo poluka reo."
- ¹⁰ Rampaakanamo sumai, e manga raja,
pewaumo aarifu!
Tarimamo kaadhari, e manga mokuasaina
dunia!
- ¹¹ Sombamo i KAWASANA OPU tee umaekaia,
Rengkumo, tee upekatambe karomiu i
aroana raja tee kaunde-unde.
- ¹² Sombamo Incia tee kakatena totona incamu
mamudhaakana Incia inda apamuru tee
apabinasakomiu i dhala
roonamo Incia amasimba mpuu a'amara.
Amasanaamo bhari-bharia mia
mopeuluna i Incia!

3

Do'a Saeona to Tapoaro tee Musu

3:1-9

¹ Zaburuna Daud, wakutuu incia apalaiaka
karona minaaka i anana mokosarona Absalom.*

² E KAWASANA OPU, abhari mpuu o bhaliku!

* **3:1 3:1** *Absalom:* Absalom sumai anana Raja Daud, bhe-mopekandawuna Daud minaaka i kauncuramakana, roonamo incia gauna bheamembali raja to abholosi Daud. Kamata 2Sa. 15:13–17:22.

Abhari mpuu moewangiaku!

³ Abhari o mia mopogauakaaku,
"Aulata'ala amendeu atulungia."

Sela

†

⁴ Maka Ingkoo, e KAWASANA OPU, satotuuna o
katangkesiku mojaganiaku,
Ingkoomo mopamembaliaku kutohoromati
tee mopadhadhina incaku pendua.

⁵ Iaku kugora kuemani tulungi i KAWASANA OPU,
tee Incia alawaniaku minaaka i gununa mo-
mangkilo.‡

Sela

⁶ Iaku kupotidhole kukole, kasiimpo alipa o
mataku,
tee kubhangu roonamo KAWASANA OPU mo-
tukoaku.

⁷ Iaku inda kumaeka tee rewu-rewuna musu
bhemolibuaku minaaka i bhari-bharia rope.

⁸ Bhangumo, KAWASANA OPU, tulungiaku e
Aulata'alaku!
Umbe, Ingkoo ubhebhe naunauna bhari-
bharia musuku,
tee upekakatu ngincina manga mia madhaki.

† 3:3 3:3 Sela: Aipomo tandana to aunto wakutuuna lagu sumai
atolaguaka, atawa o tanda to ahanda apekaogea o suonana,
atawa onina gambusuna. Amembali uka to tanda to morangoa
mamudhaakana asuju. ‡ 3:5 3:5 gununa momangkilo: Gunu
Sion i Kota Yerusalem, tampana ibaadatina miana Yahudi, siitumo
Baitulla. Siitumo, miana Yahudi kananeana asarongiakea Gunu
Sion "gununa momangkilo."

⁹ Kasalaamati aumba minaaka i KAWASANA OPU.
Barakatimu to uumatimu!

Sela

4

Do'ana Malo

4:1-9

¹ To kapalana molaguna. Tee kagasiona gam-
busu. Zaburuna Daud.

² E Aulata'ala, Ingkoomo moewaakaaku,
lawaniaku wakutuuna kugora.
Ingkoo udhawuaku kalalesa wakutuuna ku-
maseke.
Maasiakaaku tee rangomea o do'aku!

³ E manga mia, saopea uka o kangengena in-
gkomiu upekarombu kamuliangiku?
Saopea uka o kangengena umaasiaka giu
mosia-sia tee upeelo giu inda mobanara?

Sela

⁴ Mataua ande o KAWASANA OPU padhamo apili
samia mosaalihina to karonu,
KAWASANA OPU bhearangoa ande kugora i
Incia.

⁵ Wakutuuna u'amara, bholimo upewau dosa!
Pogaumo i nuncana ngangarandamu i kole-
mamu,
tee bholi tee uu'uumu.

Sela

⁶ Pasombaakamea o kurubani ipatotapuakana to
Aulata'ala,
tee uparacaeamo i KAWASANA OPU.

- 7 Abhari o mia mopogauna, "Incema bhemo-
susuakana kalape to ingkita?"
E KAWASANA OPU, taroakamo caheana
roumu asuluwi ingkami!
- 8 Ingkoo upewau incaku akaunde-unde
alabhi minaaka i kaunde-undena o mia
motaralabhi-labhina timpuana gandum
tee angguruna.
- 9 Tee namisi momasanaa bhekupotidhole, kasi-
impo kutokole,
sababuna tangkanamo Ingkoo KAWASANA
OPU,
mopewauna dhadhiku a'amani!

5

Do'ana Saeona

5:1-13

- 1 To kapalana molaguna. Tee kagasiana suli.
Zaburuna Daud.
- 2 E KAWASANA OPU, rangoa o pogauku,
perangoia ipeenciakaku.
- 3 Rangoa o goraku kuemani tulungi,
e Rajaku tee Aulata'alaku,
roonamo i Ingkoomo iaku kudo'a.
- 4 E KAWASANA OPU, i wakutuuna raneeo Ingkoo
urango do'aku,
i wakutuuna raneeo ku'atoro pasombaa to
Ingkoo* tee kuantaantagi kalawanimu.

* **5:4 5:4** *pasombaa to Ingkoo*: Ma'anana mencuana o Aulata'ala mofaraluuna saangu giu motopasombaakana to Incia (kamata Zab. 50:9-13). Bhari-bharia motopasombaakana satotuuna to tamuliangi Incia, tasukuru i Incia, tee mamudhaakana amasanaa o namisina.

- ⁵ Ingkoo mencuana Aulata'ala momaasiakana pe-
wauna mia mokodosa;
mia madhaki inda amembali amboore i
aroamu.
- ⁶ Mia mosomboakana karon a inda uundaakea
adhaangia i aroamu.
Ingkoo ubanci bhari-bharia mia mopewauna
kadhaki.
- ⁷ Ingkoo upabinasa manga mia mogau-gau.
Umarikaia ukamata pande pekamatena mia
tee pande tipu.
- ⁸ Maka rampaakanamo kaasimu inda momab-
hotu,
iaku bhekupesua i nuncana bhanuamu,
tee kusuju kusomba kupoaro i bhanuamu mo-
mangkilo,
tee kumaeka i Ingkoo.
- ⁹ E KAWASANA OPU, susuakaaku dhalamu moba-
nara
roonamo manga musuku mojoli-joliaku.
Pekakatea o dhalamu i aroaku,
mamudhaakana kumembali kuose peelu-
amu.
- ¹⁰ Sababuna pogauna manga incia inda amem-
bali atoparacaea,
i nuncana ngangarandana, manga incia
gauna apahancuru mia mosagaanana.
Goncona manga incia mboomo koburu mopon-
ganga,
dhela tee kawujuna manga incia amameko.
- ¹¹ E Aulata'ala, taroakamo manga incia atanggo
kasalahana,

bheakangkanai i karon a opea mopadhana
ihaejatiakana to mia.
Padhencua manga incia roonamo abhari o
kasalahana,
tee manga incia adorohaka i Ingkoo.

¹² Maka bhari-bharia mia mopeuluna i Ingkoo
bheakaunde-unde,
manga incia bheasambo-sambo sa'umurua.
Jagania manga mia momaasiakana saromu,
mamudhaakana manga incia akaunde-unde
i nuncana opea ipewaumu.

¹³ Sababuna Ingkoomo mobarakatina mia moba-
nara, e KAWASANA OPU,
Ingkoo ujagani manga incia tee kaasimu
mboomo katangkesi.

6

Do'a i Nuncana Kanarakaa

6:1-11

¹ To kapalana molaguna, tee kagasiana gam-
busu. Mboomo lagu: I walu anguna. Zaburuna
Daud.

² E KAWASANA OPU, bholi uhukumuaku i nun-
cana amaramu,
tee bholi uwanduaku i nuncana pamurumu.

³ Maasiakaaku, e KAWASANA OPU, sababuna
atopadhamo bukuku,
pekatangkaaku roonamo bukuku arengku.

⁴ Amapii incaku.

Bholi upekangenge inda ulawaniaku, e
KAWASANA OPU!

- ⁵ E KAWASANA OPU, mbulimo, tee utulungiaku
minaaka i mate!
Pasalaamatiaku roonamo kaasimu molag-
ina.
- ⁶ Sababuna i alamuna mia mate Ingkoo indamo
utoudhani,
tee i nuncana koburu indamo dhaangia uka
mosukuruna tee Ingkoo.
- ⁷ Iaku kumangule roonamo kapeenciku,
samalo-samalo loluku apotiburi abhaho
kolemaku.
- ⁸ Mataku amarea roonamo kaporona inca,
tee amarawu roonamo bhari-bharia bhaliku.
- ⁹ Dhencumo minaaka i karoku, e manga mia
mopewauna kadhaki,
roonamo KAWASANA OPU arangoa o
tangiku.
- ¹⁰ KAWASANA OPU arangomea iemaniku
tee atarimamea o do'aku.
- ¹¹ Bhari-bharia musuku bheanamisi kaea tee
atokidha mpuu,
manga incia asowo tee apokawaaka kaea
sakijamata.

7

Do'a Emaniana Ka'adili 7:1-18

- ¹ Lagu kaporona incana Daud, ilaguakana to
KAWASANA OPU roonamo Kus, miana Binyamin
sumai.

- ² E KAWASANA OPU, e Aulata'alaku, Ingkoomo
peulusaku,
pasalaamatiaku tee rambasakaaku minaaka
i bhari-bharia mia mopajereaku
- ³ mamudhaakana manga incia inda apapakiaku
mboo singa
asoroaku tee abheka-bhekaaku wakutuuna
inda dhaangia motulungiaku.
- ⁴ E KAWASANA OPU, e Aulata'alaku, ande kupe-
wau giu incia sii:
Ande kupewau inda a'adili i mia
mosagaana,
- ⁵ ande kuhianati sabhangkaku,
atawa kurampasi musuku inda tee
sababuna,
- ⁶ taroakamo musuku apajereaku tee arakoaku,
kasiimpo alandalandakiaku i tana,
tee adhika kamuliangiku i nuncana ngawu.
Sela
- ⁷ E KAWASANA OPU bhangumo i nuncana pamu-
rumu,
kakaromo to uewangiaka manga musuku!
Bhangumo to iaku, roonamo Ingkoomo
mo'adilina maanusia.
- ⁸ Rombusakamea bhari-bharia lipu i saripimu,
tee ukapalaimea manga incia i bhawona
kauncuramakamu momalanga.
- ⁹ KAWASANA OPU mo'adilina parakarana manga
lipu.
E KAWASANA OPU, dhawuaku ka'adili,
roonamo ipewauku abanara tee amakate to-
tona incaku.

- 10 Pauntoa o mia mokodosa apewau momadhak-
ina,
tee upekatangkea incana mia mosaalihi,
sababuna Ingkoo Aulata'ala mobanara,
momatauna incana tee baatinina maanusia.
- 11 Katangkesiku satotuuna o Aulata'ala,
mopasalaamatina mia momakatena totona
incana.
- 12 Aulata'ala satotuuna haakimu mobanara,
Incia apamuru saesao tee mia mopewauna
kadhaki.
- 13 Ande dhaangia o mia inda motoba, sumaimo
Kawasana Opu bheawinto hancuna,
tee apasiapu panana.
- 14 Incia apasiapuaka karona tee ewanga moto-
mateaka,
tee akarajaa matana pana mokowaa.
- 15 Satotuuna o mia incia sumai akokadhumaaka
kadhaki,
incia abhawa kasega i nuncana karona tee
apalaahiri gau-gau.
- 16 Incia aseli kabhalongko to mia mosagaanana,
maka o karona mokotibuna.
- 17 Jadi incia ahukumua kasegana tee haejatina
karona,
tee o kasega ipewauna bheapanarakaa
karona.
- 18 Iaku bhokusukuru i KAWASANA OPU roonamo
Incia a'adili,

tee kulaguaka kapujia to KAWASANA OPU
Momalanga.

8

*Mahaluku Mohina mboomo Mahaluku Momu-
lia*
8:1-10

¹ To kapalana molaguna. Mboomo lagu Gitit.*
Zaburuna Daud.

² E KAWASANA OPU,[†] e Aulata'alamami,
saromu amulia i saangua alamu!
Kaogesana kuasamu alabhi kalangana mi-
naaka i laiana.

³ Minaaka i ngangana manga anaana momaidhi-
idhi tee anaana modudu uka apuji kamu-
liangimu.

Roonamo Ingkoo padhamo upakaro bente
potaangia momatangka
sabutuna o ngangana bhari-bharia musu tee
bhalimu atosoncongi.

⁴ Ande kutonto tee kufikiri laiana ipadhaan-
giamu,
bula tee kalipopo idhikamu,

* **8:1 8:1** *Gitit*: Zaburu incia sii aose suarana lagu tee gambusu
minaaka i Gat, siitumo sala saangu kota miana Filistin. Gat
sumai mopadhana imbooresina Nabii Daud wakutuuna apala-
iaka karna minaaka i Raja Saul. † **8:2 8:2** *KAWASANA OPU*:
Ande atoburi tee horofu maoge, saro incia sii o sarona karna
Aulata'ala i oni Ibrani atosarongi YAHWEH, sainamo ande ato-
buri tee horofu maidhiidhi, ma'anana o Kawasana Opu (Ibrani:
Adonai). **8:3 8:3** Mat. 21:16.

- 5 incema buaka o maanusia sumai, mbakana
uudhania,
incema buaka o incia, mbakana udham-
baakea?
- 6 Maka upewau maanusia saidhepo apokana tee
Aulata'ala,‡
upakanaakea tee mahakota kamuliangi tee
kahoromati.
- 7 Udhawua kuasa to saangua alamu,
bhari-bharia ipadhaangiamu upatungkua i
incia:
- 8 Dumba, sapi tee bhari-bharia binata kadham-
baaka,
tee manga binata i rumpu;
- 9 Manu-manu tee manga ikane
bhari-bharia mahaluku i nuncana tawo.
- 10 E KAWASANA OPU, Aulata'alamami,
saromu amulia i saangua alamu!

9

Kawasana Opu Peulusana Mia Mosaalihi

9:1–10:18

1 To kapalana molaguna. Mboomo lagu:
Matena Samia Ana. Zaburuna Daud.

- 2 Iaku bhekusukuru i KAWASANA OPU, tee mpuu-
mpuuna incaku;
iaku bhekupetulatulaaka bhari-bharia
ipewaumu inda momentela.

8:5 8:5 Ayb. 7:17; Zab. 144:3; Ibr. 2:6-8. ‡ 8:6 8:6
Aulata'ala: Amembali uka ma'anana manga malaa'ekati atawa o
mahalukuna sorogaa. 8:7 8:7 1Kor. 15:27; Ef. 1:22; Ibr. 2:8.

³ Iaku bhekukaunde-unde tee kumasanaa roon-amo Ingkoo;
iaku bhekulaguaka manga kapujia roonamo saromu, e KAWASANA OPU Momalanga.

⁴ Wakutuuna manga musuku asowo,
manga incia atosunu tee abinasa i aroamu.

⁵ Ingkoo uewaaka parakaraku tee hakuku.
Ingkoo uhaakimu tee kabanara i bhawona kauncuramakamu.

⁶ Ingkoo padhamo uhaakimu manga lipu
tee upabinasa manga mia madhaki,
Ingkoo padhamo uhapusua saroni manga incia to sa'umuruu.

⁷ Manga musu amapupumo atopabinasa,
manga incia amofu sa'umuruu.
Kota-kotana manga incia padhamo upahancuruu
mboomo ngawu atontalesaka,
kaudhanina to manga incia uka ailamo.

⁸ Maka, KAWASANA OPU akokuasa sa'umuruu.
Incia padhamo apatotapuaka kauncurama-
makana to a'adili maanusia.

⁹ Inciamo bhemohaakimuna dunia sii tee kabanara,
Incia ahaakimu manga lipu tee ka'adili.

¹⁰ Sumaimo KAWASANA OPU amembali tampana
peulusa to mia motopisaki,
tampana peulusa i wakutuuna kanarakaa.

¹¹ Manga mia momatauna saromu
adhika kaparacaeana i Ingkoo,
roonamo Ingkoo inda ubholi
mia mopeelona Ingkoo, e KAWASANA OPU.

- 12 Lagumo tee pujimo KAWASANA OPU moparin-
tana i Sion!
Pakoleleakamea manga pewauna i tanga-
tangana manga lipu!
- 13 Sababuna Incia audhani manga mia
monarakaa
tee inda amalinguaka gorana mia
motopisaki;
manga pande pekamatena mia bheabalasia
tee ahukumua.
- 14 E KAWASANA OPU, maasiakaaku;
kamatea o kanarakaa ipewauna manga mia
mobanciaku,
e Aulata'ala pasalaamatiaku minaaka i mate,
- 15 mamudhaakana amembali kupujiko i
bhambana kotana Puteri Sion,* siitumo
i ra'eatina Yerusalem,
roonamo upasalaamatiaku.
- 16 Manga lipu amandawu i nuncana bhalo
mopadhana ikarajaana manga incia,
Manga incia apesua i nuncana jari ipasana
tee ibuniakana karona.
- 17 KAWASANA OPU apapematauaka karona,
tee a'adili ahaakimu maanusia.
Mia madhaki akana i katapu ikarajaana karona.
Sela
- 18 Manga mia madhaki bheambuli i duniana mia
mate,
siitumo bhari-bharia lipu momalinguakana
Aulata'ala.

* 9:15 9:15 *Puteri Sion:* Sarona to kota Yerusalem, roonamo
atobhangu i Gunu Sion.

- 19 Maka o mia misikini inda sadia bheatomalin-
guaka,
tee inda sa'umurua bheaila opea iharapuna
o mia monarakaa.
- 20 E KAWASANA OPU, bhangumo. Bholi
utaroakea o maanusia akana!
Taroakamo manga lipu sumai u'adilia i
aroamu.
- 21 Pekaekaia manga incia, e KAWASANA OPU!
Mamudhaakana manga lipu sumai amataua
ande manga incia tangkanamo maanusia.
Sela

10

- 1 E KAWASANA OPU, pokia Ingkoo upekaridho?
Pokia Ingkoo ubuniaka karomu i wakutuuna
ingkami tamaseke?
- 2 Mia madhaki mosombo apajere mia motopisaki,
taroakamo manga incia akangkanaia kata-
puna momadhaki ihaejatiakana karona.
- 3 Roonamo mia madhaki apuji-puji peeluana in-
cana,
tee o mia maso'o apektunda tee ahina
KAWASANA OPU.
- 4 Mia madhaki apogau tee kasombo,
"Aulata'ala inda bheatuntua."
I fikirina tangkanamo, "Inda dhaangia o
Aulata'ala!"
- 5 Mia madhaki sadia apotibhaaka sagala
ipeeluna.
Hukumuna Aulata'ala inda dhaangia o
ma'anana to incia.
Incia apanda'ente bhari-bharia bhalina.

- 6 Mia mokodosa apogau i nuncana ngangaran-dana, "Iaku sadhaadhaa bhekumatangka, tee sa'umurua inda bheakangkanaiaiku balaa."
- 7 Ande apogau, o ngangana abukeaka katunda, gau-gau, tee kapisaki.
Incia sadia abhoasaka pogau madhaki tee apekabanci.
- 8 Incia apekantaan i desa-desa,
Apekamate mia inda mosala, i tampa momalino.
Incia alukuti mia momalute.
- 9 Incia apekantaan i tampa momalino
Mboomo singa i nuncana rumpu.
Incia apekantaan to arako mia motopisaki.
Arako mia motopisaki tee apapesuaia i nuncana jarina.
- 10 Incia a'ungko mamudhaakana apekapapaki,
kasiimpo tee kakaana bukuna incia apakotibu mia malute sumai.
- 11 Pogauna i nuncana ngangarandana,
"Aulata'ala inda afaduliakea,
Incia apopiro tee sadia inda akamata opeopea uka."
- 12 E KAWASANA OPU, bhangumo. Hukumumea manga mia madhaki!
Bholi umalinguaka mia motopisaki.
- 13 Apokia manga mia madhaki sadia ahina Aulata'ala?
Manga incia apogau i nuncana ngangaran-dana, "Ingkoo inda bheutuntua!"

- 14 Maka Ingkoo dhaanamo ukamatea, roonamo
Ingkoomo mokamatana manga mia mo-
sukara tee mia monaraka, a,
tee uewaaka parakarana manga incia.
Mia momalute apasarakaaka karona i Ingkoo,
roonamo Ingkoomo motulungina manga ana
maelu.*
- 15 Katukimea o takiona mia mokodosa tee mia
madhaki,
tuntumea o dosana manga incia,
sakawana inda upotibhaakea uka.
- 16 KAWASANA OPU aparinta sa'umurua,
manga lipu inda momatauna Incia
bheamofu minaaka i lipuna.
- 17 E KAWASANA OPU, opea ipeeluna manga mia
motopisaki uperangoia.
Ingkoo bheupekatangka incana manga incia,
tee utaaia o talingamu
- 18 to uewaaka ana maelu tee mia motopisaki
mamudhaakana inda dhaangia o maanusia
mopekaekana manga incia.

11

KAWASANA OPU Tampana Peulusa

11:1-7

- ¹ To kapalana molaguna. Zaburuna Daud.

Iaku kupeulu i KAWASANA OPU;

* **10:14 10:14** *manga ana maelu:* I nuncana oni Ibrani, pogau incia sii amenturu atopake to apogauaka manga mia monaraka, a tee momisikini sababuna inda dhaangia modhambaakana manga incia. **10:17 10:17** Rom. 3:14.

- inda tee fa'edana upogau tee iaku,
"Pasalaamatimea o karomu mboomo manu-
manu mopolakana i gunu.
- ² Roonamo mia madhaki apekangkanamo
panana
tee apasa matana panana
to apana mia momakatena incana i tampa
momalalanda.
- ³ Ande o tuturana ra'eatina atopahancuru,
mia mobanara inda amembali apewau opeo-
pea."
- ⁴ KAWASANA OPU dhaangia i nuncana Baitulla
momangkilo,
kauncuramakana KAWASANA OPU dhaangia
i sorogaa.
- Incia atiliki maanusia
tee amataua sabhara ipewauna manga incia.
- ⁵ KAWASANA OPU auji mia mobanara tee mia
madhaki,
Incia abanci mia mopewauna kasega.
- ⁶ Incia bheapadhaangia balaa to mia madhaki tee
apasapoakea tee waa morore tee walera,
tee ngalu imangauaka siitumo to kahuku-
muna mia madhaki.
- ⁷ Sababuna KAWASANA OPU a'adili,
Incia amaasiaka kabanara.
Mia momakatena incana bheakamata tee
bheamatau Incia.

12

*Do'a Emaniana Tulungi i KAWASANA OPU
12:1-9*

¹ To kapalana molaguna. Mboomo lagu: I walu anguna. Zaburuna Daud.

² E KAWASANA OPU, manga tulungipo,
sababuna indamo dhaangia mia mosaalihi,
manga mia mota'atina tee Ingkoo indamo
dhaangia.

³ Manga incia bhari-bharia aposapopagau-gau,
podho-podho manga incia;
dhelana manga incia apekapuji, maka o
ngangarandana apekatipu.

⁴ Maasangia o KAWASANA OPU adhodho bhari-
bharia bhiwina manga mia momamekona
pogauna
tee dhelana manga mia mosombo.

⁵ Manga incia apogau,
"Ingkami takokuasa tee pogau ibhoasakamami!
Ingkami tatangkaaka bhiwimami!
Inda dhaangia mojoli-jolina ingkami!"

⁶ Firimanina KAWASANA OPU, "Roonamo mia
maidhiidhi atopisaki
tee mia misikini apeenci roonamo anarakaa,
sabutuna sii-sii kuumba kudhawua ka'amani
mboomo ipeeluna manga incia.

⁷ KAWASANA OPU abhoasaka pogau momangkilo
wakutuuna Incia apojanji.
Janjina amatangka mpuu,
mboomo pera asilii motorabuna pitu mpearo
i nuncana waa.

- ⁸ E KAWASANA OPU, Ingkoo bheujagani ingkami
minaaka i manga mia madhaki sii.
Ingkoo ujugani ingkami sadia to sa'umurua.
⁹ Mia madhaki pekawulu-wulu iapai-iapai tee
abarani
roonamo kadhakina aabhia atopuji i tanga-
tangana anana maanusia.

13

*Do'ana Mia Moparacaeana tee Kaasina
Aulata'ala*
13:1-6

- ¹ To kapalana molaguna. Zaburuna Daud.
- ² Sakawana naepia, e KAWASANA OPU?
Sa'umurua buaka Ingkoo umalin-
guakaaku?
Sakawana naepia Ingkoo ubuniaka roumu
minaaka i karoku?
- ³ Sakawana naepia kutanggo kanarakaa i nun-
cana karoku?
Saeoa amaporo incaku.
Sakawana naepia akuasaiaku musuku?
- ⁴ E KAWASANA OPU, Aulata'alaku, kamatea tee
ulawaniakumo.
Pekatangkea o bukuku mamudhaakana inda
kumate!
- ⁵ Bholi utaroakea o musuku apogau,
"Kutalomea!"
Tee o bhaliku akaunde-unde wakutuuna
kusindoli.
- ⁶ Maka kuparacaea o kaasimu molagina,

Incaku akaunde-unde roonamo upasalaama-
tiaku.
Iaku gauku kulagu to KAWASANA OPU
roonamo Incia padhamo apewau kalape tee
iaku!

14

*Kadhakina Maanusia Inda Moparacaeana
Kawasana Opu*

14:1-7

¹ To kapalana molaguna. Zaburuna Daud.

Mia mokabhongo-bhongo apogau i nuncana
ngangarandana,

"Inda dhaangia o Aulata'ala."

Pewauna manga incia amadhaki tee atomarika,
inda dhaangia mopewauna kalape.

² Minaaka i sorogaa KAWASANA OPU atonto
anana maanusia,

to akamata ara dhaangia o mia mo'aarifu,
mopeelona Aulata'ala.

³ Bhari-bharia mia abholi dhala mobanara tee
akarajaa giu momadhaki.

Inda dhaangia mopewauna kalape, moomini
samia uka.

⁴ Firimanina Aulata'ala, "Buaka apesua i akala,
ande bhari-bharia mia mopewauna kad-
haki inda amatau giu momalape?

Manga incia apekaoge karoni tee akande
uumatiku mboomo akande roti,
tee inda ado'a i Iaku."

- ⁵ Iwe sumai manga incia bheamaeka mpuu
roonamo Aulata'ala atulungi uumatina
mobanara.
- ⁶ Ingkomiu bheupekaea haejatina mia
motopisaki,
maka o KAWASANA OPU amembali peulu-
sana manga incia.
- ⁷ Maasangia kasalaamati to miana Israel aumba
minaaka i Sion, kotana Aulata'ala!
Wakutuuna KAWASANA OPU apambuli kad-
haangiana uumatina,
siwuluna Yakub bheamasanaa o namisina
tee o Israel bheakaunde-unde.

15

*Mia Molaengana to Aumba i KAWASANA OPU
15:1-5*

¹ Zaburuna Daud.

- E KAWASANA OPU, incema momembalina mobu-
tuna i Kemamu Momangkilo?
Incema momembalina momboorena i
gunumu momangkilo?
- ² Siitumo mia modhadhina inda tee kasalahana,
mopewauna kalape,
tee mopogauakana mototuuna
tee incia apogau tee mpuu-mpuuna incana.
- ³ Manga incia inda afitanaa tee dhelana,
inda apewau kadhaki i sabhangkana,
tee inda apekadhaki sarena sarimbanuana.
- ⁴ Manga incia inda mohoromatina manga mia
inda itarimana Aulata'ala,

maka ahoromati mia momaekana
KAWASANA OPU,
mota'atina janjina,
moomini amarugi.

⁵ Manga incia apekapaadhaaka doina tee inda
aala laba,
tee inda atarima kasogo to aewangi mia inda
mosala.

Mia mopewauna mboo sumai
bheamasanaa tee a'amani sa'umurua.

16

Kasanaana Mia Mosaalihi

16:1-11

¹ Miktam.* Zaburuna Daud.

E Aulata'ala, jaganiaku
roonamo Ingkoomo peulusaku.

² Iaku kupogau i KAWASANA OPU, "Ingkoomo
Kawasana Opuku,
inda dhaangia momalapena to iaku,
tangkanamo Ingkoo."

³ Mia momangkilo modhaangiana i alamu,
manga inciamo o mia momulia mosadiana
ipeeluku.

⁴ Kanarakaana manga mia mosombana dewa
mosagaanana bheahanda kabharina.

* **16:1 16:1** *Miktam*: Sarona sala saangu zaburu mokoma'anana kabhanti bulawa. Miktam minaaka i oni *kethem* i nuncana pogau Ibrani akoma'ana "bulawa."

Iaku inda bhekulali pasombaana raana ku-
rubanina manga incia,
atawa uka kusarongi saroni manga dewa
mosagaanana i bhiwiku.

⁵ E KAWASANA OPU, tangkanamo Ingkoo o
pusakaku,
Ingkoomo motantuakana dhalana dhadhiku,
Ingkoomo mokenina katooku.

⁶ Ingkoomo modhawuaku manga giu momakesa
satotuuna kadhawumu sumai mopaunde-
undeaku.

⁷ Iaku kupuji KAWASANA OPU, mopadhana
moudhaniakaaku;
i wakutuuna malo baatiniku aadhariaku.

⁸ Iaku sadia kuudhani KAWASANA OPU;
Incia dhaangia i saripiku, rampaakanamo
sumai kumatangka.

⁹ Sababuna sumai, incaku amasanaa tee ngan-
garandaku akaunde-unde,
badaku aponiunto tee ku'amani.

¹⁰ Sababuna Ingkoo inda utaroakaaku kumate,
mia mosaalihi inda utaroakea abinasa.

¹¹ Upaumbaakaaku dhala moporopena i dhadhi
imalapeaka,
i aroamu abhari mpuu kasanaa,
i lima kaanamu dhaangia kasanaa to
sa'umuruu.

17*Atopajere Moomini Inda Asala**17:1-15*¹ Do'ana Daud.

E KAWASANA OPU, maasangia uperangoi
parakara mobanara.

Tilikia o goraku!

Perangoia o do'aku,
molimbana minaaka i bhiwiku mojujuruna
sii.

² Taroakamo kambotuna parakaraku aumba mi-
naaka i Ingkoo,
roonamo matamu akamata kabanara.

³ Ande Ingkoo uuji ngangarandaku,
tee uumba utilikiaku i wakutuuna amalo,
ande uujiaku mboomo mia moujina bulawa,
sumaimo Ingkoo inda bheupotibhaaka kad-
haki i nuncana karoku.

Iaku padhamo kuneati
mamudhaakana inda kubhoasaka manga
pogau mosala, mboomo ipewauna manga
mia mosagaanana.

⁴ Alaloi firimani ipakawaakamu,
iaku padhamo kujagani karoku minaaka i
dhalana manga mia mopewauna kasega.

⁵ Bhengkalaku sadhaadhaa aose dhalamu,
tee o aeku inda asindoli.

⁶ Iaku kugora i Ingkoo
roonamo Ingkoo bheulawaniaku, e
Aulata'ala.
Perangoiaku,

rangoa manga pogauku.

⁷ Susuakaaku o kaasimu molagina inda momentela sumai!

Lima kaanamu* mopasalaamatina manga mia mopeuluna i Ingkoo minaaka i musuna.

⁸ Jaganiaku mboomo opea imaasiakamu, jaganiaku mboomo inana manu-manu mojanina anana i nuncana panina

⁹ minaaka i mia madhaki bhemopabinasaaku, siitumo manga musu molibuaku to mopekamateaku.

¹⁰ Manga incia inda tee kaasina incana, tee abhoasaka pogau mosombo.

¹¹ Sii-sii manga incia aose bhengkalaku to alibuaku, apeelo dhala to arambitakaaku i tana.

¹² Manga incia mboomo singa mopapakina kinandena, mboomo singa mangura mopekantaana i tanpa momalino.

¹³ E KAWASANA OPU, bhangumo.

Poaroakamea tee upekatalomea manga incia!

Pasalaamatiaku tee ewangamu minaaka i manga mia madhaki,

¹⁴ e Kawasana Opu, pasalaamatiaku tee limamu minaaka i manga mia madhaki,

* **17:7 17:7** *lima kaanamu*: Ibaratina kuasana Aulata'ala mopapeuluna tee mopasalaamatina maanusia.

minaaka i manga mia soo mofaduliakana
harataana dunia.
Maka pekambosua manga mia imaasiakamu.
Maasangia manga anana atumpu incana
tee abholi tinaurakana to manga siwuluna.

¹⁵ Roonamo kubanara, iaku bhekutonto roumu,
tee wakutuuna kubhangu, bheatumpu in-
caku roonamo kudhaangiapo i saripimu.

18

Lagu Kasukuruna Daud

18:1-51

¹ To kapalana molaguna. Minaaka i
bhatuana KAWASANA OPU, siitumo o Daud,
mopakawaakana lagu incia sii to KAWASANA
OPU, wakutuuna KAWASANA OPU arambasaka
Daud minaaka i limana Saul tee minaaka i manga
musuna. Incia apogau,

² "Iaku kumaasiakako, e KAWASANA OPU,
kakaaku!

³ KAWASANA OPU mboomo kabumbuna
bhatuku, bente potaangiaku, tee
mopabebasiaku.

Aulata'ala isombaku mboomo gunu bhatu,
tee kupeulu i Incia.

Incia o katangkesiku, mopasalaamatiaku mi-
naaka i musuku, tee o tampana peulusaku
mamudhaakana sadia ku'amani.

⁴ Iaku kugora i KAWASANA OPU molaengana
ipuji,

tee Incia apasalaamatiaku minaaka i manga musuku.

⁵ Manga jari imateaka arimpuaku,
tee akangkanaiaiku uwena mawa maoge mopabinasaaku,

⁶ Rabutana duniana mia mate arimpuaku,
tee manga katapu imateaka atotaa i aroaku.

⁷ I nuncana kasukara iaku kugora i KAWASANA OPU,

tee kupekee kuemani tulungi i Aulata'alaku.
Incia arango suaraku minaaka i Baitullana,
tee o pekeeku i Incia akawa i talingana.

⁸ Sumaimo o alamu akohudha tee akolendu,
manga gunu uka atorende tee akohudha roonamo pamuruna Aulata'ala.

⁹ Ombu alimba minaaka i angona,
waa alimba minaaka i ngangana,
weona waa akarore-rore.

¹⁰ Laiana awetaia, kasiimpo Incia asapo
tee ta'ina ngalu malalanda i tambena aena.

¹¹ Incia asawi i malaa'ekati kerub* kasiimpo
apolaka,

atinti tee asawi i bhawona ngalu.

¹² Incia abuniaka karona tee kalalanda,

* **18:11 18:11** *malaa'ekati kerub:* Malaa'ekati igambaraaka mboomo mahaluku mokopani, agambaraaka kalangana Aulata'ala tee umbaana. Apogauakea ande kauncuramakana KAWASANA OPU dhaangia i bhawona manga malaa'ekati kerub. Dhaangia patuna rua malaa'ekati kerub i bhawona sorongana pojanjia tee i piamo itu Musa atarima firimanina Aulata'ala minaaka iwe sumai. Kamata Limb. 25:18-19.

- tampana mbooresana satotuuna o wao momalalanda tee ta'ina ngalu momakapa i laiana.
- ¹³ Minaaka i cahea i aroana,
waona esi tee weona waa alimbamo minaaka i manga ta'ina ngaluna.
- ¹⁴ KAWASANA OPU apakoguntu i laiana,
tee Aulata'ala Momalanga apaperangoiaka suarana i tanga-tangana waona esi tee weona waa.
- ¹⁵ Incia arambasaka manga panana tee apapogaa-gaa musuna,
bhibhito apokilati sabutuna manga incia apalai amantale.
- ¹⁶ Tambena tawo atokamata roonamo tawo am-atuu,
tee atokamatamo fondasina alamu
roonamo kagorampangimu, e KAWASANA OPU,
tee roonamo poinuncana angomu.
- ¹⁷ KAWASANA OPU apaulu limana minaaka i kalangaana tee apasalaamatiaku,
Incia ahelaaku minaaka i uwena mawa imateaka.
- ¹⁸ Incia apasalaamatiaku minaaka i musuku momakaana
tee minaaka i manga mia mobanciaku,
roonamo musuku amarasai mpuu kutaloa.
- ¹⁹ Manga incia ahumbuniaku i wakutuuna kusukara,
maka KAWASANA OPU motulungiaku,
- ²⁰ Incia apalimbaaku minaaka i kaseke tee ab-hawaaku i tampa momalalesa,

- tee apasalaamatiaku roonamo amaasi-
akaaku.
- 21 KAWASANA OPU amalape tee iaku apokana tee
kabanaraku,
Incia abalasi pewauku, apokana tee kangk-
ilona limaku
- 22 roonamo iaku sadhaadhaa kuta'ati parintana
KAWASANA OPU
tee inda kupewau madhaki i Aulata'alaku.
- 23 Bhari-bharia hukumuna dhaangia i aroaku,
tee iaku inda kupekaridho minaaka i manga
katotapuna.
- 24 Iaku inda kupewau madhaki i incia,
tee kujagani karoku minaaka i kasalaha.
- 25 Sumaimo KAWASANA OPU abalasi pewauku
mobanarana
roonamo kumangkilo i aroana.
- 26 I mia mota'ati, Ingkoo ususuakea kaasimu
molagina
tee i mia momalape, Ingkoo umalape.
- 27 I mia momangkilo, Ingkoo umangkilo,
maka Ingkoo uewangi mia momadhakina
incana.
- 28 Ingkoo mopasalaamatina uumati motopisaki,
maka o mia mosombo upekaeaia.
- 29 Ingkoo mopakatana suluku,
KAWASANA OPU, Aulata'alaku, mosuluwina
kalalandaku.
- 30 Satotuuna roonamo Ingkoo, iaku kumembali
kuewangi gorombola musuku
tee kumembali kukompasi rindina bentena.
- 31 Pewauna Aulata'ala sadia amalape,
tee firimanina KAWASANA OPU atouji.
Incia o katangkesi to bhari-bharia mia

- tee amasanaamo mia mopeuluna i Incia.
- 32 Sababuna tangkanamo KAWASANA OPU o
Aulata'alata,
soomo Aulata'ala peulusata.
- 33 Aulata'ala mopekatangkaaku,
tee aparatea o dhalaku mamudhaakana
ku'amani.
- 34 Incia apekatangka aeku mboomo aena rusa
mamudhaakana kumadhei kubuntuli,
tee ajagani kasalaamatiku i gunu.
- 35 Incia aadhariakaaku carana potimbe,
sabutuna amembali kupaubhe pana tamba-
gaku.
- 36 Ingkoo katangkesiku tee mopasalaamatiaku,
tee kuasamu iaku ku'amani,
tee kalapemu kumembali kumakaa mpuu.
- 37 Ingkoo upekaewa dhala to bhengkalaku,
tee aeku inda asindoli.
- 38 Iaku kupajere manga musuku, tee kurako
manga incia,
Iaku inda bhekumbuli ande manga incia
inda atopepadhai.
- 39 Kupahancurua manga sakawana inda amem-
bali abhangu pendua,
tee kupatobhatea i aroaku.
- 40 Ingkoo udhawuaku kakaa to kupotimbe,
roonamo Ingkoo iaku amembali kutalo
manga musuku.
- 41 Ingkoo upewau manga musuku apalai mi-
naaka i iaku,
manga mia mobanciaku kupabinasea.
- 42 Manga incia apekee aemani tulungi maka inda
dhaangia mopasalaamatia.

- Manga incia apekee i KAWASANA OPU,
maka Incia inda alawani.
- 43 Kupahancurua manga mboomo ngawu ipo-
lakaakana ngalu,
tee kulandakia manga mboomo tomba i
dhala.
- 44 Ingkoo upabebasiaku minaaka i ra'eati modor-
ohaka,
Upamembaliaku mokuasaina manga lipu.
Tee lipu inda imatauku amembali bhatuaku.
- 45 Manga incia arango tee ata'ati parintaku.
Manga mia dhaga uka asomba tee arengku i
aroaku.
- 46 Manga mia dhaga ailamo kabaranina,
tee arengku alimba minaaka i bente potaan-
giana.
- 47 Iaku kumataua ande o KAWASANA OPU ad-
hadhi! Bhari-bharia kapujia to peulusaku!
Muliangia o Aulata'ala, mopasalaamatiaku!
- 48 Aulata'ala motulungiaku kutalo manga
musuku,
tee manga lipu kukuasaia.
- 49 Incia mopasalaamatiaku minaaka i manga
musuku.
Satotuuna, Ingkoomo mopekalingaaku minaaka
i musu moewangiaku
tee upasalaamatiaku minaaka i mia mo-
masega.
- 50 Sababuna sumai, iaku bhekusukuru i Ingkoo,
e KAWASANA OPU, i tanga-tangana manga
lipu,
tee iaku bhekulaguaka kapujia to saromu.

- ⁵¹ Aulata'ala adhawuaka kasalaamati momaoge
to raja ipilina,
tee asusuaka kaasina molagina i mia
ilantina,
siitumo o Daud tee siwuluna to sa'umuruu.

19

Kamuliangina Aulata'ala i Nuncana Ipadhaangiana tee Hukumuna

19:1-15

- ¹ To kapalana molaguna. Zaburuna Daud.
- ² Laiana apetulatulaaka kamuliangina
KAWASANA OPU,
tee laiana apogauaka ikarajaana.
- ³ Saesaeo laiana abhoasaka pogauna,
tee samalo-samalo uka apakoleleaka ilimuu.
- ⁴ Inda tee pogau atawa o bhoasaka,
suarana uka inda atorango.
- ⁵ Maka o lelana atorango i saangua alamu,
tee kasameana sumai akawa i tapana dunia.
- KAWASANA OPU apadhaangia laiana to
mbooresana matanaeo.
- ⁶ Kasiimpo matanaeo abhete i wakutuu saeona,
mboomo panganti umane molimbana mi-
naaka i kolemana,
mboomo samia hiri akaunde-unde wakutuu
apepuungi lingkaana.
- ⁷ Matanaeo abhete minaaka i tapana laiana,
atii akawa i tapa mosagaanana,

inda dhaangia molapana minaaka i kasod-
hona.

⁸ Hukumuna KAWASANA OPU amondo tee inda
tee kakurangana,
apadhadhi inca.

Tuturana KAWASANA OPU atoparacaea,
adhawu hikimati i manga mia inda
mo'aarifu.

⁹ Tuturana KAWASANA OPU sumai abanara,
apasanaa ngangaranda.

Parintana KAWASANA OPU sumai atinda,
amembali kainawa to karota.

¹⁰ Namisi kaeka i KAWASANA OPU sumai
amangkilo,
to sa'umurua.

Tuturana KAWASANA OPU sumai atoparacaea
tee a'adili bhari-bharia.

¹¹ Hukumuna KAWASANA OPU alabhi o kaalina
minaaka i bulawa asilii,
moomini abhari bulawa asilii,
alabhi o kamekona minaaka i golana uwani,
moomini golana uwani asilii minaaka i bhan-
uana uwani.

¹² Bhari-bharia hukumumu sumai audhaniaka
bhatuamu sii;
dhaangia o fahala maoge to mia mota'atina
parintamu.

¹³ Incema buaka momembalina momatauna
kasalahana karona?
Pekangkiloakumo minaaka i manga dosa
motobuniaka.

¹⁴ Jaganiaku mamudhaakana inda kupewau dosa
iporadhamii,

tee bholi utaroakea manga dosa akuasaiaku.
Kasiimpo iaku indamo uka kupewau madhaki,
tee kumangkilo minaaka i kasalaha mo-
maoge.

- ¹⁵ Maasangia o pogauku tee bhokuna ngangaran-
daku utarimaia,
e KAWASANA OPU, peulusaku tee motolosi-
aku.

20

Do'a Emaniana Takana

20:1-10

- ¹ To kapalana lagu. Zaburuna Daud.
- ² Maasangia KAWASANA OPU alawaniko
i wakutuuna kasukara,
maasangia Aulata'ala, isombana Yakub aja-
ganiko!
- ³ Maasangia Incia atulungiko minaaka i tampa
momangkilo,
tee atukoko minaaka i Gunu Sion.
- ⁴ Maasangia Incia audhani bhari-bharia pasom-
baamu,
tee atarima kurubani tunuamu.
- Sela
- ⁵ Maasangia Incia adhawuko opea ipeelumu,
tee apewau bhari-bharia haejatimu ako-
hasili.
- ⁶ Ingkami bhetasambo-sambo roonamo Ingkoo
ukanamo,
tee tapabhale tombi to tapuji
Aulata'alamami.
Maasangia KAWASANA OPU adhawuko
bhari-bharia iemanimu!

- ⁷ Sii-sii iaku kumataua ande o KAWASANA OPU
mopasalaamatina
raja ilantina.
Minaaka i sorogaa momangkilo Incia bhealawani
tee kuasana lima kaanana mopasalaamatina.
- ⁸ Dhaangia o mia motangkaakana manga kareta
potimbeana,
dhaangia uka motangkaakana manga
ajarana,
maka ingkita tatangkaaka sarona
KAWASANA OPU, Aulata'alata.
- ⁹ Manga incia atosunu tee amandawu,
maka ingkita tabhangu takabhale-bhale tee
tamatangka.
- ¹⁰ E KAWASANA OPU, pasalaamatia o raja,
manga lawani i wakutuuna ingkami tagora.

21

Kapujiana to Kamangantalona Raja *21:1-14*

- ¹ To kapalana molaguna. Zaburuna Daud.
- ² E KAWASANA OPU, raja akaunde-unde roonamo
kuasamu
tee amaoge mpuu o undena roonamo
kasalaamati minaaka i Ingkoo!
- ³ Ingkoo udhawua opea ipeeluna,
tee Ingkoo uundapia iemanina.
- Sela
- ⁴ Satotuuna, Ingkoo upepago incia tee barakati
motaralabhi-labhi,

- Ingkoo upasaakea mahakota minaaka i bu-
law aasili i bhaana.
- ⁵ Incia aemani dhadhi i karomu, tee Ingkoo
udhawuakea
umuru marambe to sa'umurua.
- ⁶ Amaoge o kamuliangina roonamo kasalaamati
minaaka i karomu,
kaogesa tee kuasa udhawuakea to incia.
- ⁷ Ingkoo udhawuakea barakati to incia
sa'umurua,
tee upaunde-undea namisina i aroamu.
- ⁸ Raja aparacaea i KAWASANA OPU,
tee roonamo kaasina molagina Aulata'ala
Momalanga, incia inda bheasindoli.
- ⁹ Tee kuasamu bheurako bhari-bharia musumu,
tee kuasamu karomu bheurako manga mia
mobanciko.
- ¹⁰ Ingkoo bheupamembali manga incia mboomo
waa mokarore-rore
wakutuuna upatiumba karomu.
Roonamo tee pamuruna KAWASANA OPU, manga
incia bheatopepadhai,
tee manga incia bheakandea waa.
- ¹¹ Bhari-bharia anana tee opuopuana manga
incia bheupabinasea minaaka i bhawona
alamu,
tee o siwuluna manga incia uka minaaka i
tanga-tangana anana maanusia.
- ¹² Moomini manga incia ahaejati madhaki to
Ingkoo,
tee ahaejati bheatipuko, manga incia inda
bheamembali.

¹³ Ingkoo bheupewau manga incia apalaiaka
karena
wakutuuna uhela matana panamu tee upa-
totoaka rouna manga incia.

¹⁴ E KAWASANA OPU, taroakamo utopekalanga i
nuncana kuasamu!
Ingkami bhetalaguaka lagu kapujia to kaoge-
samu.

22

Aulata'ala, Haakimu Mo'adili

22:1-32

¹ To kapalana molaguna. Mboomo lagu: Rusa i
wakutuuna raneeo. Zaburuna Daud.

² E Aulata'alaku, e Aulata'alaku, pokia ubholiaku?
Pokia upekaridho, inda utulungiaku
tee inda uperangoi goraku?

³ E Aulata'alaku, i wakutuuna eo iaku kudo'a,
maka Ingkoo inda ulawani,
tee malo uka iaku kudo'a,
maka o ngangarandaku inda uka awesa.

⁴ Garaaka Ingkoo Momangkilona,
Ingkoo ukokauncuramaka i bhawona manga
kapujiana miana Israel.

⁵ Opu-opuamami aparacaeako.
Manga incia aparacaea, to upasalaamatia.

⁶ Manga incia agora i Ingkoo, kasiimpo upasalaa-
matia;

manga incia aparacaeako, tee inda up-
ekaeaia.

⁷ Maka iaku sii mboomo ulo-ulo, mencuanamo
mboomo maanusia.

Manga maanusia ahinaaku tee mia abhari
abanciaku.

⁸ Bhari-bharia mia mokamataaku aele-eleaku.

Manga incia angiripiaku, tee alengko-
lengkoakaaku bhaana,

⁹ "Incia atangkaaka KAWASANA OPU

sumaimo taroakamo Incia mopabebasia!

Taroakamo KAWASANA OPU mopasalaamatia

roonamo KAWASANA OPU amaasiakea."

¹⁰ Maka Ingkoomo mopalimbaaku minaaka i
nuncana kadhuma,

tee ujuganiaku i sangoana inaku.

¹¹ Mancuanaku apasarakaakaaku to Ingkoo
pepuu minaaka i nuncana kompona.

Apepuu minaaka i nuncana kadhumana in-
aku, Ingkoomo Aulata'alaku.

¹² Bholi upekaridho, roonamo o balaa amaka-
sumo

tee inda dhaangia motulungiaku.

¹³ Abhari o sapi umane molibutiaku,

tee gulumana karambau umane minaaka i
Basan alibuaku.

¹⁴ Manga binata sumai abungkale ngangana
pekaewa i aroaku,

mboomo singa mopapakina kinandena tee
akomburu.

- 15 Kakaaku mboomo uwe motolali,
bhari-bharia bukuku atorambasaka
minaaka i losuaku.
Ateku mboomo taru,
arere i nuncana badaku.
- 16 Mbalo-mbalona bhorokoku amatuu mboomo
kapasana balanga,
tee o dhelaku apika i ngaraku.
Ingkoo upewauaku mboomo mia mate.
- 17 Manga mantoa alibutiaku,
tee gulumana mia madhaki alibuaku.
Manga incia asula limaku tee aeku.
- 18 Bhari-bharia bukuku amembali kugagaria,
manga incia atontoaku tee akamaka-
mataaku.
- 19 Manga incia apodhawu-dhawuakea o pakeaku
sumai,
tee a'undia.
- 20 Maka Ingkoo e KAWASANA OPU bholi
umaridho minaaka i karoku!
Ingkoomo mopekatangkana bukuku, um-
bamo madhei utulungiaku!
- 21 Rambasakea o inyawaku minaaka i ewanga,
tee upasalaamatiaku minaaka i mantoa
mopapakiaku.
- 22 Rambasakaaku minaaka i ngangana singa
tee minaaka i tanduna karambau.
Ingkoo padhamo upasalaamatiaku.
- 23 Iaku bhakupetulatulaaka saromu i manga witi-
naiku,

- tee i tanga-tangana jama'a bhekupuji-pujiko.
- 24 Pujimo Incia, e manga mia momaekana i
KAWASANA OPU!
E bhari-bharia siwuluna Yakub, muliangua o
KAWASANA OPU!
E bhari-bharia siwuluna Israel, sujumo i
Incia!
- 25 Sababuna Incia inda apanda'ente tee ahina o
mia motopisaki,
tee inda abuniaka rouna minaaka i mia incia
sumai,
maka aperangoi o mia motopisaki sumai
wakutuuna agora aemani tulungi i Incia.
- 26 Roonamo Ingkoo, iaku kupuji-pujiko
i tanga-tangana jama'a mobhari sumai,
tee iaku bhekupomea tolauna oniku
i aroana manga mia momaekana tee Ingkoo.
- 27 Iaku bhekukemba manga mia misikini ma-
mudhaakana akande sakawana amam-
bosu;
mia mopeelona KAWASANA OPU bheapujia;
taroakamo manga incia bhari-bharia ama-
rambe o umuruna!
- 28 Bhari-bharia lipu i dunia bheaudhanian tee
ambuli apuji kaogesana KAWASANA OPU.
Bhari-bharia siwulu minaaka i manga lipu
bheasuju tee asomba i aroana
- 29 roonamo tangkanamo KAWASANA OPU
mokopamarintana,
Incia moparintana i bhari-bharia lipu.
- 30 Bhari-bharia mia morangkaea i dunia sii
bheasomba tee asuju i Incia.

Bhari-bharia maanusia mofanaa
bheasuju i aroana.

³¹ Manga opu-opuana naile itu bheasomba i Incia
tee apetulatulaaka KAWASANA OPU i siwu-
luna bhemoumbana naile itu.

³² Manga incia bheaumba tee apetulatulaaka ka-
banara
i lipu tee siwulu bhemoumbana naile itu
ande o KAWASANA OPU a'adili tee uumatina.
Totuumo, Incia padhamo apewau mboo sumai.

23

KAWASANA OPU o Gembalaku Momalape

23:1-6

¹ Zaburuna Daud.

KAWASANA OPU o gembalaku, iaku inda
bhekukakuranga.

² Incia ataroakaaku kuponiunto i tana moko-
rumpu;

Incia abhawaaku i bhiwina uwe momalino.

³ Incia apektangkaaku,
tee atondaaku i dhala mobanara
rampaakanamo sifatuna mboomo gembala
momalape.

⁴ Moomini kudhala i nuncana mbolonga moma-
lalanda mpuu,

iaku inda kumaeka balaa roonamo Ingkoo
dhaangia i saripiku;

Ingkoo ujuganiaku

mboomo gembala mojananina dumbana,
tee katuko ibhawamu, kunamisi kutohiburu.

- ⁵ Ingkoo upasiapuakaaku kinande
i aroana manga bhaliku.
I bhaaku ujampuakea tee mina-mina mawondu;
tondeku uantokiakea tee giu isumpu
motaralabhi-labhi.
- ⁶ Kalape tee kaasi molagina bheaoseaku
sa'umurua dhadhiku,
tee iaku bhekumboore i nuncana Bhanuamu
sa'umurua.

24

Umbaana Raja Momulia i Nuncana Baitulla

24:1-10

- ¹ Zaburuna Daud.
KAWASANA OPU mokopewauaakana alamu tee
bhari-bharia antona,
dunia tee bhari-bharia momboorena i nuncana.
- ² Incia modhikana kalempesina alamu i bhawona
tawo,
tee apakaroa i bhawona manga umala.
- ³ Incema momembalina mopenena i gununa
KAWASANA OPU?
Tee incema momembalina moubana i
aroana tanpa momangkilona?
- ⁴ Mia momangkilona limana tee momalapena
incana,
incia inda ado'a i manga barahala,
tee inda aposumpa gau-gau.
- ⁵ Incia bheapotibhaaka barakati minaaka i
KAWASANA OPU,

tee Aulata'ala mopasalaamatia bheapa-
banarea.

⁶ Siimo manga mia mopeelona Aulata'ala,
aumba to asomba Ingkoo, Aulata'alana
Yakub.

Sela

⁷ Pobungkalemo pekaewa, e manga bhambana
lawalawa!
Toangkamo, e manga bhamba mo-
topakaronana minaaka i piamo itu,
mamudhaakana Raja Momulia apesua!

⁸ Incema o Raja Momulia sumai?
KAWASANA OPU, momakaana tee mohe-
bana!
KAWASANA OPU, mohebana i nuncana po-
timbea!

⁹ Pobungkalemo pekaewa, e manga bhambana
lawalawa!
Toangkamo, e manga bhamba mo-
topakaronana minaaka i piamo itu,
mamudhaakana Raja Momulia apesua!

¹⁰ "Incema buaka Raja momulia sumai?"
KAWASANA OPUNA saangua alamu,
Incia Raja Momulia!

Sela

25

Do'a Emaniana Amponi tee Peulusa

25:1-22

¹ Zaburuna Daud.

E KAWASANA OPU, i Ingkoomo kudo'a!

² E Aulata'alaku, i Ingkoomo kuparacaea,

maasangia inda kupotibhaaka kaea,
tee bholi utaroakea manga musuku
apotawaikiaku.

³ Bhari-bharia mia moharapuna i Ingkoo inda
bheanamisi kaea,
maka manga mia mohianatia inda tee
sababuna bheanamisi kaea.

⁴ E KAWASANA OPU, paumbaakaaku manga dha-
lamu,
adhariaakaaku manga parintamu.

⁵ Bhawaaku kulingka i nuncana kabanaramu tee
uadhariaku,
roonamo Ingkoomo Aulata'ala mopasalaa-
matiaku,
iaku kuantaaantagiko saeo.

⁶ E KAWASANA OPU, udhania rahumatimu tee
kaasimu molagina
roonamo bhari-bharia sumai adhaangiamo
minaaka i zamani mangenge.

⁷ Dosa-dosa wakutuuna amangura dhadhiku,
tee manga kasalaha ipewauku bholimo uud-
hania,
tabeana udhaniaku apokana tee kaasimu molag-
ina
roonamo kalapena incamu, e KAWASANA
OPU.

⁸ KAWASANA OPU sumai amalape tee amakate
totona incana,
sababuna Incia asusuaka dhala to manga
mia mokodosa.

⁹ KAWASANA OPU akapalai mia inda mosombo i
dhala mobanara,

- tee manga incia aadhariakea tee opea
ipeeluna.
- 10 Bhari-bharia dhalana KAWASANA OPU
abukeaka tee kaasi molagina tee amembali
atoparacaea
to mia mopengkenina i pojanjiana tee manga
kaudhaniana.
- 11 E KAWASANA OPU, roonamo saromu
amponia o kasalahaku moomini amaoge o
kasalahaku sumai.
- 12 Incema mia momaekana i KAWASANA OPU?
KAWASANA OPU bheasusuakea dhala to id-
halikina.
- 13 Manga incia bheasadhaadhaa adhadhi
amasanaa,
tee manga siwuluna mokotinaurakaakana
alamu.
- 14 KAWASANA OPU aposabhangka tee manga mia
momaekaia,
tee asusuaka o antona pojanjiana to manga
incia.
- 15 Matakusadhaadhaa atonto KAWASANA OPU,
roonamo Incia bheapasalaamatiaku
minaaka i balaa.
- 16 Tontoaku, tee umaasiakaaku,
roonamo kumalino tee kutopisaki.
- 17 Pekalalesaia o ngangarandaku sii minaaka i
kasukara,
rambasakaaku minaaka i kanarakaaku.
- 18 Tilikia kanarakaaku tee kasukaraku,
tee amponia bhari-bharia dhosaku.
- 19 Kamatea, tapanamo kabhari o musuku,
tee manga incia abanciaku mpuu.
- 20 Jagania inyawaku tee pasalaamatiaku,

bholi utaroakaaku kupotibhaaka kaea roon-amo Ingkoo peulusaku.

²¹ Maasangia o kakatena totona incamu tee kaju-jurumu ajaganiaku, sababuna kuharapu i Ingkoo.

²² E Aulata'ala, tolosia manga miana Israel mi-naaka i bhari-bharia kasukarana!

26

Do'ana Aemani Apabanarea KAWASANA OPU
26:1-12

¹ Zaburuna Daud.

E KAWASANA OPU, ewaakaaku roonamo kudhadhi i nuncana kakatena to-tona incaku.

Iaku kuparacaea i KAWASANA OPU tee inda kusindoli.

² Parakisaaku, e KAWASANA OPU, tee ucobaaku, ujimea o baatiniku tee ngangarandaku.

³ Satotuuna, kaasimu molagina dhaangia i aroaku, tee kudhadhi i nuncana kabanaramu.

⁴ Iaku inda kuuncura tee mia pande gau-gau, atawa kuposabhangka tee mia munaafiki.

⁵ Iaku kubanci poromusakaana mia mopewauna kadhaki, tee kumendeu kuuncura tee mia mokodosa.

⁶ Iaku kubhanui limaku to tandana inda kusala, kasiimpo kubulilingi tampana tunuana kuru-rubanimu, e KAWASANA OPU,

⁷ to kulaguaka manga kabhanti kasukuru to Aulata'ala tee suara makaa,

- tee kupetulatulaaka bhari-bharia pewaumu
inda momentela.
- ⁸ E KAWASANA OPU, iaku kumaasiakea o bhanua
mbooresamu,
tampana kamuliangimu amboore.
- ⁹ Bholi uala inyawaku mboomo uala inyawana
manga mia mokodosa,
tee bholi uala dhadhiku mboomo uala dhad-
hina pande pekamatena mia.
- ¹⁰ I nuncana limana dhaangia tee haejati mad-
haki,
tee i lima kaanana atarima doina kasogo.
- ¹¹ Maka iaku bhekudhadhi tee kakatena totona
incaku.
Pasalaamatiaku tee umaasiakaaku.
- ¹² Sii-sii ku'amanimo minaaka i bhari-bharia
balaa,
sumaimo iaku bhekupuji KAWASANA OPU i
nuncana poromusakaana uumatina.

27

*Amani i Nuncana Peulusana KAWASANA OPU
27:1-14*

¹ Zaburuna Daud.

KAWASANA OPU o kainawa tee kasalaamatiku,
tee incema buaka iaku bhekumaeka?
KAWASANA OPU o bentena dhadiku,
tee incema buaka iaku bhekurengku?

² Wakutuuna manga parampo aumba alibuaku
to akande dagiku,
siitumo bhari-bharia bhaliku tee musuku,

manga inciamo mosindolina tee moman-
dawuna.

³ Moomini alibuaku rombongana suludadu mob-
hari,
i nuncana ngangarandaku inda kumaeka.
Moomini dhaangia tee potimbea to moewan-
giaku,
iaku sadhaadhaa kuparacaea.

⁴ Tangkanamo saangu iemaniku i KAWASANA
OPU,
siitumo ipeeluku,
mamudhaakana kumboore i nuncana Bhanuana
KAWASANA OPU
sa'umurua dhadhiku,
to kukamataaka kalapena KAWASANA OPU
tee kupengkaabha-abha i nuncana Bhanu-
ana Momangkilo.

⁵ Sababuna i wakutuuna kasukara,
KAWASANA OPU bheajaganiaku i tampana
peulusana.
Incia bheabuniakaaku i nuncana Kemana Mo-
mangkilo,
tee Incia bheaangkaaku i tampa mo'amani,
siitumo i bhawona gunu bhatu.

⁶ Sumaimo, bhaaku indamo atungku
i aroana manga musu molibuaku,
tee i nuncana Kemana Momangkilo
iaku bhekupasombaaka kurubani isumbele
tee kusambo-sambo;
iaku bhekulaguaka lagu kapujia to
KAWASANA OPU.

- 7 E KAWASANA OPU, maasangia urangoa o
suaraku wakutuuna kugora,
maasiakaaku tee ulawaniaku!
- 8 Totona incaku aose firimanimu, "Maimo umba
u'ibaadati i Iaku."
Sumaimo, kulausakamo kuumba to
ku'ibaadati, e KAWASANA OPU.
- 9 Bholi ubuniaka karomu wakutuuna ku'ibaadati
i Ingkoo.
Bholi inda umaheruakea o bhatuamu sii i
nuncana pamurumu.
- Ingkoomo moagoaku,
bholi umendeuaku atawa ubholiaku,
e Aulata'ala, mopasalaamatiaku!
- 10 Moomini amaku tee inaku abholiaku,
KAWASANA OPU bheapepagoaku mboomo
anana karon.
- 11 E KAWASANA OPU, adhariaakaaku opea
ipeelumu,
tee ususuakaaku dhala momakate,
roonamo bhaliku tee musuku.
- 12 Bholi upasaraakaaku i nawusuuna bhaliku,
roonamo manga sakusii gau-gau akakaromo
aewangiaku,
siitumo manga mia modhadhina tee fe'eli
madhaki.
- 13 Iaku sadhaadhaa kuparacaea ande iaku
bhekukamata kalapena KAWASANA OPU,
i lipuna manga mia modhadhi.
- 14 Antagimo KAWASANA OPU!
Pekakaaia tee upekatangkea o incamu!
Umbe, antagimo KAWASANA OPU!

28

KAWASANA OPU o Peulusaku

28:1-9

¹ Zaburuna Daud.

E KAWASANA OPU, gununa bhatuku, i Ingkoomo
kugora!

Bholi utaroakaaku,
roonamo ande Ingkoo inda umaheruakaaku,
iaku mboomo mia mosapona i nuncana liana
koburu.

² Perangoia iemaniku
wakutuuna kupekee kuemani tulungi i In-
gkoo,
wakutuuna kuangka limaku tee kudo'a
kupoaro i tampamu momangkilo mpuu.

³ Ande uhukumuaku bholi upapobhawa-
bhawaaku tee mia madhaki,
tee bholi upapobhawa-bhawaaku tee manga
mia mopewauna madhaki,
mopogauna amalape i manga sabhangkana,
maka i nuncana ngangarandana abukeaka
kadhaki.

⁴ Hukumua manga incia apokana mboomo pe-
wauna manga incia,
apokana mboomo fe'elina manga momad-
hakina.

Hukumua manga incia mboomo opea ipewauna
limana,
pambuliakea to manga incia opea mopad-
hana ipewauna.

⁵ Roonamo manga incia inda afaduliakea o opea
 ikarajaana KAWASANA OPU,
 tee uka manga hali maoge mopadhana
 ipewauna.

KAWASANA OPU bheapatobhata manga incia tee
 inda apabhangua pendua.

⁶ Atopujimo KAWASANA OPU
 roonamo Incia padhamo aperangoi o opea
 iemaniku.

⁷ KAWASANA OPU o kakaaku tee katangkesiku,
 totona incaku aparacaea i Incia, tee atulun-
 giaku.

Incaku akaunde-unde,
 tee laguku kusukuru i Incia.

⁸ KAWASANA OPU satotuuna o kakaana
 uumatina,

Incia o bente kasalaamatina to mia ilantina.

⁹ Pasalaamatia o uumatimu,
 barakatia pewauamu karomu.

Umembalimo gembalana, tee ubhawe
 sa'umurua.

29

*Kaogesana KAWASANA OPU i Nuncana
 Garura**

29:1-11

¹ Zaburuna Daud.

Pujimo KAWASANA OPU, e manga mahalukuna
 sorogaa,

* 29: 29:1 *Garura*: Ngalu makaa mpuu. 29:1 29:1 Zab. 96:7-9.

- pujimo kaogesana tee kuasana.
- ² Pujimo sarena KAWASANA OPU momulia
tee usombaia upake pakea momangkilo.
- ³ Wakutuuna KAWASANA OPU apogau,
suarana Aulata'ala Momulia atorango
angkolele
mboomo guntu i tangana andala.
- ⁴ Suarana KAWASANA OPU amakaa mpuu,
Suarana KAWASANA OPU abukeaka kuasa.
- ⁵ Wakutuuna KAWASANA OPU apogau, amembali
akatuki manga puuna aras,
tee uka amembali apatobhata manga puuna
aras motuwuna i Libanon.
- ⁶ Incia apewau Gunu Libanon apektiba-tiba
mboomo anana sapi,
tee Gunu Siryon mboomo anana karambau.
- ⁷ Suarana KAWASANA OPU apewau bherese
apokilati.
- ⁸ Suarana KAWASANA OPU apamembali tana
matuu atorende,
KAWASANA OPU apamembali Tana Matuu
Kades atorende.
- ⁹ Suarana KAWASANA OPU amembali apakoana
rusa bhawine mobhawa-bhawa,
tee apamembali manga koo amembali am-
atuu.
- I nuncana Bhanuana Momangkilona
bhari-bharia uumati agora "Muliangimo
KAWASANA OPU!"
- ¹⁰ KAWASANA OPU akokuasa i bhawona mawa,
KAWASANA OPU o raja mokokuasa to
sa'umurua.

- ¹¹ Maasangia KAWASANA OPU adhawu kakaa to uumatina,
tee abarakatiakea kasanaa tee ka'amani to uumatina.

30

Do'a Sukuru roonamo Asalaamati minaaka i Balaa

30:1-13

- ¹ Zaburuna Daud to alaguaka wakutuuna lipuna Israel alimbaisi Bhanua Mangkilo.

- ² Iaku kupujiko, e KAWASANA OPU,
sababuna Ingkoo padhamo upasalaamatiaku
tee inda utaroaka musuku asamboakaaku.

- ³ E KAWASANA OPU, e Aulata'alaku, iaku kugora
i Ingkoo kuemani tulungi
tee Ingkoo mopauntona kapiiku.

- ⁴ E KAWASANA OPU Ingkoo padhamo uangkaaku
minaaka i alamuna koburu,
Ingkoo padhamo upotaangiaka dhadhiku
sabutuna iaku inda kusapo i liana koburu.

- ⁵ E manga mia mosaalihi, laguakamea manga
lagu kapujia to KAWASANA OPU,
bhoasakamea o kasukuru to saronu mo-
mangkilona.

- ⁶ Satotuuna o amarana sabantarama,
maka o kalapena sa'umurua.
Moomini tatangi samaloa,
maka i wakutuuna saeona bhetakaunde-
undemo.

- ⁷ Roonamo kumasanaa, kupogau,

"Dhadhiku bhea'amani torosu!"

⁸ E KAWASANA OPU, roonamo kalapena incamu,
Upamembaliaku mboomo gunu
momatangka.

Maka wakutuuna ubuniaka roumu,
iaku kumaeka.

⁹ I Ingkoo iaku kugora, e KAWASANA OPU,
tee i Aulata'ala kuemani kaasi,

¹⁰ "Opea o fa'edana to Ingkoo ande amabhotu
inyawaku
tee kupesua i nuncana koburu?

Amembali buaka o ngawu asukuru i Ingkoo
tee apakoleleaka ande Ingkoo umembali
utoparacaea?

¹¹ E KAWASANA OPU, maasangia urangoa tee
umaasiakaaku.
E KAWASANA OPU, tulungiaku!"

¹² Tangiku ubhaliia amembali manari kaunde-
unde,
kae kadhu tandana kaporona incaku ualea,
tee o tangaku ubhokeakea tee kasanaa.

¹³ Sabutuna kumembali kulaguaka lagu kapujia
to Ingkoo
tee inda soo kukatongo-tongo.

E KAWASANA OPU, e Aulata'alaku, iaku gauku
kusukuru i Ingkoo
to sa'umurua.

31

Amani i Nuncana Limana Aulata'ala
31:1-25

¹ To kapalana molaguna. Zaburuna Daud.

- ² E KAWASANA OPU, Ingkoomo peulusaku,
bholi utaroakaaku kutopekaea.
Pasalaamatiaku roonamo ka'adilimu.
- ³ Perangoiaku,
tee rambasakaaku pekadhei!
Umembalimo gunu bhatu to tampana peulusaku,
mboomo bentena potaangia mopasalaamati-
aku.
- ⁴ Satotuuna, Ingkoomo gunu bhatuku tee bentena
potaangiaku.
Rampaakanamo saromu, kapalaikiaku tee
utondaaku.
- ⁵ Rambasakaaku minaaka i katapu
itaana musu to arakoaka iaku
roonamo Ingkoomo peulusaku.
- ⁶ I nuncana limamu kupasaraakaaka inyawaku.
Ingkoo padhamo upasalaamatiaku
e KAWASANA OPU, Aulata'ala
momembalina motoparacaea.
- ⁷ Iaku kubanci manga mia mosombana barahala
mosia-sia;
maka iaku samia kuparacaea i KAWASANA
OPU.
- ⁸ Iaku bhekusambo-sambo tee kukaunde-unde
roonamo kaasimu molagina,
sababuna Ingkoo ukamata kanarakaaku
tee umatau kasukaraku.
- ⁹ Ingkoo inda upasaraakaaku i limana musu,
maka Ingkoo upakakaro aeku i tampa moma-
lalesa.
- ¹⁰ E KAWASANA OPU, maasiakaakupo

roonamo iaku i nuncana kasukara,
mataku amandala roonamo kutangi,
badaku tee inyawaku anarakaa.

¹¹ Dhadhiku atopadha i nuncana kaporona inca,
umuruku atopadha roonamo kupeenci;
kakaaku aila roonamo kasalahaku,
tee manga bukuku amapuromo.

¹² I aroana bhari-bharia bhaliku, iaku kumembali
giu ipotawaakana manga incia,
tee uka manga sarimbanuaku.

Iaku kumembali giu imingkiriaka to manga sam-
pomatauku,
tee manga mia mokamataaku i dhala apala-
iakaaku.

¹³ Iaku kutomalinguaka mboomo mia mate,
iaku kumembali mboomo bara momapasa.

¹⁴ Iaku kurango mia abhari apokamuntuiakaku,
kamingkiri* adhaangia i bhari-bharia rope!
Manga incia apomufakati to abhaliaku,
tee ahaejati to apekamateaku.

¹⁵ Maka iaku kuparacaeako, e KAWASANA OPU,
sababuna iaku kupogau, "Ingkoomo
Aulata'ala isombaku!"

¹⁶ Dhadhiku dhaangia i nuncana limamu,
rambasakaaku minaaka i limana manga
musuku
tee minaaka i manga mia mopajereaku.

¹⁷ Taroakamo o caheana roumu akangkanai bhat-
uamu sii,

* **31:14 31:14** *kamingkiri:* Kadhaangiana mia monamisina
karona amaeka mpuu tee ameri.

tee upasalaamatiaku roonamo kaasimu molagina.

- 18 E KAWASANA OPU, bholi utaroakea manga musuku apekaeaaku roonamo iaku kugora i Ingkoo.

Taroakamo manga mia madhaki apotibhaaka kaea,
tee taroakamo manga incia asapo i duniana mia mate tee inda tee uu'uuna.

- 19 Soncongia o muncuna manga pande gau-gau, mohinana tee momangkatuna mia mobanara;
manga incia asombo tee apekahina.

- 20 Tapanamo kabhari o kalapemu mopadhana ipasiapuakamu to manga mia momaekako,
tee ipewaumu to manga mia mopeuluna i Ingkoo,
i aroana maanusia!

- 21 Ingkoo ubuniaka manga incia i nuncana peulusana kuasamu
minaaka i mia mosahimuakana manga incia.
Ingkoo ujugani manga incia i nuncana mbooresamu
minaaka i manga mia moraeakana manga incia.

- 22 Atopujimo KAWASANA OPU
roonamo inda amentela mpuu kaasina molagina mopadhana isusuakana to iaku wakutuuna kumaseke mboomo kota motolibu.

- 23 Roonamo kubingu, kusarongia,
"Kutopadhencumo minaaka i aroamu."

Maka satotuuna Ingkoo urangoa iemaniku
wakutuuna kugora kuemani tulungi i In-
gkoo.

- ²⁴ Maasiakea o KAWASANA OPU,
e bhari-bharia mia mosaalihi!
KAWASANA OPU ajagani mia mota'ati
maka Incia ahukumu totuu-totuu o mia mo-
sombo.
- ²⁵ Pekakaaia tee upekatangkea o incamu,
e bhari-bharia mia moharapuna i
KAWASANA OPU!

32

Kasanaana Mia Moto'amponina Dosana

32:1-11

¹ Zaburuna Daud. Laguna kaadhari.

Amasanaamo o mia moto'amponina kasalahana,
tee o mia motoma'afuakana dosana.

² Amasanaamo o mia
mopewauna kasalaha, maka inda alentua o
KAWASANA OPU,
tee inda amakidha apekagau.

³ Kangengena indapo ku'akui dosaku,
buku-bukuku amalute roonamo kupeenci
saeoa.

⁴ Malo eona Ingkoo upekatamo kahukumuku.
Kakaaku atopadha mboomo kamba-kamba
momalau roonamo ahangkanaia kasod-
hona matanaeo.

Sela

⁵ Kasiimpo ku'akuia o dosaku i Ingkoo
tee inda kubuniakea o kasalahaku.
Kupogau, "Iaku bheku'akuia manga kasalahaku i
KAWASANA OPU,"
tee Ingkoo u'amponi manga kasalahana
dosaku.

Sela

⁶ Sababuna sumai bhari-bharia mia mosaalihi
tabeana ado'a i Ingkoo
wakutuuna Ingkoo dhaangiapo umembali
utopokawaaka.

Sumaimo wakutuuna uwena mawa maoge
akawa,
uwena mawa sumai inda amembali apabi-
nasa incia.

⁷ Ingkoomo peulusaku,
Ingkoo mojaganiaku minaaka i kasukara,
Ingkoo modhikana lagu i nuncana ngan-
garandaku, roonamo padhamo upasalaa-
matiaku.

Sela

⁸ Iaku bhekuadhariko tee kususukakako
dhala molaengana idhalaikimu.

Iaku bhekuudhaniakako,
tee kujaganiko mamudhaakana sadhaadhaa
u'amani.

⁹ Bholi mboomo ajara atawa o siwuluna keledai
inda tee akalana,
tabeana atohelaaka tee kabhokena bhorokona
tee rabutana,
ande inda mboo sumai, manga incia inda
bheaoseko.

- ¹⁰ Abhari o kanarakaa inamisina mia madhaki,
maka o mia moparacaeana i KAWASANA
OPU
ajaganiakea tee kaasina molagina.
- ¹¹ E manga mia mobanara,
masanaamo tee ukaunde-undemo roonamo
KAWASANA OPU!
Sambo-sambomo, e bhari-bharia mia mo-
makatena incana!

33

*Manga Kapujia to KAWASANA OPU Isombana
Miana Israel
33:1-22*

- ¹ Sambo-sambomo rampaakanamo KAWASANA
OPU, e manga mia mobanara!
Alaengamo mia momakatena incana apuji
KAWASANA OPU.
- ² Emanimo sukuru i KAWASANA OPU tee uma-
gasiaaka kecapi!
Laguakea o lagu kapujia to Incia tee umagasi-
aakea gambusu sapulu taliana.
- ³ Laguakea to Incia saangu lagu bhaau!
Tikia pekalape o gambusumu, tee usambo-
sambomo!
- ⁴ Firimanina KAWASANA OPU sumai abanara,
tee bhari-bharia ikarajaana abukutiiakea
ande Incia amembali atoparacaea.
- ⁵ Incia amaasiaka kabanara tee ka'adili,
saangua alamu abukeaka kaasina molagina.

- 6 Minaaka i firimanina KAWASANA OPU o laiana apamembalia,
tee minaaka i poinuncana, bhari-bharia giu i laiana apadhaangiaia.
- 7 Incia arombusaka uwena tawo mboomo arombusaka uwe i nuncana gusi,
tee mboomo andalaoge adhikaia i nuncana bendunga.
- 8 Taroakamo saangua alamu amaeka i KAWASANA OPU,
tee taroakamo bhari-bharia mia i nuncana dunia atungku i Incia.
- 9 Roonamo Incia afirimani sabutuna bhari-bharia amembali;
ande Incia adhawu parinta sabutuna bhari-bharia adhaangia tee amatangka.
- 10 KAWASANA OPU apabatala opea ifikirina manga lipu,
tee apanainda opea ihaejatiakana manga incia.
- 11 Maka o haejatina KAWASANA OPU sadhaadhaa sa'umurua,
tee o isikadina amatangka sa'umurua zaman.
- 12 Amasanaamo mpuu o lipu mosombana KAWASANA OPU apamembalia Aulata'alana,
amasanaamo mpuu uumati ipilina to mopotibhaakana tinaurakana.
- 13 KAWASANA OPU apentiro minaaka i sorogaa,
tee akamata bhari-bharia maanusia.
- 14 Minaaka i kauncuramakana, Incia atiliki bhari-bharia momboorena i dunia.

- 15 KAWASANA OPU mopebhanguina incana
bhari-bharia maanusia,
KAWASANA OPU mokamatana bhari-bharia
ipewauna manga incia.
- 16 Samia raja inda atopasalaamati minaaka i
kabharina suludaduna,
samia tantara mobarani inda bheasalaamati
minaaka i kakaana.
- 17 Ajarana potimbea inda amembali
atotangkaaka to kasalaamati,
Moomini amakaa mpuu, o ajara inda amem-
bali manga pasalaamati.
- 18 Satotuuna, KAWASANA OPU afaduliaka manga
mia momaekaia,
tee moharapuakana kaasina molagina
- 19 to mopasalaamatina manga incia minaaka i
mate,
tee apakande manga incia i wakutuuna um-
baana balaana kaara.
- 20 Incamami aharapuaka katulungina
KAWASANA OPU,
Incia motulungina ingkita tee Incia amem-
bali katangkesita.
- 21 Roonamo Incia o incata akaunde-unde,
rampaakanamo ingkita taparacaea i saronu
momangkilona.
- 22 E KAWASANA OPU, taroakamo kaasimu molag-
ina sadhaadhaa to ingkami
apokana tee opea mopadhana iharapumami
i Ingkoo.

34

I nuncana Kajaganina KAWASANA OPU

34:1-23

¹ Zaburuna Daud, wakutuuna incia apara-para amagila i aroana Abimelekh, sabutuna incia atopadhencu, kasiimpo alingka.

² Iaku bhekupuji KAWASANA OPU sadia,
tee inda kuunto-unto kupuji Incia.

³ Iaku kubangga roonamo opea ipewauna
KAWASANA OPU,
maasangia manga mia motopisaki arangoa
tee akaunde-unde.

⁴ Maimo tapobhawa-bhawa tamuliangi sarona
KAWASANA OPU,
tee maimo tapobhawa-bhawaaka
tapekalanga sarona!

⁵ Iaku kudo'a i KAWASANA OPU, tee Incia alawa-
niaku,
tee arambasakaaku minaaka i bhari-bharia
kaekaku.

⁶ Mia motontona Incia bheakocahea o rouna,
tee inda bheamaea.

⁷ Mia motopisaki sii agora, tee o KAWASANA OPU
aperangoia
tee apasalaamatia minaaka i bhari-bharia
balaa.

⁸ Malaa'ekatina KAWASANA OPU abulilingi tee
ajagani mia momaekaia,
tee arambasaka manga incia minaaka i ka-
sukara.

- 9 Namisimea tee ukamatamea tapanamo
kalapena o KAWASANA OPU sumai!
Amasanaamo o mia mopeuluna i Incia.
- 10 Maekamo i KAWASANA OPU, e ingkomiu
manga uumatina momangkilo,
roonamo inda bheadhaangia ikakuran-
gaakana manga mia momaekana i Incia.
- 11 Manga singa momangura amalute tee amaara,
maka manga mia mopeelona KAWASANA
OPU inda bheakakurangaaka manga giu
momalape.
- 12 Maimo e manga anaana, perangoiaku!
Iaku bhekuadhariakakomiu umaeka i
KAWASANA OPU.
- 13 Incema mopeeluna dhadhi masanaa,
tee mopeeluna umuru marambe, mamud-
haakana amembali ani'imati manga giu
malape?
- 14 Jagania o dhelamu minaaka i momadhakina,
tee o bhiwimu minaaka i manga pogau
mopekagau.
- 15 Pekaridho minaaka i giu momadhaki, tee upe-
waumo manga giu momalape.
Peelomo ka'amani tee kakaana bukumu tee
u'usahamo upomalape.
- 16 KAWASANA OPU atiliki manga mia mobanara,
tee aperangoia ande agora aemani tulungi.
- 17 KAWASANA OPU amusui manga mia mope-
wauna kadhaki

samatena manga incia, KAWASANA OPU ape-
wau bhari-bharia mia amalinguaka manga
mia madhaki sumai.

- 18 Wakutuuna manga mia mobanara agora,
KAWASANA OPU aperangoia,
tee arambasakea manga minaaka i bhari-
bharia kanarakaana.
- 19 KAWASANA OPU apomakasu tee manga mia
momaidhiidhina incana,
Incia apasalaamati mia momatena akalana.
- 20 Mia mobanara abhari o kanarakaana,
maka o KAWASANA OPU arambasakea mi-
naaka i bhari-bharia sumai.
- 21 KAWASANA OPU ajagani bhari-bharia bukuna,
inda saangu uka momakatuna.
- 22 Giu madhaki bheapekamate mia madhaki,
tee o mia mobancina mia mobanara bheato-
hukumu.
- 23 KAWASANA OPU apasalaamati manga bhatu-
ana,
tee bhari-bharia mia mopeuluna i Incia
inda bheatohukumu.

35

Do'a Emaniana Tulungi to Tapoaro tee Musu
35:1-28

¹ Zaburuna Daud.

E KAWASANA OPU, upobhaliakea manga mia
mobhaliaku,

tee upotimbeakea manga mia mopotim-
beakaaku.

² Kenia o katangkesi maidhiidhi tee katangkesi
maogemu,
tee ubhangumo utulungiaku!

³ Bhindumea o pandanga tee ndamumu
to uewangi manga mia mopajereaku!

Paumbaaku ande Ingkoomo
mopasalaamatiaku!

⁴ Taroakamo manga mia bhemopekamateaku
amaea tee apotibhaaka aebu.

Taroakamo manga mia mohaejatiakana kadhaki
to iaku
asowo tee atopekaea.

⁵ Taroakamo manga incia mboo kulina bhae
ikamburakana ngalu.

Taroakamo manga incia
apajerea malaa'ekatina KAWASANA OPU.

⁶ Taroakamo dhalana manga incia amalalanda
tee amararo,
tee manga incia apajerea malaa'ekatina
KAWASANA OPU.

⁷ Roonamo manga incia ataa katapu to iaku inda
tee alasana
tee manga incia aseli kabhalongko to
arakoaku inda tee sababuna.

⁸ Taroakamo manga incia abinasa i wakutuu inda
inamunamuna,
tee taroakamo manga incia apesua i nuncana
katapu itaana karona.
Taroakamo manga incia akotibu tee abinasa
i nuncana.

9 Sumaimo kusambo-sambo roonamo
KAWASANA OPU
tee kukaunde-unde roonamo Incia apasalaamatiaku.

10 Tee mpuu-mpuuna incaku bhekupogau,
"E KAWASANA OPU, Ingkoo inda tee kadhimbamu!

Ingkoo upasalaamati manga mia malute
wakutuuna manga mia makaa apisaki
manga incia,

Ingkoo ujugani manga mia malute tee momisikini
minaaka i limana manga mia morampasia."

11 Manga mia madhaki adhawu kasakusiina to
abhaliaku,
tee araeakaaku kupewau manga giu inda
imatauku.

12 Kalapeku manga incia abholosia tee kadhaki,
ngangarandaku amaasi tee amate o akalaku.

13 Garaaka, wakutuuna manga incia amapii,
iaku kupake kae kadhu to tandana ande
incaku amaporo.

Kusikisaa karoku tee kupoasa,
tee kupatungku bhaaku wakutuuna kudo'a.

14 Mboomo kudo'aaka sabhangkaku atawa o witi-
naiku.

Iaku kutungku kutangisi manga incia,
mboomo mia mosukara motangisina
mateana inana.

15 Maka wakutuuna kutosunu, manga incia
amasanaa tee aele-eleaku.
Manga incia aporomusaka abhaliaku,
tee inda aunto-unto afitanaaku.

- 16 Mboomo manga mia munaafiki, manga incia
aele-eleaku torosu
tee apakiri-kiriakaaku ngincina.*
- 17 E Kawasana Opu, sakawana naepia Ingkoo soo
utonto-tontoaku?
Pabebasia o inyawaku minaaka i kahumbun-
ina manga incia,
rambasakaaku minaaka i manga musuku mo-
humbuniaku mboomo manga singa man-
gura sumai!
- 18 Sapadhana upasalaamatiaku, iaku
bhekusukuru i Ingkoo
i tanga-tangana uumatimu,
tee bhekupujiko i tanga-tangana mia bhari.
- 19 Bholi utaroakea manga mia amusuiaku inda
tee sababuna
akaunde-unde wakutuuna akamataaku ku-
narakaa,
tee bholi utaroakea manga mia abanciaku inda
tee sababuna
tee apotawaikiaku wakutuuna kusukara.
- 20 Roonamo mencuana giu pomalape
ipogauakana manga incia,
maka manga incia apogauaka haejatina to
apekagau
to abhali manga mia mopomalapena i lipu
sii.
- 21 Manga incia akakee-kee tee ahinaaku
kasiimpo apogau, "Atumpu incamu, ingkami
takamatamea ipewaumu!"

* 35:16 35:16 *apakiri-kiriakaaku ngincina:* Tandana o mia
a'amara tee abanci mia mosagaanana to miana Israel. 35:19
35:19 Zab. 69:5; Yah. 15:25.

22 E KAWASANA OPU Ingkoo padhamo ukamatea.
Bholimo soo utaroaka!

E Kawasana Opu, bholimo umaridho minaaka i iaku.

23 Bhangumo uewaaka hakuku,
tee parakaraku, e Aulata'alaku Kawasana
Opuku!

24 E KAWASANA OPU, e Aulata'alaku, adiliaku
upapokanea mboomo kabanaramu!
Bholi utaroakea manga incia akaunde-unde
wakutuuna akamataaku kunarakaa.

25 Bholi utaroakea manga incia apogau i nuncana
ngangarandana,
"Atumpu incamu, siitumo ipeelumami!"
Bholi utaroakea manga incia apogau, "Pad-
hamo tapahancurua!"

26 Taroakamo manga mia mokaunde-undena
mokamataaku wakutuuna kunarakaa
amembali amaea tee abingu.

Taroakamo manga mia mosomboakana karonā
amaea tee apotibhaaka aebu.

27 Taroakamo asambo-sambo tee akaunde-unde
manga mia gauna bheakamataaku kutopa-
banara!

Taroakamo manga incia bheapogau, "Tapanamo
kaoge o KAWASANA OPU!

Incia akaunde-unde ande akamata dhadhina
bhatuana amasanaa tee inda akakuran-
gaaka opeopea!"

28 Sumaimo iaku bhekupakoleleaka
kabanaramu,
tee kupuji-pujiko saeoā.

36

*Kadhakina Mia Mokodosa tee Kaasina
Aulata'ala*

36:1-13

¹ To kapalana molaguna. Zaburuna Daud, o bhatuana KAWASANA OPU.

² Dosa apamembali mia madhaki arango pogau inda momalape i nuncana ngangarandana. Mia incia sumai apogau i nuncana ngangarandana,
"Iaku inda kufaraluu kumaeka tee Aulata'ala."

³ Roonamo incia awuju karona, tee afikiria ande o mia mosagaanana inda amataua o kasalahana, tee inda dhaangia mobancia.

⁴ Pogau ibhoasakana satotuuna o kadhaki tee kagau-gau, incia inda a'aarifu tee inda apewau kalape.

⁵ Incia ahaejatiaka kadhaki i bhawona kolemana, sadio apewau inda momalapena, tee inda amendeu apewau kadhaki.

⁶ E KAWASANA OPU, kaasimu molagina akawa i laiana, tee kaparacaeamu akawa i ta'ina ngalu.

⁷ Kabanaramu mboomo gunu momakaa, manga kambotumu mboomo andalaogena, E KAWASANA OPU, Ingkoomo modhambaakana maanusia tee binata.

⁸ Tapanamo kalape o kaasimu molagina, e KAWASANA OPU!

- Bhari-bharia maanusia ujagania i nuncana
peulusana panimu.
- ⁹ Manga incia amambosu akande i Bhanuamu,
tee atarima manga giu momalape mboomo o
umala mosiwulu.
- ¹⁰ Ingkoomo asalana dhadhina bhari-bharia ma-
haluku,
tee kainawamu mosuluwina dhadhimami.
- ¹¹ Palausakea o kaasimu molagina i mia mo-
matauko,
tee kabanaramu i mia momakatena incana.
- ¹² Bholi utaroakaaku ahumbuniaku mia mo-
sombo,
atawa apadhencuaku mia madhaki.
- ¹³ Kamatea, mia mopewauna kadhaki
akotibumo,
manga incia apolangkuri tee inda amembali
abhangu pendua.

37

Kaunde-undena Mia Madhaki Sabantaramea
37:1-40

¹ Zaburuna Daud.

- Bholi u'amara roonamo o mia mopewauna kad-
haki,
bholi ugigibulu* tee pande gau-gau roonamo
opea ipotibhaakana,
- ² roonamo manga incia bhealausaka amatuu
mboomo rumpu,
tee amalau mboomo penembula.

* **37:1 37:1** *ugigibulu*: Ma'anana u'iri.

- ³ Paracaeamo i KAWASANA OPU, tee upewaumo momalapena,
mbooremo i lipu sumai tee u'amani.
- ⁴ Kaunde-undemo roonamo KAWASANA OPU
sumaimo Incia bheadhawuakako opea ipeelumu.
- ⁵ Pasaraakaakea o dhadhimu i KAWASANA OPU
tee uparacaeamo i Incia,
sumaimo Incia bheatulungiko.
- ⁶ Incia bheapatiumba kabanaramu mboomo kainawa,
tee o ka'adilimu mboomo caheana matanaeo.
- ⁷ Tanangimo, bholi tee uu'uumu i aroana KAWASANA OPU tee uantagimea.
Bholi u'amara tee mia momalapena dhawuana,
atawa tee mia mopekagau.
- ⁸ Untomo u'amara tee ubholimea opea ilum-
buakana incamu.
Untomo u'amara, roonamo giu incia sumai bheaumbaaka kadhaki.
- ⁹ Satotuuna o mia mopewauna kadhaki bheatopabinasa,
maka manga incia moharapuna i KAWASANA OPU bheapotibhaaka tana tinauraka ijanjiakana sumai.
- ¹⁰ Inda amangenge indamo bheadhaangia uka o mia madhaki.
Wakutuuna upeeloa i tampana, indamo tee manga incia.

- 11 Maka o mia mopaporitambena karona
bheakotinaurakaaka tana incia sumai,
tee akaunde-unde ani'imati kasanaa
motaralabhi-labhi.
- 12 Mia madhaki ahaejati inda momalape i mia
mobanara,
tee apakiri-kiriakea tee ngincina.
- 13 Maka o Aulata'ala apotawaikia
roonamo akamatea ande o eona amaka-
sumo.
- 14 Manga mia madhaki ahela ewangana tee apasi-
apu panana
to apekamate manga mia misikini tee manga
mia monarakaa,
tee apekamate manga mia momakatena in-
cana.
- 15 Maka manga incia bheatobhoki badana
karona,
tee o panana manga incia bheatokatuki.
- 16 Saidhe o harataana mia mobanara
alabhi o kalapena minaaka i mia madhaki
mobharina harataana.
- 17 Roonamo o takiona mia madhaki
bheatokatuki,
maka o KAWASANA OPU bheajagani mia
mobanara.
- 18 KAWASANA OPU ajagani dhadhina mia inda
tee kasalahana,
tinaurakana manga incia sadhaadhaa
sa'umurua.

- 19 Manga incia inda bheamaea i wakutuuna ka-
narakaa,
tee i wakutuuna kaara manga incia bhea-
mambosu.
- 20 Maka o mia madhaki bheabinasa,
tee manga musuna KAWASANA OPU
bheamofu, mboomo kamba-kamba i tana
mokorumpu.
Manga incia bheamofu tee atopadha
mboomo ombu.
- 21 Ande dhaangia iadhana mia madhaki, manga
incia inda bheapambulia pendua opea iad-
hana sumai,
maka o mia mobanara abukeaka kaasi tee
sadia apekadhawu.
- 22 Satotuuna o mia ibarakatina KAWASANA
OPU bheakotinaurakaaka tana ijanjiakana
sumai,
sainamo o mia itundana bheatopamofu.
- 23 KAWASANA OPU mosusuakana dhala moba-
nara,
to mia momalapena fe'elina mopasanaana
ngangarandana.
- 24 Moomini asindoli incia inda bheamandawu
roonamo KAWASANA OPU atuko limana.
- 25 Pepuu minaaka kumangura sakawana kuman-
cuana,
indapo mina kukamata mia mobanara abho-
lia KAWASANA OPU,
atawa o siwuluna amembali pande pengkae-
mani.
- 26 Incia abukeaka kaasi tee sadia apekapaadha,
tee manga anana amembali barakati to incia.

- 27 Bholia momadhakina tee upewaumo moma-lapena,
sumaimo ingkoo bheusadhaadhaa umboore
to sa'umurua.
- 28 Roonamo KAWASANA OPU amaasiaka pewau
momalape tee mo'adili,
tee inda abholi manga mia mosaalihi.
Manga incia bheatojagani sa'umurua,
maka o siwuluna mia madhaki
bheatopamofu.
- 29 Mia mobanara bheakotinaurakaaka tana ijan-
jiakana sumai,
tee amboore iwe sumai sa'umurua.
- 30 Mia mobanara o pogauna akohikimati,
bhari-bharia ipogauakana a'adili.
- 31 Hukumuna Aulata'alana manga incia adhikaia
i nuncana ngangarandana,
tee o bhengkalana inda bheasindoli.
- 32 Mia madhaki amata-matai mia mobanara,
tee ahaejati apekamatea.
- 33 Maka o KAWASANA OPU inda bheataroakea
amandawu i limana musuna,
atawa ataroakea atohukumu i wakutuuna
ato'adili.
- 34 Harapumo i KAWASANA OPU tee uta'atia o
parintana,
sumaimo Incia bheaangkako to apamemba-
liko mokotinaurakaakana tana ijanjiakana
sumai,
tee ingkoo bheukamata manga mia madhaki
atopamofu.

- 35 Saangu wakutuu kukamata mia madhaki
mopisakina mia mosagaanana,
dhadhina mboomo puuna kau motuwuna
ajulu amaoge tee amaowo[†] i lipuna,
- 36 maka sapadhana sumai incia amofu, tee in-
damo atokamata.
Moomini kupeeloa, indamo kupotibhaakea.
- 37 Kamatea o mia inda tee kasalahana tee mo-
makatena incana,
roonamo manga mia modhadhina mopoma-
lape bheakaunde-unde o siwuluna naile
itu.
- 38 Maka o mia mokodosa bheapabinasea bhari-
bharia,
tee o siwuluna bheatopamofu.
- 39 KAWASANA OPU apasalaamati mia mobanara,
tee ajagani manga incia i wakutuuna kaseke.
- 40 KAWASANA OPU atulungi tee apasalaamati
manga incia;
Incia apasalaamatia minaaka i manga mia
madhaki,
roonamo manga incia apeulu i KAWASANA
OPU.

38

Do'a i Wakutuuna Kapii

38:1-23

¹ Zaburuna Daud. Zikiri i wakutuuna pasom-
baana kurubanina kaudhania.

[†] 37:35 37:35 *amaowo*: Ma'anana "rimbun."

- ² E KAWASANA OPU, bholi uhukumuaku i nuncana amaramu,
bholi usikisaaku i nuncana pamurumu.
- ³ Roonamo anana panamu atongke i badaku,
tee o limamu amakaa abhebheaku.
- ⁴ Inda dhaangia o kalapena namisi i badaku
roonamo pamurumu,
inda amatangka manga bukuku roonamo dosaku.
- ⁵ Manga kasalahaku abhari alaloia o bhaaku,
mboomo bhawa momatamo mpuu to iaku.
- ⁶ Manga kambelaku akobhou tee amabuto,
roonamo o kabhongo-bhongoku.
- ⁷ Kapiiku amatamo mpuu, sabutuna inda amembali kukakaro.
Saeoa kutangi mboomo mia momaporona incana.
- ⁸ Badaku amasodho roonamo amagari buluku,
inda dhaangia kalapena namisi i badaku.
- ⁹ Tanagaku amapupumo sabutuna inda kunamisi opeopea,
iaku kupekidhei roonamo alilaho ngangarandaku.
- ¹⁰ E Kawasana Opu, bhari-bharia pemeliliku atokamata i aroamu,
tee peenciku inda kubuniakea minaaka i Ingkoo.
- ¹¹ Randaku akabhaka-bhaka tee o tanagaku indamo dhaangia,
matau amarawumo.
- ¹² Manga sabhangkaku indamo akasuiaku roonamo panyakiku,

- witinaiku apekaridho minaaka i iaku.
- 13 Manga mia bhemopekamateaku ataakaaku katapu,
tee manga mia mohaejatiakana kadhaki to iaku apogauaka kahancuru.
Manga incia afikiriaka tuaapa carana amembali ahianati mia mosagaanana saeo.
- 14 Maka iaku mboomo mia mabhongo inda moporango,
mboomo mia mobhea inda momembalina mopogau.
- 15 Atotuu, iaku mboomo mia inda moporango,
rampaakanamo incia sumai inda kutagali.
- 16 Maka iaku kuharapu i Ingkoo, e KAWASANA OPU.
E Kawasana Opu, e Aulata'alaku, Ingkoomo bhemolawaniaku.
- 17 Iaku kupogau, "Ancosala manga incia akaunde-
unde akamataaku kusukara,
atawa asomboaka karon wakutuuna akamataaku kusindoli."
- 18 Iaku saidhepo kumandawu,
tee atorotorosu kunamisi kapii.
- 19 Iaku ku'akuia manga kasalahaku,
tee kulilaho wakutuuna kufikiri manga dosaku.
- 20 Manga musuku amakaa tee abhari mpuu,
manga incia abanciaku inda tee sababuna.
- 21 Manga mia abalasi kalapeku tee kadhaki,
tee amembali bhaliku garaaka iaku kupewau giu momalape.

- ²² E KAWASANA OPU, bholi ubholiaku.
E Aulata'alaku, bholi upekaridho minaaka i iaku.
- ²³ Tulungiaku pekadhei,
e Kawasana Opu, mopasalaamatiaku.

39

Do'ana Emaniana Tulungi

39:1-14

¹ To kapalana molaguna. To Yedutun. Zaburuna Daud.

² Iaku kupogau,
"Bhekupengkaanaka kujagani karoku
mamudhaakana inda kukodosa tee dhelaku.
Iaku bhekukoputi muncuku
kangengena dhaangia tee mia madhaki i aroaku."

³ Iaku inda kupogau sampeampearo;
pogau momalape uka inda kubhoasakea,
maka o kanarakaaku ahanda amatamo,

⁴ ngangarandaku alilaho.
Ahanda kufikiria, ahanda amasodho ngangarandaku;
kasiimpo kupogau,

⁵ "E KAWASANA OPU, paumbaakaaku naepia akawa o ajalaku
tee dhaangia pia eopo uka o dhadhiku
mamudhaakana kumataua ande o umuruku amampodho!

⁶ Kamatea, tapanamo kampodho o umuru itantu-akamu to iaku.

Dhadhiku mboomo inda tee ma'anana i
matamu.
Bhari-bharia maanusia modhaangiana i dunia
bheamofu sakijamata mboomo poinunca.

Sela

⁷ Dhadhina maanusia mboomo ngkamia-mia!
Ncia-nciamo maanusia moomini apepadhai
tanaga,
incia arombusaka o harataa wakutuuna
dhaangiapo adhadhi, maka samatena,
inda amataua incema bhemoni'imatia."

⁸ "Sii-sii opea bheiantagiku, e Kawasana Opu?
Ingkoomo iharapuku.

⁹ Rambasakaaku minaaka i bhari-bharia dosaku,
tee bholi utaroakaaku aele-eleaku mia
mokabhongo-bhongo.

¹⁰ Iaku inda kukosuara tee inda kubungkale
ngangaku,
roonamo Ingkoomo mohukumuku.

¹¹ Pekaridhoa o limamu to ubhebheaku,
sababuna saidhepo kumate roonamo
kahukumumu.

¹² Ingkoo uadhari maanusia tee kahukumu roon-
amo kasalahana,
Ingkoo mboomo ane upahancuru opea
imaasiakamami.
Bhari-bharia maanusia tangkanamo
mboomo poinunca!"

Sela

¹³ "E KAWASANA OPU, perangoia o do'aku,
tee utilikiaku wakutuuna kugora kuemani
tulungi.

Bholi inda umaheruakea ande kutangi,

- roonamo iaku sii mboomo samia dhaga
moumbana i Ingkoo,
mboomo bhari-bharia manga opu-opuaku.
¹⁴ Bholi ukamataaku tee pamurumu
mamudhaakana amembali kupemboi pen-
dua
wakutuuna indapo kumate."

40

Do'ana Sukuru tee Do'ana Emaniana Tulungi
40:1-18

- ¹ To kapalana molaguna. Zaburuna Daud.
- ² Iaku kuantagi tee kuharapu mpuu katulungina
KAWASANA OPU,
kasiimpo Incia atilikiaku tee aperangoi
goraku.
- ³ Incia aangkaaku minaaka i bhalona karompa,
minaaka i tomba momandala.
Incia apa'amaniaku i bhawona gunu bhatu
tee apekatangka bhengkalaku.
- ⁴ Incia aadhariakaaku lagu bhaau,
lagu kapujia to Aulata'alata.
Abhari o mia bhemokamatea, kasiimpo amaeka
tee aparacaea i KAWASANA OPU.
- ⁵ Amasanaamo o mia moparacaeana i
KAWASANA OPU,
incia inda aose mia mosombo,
atawa aose mia mosombana barahala.
- ⁶ E KAWASANA OPU, e Aulata'alaku, abhari o giu
inda momentela
mopadhana ipewaumu tee ihaejatiakamu to
ingkami!

Inda dhaangia momembalina mopodhim-
bana tee Ingkoo!

Iaku bhekupetulatulaakea tee kubhoasakea,
maka abhari laulauna to kugagaria.

⁷ Ingkoo inda uemani mamudhaakana kud-
hawuakako kurubani itunu tee pasom-
baana giuna ikande,
maka Ingkoo padhamo ubungkale talingaku.
Kurubani itunu tee kurubani kahapusuana dosa
inda utuntua.

⁸ Kasiimpo kupogau, "Kamatea, iaku kuumba,
i nuncana kalulungina kitabi mopadhana
motoburi tee momembalina i karoku.

⁹ Iaku gauku kupewau opea ipeelumu, e
Aulata'alaku,
tee o hukumumu dhaangia i nuncana ngan-
garandaku."

¹⁰ Iaku padhamo kupakoleleaka kabanara i tam-
pana poromusakaana uumatimu mobha-
rina sumai.

Kamatea, iaku inda kutaangi bhiwiku,
e KAWASANA OPU, Ingkoo uka umataua!

¹¹ Kabanaramu inda kubuniakea i nuncana ngan-
garandaku,
iaku kupogauaka ande Ingkoo sadia ukeni-
aka pojanjiamu tee kupogauaka kasalaa-
mati minaaka i Ingkoo.

Kaasimu molagina tee kabanaramu inda kura-
hasiaakea

i aroana poromusakaana uumatimu mob-
hari sumai.

¹² E KAWASANA OPU, bholi utaangi rahumatimu
to iaku,
taroakamo o kaasimu molagina tee kaba-
naramu sadia ajaganiaku.

¹³ Roonamo abhari mpuu o balaa molibuaku.
Iaku apajereaku manga dosaku
tee inda kumembali kupokamata;
kabharina alabhia o bulua i bhaaku,
sabutuna amateakea akalaku.

¹⁴ E KAWASANA OPU, madheimo upasalaamati-
aku,
e KAWASANA OPU, madheimo utulungiaku!

¹⁵ Maasangia manga mia mohaejatina mopeka-
mateaku
amaea tee abingu.

Maasangia manga mia mohaejatina to
mopacilakaaku
apalai tee apotibhaaka aebu.

¹⁶ Maasangia manga mia moele-eleaku
atokidha roonamo manga incia amaea.

¹⁷ Taroakamo bhari-bharia mia mopeeloko
amasanaa tee akaunde-unde,
tee taroakamo bhari-bharia momaasiakana
kasalaamati minaaka i Ingkoo
sadia apogau, "Tapanamo kaogena o
KAWASANA OPU!"

¹⁸ Iaku sii kunarakaa tee kumisikini,
maka o Aulata'ala afaduliakaaku.

Ingkoomo motulungiaku tee mopasalaamatiaku,
E Aulata'alaku, bholi upekanoe-noe, pekad-
heimo utulungiaku.

41

Do'a Emaniana Auntoaka Panyaki

41:1-14

- ¹ To kapalana molaguna. Zaburuna Daud.
- ² Amasanaamo mia mofaduliakana mia misikini!
KAWASANA OPU bheapasalaamatia i waku-
tuuna anarakaa.
- ³ KAWASANA OPU bheajagania tee adham-
baakea.
Sabutuna manga mia bheasarongiakea
amasanaamo i lipuna mbooresana,
tee inda upasaraakaakea i manga musuna.
- ⁴ KAWASANA OPU bheatulungia i wakutuuna
amapii,
tee apauntoa minaaka i kapiina.
- ⁵ Iaku kupogau, "E KAWASANA OPU, maasi-
akaaku,
pauntoa o panyakiku roonamo kukodosamo
tee Ingkoo."
- ⁶ Manga musuku apogauakaaku madhaki,
manga incia apogau, "Naepia incia bhea-
mate mamudhaakana manga mia amalin-
guakea?"
- ⁷ Manga mia mosoloaku inda amakate o ngan-
garandana;
manga incia apara-para afaduli tee agau-gau.
Manga incia apeelo lele madhaki minaaka i iaku,

- kasiimpo alingka apetulatulaakea i dhala.
- ⁸ Bhari-bharia mobanciaku apokamuntuiakaaku, manga incia ahaejatiakaaku tee kadhaki.
- ⁹ Pogauna manga incia, "Kapiina ahanda mpuu, indamo bheamembali atopaunto."
- ¹⁰ Sampe moomini o sabhangkaku momakasuna iparacaeaku, mokandena rotiku, ambulimo abhaliaku.
- ¹¹ Maka Ingkoo, e KAWASANA OPU, susuakaaku o kaasimu, tee pauntoaku minaaka i kapiiku, mamudhaakana amembali kubalasi kadhakina manga musuku.
- ¹² Tee mboo sumai iaku kumataua ande Ingkoo umaasiakaaku roonamo o musuku inda amembali asambo-samboakaaku.
- ¹³ Ingkoo utulungiaku roonamo kakatena totona incaku, tee udhikaaku i saripimu sa'umuraa.
- ¹⁴ Atopujimo KAWASANA OPU, Aulata'ala isombana miana Israel, sii-sii tee sa'umuraa!
Aamin!

BOKU I RUA ANGUNA:

42

ZABURU 42--72

*Pemelili to Aulata'ala, Haakimu Mo'adili
42:1--43:5*

41:10 41:10 Mat. 26:23; Mrk. 14:20; Luk. 22:21; Yah. 13:18.
41:14 41:14 Zab. 106:48.

¹ To kapalana molaguna. Lagu kaadharina miana Korah.*

² Mboomo rusa apemeliliaka umala mokouwe,
mboo sumai uka iaku kupemeliliaka Ingkoo,
e Aulata'ala.

³ Iaku kufaraluu mpuu Aulata'ala,
Aulata'ala modhadhi.
Naepia amembali kupoaro tee kukamata
Aulata'ala?

⁴ Malo eona kutangi,
loluku amembali kinandeku.
Saeoa o musuku aele-eleaku tee apogau,
"Iapai o Aulata'alamu?"

⁵ Giumo incia sii iudhaniku,
wakutuuna kupetulatulaaka o antona ngan-
garandaku:

Tuaapa i piamo itu kulingka kupobhawa tee
mia bhari wakutuu taporope i bhanuana
Aulata'ala,
kuporiaroaka dhala
poose tasambo-sambo tee tasukuru
i nuncana kariaa sumai.

⁶ Pokia ingkoo umaasi e ngangarandaku,
tee ulilaho i nuncana badaku?
Harapumo i Aulata'ala roonamo iaku uka
bhekupuji Incia
tee kasalaamati moumbana minaaka i
aroana.

* **42:1 42:1** *miana Korah*: Kolompona molaguna minaaka i siwuluna Korah (kamata Kab. 26:10), siitumo o Heman tee manga anana. Nabii Daud apatugasiaka Heman to apakawaaka kasameana nabii aoseakea gambusu tee lagu i nuncana ibaadati i Baitulla.

⁷ E Aulata'alaku, ngangarandaku ahancuru i nuncana badaku,
rampaakanamo sumai iaku bhekuudhaniko
minaaka i lipuna Umala Yordan tee Gunu Hermon,
tee minaaka i Gunu Mizar.

⁸ Andalaoge alawani andalaoge mosagaanana
tee suarana momakaa o uwe momandawu
minaaka i kalangaana.

Bhari-bharia ewo tee solomu
akangkanaiaiku.

⁹ I wakutuuna aeo KAWASANA OPU aparintaaka
kaasina molagina,
tee i wakutuuna amalo iaku kulagu,
siitumo saangu do'a to Aulata'ala mopadhadhiaku.

¹⁰ Iaku kupogau tee Aulata'ala, gunu bhatuku,
"Pokia umalinguakaaku?

Pokia manga musuku apisakiaku
sabutuna iaku sadiamo kusukara?

¹¹ Mboomo katobhoki imateaka i nuncana
bukuku,
manga bhaliku aele-eleaku.

Manga incia saeoa aabha,
"Iapai o Aulata'alamu?"

¹² Pokia ingkoo umaasi, e ngangarandaku,
pokia ulilaho i nuncana badaku?

Harapumo i Aulata'ala roonamo iaku uka
bhekupuji Incia,
Aulata'alaku mopasalaamatiaku.

43

¹ E Aulata'ala, dhawuakumo ka'adili,
tee uewaaka parakaraku i aroana lipu
modorohaka.

Pabebasiaku minaaka i pande pekagau tee mia
madhaki,

² roonamo Ingkoomo Aulata'ala peulusaku.
Pokia Ingkoo umendeuaku?
Pokia iaku sadiamo kusukara
roonamo kapisakina musu?

³ Lambokoa o kainawamu tee kabanaramu
to akapalaikiaku
tee abhawaaku i gunumu momangkilo,
i tampana mbooresamu.

⁴ Sumaimo, iaku bhekulingka kuporope i tampa
tunuana kurubani to Aulata'ala,
iaku bhekupoaro i Aulata'ala, mopasanaaku
tee mopaunde-undeaku.

Iaku bhekupujiko tee kecapi,
e Kawasana Opu, e Aulata'alaku.

⁵ Pokia umaasi e ngangarandaku
tee pokia ulilaho i nuncana badaku?
Uharapumo i Aulata'ala roonamo iaku uka
bhekupuji Incia,
Aulata'alaku mopasalaamatiaku.

44

Pekidheina Lipu Motopisaki

44:1-27

¹ To kapalana molaguna. Zaburuna miana
Korah. Laguna kaadhari.

- ² E Aulata'ala, ingkami padhamo tarangoa.
Opu-opuamami padhamo manga petulatu-
laaka
giu mopadhana ipewaumu i zamanina manga
incia,
siitumo i zamani mangenge.
- ³ Ingkoo upadhencu manga lipu mosagaanana
tee limamu karomu,
kasiimpo upamboore opu-opuamami to kab-
holosina manga incia.
Ingkoo upahancuru manga lipu,
maka utaroakea opu-opuamami ajulu o kab-
harina.
- ⁴ Manga incia inda apoewaangiakea to apotib-
haaka tana incia sumai,
mencuana tee limana manga incia imembali-
akana akana,
maka tee lima kaanamu tee kuasamu,
tee caheana roumu
roonamo Ingkoo umaasiaka manga incia.
- ⁵ E Aulata'ala, Ingkoomo Rajaku,
mopamembalina miana Israel akana.
- ⁶ Tee kuasamu ingkami tapadhencu musumami,
tee saromu, talandalandaki manga mia bhe-
moewangina ingkami.
- ⁷ Mencuana panaku itangkaakaku,
hancuku uka inda apasalaamatiaku.
- ⁸ Maka Ingkoomo mopasalaamatina ingkami mi-
naaka i bhalimami,
tee upekaea manga mia mobancina ingkami.
- ⁹ Roonamo Aulata'ala, ingkami sadia talaguaka
lagu kapujia,

tee saromu, ingkami bhetasukuru
sa'umuruu.

Sela

- 10 Maka sii-sii Ingkoo manga bholimo tee manga
taroaka tamaea.
Ingkoo indamo umaju uka upobhawa tee
tantaramami.
- 11 Ingkoo manga taroaka tapalai minaaka i
musumami,
tee manga mia mobancina ingkami arampasi
harataamami.
- 12 Ingkoo manga pasarakaaka mboomo dumba
isumbele,
tee manga papogaa-gaa i lipu mosagaanana.
- 13 Ingkoo uaso uumatimu inda tee haragaana i
musuna to amembali bhatua,
tee inda uala laba saidhe uka.
- 14 Ingkoo utaroaka ingkami mangahina manga
lipu sarimbanuamami,
tee tamembali kaele-elena manga mia i
saripimami.
- 15 Utaroakea manga lipu apotawaiki ingkami.
Manga incia alengko-lengko bhaana to in-
gkami.
- 16 Saeoa kutohina,
tee kutanggo kaeaku,
- 17 roonamo kurango kaele-ele tee kahina
minaaka i musumami tee manga mia mod-
hikaakana bukuna incana tee ingkami.
- 18 Bhari-bharia sumai padhamo akangkanai in-
gkami
maka ingkami inda tamalinguakako

- atawa tahianati janjimu tee ingkami.
- 19 Incamami inda abhalii minaaka i Ingkoo,
tee ingkami inda tabholi o kaadharimu
- 20 moomini Ingkoo padhamo upahancuru ingkami i tampana serigala,
tee udhika ingkami i nuncana kalalanda.
- 21 Ande ingkami tamalinguaka sarona
Aulata'alamami,
atawa tado'a tee tasomba i Aulata'ala
mosagaanana,
- 22 Aulata'ala dhaanamo bheamataua,
satotuuna Incia amataua o rahasiana ngan-
garandamami!
- 23 Saeo-saeo ingkami taaro mate rampaakanamo
taose tee tata'ati i Ingkoo,
tee ingkami tatoabhi mboomo dumba isum-
bele.
- 24 E Aulata'ala, pewaumo. Pokia Ingkoo mboomo
ukole?
Pewaumo! Bholi manga umendeu
sa'umurua.
- 25 Pokia Ingkoo ubuniaka karomu
tee umalinguaka kanarakaa tee kapisaki-
mami?
- 26 Ingkami takotibu i nuncana ngawu,
tee o badamami akumbu i tana.
- 27 Pewaumo tee tulungimo ingkami!
Roonamo kaasimu molagina, manga tolosi!

45

*Lagu i Wakutuuna Kawiana Raja**45:1-18*

¹ To kapalana molaguna. Aose lagu: Kamba-kamba Bakung. Zaburuna miana Korah. Laguna kaadhari; laguna kaasi.

² Ngangarandaku abukeaka tee manga lagu makesa.

Iaku bhekulaguaka laguku to raja,
dhelaku mboomo folupenina samia juru
tulisi momakidha.

³ Ingkoo momangadana i tanga-tangana umane,
kalapemu atokamata minaaka i pogaumu,
sababuna sumai Aulata'ala abarakatiko to
sa'umurua.

⁴ Bhokea o ewangamu i tangamu, e raja mo-
barani,
ingkoo momalangana tee momuliana!

⁵ I nuncana kamuliangimu sumai usawikimo
karetamu tee ukanamo,
to kabanara, sifatuna mia inda mosombo, tee
ka'adili!

Taroakamo lima kaanamu akarajaa
pewauna motomaeka.

⁶ Anana panamu amatadha,
alosa i bhakena manga musumu,
manga lipu akotibu i aroamu.

⁷ Kauncuramakamu, e Aulata'ala, sadhaadhaa
torotorosu tee sa'umurua,
tee o katukona pamarintamu satotuuna o
katukona kabanara.

- 8 Ingkoo umaasiaka kabanara tee ubanci mia
madhaki.
Sababuna sumai, Kawasana Opumu,
Aulata'alamu, padhamo alantiko
umembali raja
tee apasanaako alabhi minaaka i raja
mosagaanana.
- 9 Bhari-bharia pakeamu akobhou mina-mina ma-
wundu mboomo polona damar, garu, tee
asana.
Ingkoo umasanaa urango suarana kecapi tee
gambusu minaaka i maligemu motobh-
elokiakana gadhi.
- 10 I tanga-tangana manga bhawine molaianiko
dhaangia tee manga bhawine o anana raja.
I weta kaanamu akabhale-bhale o ratu
mopakena kabheloki bulawa momalape
minaaka i Ofir.
- 11 Perangoiaku pekalape, e kabuabua, kamatea
tee utaaia o talingamu!
Malinguakamea o lipumu tee bhanuana
amamu.
- 12 Taroakamo o raja apeeluko roonamo umakesa!
Incia o opumu, sujumo uhoromatia.
- 13 Ra'eatina kota Tirus bheabhawaakako pasom-
baa,
tee manga mia morangkaea bhea'usaha to
aala-ala incamu.
- 14 Anana raja bhemokawina tee rajana Israel

- apesua i nuncana maligena,*
pakeana kabuabua sumai abukeaka kasokai
bulawa.†
- 15 Incia bheato'antara i raja tee pakea motosokai,
apoose tee manga sabhangkana,
siitumo manga kabuabua molaianina anana
raja.
- 16 Manga incia ato'antara tee asambo-sambo tee
akaunde-unde,
manga incia apesua i nuncana maligena raja.
- 17 E raja, manga anamu bheabholosi opu-
opuamu,
ingkoo bheuangkea manga to amembali kao-
gesa i saangua alamu.
- 18 Iaku bhekupewau saromu amaoge tee bhari-
bharia ipewaumu audhania mia sii-sii
sakawana i aaherati,
sabutuna bhari-bharia lipu bheapuji-pujiko
torosu sa'umurua.

46

Aulata'ala o Kotana Benteta

46:1-12

¹ To kapalana molaguna. Laguna miana Korah;
alaguakea tee suara momalanga.

* **45:14 45:14** *Anana raja bhemokawina tee rajana Israel: Atokamata mboomo kabuabua ipetulatulaakana i aeati 11, siitumo anana raja minaaka i lipu mosagaanana, bheakawi tee rajana Israel. † 45:14 45:14 pakeana kabuabua sumai abukeaka kasokai bulawa: Pakea motobhelokiakana tee kambari mokowaranaa.*

- ² Aulata'ala sumai o tampana peulusata tee o kakaata.
Incia sadia amakasu to manga tulungi i wakutuuna kaseke.
- ³ Sumaimo ingkita inda tamaeka, moomini o alamu akolendu,
moomini manga gunu atondu i nuncana tawo,
- ⁴ tee moomini o tawo akomburu tee akobura
tee manga gunu akohudha rampaakanamo akangkanaia ewona tawo sumai.

Sela

- ⁵ Dhaangia manga siwuluana uwena umala aumbaaka kaunde-unde to ra'eatina kotana Aulata'ala,*
siitumo o tampa momangkilo, mbooresana Aulata'ala Momalanga.
- ⁶ Aulata'ala amboore i tanga-tangana kota sumai, sabutuna o kota sumai inda bheakohudha. Aulata'ala bheatulungia wakutuuna akawa raneeo.
- ⁷ Manga ra'eatina lipu atobungke tee manga pamarintana abagoea,
rampaakanamo Incia aparangoaka suarana, alamu ahancuru.
- ⁸ KAWASANA OPU, kapalana saangua pasukana sorogaa, apoose tee ingkita,
Aulata'ala isombana Yakub siitumo o kotana benteta.

Sela

* **46:5 46:5** *kotana Aulata'ala*: Siitumo Kota Yerusalem, tampana Baitulla Momangkilo to miana Yahudi.

- ⁹ Mai, kamatea opea ikarajaana KAWASANA OPU,
Incia apewau giu inda momentela i alamu!
- ¹⁰ Incia apaunto potimbea i saangua dunia,
pana apahancurua tee pandanga akatukia,
Incia atunu manga kareta potimbea tee waa.
- ¹¹ Firimanina, "Untomo upoewangi, mataumea
ande Iaku sii o Aulata'ala!
Manga lipu bheapekalangaaku,
tee saangua alamu bheamuliangiaku."
- ¹² KAWASANA OPU, kapalana saangua pasukana
sorogaa, apoose tee ingkita,
Aulata'ala isombana Yakub siitumo kotana
benteta.

Sela

47

Aulata'ala Rajana Saangua Alamu

47:1-10

- ¹ To kapalana molaguna. Zaburu minaaka i
miana Korah.
- ² E bhari-bharia lipu, pujimo Aulata'ala!
Bhija-bhijamea o Aulata'ala tee usambo-
sambomo.
- ³ Roonamo KAWASANA OPU Momalanga sumai
atomaeka mpuu,
Incia o raja maoge mokuasaina saangua
alamu.
- ⁴ Incia apekatalo manga lipu tee adhawuakea i
nuncana kuasata,
tee manga lipu adhikaia i tambena aeta.
- ⁵ Incia mangapiliaka tana

bhemomembalina tinauraka ibanggaakata
sa'umuru.*
Ingkita o siwuluna Yakub,
uumati imaasiakana.

Sela

- ⁶ Wakutuuna Aulata'ala akompa i kauncura-
makana, manga mia asambo-sambo tee
akaunde-unde,
tee atowiiakea sangkakala.
- ⁷ Laguakamea o lagu kapujia to Aulata'ala,
laguakamea!
Laguakamea o lagu kapujia to Rajata,
laguakamea!
- ⁸ Roonamo Aulata'ala o Rajana saangua alamu,
laguakamea o laguna kaadhari!
- ⁹ Aulata'ala satotuuna o Rajana bhari-bharia lipu,
Incia amboore i bhawona kauncuramakana
momangkilo.
- ¹⁰ Manga kapalana lipu aporomusaka
to amembali uumatina Aulata'ala isombana
Ibrahim.
- Roonamo bhari-bharia mokuasaina alamu sii
atungku i Aulata'ala,
Incia atomuliangi mpuu.

48

Sion, Kotana Aulata'ala
48:1-15

- ¹ Zaburuna miana Korah to lagu.

* **47:5 47:5** *tinauraka ibanggaakata sa'umuru*: Tinauraka sumai
siitumo Tana Kanaan, tana ijanjiakana Aulata'ala to Ibrahim tee
manga siwuluna.

- ² Tapanamo kaoge o KAWASANA OPU tee alaenga
mpuu atopuji
i kotana Aulata'alata, i gununa momangkilo.
- ³ Amakesa amalanga, apasanaa mia i saangua
alamu,
siitumo o gunu Sion i weta i napa,
kotana Raja Maoge!
- ⁴ I nuncana manga bentena
Aulata'ala padhamo apatiumbaaka ande
karona satotuuna o bente momakaa.
- ⁵ Kamatea, manga raja aporomusaka,
manga incia amaju apobhawa-bhawa.
- ⁶ Sakamatana kotana Sion, manga incia amente;
manga raja atokidha tee apalai roonamo
amaeka.
- ⁷ Iwe sumai manga incia arengku roonamo
amaeka,
tee anamisi kapii mboomo bhawine bhe-
mopalaahirina.
- ⁸ Tee garura
Ingkoo upahancuru manga kapala maoge
minaaka i Tarsis.
- ⁹ Mboomo mopadhana irangota, mboo siitumo
uka ikamatata,
i kotana KAWASANA OPUNA saangua alamu,
i kotana Aulata'alata,
ipekatangkana Aulata'ala to sa'umurua.
- Sela
- ¹⁰ E Aulata'ala, ingkami taudhania o kaasimu
molagina
i nuncana Baitullamu momangkilo.

- 11 Mboomo saromu, e Aulata'ala,
mboo siitumo o mia i saangua alamu amu-
liangiko.
Ingkoo ukokuasa tee u'adili.
- 12 Taroakamo ra'eatina Sion akaunde-unde,
tee taroakamo manga anana bhawine Yuda
asambo-sambo
roonamo sadia u'adili i wakutuuna
uhaakimu mia.
- 13 Lingkamo uumatina Aulata'ala, tiingia o Sion,
tee ubulilingia,
tee ugagara manga munarana.
- 14 Tilikia manga rindina,
kamatea o bentena,
mamudhaakana amembali upetulatulaakea i
manga siwulumu.
- 15 Satotuuna o siimo Aulata'ala, Aulata'alata
abakaa;
Incia bhemokapalaikina ingkita sa'umurua!

49

Kasanaa Mosia-sia

49:1-21

- ¹ To kapalana molaguna. Zaburuna miana
Korah.
- ² Perangoia o giu incia sii, e bhari-bharia lipu,
taaia o talingamiu e bhari-bharia ra'eatina
dunia,
- ³ Malape o kaogesa atawa o mia maidhiidhi,
mia morangkaea atawa o mia misikini!
- ⁴ Ngangaku bheabhoasaka manga pogau imem-
baliakamiu ubukeaka hikimati,

- tee ngangarandaku bheafikiri manga giu
imembaliakamiu umakidha uma'anaia.
- 5 Talingaku bhekubungkalea to kuperangoi
manga kabhanti mo'aarifu,
poose kumagasiaaka kecapi, bhekub-
hoasakea ma'anana o taataangkeku.
- 6 Iaku inda kufaraluu kumaeka i wakutuuna
kaseke,
wakutuuna kadhakina musuku alibuaku.
- 7 Manga incia mia motangkaakana harataana
tee mosomboakana karangkaeana.
- 8 Satotuuna, inda samia uka momembalina
mopasalaamatina karon samia,
atawa apomea katolosina i Aulata'ala to
apamembalia kabholosina inyawana
- 9 roonamo ponambona katolosina inyawana mia
amaali mpuu,
tee inda bheakawa moomini apomeaia tee
opeapo uka
- 10 mamudhaakana incia amembali adhadhi
sa'umurua
tee inda bheakamata bhalona koburuna.
- 11 Maka satotuuna, incia bheakamata
mia mo'aarifu uka bheamate,
mboo sumai uka tee mia mokabhongo-bhongo
tee mia mobhore;
manga incia bheabholi harataana to mia
mosagaanana.
- 12 Koburuna manga incia bheamembali bhanu-
ana sa'umurua,
mbooresana manga incia asadhaadhaa to
sa'umurua,

moomini manga incia dhaangia tee tanana
karona.

- 13 Maka o maanusia moomini tee karangkaeana
inda bheamembali adhadhi torosu.
Maanusia apokana tee binata dhaanamo
bheabinasa.

- 14 Mboo siimo dhawuana mia motangkaakana
karona,
tee ajalana manga mia momaasiakana
pogauna karona.

Sela

*

- 15 Aulata'ala apatotapuaka manga incia to amate
mboomo dumba,
manga incia awulua mboomo dumba apesua
i bhalona koburu,
manga incia bheasapo lausaka i nuncana
koburu.

Badana manga incia bheamabuto tee ahancuru,
amaridho minaaka i bhanuana.

- 16 Maka o Aulata'ala bheatolosiaku
minaaka i duniana mia mate
roonamo Incia bheaalaaku minaaka iwe
sumai.

Sela

- 17 Bholi umaeka ande o mia mosagaanana amem-
bali arangkaea,
tee o harataana ahandamo abhari,

* **49:14 49:14 Sela:** Aipomo tandana to aunto wakutuuna lagu
sumai atolaguaka, atawa o tanda to ahanda apekaogea o suarana,
atawa onina gambusuna. Amembali uka to tanda to morangoa
mamudhaakana asuju.

- 18 roonamo wakutuuna amate, incia inda amembali abhawa opeopeapo uka,
tee o harataana inda bheasapo i koburu to apobhawa tee incia.
- 19 Moomini kangengena dhadhina incia aabhi karna atobarakati
tee apuji-pujia mia roonamo akodhawua,
- 20 incia uka bheatutuni manga opu-opuana, momatena porikana i tampa momalalanda
tee iwe sumai, indamo uka bheakamata kainawa pendua.
- 21 Maanusia morangkaea, maka inda amembali ama'anai hikimati,
amembali tapapokanea tee binata motopabinasa.

50

Ibaadati Mobanara

50:1-23

¹ Zaburuna Asaf.*

- KAWASANA OPU, Aulata'ala Mokokuasana Mpuu, afirimani
tee agoraaka saangua alamu minaaka i timbu sakawana i bhara.
- ² Minaaka i kota Sion momakesa mpuu,
Aulata'ala apatiumba karna mboomo cahea.
- ³ Aulata'alata aumba tee inda soo akatongotongo;

* **50:1 50:1 Asaf:** Asaf sii apatugasiakea Nabii Daud to akapalai molaguna i nuncana ibaadati i Baitulla. Incia o miana Lewi mopakawaakana kasameana nabii i tambena kuasana Nabii Daud.

waa imangauaka dhaangia i aroana,
tee garura[†] momakaa dhaangia i saripina.

⁴ Incia agoraaka laiana tee alamu
to amembali sakusii wakutuuna a'adili
uumatina.

⁵ Firimanina, "Romusakaakaaku bhari-bharia
uumatiku mosaalihi i aroaku,
siitumo manga incia mopadhana mobokena
pojanjia tee Iaku alaloi kurubani isum-
bele."

⁶ Laiana apakoleleaka kabanarana,
roonamo o karona Aulata'ala mo'adilina
uumatina.

Sela

⁷ "Rangoa e uumatiku, Iaku bhekufirimani!
E Israel, Iaku bhekumembali sakusii tee opea
mopadhana ipewaumu,
Iakumo o Kawasana Opu, Aulata'alamu!

⁸ Mencuana rampaakanamo kurubani isum-
belemu mbakana kuraeakako,
atawa o kurubani tunuamu
modhaangiana i aroaku.

⁹ Iaku kumendeu bhekutarima sapi umane mi-
naaka i bhanuamu,
atawa o bhembe umane minaaka i kandamu,

¹⁰ roonamo bhari-bharia binata maila i koo o
pewauaku,
tee uka bhari-bharia manga kadhambaaka
modhaangiana i rewuna gunu.

¹¹ Iaku kumataua bhari-bharia manu-manu mod-
haangiana i gunu,

[†] **50:3 50:3** *garura*: Wao maranca tee ngalu makaa mpuu apoose
tee bhibhito.

- tee manga mahaluku modhadhi i nuncana
koo o pewauaku.
- 12 Ande kumaara, inda afaraluu kupaum-
baakako,
roonamo alamu tee bhari-bharia antona o
pewauaku.
- 13 Iaku inda kukande dagina sapi umane,
inda uka kusumpu raana bhembe umane.
- 14 Sukurumo i Aulata'ala to amembali pasom-
baamu to Incia,
tee upomeaia o tolauna onimu i KAWASANA
OPU.
- 15 Goraakaaku i wakutuuna umaseke,
Iaku bhekutulungiko,
tee ingkoo bheumuliangiaku."
- 16 Maka to mia madhaki o KAWASANA OPU
afirmani,
"Inda tee fa'edana ingkoo usarongi huku-
muku,
tee upogauaka manga pojanjiaku.
- 17 Roonamo ingkoo umendeu utoudhaniaka,
tee inda umaheruakea uka manga firi-
maniku.
- 18 Ande upokawa tee mia manako, ingkoo upos-
abhangkaakea,
tee manga pande zina, ingkoo upooseakea.
- 19 Muncumu utaroakea abhoasaka manga pogau
madhaki,
tee o dhelamu sadia apekagau.
- 20 Ingkoo utorotorosu uraeaka tee upogauaka
witinaimu karomu,
tee ufitanaaia.

21 Mboo sumaimo ipewaumu, maka Iaku inda tee
uu'uuku,
jadi ufikiria ande Iaku sii kupokana tee in-
gkoo.

Maka sii-sii bhekuhukumuko,
tee kubhawe a o parakara incia sii i aroamu
mamudhaakana uma'anaia.

22 Kamatame a o giu incia sii, e ingkomiu moma-
linguakana Aulata'ala,
kojagamo ancosala Kupabinasakomiu tee
inda dhaangia mopasalaamatikomiu.

23 Incema mopasombaakana sukuru i Iaku
mboomo kurubani,
inciamo amuliangiaku;
o mia modhadhina i nuncana kajujuru,
Aulata'ala bhekususuakea kasalaamati to in-
cia."

51

Do'a Emaniana Amponi

51:1-21

¹ To kapalana molaguna. Zaburuna Daud.

2 I wakutuuna Nabii Natan audhaniaka Raja
Daud sapadhana incia apewau zinaa tee
Batsyeba.*

51:2 51:2 2Sa. 12:1-15. * 51:2 51:2 *Batsyeba*: Bhawine
sii amangada mpuu tee bhawinena samia suludaduna Daud
mokusaroakana Uriah. Sapadhana Daud azina tee Batsyeba tee
amataua ande incia abhawa-bhawa, Daud asampea tee antona
mamudhaakana apekamate Uriah. Samatena Uriah, Daud akawi
tee Batsyeba. Maka giu sumai amataua Nabii Natan. Kamatea
2Sa. 11:2-27.

- ³ E Aulata'ala, maasiakaaku roonamo kaasimu molagina.
Apokana tee rahumatimu momaoge, hapusumea manga dosaku!
- ⁴ Bhanuia tee pekangkiloa karoku minaaka i kasalahaku,
tee pekangkiloaku minaaka i dosaku.
- ⁵ Roonamo kumataua manga kasalahaku,
tee dosaku sadia kuudhania.
- ⁶ I Ingkoo, tangkanamo i Ingkoo kukodosa
tee kupewau opea iabhimu amadhaki.
Sabutuna ubanara i wakutuuna ufirimani ande kusala,
tee u'adili i wakutuuna uhukumuaku.
- ⁷ Satotuuna, kumadhaki pepuu mina kutopalaahiri,
tee kukodosa minaaka i nuncana kadhuma.
- ⁸ Satotuuna, Ingkoo upeelu kabanara i nuncana baatini,
tee Ingkoo uadhariaakaaku hikimati i nuncana ngangarandaku.
- ⁹ Pekangkilomea o dosaku, sumaimo iaku bhekumangkilo,
pekangkiloaku sumaimo bhekumembali maputi mpuu.
- ¹⁰ Taroakamo kurango lele kaunde-unde tee kasanaa,
tee taroakamo manga bukuku ipahancurumu sii akaunde-unde pendua.
- ¹¹ Tutubhia o roumu tee bholi ukamata manga giu madhaki ipewauku,
tee uhapusumea bhari-bharia kasalahaku.

- 12 E Aulata'ala, padhaangiakaaku ngangaranda momangkilo,
dhikaia o rohi mobhaau tee matangka i nuncana baatiniku.
- 13 Bholi ubhanakaaku minaaka i aroamu,
tee bholi ualea o rohimu momangkilona.
- 14 Paunde-undeaku pendua roonamo kasalaamati minaaka i Ingkoo,
tee dhawuaku ngangaranda morela to kuta'ati i Ingkoo.
- 15 Sumaimo, iaku bhekuadhariaka parintamu i manga mia mopewauna kasalaha,
tee manga mia mokodosa bheambuli i Ingkoo.
- 16 Rambasakaaku minaaka i kasalaha roonamo kupekamate mia saganana, e Kawasana Opu,
e Aulata'ala mopasalaamatiaku,
tee bhekulaguaka roonamo kabanaramu.
- 17 E Aulata'ala, papogauaku,
sumaimo iaku bhekupujiko!
- 18 Sumaimo Ingkoo inda upeelua kurubani isumbele.
Moomini iaku kupasombaaka kurubani tunua, Ingkoo inda upeelua.
- 19 Satotuuna kurubani mopasanaana Aulata'ala sumai o rohi mohancuru.
E Aulata'ala, ngangaranda mohancuru tee momapuro inda bheuhinaia.

- 20 Maasangia Ingkoo usanaa pewau malape i
Sion,
pakakaroa pendua rindina peulusa i
sakaaratea kotana Yerusalem.
- 21 Sumaimo, bheupeelu utarimaia manga ku-
rubani isumbele molaenga,
siitumo kurubani pasombaa itunu tee ku-
rubani pasombaa mototunu saangua,
sumaimo mia bheapasombaaka manga sapi
umane i bhawona tampana tunuana ku-
rubanimu.

52

Kahukumuna to Mia Madhaki

52:1-11

- ¹ To kapalana molaguna.
Lagu kaadharina Daud,
- ² wakutuuna Do'eg, miana Edom sumai, aumba
apokawa tee Saul tee apaumbaaka ande o
Daud akawamo i bhanuana Abimelekh.
- ³ E mia mobarani, pokia ingkoo usomboaka kad-
hakimiu?
Kaasina Kawasana Opu sadhaadhaana to
sa'umurua!
- ⁴ Saeo ingkoo uhaejati to upanarakaa mia
sagaanana.
Pogaumu amatadha mboomo piso motow-
into,
e mia pande pekagau!
- ⁵ Ingkoo ulabhi upeelu momadhakina tee inda
upeelu momalapena,

labhi upeelu kagau-gau minaaka i
upogauaka kabanara.

Sela

⁶ Ingkoo usanaa upekapii incana mia tee manga
pogaumu,
e pande pekagau!

⁷ Maka o Aulata'ala bheapahancuruko to
sa'umurua.
Incia bheasoroko tee apalimbako minaaka i
mbooresamu,
tee adhikako i nuncana duniana mia mate.

Sela

⁸ Akamata incia sumai, mia mobanara bhea-
maeka tee amente,
kasiimpo apotawaikiko,

⁹ Manga incia apogau, "Siitumo mia moindana
moemanina peulusa i Kawasana Opu,
tabeana soo atangkaaka karangkaeana
motaralabhi-labhi,
tee apahancuru mia mosagaanana to
apekatangka karona."

¹⁰ Maka, iaku sii mboomo puuna zaitun mosub-
uru
i nuncana bhanuana Aulata'ala.

Iaku kuparacaea tee kaasina molagina Aulata'ala
to sa'umurua.

¹¹ Iaku sadio kusukuru i Ingkoo sa'umurua
rampaakanamo opea ipewaumu.

Iaku bhekuharapu i saromu i aroana manga mia
mosaalihi
sababuna saromu amalape.

53

*Kadhakina Maanusia Inda Moparacaeana
Kawasana Opu*

53:1-7

¹ To kapalana molaguna.
Mboomo laguna kanarakaa. Lagu kaadharina
Daud.*

² Mia mokabhongo-bhongo apogau i nuncana
ngangarandana,
"Inda dhaangia o Aulata'ala."
Pewauna manga incia amadhaki tee atomarika,
inda dhaangia mopewauna kalape.

³ Minaaka i sorogaa, Aulata'ala
atonto anana maanusia,
to akamata ara dhaangia o mia mo'arifu,
mopeelona Aulata'ala.

⁴ Bhari-bharia mia abholi dhala mobanara tee
akarajaa giu momadhaki.
Inda dhaangia mopewauna kalape,
moomini samia uka.

⁵ Firimanina Aulata'ala, "Buaka apesua i akala,
ande manga mia mopewauna kadhaki
inda amatau giu momalape?
Manga incia apekaoge karoni tee akande
uumatiku mboomo akande roti,
tee inda ado'a i Iaku."

⁶ Maka iwe sumai manga incia bheamaeka mpuu,

53: 53:1 14:1-7. * **53:1 53:1** Zaburu incia sii apokana tee
Zaburu 14, somanamo dhaangia tee posalana. **53:2 53:2-4** Rom.
3:10-12. **53:2 53:2-7** Zab. 14.

garaaka inda dhaangia o giu imaeka!
Sababuna Aulata'ala apekantale bukuna manga
mia moewangiko.

Ingkoo bheupekatalo tee upekaea manga
incia, sababuna o Aulata'ala amendeu
manga incia.

⁷ Maasangia o kasalaamati to miana Israel aumba
minaaka i Sion, kotana Aulata'ala!
Wakutuuna Aulata'ala apambuli kadhaan-
giana uumatina,
siwuluna Yakub bheamasanaa o namisina
tee o miana Israel bheakaunde-unde.

54

Do'a Emaniana Peulusa

54:1-9

- ¹ To kapalana molaguna.
Tee kagasiana kecapi. Lagu kaadharina Daud
² wakutuuna miana Zifi aumba apogauaka i Raja
Saul, "Daud apeopo i ingkami."

³ E Aulata'ala pasalaamatiaku roonamo saromu,
tee adilia parakaraku roonamo kakaamu.
⁴ Maasangia urangoa do'aku, e Aulata'ala,
rangoa manga pogau ibhoasakaku.

⁵ Manga mia momalangana incana akakaro ae-
wangiaku,
tee manga mia mosombo gauna bheaala in-
yawaku.
Manga incia inda afaduliaka Aulata'ala.

Sela

- ⁶ Satotuuna Aulata'ala motulungiaku,
Kawasana Opu modhambaakaaku.
- ⁷ Taroakamo kadhaki ambuli akangkanai manga
musuku.
Roonamo kaasimu molagina, pabinasamea
manga incia!
- ⁸ Tee relana totona incaku, iaku bhekupasom-
baaka kurubani to Ingkoo.
Iaku bhekusukuru tee Ingkoo, e KAWASANA
OPU, roonamo saromu amalape.
- ⁹ Roonamo Ingkoo padhamo urambasakaaku mi-
naaka i sagala kanarakaa,
sabutuna kukamata musuku amatalo.

55

*Do'a Emani Peulusa minaaka i Kahandana
Musu*

55:1-24

- ¹ To kapalana molaguna.
Tee kagasiana kecapi. Lagu kaadharina Daud.
- ² E Aulata'ala, perangoia o do'aku,
tee bholi inda ufaduliakea giu iemaniku.
- ³ Kamataaku tee tulungiaku!
Kulilaho tee kupekidhei
- ⁴ roonamo kahandana musu
tee roonamo kapisakina mia madhaki.
- Manga incia apanarakaaku,
manga incia a'amaraikiaku tee abanciaku.

- ⁵ Ngangarandaku abagoea,
kamingkirina mate aoseaku.
- ⁶ Iaku kurengku tee kumaeka mpuu,
kamingkiri akuasaiaku.
- ⁷ Iaku kupogau, "Ande kukopani mboomo manu-
manu jarajara!
Iaku bhekupolaka tee kupeelo tanpa moma-
lino.
- ⁸ Umbe, iaku bhekulingka maridho mpuu,
tee kumboore i tana matuu.
- ⁹ Iaku bhekupekadhei kupeelo tanpa peulusaku
minaaka i ngalu makaa tee garura." Sela
- ¹⁰ E Kawasana Opu, upabingumea manga
musuku tee upapogeso-gesomea pogauna,
roonamo kukamata mia apewau kasega tee
apogera i nuncana kota.
- ¹¹ Malo eona manga incia apektii-tii i bhawona
rindina bente motiingina kota,
tee i nuncana kota apewau kadhaki tee apa-
narakaa mia.
- ¹² Manga incia apabinasa mia i tanga-tangana
kota,
i dhaoa manga incia sadhaadhaa
apekapisaki tee apektipuu.
- ¹³ Ande o musuku abanciaku,
amembali kukapoia,
ande o bhaliku ahinaaku
amembali kupekaridho.
- ¹⁴ Maka ingkoo mboomo samia witinaiku!
Sabhangkaku! Sampomatauku malape!
- ¹⁵ I piamo itu ingkita taposabhangka malape,

tee tapobhawa-bhawa talingka i bhanuana
Aulata'ala i tanga-tangana mia bhari!

- 16 Taroakamo manga musuku amate inda atom-
atau,
tee asapo akadhadhi-dhadhi i duniana mia
mate,
roonamo kadhaki dhaangia i mbooresana
tee i tanga-tangana manga incia.

- 17 Maka iaku bhekugora i Aulata'ala,
tee KAWASANA OPU bheapasalaamatiaku.

- 18 Wakutuuna konowia, saeona, tee pontanga eo,
kupeenci tee kupekidhei,
tee Incia uka bhearango suaraku.

- 19 Incia bheatolosiaku
minaaka i musu mobhaliaku,
roonamo abhari mia moewangiaku.

- 20 Aulata'ala, mokokauncuramakana pepuu i za-
mani i piamo itu,
bhearangoa do'aku tee apekatalo manga in-
cia,
roonamo manga incia amendeu atoba
tee inda amaeka i Aulata'ala.

Sela

- 21 Mia mopadhana kuabhia witinaiku incia sumai
apacilaka sabhangkana,
tee incia inda akeniakea janjina.

- 22 Bhoasakana ama'alusu mpuu to aala-ala inca,
maka neatina to apacilaka mia.

Pogauna amararo alabhi minaaka i mina,
maka satotuuna bhari-bharia sumai
mboomo ewanga momatadha.

23 Pasarakaakamea o bhawamu i KAWASANA
OPU,
sumaimo Incia bheadhambaakako,
tee inda bheataroaka mia mobanara abagoea
sa'umurua.

24 Maka Ingkoo, e Aulata'ala, bheupapesua
manga incia
i nuncana kabhalongko momandalana
mpuu.

Manga pande pekamate tee pande pekagau
inda bheakawa samuntanga umuruna.

Maka, iaku kuparacaea i Ingkoo.

56

*I Nuncana Kanarakaa, Taharapu i Aulata'ala
56:1-14*

¹ To kapalana molaguna.

Mboomo lagu: Manu-manu jarajara mopopo-
teona i puuna kau tarbantin* momaridho.
Zaburuna Daud wakutuuna miana Filistin
arako incia i Gat.

² E Kawasana Opu, maasiakaaku roonamo manga
mia alanda-landakiaku
tee saeoa apisakiaku.

³ Manga musuku sadia alanda-landakiaku,
abhari mia moewangiaku, e Aulata'ala Mo-
malanga!

⁴ I wakutuuna kumaeka,
kuparacaea i Ingkoo.

56:1 56:1 1Sa. 21:12. * **56:1 56:1** *tarbantin*: Sagi puuna kau
maoge tee rahana abhari mboomo puuna kau wuraha.

- ⁵ Iaku kupuji firimanina Aulata'ala,
tee kuparacaea i Aulata'ala, siitumo inda
bhekumaeka.
Opea momembalina ipewauna maanusia to
iaku? Inda dhaangia!
- ⁶ Saeoa musuku apatiipambuli pogauku,
bhari-bharia haejatina manga incia to iaku
amadhaki.
- ⁷ Manga incia aporomusaka tee apeopo,
alukuti bhengkalaku,
tee ahaejati apekamateaku.
- ⁸ Balasia manga incia to kadhakina ipewauna;
e Kawasana Opu, patobhatamea manga lipu
tee amaramu!
- ⁹ Ingkoo umataua saopea kabharina
kanarakaaku,
Udhika loluku i nuncana butolomu.
Buaka bhari-bharia dhaangia i nuncana
kitabimu?
- ¹⁰ Sumaimo manga musuku bheasowo
i wakutuuna kugora.
Tee mboo sumai, kumataua
ande Aulata'ala aewaakaaku.
- ¹¹ Iaku kupogauaka kalape to KAWASANA OPU
tee kupuji firimanina,
roonamo Aulata'ala adhawu janji momalape.
- ¹² Iaku kuparacaea i Incia, siitumo iaku inda
bhekumaeka.
Opea momembalina ipewauna maanusia to
iaku?

- ¹³ E Aulata'ala, kuwaajibu bhekupewaua tolauna
oniku tee Ingkoo,
bhekupasombaaka kurubani kasukuru i In-
gkoo.
- ¹⁴ Sababuna Ingkoo upasalaamatiaku minaaka i
mate,
tee ujaganiaku sabutuna inda kutosunu.
Tee mboo sumai, iaku kumembali kulingka i
aroana Aulata'ala
i nuncana kainawana dhadhi.

57

*Apajerea Musu, maka Atulungia Kawasana
Opu*

57:1-12

- ¹ To kapalana molaguna.
Mboomo lagu: Bholi upahancuru. Zaburuna
Daud, wakutuuna incia apalaiaka Saul tee
aopo i nuncana lia.
- ² Maasiakaaku, e Aulata'ala, maasiakaaku,
roonamo i Ingkoomo kupeulu.
I tambena panimu iaku kupeulu,
sakawana garura sumai aunto.
- ³ Iaku kudo'a kuemani tulungi i Aulata'ala Moma-
langa,
Aulata'ala apamondo ihaejatiakana to dhad-
hiku.
- ⁴ Maasangia Incia bhealawaniaku minaaka i
sorogaa tee apasalaamatiaku,
Incia bheapa'aebu manga mia molanda-
landakiaku.

Sela
Aulata'ala alamboko kaasina molagina tee inda
bheamabhotu janjina tee iaku sa'umurua.

⁵ Iaku kudhaangia i tanga-tangana musu,
manga incia mboomo singa mobhembaruna
maanusia.
Ngincina amatadha mboomo pandanga tee
anana pana,
tee dhelana mboomo ewanga momatadha.

⁶ E Aulata'ala, susuakea kaogesamu i laiana
tee kamuliangimu i saangua alamu.

⁷ Manga musuku ataa katapu to iaku,
sakawana amate akalaku.
Manga incia aseli kabhalongko i aroaku to
apacilakaaku,
maka o karonu manga mokotibuna.

Sela

⁸ Ngangarandaku amatangka, e Aulata'ala, ngan-
garandaku amatangka.
Gauku bhekulaguaka lagu kapujia to Ingkoo.

⁹ Iaku bhekubhangu
tee kumagasiaaka gambusu tee kecapil!
Iaku bhekubhangu raneeooge!

¹⁰ Iaku bhekusukuru i Ingkoo i tanga-tangana
manga lipu, e Kawasana Opu,
tee kulaguaka manga lagu kapujia.

¹¹ Sababuna kaasimu molagina amaoge akawa i
laiana,

tee kabanaramu akawa i ta'ina ngalu.

- ¹² E Aulata'ala, susuakea kaogesamu i laiana,
tee kamuliangimu i saangua alamu.

58

Do'a Emaniana Kabalasina to Mia Madhaki
58:1-12

- ¹ To kapalana molaguna.
Mboomo lagu: Bholi upahancuru. Zaburuna
Daud.
- ² E manga mia mokokuasa,* atotuu buaka ud-
hawu kambotu mobanara?
Buaka ujujuru i wakutuuna u'adili maanu-
sia?
- ³ Inda, uhaejatiaka momadhakina i nuncana
ngangarandamiu,
tee upewau kasega tee limamiu i bhawona
alamu.
- ⁴ Mia madhaki asaladhala pepuu minaaka
alaahiri,
tee agau-gau minaaka i nuncana kadhuma.
- ⁵ Manga incia mboomo ulo mokobisa
tee mboomo ulo momabhongo momendeuna
morango
- ⁶ sabutuna inda arango suarana pande parikana
ulo,†

* **58:2 58:2** *mia mokokuasa*: I nuncana pogau Ibrani, oni *elim*
dhaangia ma'ana 'mokokuasa' atawa 'opu' atawa 'dewa.' † **58:6**
58:6 *pande parikana ulo*: Mia motowiina suli mamudhaakana ulo
maila amembali ulo manea tee inda apapaki mia.

moomini suarana pande baca do'a mo'ahalii.

⁷ E Aulata'ala, upahancurumea o ngincina i nuncana ngangana.

Hobutimea nginci mantoana manga singa mangura, e KAWASANA OPU!

⁸ Taroakamo manga incia aila mboomo uwe motobusaka kasiimpo indamo atokamata.

Wakutuuna manga incia ahela panana, o panana manga amembalimo amakundu.

⁹ Taroakamo manga incia mboomo bhiku morere amembali nggalanggala,

mboomo rahasia momatena i nuncana kad-huma tee indapo akamata matana eo.

¹⁰ Indapo asadaria, manga incia abinasamo, ibaratina mboomo rumpu mokorui momaijo tee indapo amaoge,

maka aporikanamo atowiia ngalu tee apolakaakea mboomo penembulana momalau.

Amarana Kawasana Opu bheakangkanaia i wakutuuna manga incia dhaangiapo adhadhi.

¹¹ Mia mobanara bheakaunde-unde wakutuuna manga incia akamata kabalasina to mia madhaki,

tee abhanui aena tee raana manga incia.

¹² Mia bheapogau, "Totuu dhaangia fahala to mia mobanara!

Satotuuna, Aulata'ala modhawuna ka'adili i alamu!"

59

*Do'a Emaniana Mamudhaakana Tasalaamati
minaaka i Manga Musu*

59:1-18

¹ To kapalana molaguna.

Mboomo lagu: Bholi upahancuru. Zaburuna Daud, siitumo wakutuuna Raja Saul atumpu mia to alibu bhanuana Daud tee ahaejati to apekamatea.

² E Aulata'alaku, rambasakaaku minaaka i manga musuku,
jaganiaku minaaka i manga mia moewangiaku.

³ Rambasakaaku minaaka i manga mia mopewauna kadhaki,
tee pasalaamatiaku minaaka i pande pekamatena mia.

⁴ Kamatea, manga incia aopo tee aantagiaku kulalo mamudhaakana amembali apekamateaku,
manga mia makaa aporomusaka to aewangiaku,
garaaka iaku inda kupewau kasalaha,
tee uka inda kupewau dosa, e KAWASANA OPU.

⁵ Moomini inda dhaangia o kasalahaku,
manga incia abuntuli tee amakanu aewangiaku.

Bhangumo, upokawaakaaku tee ukamata kad-
haangiaku!

⁶ E KAWASANA OPU, Ingkoo Aulata'alana
saangua alamu isombana miana Israel.

Maasangia ubhangumo to uhukumu bhari-
bharia lipu!

Bholi umaasi i bhari-bharia mia mopewauna
kadhaki tee pande hianati.

Sela

⁷ I wakutuuna konowia manga incia ambulimo,
tee akaolu-olu mboomo mantoa mobuliling-
ina kota.

⁸ Kamatea, ngangana manga incia apekasindiri!
Dhelana manga incia mboomo ewanga mo-
matadha,
roonamo manga pande hianati afikiri, "Inda
dhaangia manga rangona!"

⁹ Maka Ingkoo, upotawaiki manga incia, e
KAWASANA OPU,
Ingkoo uele-ele bhari-bharia lipu.

¹⁰ E kakaaku, iaku bhekuantagiko;
roonamo Ingkoo, e Aulata'ala, satotuuna o
kota benteku.

¹¹ Aulata'ala i nuncana kaasi molagina bhe-
mopokawaakaaku,
tee bheataroakaaku kukamata manga
musuku atotalo.

¹² Bholi upekamate manga incia mamudhaakana
lipuku inda amalingu;
maka tee kuasamu upapogaa-gaaia

tee pakotibumea manga incia, e Aulata'ala,
peulusamami!

- 13 Roonamo dosa minaaka i muncuna tee pogau
ibhoasakana dhelana,
taroakamo manga incia atorako i nuncana
kasombona.

Roonamo katunda tee kagau-gau ibhoasakana
manga incia,

- 14 pabinasamea i nuncana amaramu;
pabinasamea sampe amapupu.

Tee mboo sumai, mia bheamataua ande
Kawasana Opu aparintangi lipuna Israel,
tee uka bhari-bharia lipu i dunia.

Sela

- 15 I wakutuuna konowia manga incia ambulimo,
tee akaolu-olu mboomo mantoa atiingi kota.

- 16 Manga incia apekalingka-lingka apeelo kinan-
dena,
tee akaolu-olu ande inda amambosu.

- 17 Maka iaku bhekulaguaka kuasamu,
i saeona iaku bhekusambo-sambo roonamo
kaasimu molagina,

sababuna Ingkoo mboomo bente mojanianaku
tee tampana peulusaku i wakutuuna ka-
narakaaku.

- 18 E kakaaku, i Ingkoomo iaku bhekulaguaka
manga lagu kapujia,
roonamo Ingkoomo, e Aulata'ala, benteku
mojanianaku,
Kawasana Opu momaasiakaaku.

60

*Do'a Emaniana Kamangantalo**60:1-14*

¹ To kapalana molaguna.

Aose lagu: Kamba Bakung Kasakusii. Zaburuna Daud, to atoadhariaka

² wakutuuna incia aewangi miana Aram-Naharaim tee miana Aram-Zoba, tee wakutuuna Yoab ambuli sapadhana apekamate 12.000 miana Edom i Mbolongana Asin.

³ E Aulata'ala, Ingkoo padhamo manga mendeu, tee utaroaka manga musu akatuki katangkesimami.

Ingkoo u'amara tee ingkami, maka sii-sii upekalapea pendua kadhaangiamami mi-naaka i kanarakaa.

⁴ Ingkoo padhamo ulendu alamu tee upaporu-awetaia, tulungi upekalapea pendua manga ngkole-lena, roonamo dunia sii atorende.

⁵ Utaroakea uumatimu anamisi giu momatamo, upasumpu ingkami angguru sakawana tadida.*

⁶ Ingkoo padhamo upabhale tombi to manga mia momaekana tee Ingkoo

60:2 60:2 2Sa. 8:13; 1Taw. 18:12. * **60:5 60:5** *angguru sakawana tadida*: Ibaratina momatadha to agambaraaka hukumuna to uumatina Aulata'ala inda mota'atina.

mamudhaakana manga incia aporomusaka
iwe sumai to apeulu minaaka i manga
pande pana.

Sela

⁷ Manga pakana tee kuasamu tee uperangoimea
o do'amami,
mamudhaakana manga mia imaasiakamu
atopasalaamati.

⁸ Aulata'ala padhamo afirimani i tampana mo-
mangkilo,
"Iaku gauku kukaunde-unde, tee
kupodhawu-dhawuaka Tana Sikhem,
tee ku'ukuru Mbolongana Sukot.

⁹ Gilead tee Manasye o pewauaku,
Efraim mboomo helem minaaka i ase moja-
ganina bhaaku,
tee Yuda katukona pamarintaku.

¹⁰ Maka o Tana Moab amembali palangga tam-
pana bhanuiana aeku,
tee i bhawona Tana Edom kutudhaaka san-
daliku.[†]
E Tana Filistin, Iaku kusambo-sambomo
roonamo padhamo kotaloko!"

¹¹ Incema bhemobhawaaku i kota mokobentena
makaa sumai?
Incema momembalina mo'antaraaku
sakawana i Edom?

¹² E Aulata'ala, buaka mencuana Ingkoo mangab-
hanakana?

60:7 60:7-14 Zab. 108:7-14. † **60:10 60:10** *kutudhaaka sanda-
liku*: To ibarati ande o lipuna Moab tee Edom bheapaporitambea
Aulata'ala.

E Aulata'ala, Ingkoo inda umaju upobhawa
tee tantaramami to taewangi musu.

¹³ Manga tulungi minaaka i musu,
roonamo o katulungina maanusia inda ako-
guna.

¹⁴ Tapobhawa tee Aulata'ala ingkita tamembali
tatalo musuta,
sababuna Incia bhemopahancuruna musuta.

61

Do'a Emaniana Peulusa

61:1-9

¹ To kapalana molaguna.
Tee kagasiana kecapu. Zaburuna Daud.

² E Aulata'ala rangoa igoraakaku,
perangoia o do'aku.

³ Minaaka i tapana alamu kugoraakako
wakutuuna amate akalaku.

Bhawaaku i gunu bhatu
molabhina kalangana minaaka i karoku

⁴ roonamo Ingkoomo peulusaku,
munara momakaa to kupeuluaka minaaka i
musuku.

⁵ Taroakamo sa'umurua dhadhiku kumboore i
nuncana Kema Momangkilomu,
mamudhaakana ku'amani i nuncana peulu-
sana panimu.

⁶ Sababuna Ingkoo padhamo urango tolauna
oniku, e Aulata'ala, Sela

tee padhamo udhawuaku tinauraka
idhawuakamu to mia momaekako.

- ⁷ Maasangia upekarambe umuruna raja,
mamudhaakana incia adhadhi sa'umurua.
⁸ Maasangia incia amembali raja sa'umurua i
aroana Aulata'ala,
parintaakamea o kaasimu molagina tee jan-
jimu inda momabhotu to mojanania.
⁹ Sumaimo iaku sadia bhekulaguaka lagu kapujia
to saromu,
tee kupomea tolauna oniku saesaeo.

62

Namisi Momalimua i Saripina Aulata'ala *62:1-13*

- ¹ To kapalana molaguna.
Mboomo: Yedutun. Zaburuna Daud.
² Tangkanamo i saripina Aulata'ala o namisiku
amalimua,
minaakamo i Incia o kasalaamatiku.
³ Tangkanamo Incia gunu bhatuku tee
mopasalaamatiaku,
Incia mboomo kota bente moewaakaaku,
iaku inda bhekukohudha sampeampearo.
⁴ Sakawana naepia ingkomiuhumbuni mia?
E bhari-bharikomiu, buaka ingkomiuhueb-
hebhe mia ihumbunimiu,
mboomo ubhebhe rindi mobhele tee tondo mo-
makasuna motobhata?

5 Manga incia tangkanamo ahaejati to apasabua
minaaka i kauncuramakana momalan-
gana,
manga incia sadia agau-gau,
tee o muncuna manga incia aemani barakati,
maka i nuncana ngangarandana
apekatunda.

Sela

*

6 E ngangarandaku, tangkanamo i Aulata'ala o
namisiku amalimua
roonamo tangkanamo Incia iharapuku.

7 Tangkanamo Incia o gunu bhatuku tee
mopasalaamatiaku,
Incia o benteku, iaku inda bhekukohudha.

8 Aulata'ala modhawuaku kasalaamati tee
mopamembaliaku kumulia,
Incia o gunu bhatuku momakaa tee o tam-
pana peulusaku.

9 E manga witinai, sadio uparacaea i
Aulata'ala,
palimbamea antona ngangarandamu i
aroana,
sababuna Incia o tampana peulusata.

Sela

10 Mia mohina mboomo sampearo poinunca,
tee o mia momulia inda amembali atopara-
caea.

* 62:5 62:5 Sela: Aipomo tandana to aunto wakutuuna lagu
sumai atolaguaka, atawa o tanda to ahanda apekaogea o suarana,
atawa onina gambusuna.

Atotimbangi manga incia bhari-bharia amagaa-
gaa,
alabhi o kagaa-gaana minaaka i ngalu.

¹¹ Bholi uparacaea tee hasili ipotibhaakamiu mi-
naaka i uhanda mia,
tee bholi uharapuaka harataa irampasi.

Ande o harataamiu ajulu o kabharina,
incamu bholi aposaronaka i harataamiu
sumai.

¹² Sampearo Aulata'ala afirimani,
rua giu irangoku,
siitumo ande o kuasa minaaka i Aulata'ala,
¹³ tee minaaka i Ingkoo uka o kaasi molagina,
e Kawasana Opu.

Roonamo Ingkoo mobalasina bhari-bharia mia
apokana mboomo ipewauna.

63

Pemelili i Kawasana Opu

63:1-12

¹ Zaburuna Daud wakutuuna incia adhaangia i
Tana Matuuna Yuda.

² E Aulata'ala, Ingkoomo Aulata'alaku, iaku ku-
peeloko,
tee gauku kupokawa tee Ingkoo.
Saangua badaku apemeliliakako,
mboomo mia molingkana i tana matuu mo-
faraluuna uwe.

62:13 62:13 Ayb. 34:11; Yer. 17:10; Mat. 16:27; Rom. 2:6; Wah.
2:23. **63:1 63:1** 1Sa. 23:14.

- 3 Mboo sumaimo kutontoko i tampamu mo-
mangkilo
to kukamataaka kuasamu tee kamuliangimu.
- 4 Roonamo kaasimu molagina alabhi akoharagaa
minaaka i dhadhi,
sababuna sumai kupujiko.
- 5 Mboo sumaimo bhekupujiko sa'umurua dhad-
hiku,
tee kuangka limaku to kumuliangi saromu.
- 6 Atumpu incaku, mboomo tee kinande momam-
baka,
tee kupujiko tee bhiwiku mokaunde-unde,
- 7 wakutuu kuudhaniko i kolemaku,
tee kufikiriko samaloa.
- 8 Roonamo Ingkoomo motulungiaku,
i tambena panimu iaku kusambo-sambo.
- 9 Ngangarandaku bheakeniakako pekatangka,
lima kaanamu atukoaku.
- 10 Maka manga mia mohaejatina mopeka-
mateaku
bheapesua i tambena tana tee manga mia
mate;
- 11 manga musuku bheatopekamateaka tee hancu,
tee amembali kinandena serigala.
- 12 Maka raja bheakaunde-unde roonamo katu-
lungina Aulata'ala;
bhari-bharia mia moposumpna tee
Aulata'ala bheabangga,
roonamo Incia bheasoncongi ngangana
manga pande gau-gau.

64

Kahukumuna Aulata'ala to Mia Madhaki *64:1-11*

¹ To kapalana molaguna. Zaburuna Daud.

² E Aulata'ala, maasangia urango do'aku i waku-
tuuna kupeenci,
pasalaamatia inyawaku minaaka i kasegana
musu.

³ Jaganiaku minaaka i haejati irahasiaakana
manga mia madhaki,
tee minaaka i isikadina manga mia mope-
wauna kadhaki.

⁴ Pogauna manga amatadha mboomo hancu,
tee pogau ibhoasakana amapii mboomo
anana pana.

⁵ Manga incia apana manga mia inda mosala
minaaka i tampana opoana,
sumaimo alausaka apaneana inda tee kaekana.

⁶ Manga incia sadia ahaejatiaka momadhakina,
apomufakati to ataa katapu tee apobuniaka,
tee apogau i nuncana ngangarandana, "Inda
dhaangia manga kamatana!"

⁷ Manga incia ahaejatiaka kadhaki tee apogau,
"Ihaejatiakamami amondomo!"

Manga incia abuniaka opea ihaejatiakana,
roonamo ngangarandana maanusia inda
amembali amataua mia mosagaanana.

⁸ Maka Aulata'ala apana manga incia
tee saanampuu manga incia amambela.

⁹ Aulata'ala bheapasindoli manga incia ram-
paakanamo dhelana;

- bhari-bharia mia mokamatea bhearengku
tee abhibhi.
- 10 Bhari-bharia mia bheamaeka;
manga incia bheapetulatulaaka opea mopad-
hana ipewauna Aulata'ala,
tee bheafikiri opea mopadhana ipewauna.
- 11 Taroakamo mia mobanara akaunde-unde
roonamo KAWASANA OPU
tee apeulu i Incia.
- Taroakamo bhari-bharia mia momakatena in-
cana bheabangga tee Incia!

65

Kasukuru to Barakati Idhawuakana Aulata'ala 65:1-14

- 1 To kapalana molaguna. Zaburuna Daud.
Laguna.
- 2 E Aulata'ala, alaengamo ingkami tapujiko i Sion,
tee tapomea o tolauna onimami i Ingkoo.
- 3 Sababuna Ingkoomo moperangoina do'a,
i Ingkoomo bhari-bharia maanusia bheaumba.
- 4 Wakutuuna dosamami alabhi o katamona mi-
naaka i kakaamami,
Ingkoomo mo'amponina kasalahamami.
- 5 Amasanaamo mia ipilimu tee ipekakasumu
to amboore i aroana Bhanuamu.
Bheapatumpu incamami tee bhari-bharia moma-
lapena modhaangiana i Bhanuamu,
siitumo i nuncana Baitullamu momangkilo.
- 6 Tee manga pewaumu mo'adili tee inda mo-
mentela

Ingkoo ulawani ingkami,
e Kawasana Opu, mopasalaamatina ingkami.
Ingkoomo iparacaeana saangua alamu
tee i tawo momaridho mpuu.

⁷ Minaaka i kakaamu, upakaro manga gunu;
upakanaakea kuasamu momakaana.

⁸ Ingkoomo mopauntona suarana pamuruna
tawo,
siitumo suarana pamuruna ewona,
tee karobhona manga lipu.

⁹ Manga mia i saangua alamu
amaeka akamata manga tanda inda mo-
mentela ipewaumu.

Minaaka i timbu sakawana i bhara,
upewaua asambo-sambo tee akaunde-unde.

¹⁰ Tana sumai udhambaakea tee udhawua wao,
Upasuburua sabutuna hasilina abhari mpuu.
Umalana Aulata'ala abukeaka tee uwe,
tee upasadiaakea gandum to maanusia,
mboo sumaimo upatotapuakea.

¹¹ Ingkoo sadia upakouwe tana ibhingkunina,
tee uparatea manga tongkana tanana,
upekagodhea tee wao,
tee ubarakati manga penembulana.

¹² Roonamo kalapemu, satao-satao udhawuakea
timpua,
I iapaipo ubhengkala, ubholi manga giu mo-
malape.

¹³ Manga rumpu i tana matuu atuwu asuburu,
manga gunu akaunde-unde.

¹⁴ Manga tana mokorumpu abukeaka gulumana
dumba,

tee manga mbolonga atipuaka gandum.
Bhari-bharia asambo-sambo tee alagu
akaunde-unde.

66

Kasukuru roonamo Miana Israel Atotulungi
66:1-20

¹ To kapalana molaguna. Laguna Zaburu.

Sambo-sambomo to Aulata'ala, e saangua alamu!

² Laguakamo manga lagu kapujia tee umu-
liangimea o sarena,
muliangimea o kapujiana to Incia.

³ Pakawaakea i Aulata'ala, "Tapanamo atomaeka
ipewaumu!

Roonamo kuasamu amaoge, sumaimo o
musu-musumu atungku tee arengku i
aroamu.

⁴ Saangua dunia asuju asombako.

Manga incia apuji-pujiko,
tee alaguaka lagu kapujia to saromu."

Sela

*

⁵ Mai, kamatea opea ipewauna Aulata'ala,
ipewauna inda momentela to maanusia.

⁶ Incia abhali tawo amembali tana matuu,

* **66:4 66:4** Sela: Aipomo tandana to aunto wakutuuna lagu
sumai atolaguaka, atawa o tanda to ahanda apekaogea o suarana,
atawa onina gambusuna. **66:6 66:6** Limb. 14:21-29.

tee manga opu-opuata apolimba i umala tee
adhala ae.[†]
Siitumo ingkita takaunde-unde roonamo bhari-
bharia ipewauna.

⁷ Incia aparinta tee kakaana to sa'umurua,
tee o matana ajagani manga lipu
mamudhaakana manga mia mobhalia inda
asomboaka karona.

Sela

⁸ Pujimo Aulata'alamami, e manga lipu,
parangoakamea o kapujiamiu i Incia!

⁹ Incia mojagani inyawamami mamudhaakana
inda tamate,
tee inda ataroakea o aemami asindoli.

¹⁰ E Aulata'ala, Ingkoo padhamo manga uuji,
tee manga pekangkilo mboomo mia
mopekangkilona pera i nuncana waa.

¹¹ Ingkoo upapesua ingkami i nuncana jari,
tee udhika bhawa momatamo i bhawona
torukumami.

¹² Ingkoo utaroakea manga mia alanda-landaki
bhaamami.
Ingkami talaloi waa tee mawa,

[†] **66:6 66:6** I aeati incia sii, moburina zaburu incia sii apogauaka
rua kajadia inda momentela iapai Aulata'ala atulungi miana
Israel apolimba i uwe. Wakutuuna Musa tee miana Israel
abholi Mesir, manga incia amembali apalaiiaka karona minaaka i
tantarana Firaun sapadhana Aulata'ala aweta Tawo Towu Lambe
mamudhaakana manga incia amembali adhala i tanga-tangana
tee akawa i sawetana. Kasiimpo 40 tao i aroa, Aulata'ala apaunto
siwuluna Umala Yordan mamudhaakana Yusak tee miana Israel
adhala i tanga-tangana umala incia sumai tee apesuaiiki Tana
Kanaan.

maka Ingkoo ubhawa ingkami i tampa momalape tee momalalesa.

13 Iaku bhekupesua i nuncana bhanuamu tee kubhawa kurubani itunu.

Iaku bhekupomea tolauna oniku

14 ibhoasakaku minaaka i ngangaku i wakutuuna kumaseke.

15 Iaku bhekupasombaaka to Ingkoo
manga kurubani itunu minaaka i binata momalombo,
tee momawonduna bhouna minaaka i dumba umane.

Iaku bhekupasombaakako manga sapi umane tee bhembe umane.

Sela

16 Mai perangoia, e bhari-bharia mia momaeka i Aulata'ala!

Iaku bhekupetulatulaaka opea mopadhana ipewauna to iaku.

17 Tee ngangaku kugoraakea
sabutuna o dhelaku alaguaka lagu kapujia to Incia.

18 Ande kumaasiaka giu madhaki i nuncana ngangarandaku,
atantum o Aulata'ala amendeu aperangoiaku.

19 Maka o Aulata'ala aperangoia,
Incia amaheruakaaku wakutuuna kudo'a.

20 Atopujimo o Aulata'ala,
moperangoina do'aku

tee inda apekaridhoakaaku o kaasina molag-
ina minaaka i karoku.

67

Kasukuru to Bhari-bharia Barakati
Idhawuakana Aulata'ala
67:1-8

- ¹ To kapalana molaguna.
Tee kagasiana kecapu. Laguna Zaburu.
- ² Maasangia o Aulata'ala manga maasiaka tee
manga barakati,
maasangia Incia manga kamata tee kalapena
incana,
- ³ tee mboo sumai, maanusia i bhawona alamu sii
amataua opea ipeelumu to manga incia,
tee bhari-bharia lipu amataua ande Ingkoo
mokokuasana to mopasalaamatina manga
incia.
- ⁴ E Aulata'ala, maasangia manga lipu apujiko,
maasangia bhari-bharia lipu apujiko.
- ⁵ Maasangia manga lipu akaunde-unde tee
asambo-sambo
roonamo Ingkoo tee ka'adili uhaakimu
manga lipu,
tee utonda bhari-bharia lipu i bhawona
alamu.
- ⁶ Maasangia manga lipu apujiko, e Aulata'ala,
maasangia bhari-bharia lipu apujiko.
- ⁷ Alamu padhamo adhawuaka hasilina;

Aulata'ala, Aulata'alata, padhamo abarakati ingkita.

- ⁸ Maasangia Aulata'ala manga barakati torosu;
maasangia bhari-bharia lipu i bhawona
dunia amaekaia.

68

Lagu Kamangantalona Kawasana Opu

68:1-36

- ¹ To kapalana molaguna. Zaburuna Daud.
Laguna.

- ² Taroakamo Aulata'ala akakaro tee apewau
musuna apogaa-gaa;
taroakamo manga mia mobancia amatalo tee
apalai minaaka i aroana.

- ³ Mboomo ombu aila wakutuuna atowiia ngalu,
taroakamo Ingkoo uwulu manga incia.
Mboomo taru arere i aroana waa,
taroakamo mia madhaki abinasa i aroana
Aulata'ala.

- ⁴ Maka taroakamo o mia mobanara akaunde-
unde,
taroakamo manga incia amasanaa i aroana
Aulata'ala,
tee taroakamo manga incia asambo-sambo
tee akaunde-unde.

- ⁵ Lagumo to Aulata'ala, laguakamo lagu kapujia
to saronal!
Pasiapuakea dhala oge to Incia mosawina i
ta'ina ngalu!*

Saronal o KAWASANA OPU,

* **68:5 68:5** *mosawina i ta'ina ngalu:* Pogau kabhanti mokotandana o kaogesana Aulata'ala.

- kaunde-undemo i aroana!
- 6 Amana manga ana maelu tee moewaakana
manga iaiaro
siitumo o Aulata'ala i tampana mbooresana
momangkilo.
- 7 Mia momboorena samia-miana Aulata'ala
aposaangua i nuncana saangu bhanua,
Incia apabebasi mia mototorongku sabutuna
manga incia amasanaamo dhadhina,
maka manga mia mobhalia amboore i tana
matuu.
- 8 E Aulata'ala, wakutuuna ukapalai uumatimu
wakutuuna apotimbe,
tee wakutuuna ulaloi tana matuu, Sela
- 9 alamu akolendu, tee o laiana apasapo wao,
roonamo umbaana Aulata'ala isombana miana
Israel,
siitumo isarongiakana Aulata'ala i Sinai.†
- 10 E Aulata'ala, amaranca mpuu Ingkoo upasapo
wao,
tee upasuburu tana tinaurakamu‡ i wakutu-
una amatuu;
- 11 sabutuna o uumatimu ambooresia.
E Aulata'ala, tee kalapemu udhawuakea
bhari-bharia ifaraluuna mia misikini.
- 12 Kawasana Opu apakawaaka firimanina,

68:8 68:8-9 Limb. 14:12; 19:18. † 68:9 68:9 Aulata'ala i Sinai: Aulata'ala apatokamataaka karoni i miana Israel i Gunu Sinai wakutuuna manga incia alingka minaaka i Mesir aporope i Kanaan. Kamata Limb. 19:16-25. ‡ 68:10 68:10 tinaurakamu: Siitumo Tana Kanaan, idhawuakana Kawasana Opu to miana Israel.

- tee rombongana mia bhari§ mobhawana lele
malape sumai.
- 13 "Manga raja tee tantarana apalai, umbe, apalai-
iaka karona!"
Manga bhawine momboorena i nuncana
bhanua apodhawu-dhawuaka bara iram-
pasi minaaka i tampana potimbea.
- 14 Moomini ingkomi apotidhole i tanga-tangana
kandana dumba,
bara irampasimiu mboomo panina jarajara
ilapisiaka pera,
buluna minaaka i bulawa mokokila!
- 15 Wakutuuna o Kawasana Opu Mokokuasana
apapogaa-gaa manga raja iwe sumai,
asapomo salju i Gunu Zalmon.
- 16 Gunu Basan o gunu momakaa.
Gunu mobharina tubuna, siitumo o Gunu
Basan.
- 17 E Gunu Basan mobharina tubuna, pokia ingkoo
ugigibulu
tee Gunu Sion ipilina Aulata'ala to amembali
tampana kauncuramakana?
Satotuuna o KAWASANA OPU bheamboore
iwe sumai sa'umurua!
- 18 Kawasana Opu aumbamo minaaka i Gunu
Sinai
tee apesua i tampana momangkilo
tee puluna rewu kareta potimbeana,
inda atolentu o kabharina.
- 19 Ingkoo ukompa i tampa momalanga

§ 68:12 68:12 *rombongana mia bhari*: Amembali uka "rombon-
gana bhawine bhari." 68:17 68:17 2:6. 68:19 68:19 Ef. 4:8.

- tee ubhawa manga mia mototaangi i
talikumu.*
Ingkoo utarima hadia mobhari minaaka i maanusa,
moomini minaaka i manga mia mobhaliko.
KAWASANA OPU, Aulata'ala,
bheamboore iwe sumai.
20 Atopujimo Kawasana Opu,
mosodhana bhawata saesaeo.
Incia o Aulata'ala mopasalaamatina ingkita.
Sela
21 Aulata'alata satotuuna o Aulata'ala mopasalaa-
matina ingkita,
tee KAWASANA OPU motulungina ingkita
mamudhaakana inda tamate.
22 Maka o Aulata'ala bheapurokoti bhaana
musuna,
tee kauwana bhaana mokobulua minaaka i
manga mia
mosadhaadhaana modhadhina i nuncana
kasalaha.
23 Kawasana Opu afirimani, "Iaku bhekubhawe
pendua o musumu minaaka i Basan;
bhekubhawe pendua manga incia minaaka
i tawo momandala
24 mamudhaakana ingkomi amembali ubhanui
aemu tee raana manga incia,
tee manga mantoamu amembali apotib-
haaka dhawuna tee atumpu incana adhe-
lapia."

* **68:19 68:19** *manga mia mototaangi i talikumu:* I zamani man-
genge, ande saangu lipu atalo lipu mosagaanana, raja mokana
bheabhawa manga mia momatalo i talikuna to amembali bhatua
i lipuna.

- 25 Manga mia padhamo akamatako wakutuuna
ambeliakako mboomo raja, e Aulata'ala;
ambeliakako o Kawasana Opuku, o Rajaku to
ulingka uporope i mbooresamu momangk-
ilo.
- 26 Manga molaguna adhaangia i aroa,
momagasiaakana kecapi i taliku,
i tanga-tanga manga kabuabua mobhebhena
ganda-ganda. Mboo siimo laguna manga
incia,
- 27 "Pujimea o Aulata'ala i tanga-tangana
uumatina momaoge,
Pujimea o KAWASANA OPU, e bhari-
bharikomiu siwuluna Israel!"
- 28 Bhaa-bhaana o siwuluna Binyamin, momem-
balina kamia momaidhiidhi mpuu moka-
palaina manga incia,
kasiimpo aosea manga lakina Yuda i saangu
rombongana,
kasiimpo manga lakina Zebulon tee lakina
Naftali.
- 29 E Aulata'ala, palimbamea o kakaamu.
E Aulata'ala, susuakamea o kakaamu,
mboomo mopadhana ipewaumu to ingkami.
- 30 Rampaakanamo Bhanuamu i Yerusalem,
manga raja abhawa pasombaa to Ingkoo.
- 31 Gorampangia o Mesir, lipu mboomo binata
maila i tanga-tangana gelaga,
gorampangia o Mesir, lipu mboomo gu-
lumana sapi umane tee manga anana, si-
itumo manga lipu mokokuasa.
- Pahancurua manga incia momaso'oakana pera,

papogaa-gaaia manga lipu momaasiakana
potimbea.

³² Manga potolowe a bheaumba minaaka i Mesir,
tee miana Etiopia lausaka bheataanaka
limana tee adhawu pasombaana i
Aulata'ala.

³³ Lagumo to Aulata'ala, e bhari-bharia lipu i
dunia sii!

Laguakamo lagu kapujia to Kawasana Opu,
Sela

³⁴ to Incia mosawina i kareta modhalana i bha-
wona laiana, siitumo laiana modhaan-
giana pepuu minaaka i zamani mangenge.

Rangoa, Incia apaperangoaka suaranya,
suarana amakaa tee akoguntu.

³⁵ Akuimea o kuasana Aulata'ala!
Kaogena dhaangia i bhawona lipu Israel,
kuasana akawea i laiana.

³⁶ E Aulata'ala, Ingkoo inda umentela mpuu
wakutuuna ulimba minaaka i tampana
mbooresamu momangkilo!

Aulata'ala isombana miana Israel
adhawuaka kuasana tee kakaana to
uumatina.

Atopujimo Aulata'ala!

69

Do'a i Wakutuuna Kaseke

69:1-37

¹ To kapalana molaguna. Aose lagu: Kamba-
kamba Bakung. Zaburuna Daud.

- ² Pasalaamatiaku, e Aulata'ala,
 roonamo o uwe akawamo i bhorokoku.
³ Iaku kutondu i nuncana tomba momandala,
 inda dhaangia o tampana polandakaku.
Iaku kukotibu i uwe momandala,
 tee o mawa apaampeaku.
⁴ Iaku kumangule kugora kuemani tulungi;
 goncoku amatuu.
Mataku amalau kuantagi Aulata'alaku.
- ⁵ Mia mobanciaku inda ako'alasa,
 alabhi o kabharina minaaka i bulua i
 bhaaku.
Manga mia mogauna mopabinasaaku abhari
 mpuu;
 manga incia amembali musuku inda akos-
 ababu.
Iaku apakisaaku kubholosi
 harataa inda irampasiku.
- ⁶ E Aulata'ala, Ingkoo umataua o kabhongo-
 bhongoku,
 manga kasalahaku inda atobuniaka minaaka
 i Ingkoo.
- ⁷ Bholi utaroakea manga mia motangkaakako
 apotibhaaka kaea roonamo iaku, e
 KAWASANA OPU, Aulata'alana saangua
 alamu!
Bholi utaroakea manga mia mopeeloko
 apotibhaaka aebu roonamo iaku, e
 Aulata'ala isombana miana Israel!
- ⁸ Rampaakanamo Ingkoo iaku kutohina,
 tee o kae atutubhi rouku.

- 9 Iaku mboomo dhaga to manga witinaiku,
tee bhari-bharia witinaiku aabhiaku mia
moumba.
- 10 Ngangarandaku akarore-rore to kuewaaka
bhanuamu, sabutuna apekangauaku,
tee o kahinana manga mia mohinako
akangkanaiaiku.
- 11 Wakutuuna kupaporitambe karoku tee
kupoasa,
iaku kumembali kahinana mia.
- 12 Wakutuuna kupake kae kadhu to tandana
kusukara,
rampaakanamo sumai manga incia
apotawaikiaku.
- 13 Iaku kumembali giu ipogauakana manga mia
mouncurana i bhambana lawana kota
tee apamembaliaku lagu kaele-elena manga
pande sumpu.
- 14 Maka kudo'a i Ingkoo, e KAWASANA OPU,
e Aulata'ala, lawaniaku i wakutuu moma-
lape;
lawaniaku roonamo kaasimu molagina
motaralabhi-labhi
tee roonamo katulungimu momembalina
iparacaeaku.
- 15 Pasalaamatiaku minaaka i nuncana tomba,
tee bholi utaroakaaku kutondu.
Rambasakaaku minaaka i manga mia mobanci-
aku
tee minaaka i uwe momandala.
- 16 Bholi utaroakaaku apaampeaku mawa,

atawa kutonde i tawo momandala.
Bholi utaroakaaku kutokoburu i nuncana
bhalo.

17 E KAWASANA OPU, maasangia ulawaniaku
roonamo kaasimu molagina amalape,
poilimo tee urangoaku rampaakanamo rahu-
matimu momaoge.

18 Bholi ubuniaka roumu minaaka i bhatuamu
roonamo iaku kunaraka, lawaniakumo
pekadhei.

19 Umbamo pasalaamatiaku,
pabebasiaku minaaka i manga musuku.

20 Ingkoo umataua tuaapa o musuku aele-eleaku,
apekaeaaaku tee ahinaaku.

Ingkoo ukamatea bhari-bharia musuku.

21 Kahinana sumai apahancuru incaku,
sabutuna amate o akalaku.

Iaku kuharapu kaasina mia, maka inda dhaan-
gia;
iaku kupeelo mia mohiburuaku, maka inda
kupertibhaakea.

22 Sampe manga incia uka adhawuaku racu to
kukandea,
tee wakutuuna amatuu bhorokoku, ad-
hawuaku cuka to kusumpua.

23 Taroakamo kinande i aroana manga incia
amembali katapu to karonu,
tee amembali kapetambo to manga sab-
hangkana.

- 24 Taroakamo matana manga incia amarawu mamudhaakana inda amembali apokamata,
tee taroakamo o tangana manga incia sadia arengku.
- 25 Palimbamea pamurumu to manga incia,
tee taroakamo o amaramu mokaoro-rorena akangkanai manga incia.
- 26 Taroakamo pokemaana manga incia amembali amalino,
tee taroakamo inda samia uka momboorena i kemana manga incia.
- 27 Roonamo manga incia apajere manga mia mopadhana ibhebhemu,
tee apetulatulaaka o kanarakaana manga mia mopadhana ipekambelamu.
- 28 Taroakamo urangania kabharina kasalahana manga incia,
tee manga incia bholi upabanarea.
- 29 Taroakamo o sarona manga incia uhapusua minaaka i nuncana boku mokoantoakana manga sarona mia momalape,
tee o sarona manga incia bholi upapesuaia i nuncana daftarana mia mobanara.
- 30 Maka iaku sii kunarakaa tee kumapii.
E Aulata'ala, tulungiaku
tee uaganiaku.
- 31 Iaku bhekulagu to kupuji sarona Aulata'ala,
tee kusukuru tee kumuliangia.

- 32 Giu incia sumai alabhi alaenga i matana
KAWASANA OPU minaaka i binata pasom-
baa,
tee minaaka i sapi umane maoge mokotandu
tee mokokonuku mopoweta.
- 33 Manga mia monarakaa bheakamatea tee
akaunde-unde.
Taroakamo incamiu adhadhi pendua, e in-
gkomiu mopeelona Aulata'ala!
- 34 KAWASANA OPU aperangoi mia misikini,
tee Incia inda apanda'ente uumatina mod-
haangiana i nuncana katorongku.
- 35 Taroakamo Incia apujia bhari-bharia mod-
haangiana i laiana tee i dunia,
i tawo tee bhari-bharia mahaluku modhad-
hina i nuncana tawo
- 36 roonamo Aulata'ala bheapasalaamati Kota
Sion,
tee apendua abhangu manga kota i Tana
Yuda
mamudhaakana manga bhatuana amboore
tee akotanaaka lipu incia sumai
sa'umurua.
- 37 Siwuluna minaaka i manga bhatuana
bhemokotinaurakaakea,
tee manga mia momaasiakana Kawasana
Opu bheamboore i nuncana.

70

Do'a Emaniana Katulungi
70:1-6

¹ To kapalana molaguna. Zaburuna Daud.
Zikiri i wakutuuna pasombaana kurubanina
kaudhania.

² E Aulata'ala, pasalaamatiaku!

E KAWASANA OPU, tulungiaku pekadhei!

³ Taroakamo manga mia mogauna mopeka-
mateaku
amaea tee apalai roonamo abingu.

Taroakamo manga mia mogauna mopacilakaaku
apotibhaaka kahina tee a'aebu.

⁴ Taroakamo manga mia mopogauna, "Namisia,
namisia!" tee mopotawaikiaku
abhalili roonamo amaea.

⁵ Taroakamo bhari-bharia mia mopeeloko
asambo-sambo tee akaunde-unde roonamo
Ingkoo.

Taroakamo manga mia momaasiakana kasalaa-
mati minaaka i Ingkoo
sadia apogau, "Tapanamo kalanga o
Aulata'ala!"

⁶ Iaku sii kunarakaa tee kumisikini,
umbamo pekadhei, e Aulata'ala!

Ingkoomo motulungiaku tee mopasalaamatiaku.
E KAWASANA OPU bholi upekanoe-noe!

71

*Do'a Emaniana Peulusa i Wakutuu Taman-
cuana*

71:1-24

- ¹ E KAWASANA OPU, Ingkoomo o peulusaku,
bholi sampeampearo kutopekaea.
- ² Rambasakaaku, tee upabebasiaku roonamo In-
gkoo ubanara;
perangoiaku tee upasalaamatiaku.
- ³ Membalimo gunu bhatu to tampana mboore-
saku
sadia momembalina iumbatiku.
Ingkoo padhamo udhawu parinta mamud-
haakana kutopasalaamati
roonamo Ingkoomo gunu bhatu mojangani-
aku tee bente potaangiaku.
- ⁴ E Aulata'alaku, pasalaamatiaku minaaka i li-
mana mia madhaki,
minaaka i kuasana mia inda mo'adili tee mia
masega.
- ⁵ Ingkoomo iharapuku, e KAWASANA OPU
Aulata'ala,
Ingkoomo iparacaeaku minaaka dhaangia
kumangura.
- ⁶ Ingkoomo o tampana kupasande minaaka i
nuncana kadhuma;
Ingkoomo mopalimbaaku minaaka i kom-
pona inaku,
sumaimo iaku sadia kupujiko.
- ⁷ Iaku kumembali mboomo mia ipeelona manga
pande pana,
maka Ingkoomo o tampana peulusaku mo-
makaa.
- ⁸ Ngangaku sadia apujiko,
saeoa iaku kumuliangiko.

- ⁹ Bholi ubhanakaaku i wakutuuna kumancuana,
tee bholi ubholiaku ande atopadhamo
kakaaku.
- ¹⁰ Sababuna manga musuku apogauakaaku,
tee manga mia mogauna mopekamateaku
asahimuakaaku.
- ¹¹ Pogauna manga incia, "Aulata'ala padhamo
abholi incia!
Pajeremea tee urakomea roonamo inda
dhaangia bhemorambasakea!"
- ¹² E Aulata'ala, bholi umaridho minaaka i iaku,
e Aulata'alaku, tulungiaku pekadhei!
- ¹³ Taroakamo mia moraeakaaku
apotibhaaka kaea tee abinasa.
Taroakamo manga mia mogauna mopacilakaaku
abukeaka kahina tee aebu.
- ¹⁴ Maka sadia kuharapu,
tee iaku ahandamo bhekupujiko.
- ¹⁵ Ngangaku saeoa bhekupetulatulaaka manga
pewaumu mobanara,
tee kasalaamati inda motolentu minaaka i
Ingkoo.
- ¹⁶ Iaku bhekuumba tee kupuji pewauna mo-
makaana KAWASANA OPU Aulata'ala.
Iaku bhekumuliangiakea tangkanamo
ka'adilina Karomu samia.
- ¹⁷ E Aulata'ala, minaaka kumangura Ingkoo
moadhariaku,
tee sakawana sii-sii iaku kupetulatulaaka pe-
waumu inda momentela.
- ¹⁸ Sampe sakawana kumancuana tee kukouwa
uka,

e Aulata'ala, bholi ubholiaku,
mamudhaakana kumembali kupakoleleaka
kuasamu i siwulu sii-sii,
tee kaogesamu i bhari-bharia mia bhemoum-
bana naile itu.

¹⁹ E Aulata'ala, kuasamu tee kabanaramu akawea
i laiana!

Ingkoo padhamo upewau manga giu mo-
maoge,

e Aulata'ala, incema mopokanana tee In-
gkoo?

²⁰ Ingkoo padhamo utaroakaaku kunamisi bhari
kanarakaa tee balaa,

Ingkoo uka bheupadhadhiaku pendua.

Minaaka i nuncana koburu

Ingkoo bheuangkaaku pendua.

²¹ Ingkoo bheupamembaliaku ajulu kutohoro-
mati,

tee uhiburuaku pendua.

²² Iaku bhekupujiko tee gambusu

roonamo umembali utoparacaea, e
Aulata'alaku.

Tee kecapu Iaku bhekulaguaka lagu kapujia to
Ingkoo,

e Momangkilona, Aulata'ala isombana miana
Israel!

²³ Bhiwiku bheasambo-sambo

wakutuuna kulaguaka lagu kapujia to In-
gkoo,

apokana uka mboomo inyawaku mopadhana
itolosimu.

²⁴ Dhelaku bheapakoleleaka

katulungimu mobanara saeo,
roonamo manga mia mopadhana mo'usahana to
mopacilakaaku
amembali amaea tee amajule.

72

Do'a Iharapuaka to Raja

72:1-20

¹ Zaburuna Sulaiman.*

E Kawasana Opu, dhawuakea o ka'adilimu to
raja,
tee udhawuakea o kabanaramu to anana
raja.

² Maasangia incia a'adili uumatimu tee kabanara,
tee a'adili apewau mia motopisaki.

³ Maasangia manga gunu aumbaaka kasanaa to
ra'eati,
tee manga kabumbu ahasiliaka kabanara.

⁴ Maasangia incia bheaewaaka parakarana
manga mia motopisaki i tanga-tangana
ra'eati,
apasalaamati manga mia misikini
tee apahancuru manga pande pisaki.

⁵ Maasangia manga incia bheamaeka i Ingkoo
kangengena dhaangia tee matanaeo
tee kangengena dhaangia tee bula,
sa'umurua.

⁶ Maasangia raja incia sumai mboomo uwena
wao mosapona

* **72:1 72:1** Sulaiman o anana Raja Daud momembalina rajana
Israel sapadhana Daud.

- i bhawona rumpu mopadhana motoweli,
tee mboomo wao maranca mobubusina
dunia.
- 7 Maasangia o kabanara sadhaadhaa ani'imatia
ra'eati kangengena raja dhaangiapo ad-
hadhi,
tee o kasanaa ataralabhi-labhi sakawana
bula indamo dhaangia.
- 8 Incia bheakokuasa minaaka i tawo sakawana i
tawo,
minaaka i Umala Efrat sakawana i tapana
dunia.
- 9 Manga mia momboorena i tana matuu
bheatungku i aroana,
tee manga musuna adhelapi ngawuna tana.
- 10 Maasangia manga raja minaaka i Tarsis
tee manga raja minaaka i pulo-pulo
mosagaanana
bheabhawaakea hadia.
Maasangia manga raja minaaka i Syeba tee Seba
abhawa pasombaa to incia.
- 11 Maasangia bhari-bharia raja bheasuju i
aroana,
tee bhari-bharia lipu apabhatua karona i
incia.
- 12 Roonamo incia bhearambasaka mia misikini
mogorana i incia,
tee atolosi mia motopisaki tee mia inda mo-
totulungi.
- 13 Incia bheamaasiaka mia misikini tee mia
monaraka, a,
tee apasalaamati inyawana mia inda
mokokadhaangia.

14 Tee bheatolosi dhadhina manga incia minaaka
i mia masega tee mopisakina manga incia,
sababuna o dhadhina manga incia akohara-
gaa mpuu i matana.

15 Maasangia amarambe o umuruna!
Maasangia o bulawa minaaka i Syeba atopa-
sombaaka to incia.

Maasangia incia sadia atodo'aaka,
tee saeoa o mia aemaniakea barakati.

16 Maasangia o gandum ataralabhi-labhi i saan-
gua lipu,
akaweaa i lolona gunu.

Maasangia o hasilina tanana asuburu mboomo i
Libanon,
tee o ra'eatina kotana ajulu o kabharina
mboomo rumpu i tana lapa.

17 Maasangia o saroni raja atoudhani sa'umurua,
maasangia sahandana abhari o mia mo-
matauna saroni, kangengena dhaangiapo
tee matanaeo.

Maasangia bhari-bharia lipu bheapotibhaaka
barakati roonamo incia,
tee bhari-bharia lipu asarongiakea
amasanaa.

18 Atopujimo KAWASANA OPU, siitumo Aulata'ala
isombana miana Israel,
mopewauna manga giu inda momentela
samia-miana!

19 Atopujimo saroni momuliana sa'umurua!
Maasangia saangua alamu abukeaka tee ka-
muliangina.

Aamin, aamin!

²⁰ Mboo siimo kapadhaana do'ana Daud bin Isai.

BOKU I TALU ANGUNA:

73

ZABURU 73--89

Giu Imeriaka tee Giu Iharapu

73:1-28

¹ Zaburuna Asaf.*

Satotuuna o Aulata'ala sumai amalape tee miana
Israel,
tee mia morelana totona incana.

² Maka iaku saidhepo kusindoli,
tee saidhepo kumanduli,

³ roonamo kugigibulu kukamata mia mosombo
wakutuuna kukamata kasanaana tee
karangkaeana mia madhaki.

⁴ Manga incia inda anamisi kapii,
badana manga incia amalompo tee amakaa.

⁵ Manga incia inda anamisi kanarakaa mboomo
mia mosagaanana,
tee manga incia inda akangkanaia balaa
mboomo maanusia mosagaanana.

⁶ Siitumo o sababuna manga incia aporanteaka
tee pewau mosombo,
tee kasegana asalibumbuaka karona
mboomo juba.

* **73:1 73:1Asaf:** Incia apatugasiakea Nabii Daud to akapalai
molaguna i nuncana Bhanuana Aulata'ala.

- 7 Matana manga incia a'untu roonamo kaogena
bukuna,
ngangarandana manga incia abukeaka tee
manga haejati madhaki.
- 8 Manga incia tee kadhakina aele-ele tee apeonii
mia mosagaanana,
tee kalangana incana manga incia apekapa-
handa tee apekapisaki.
- 9 Ngangana manga incia ahina sorogaa,
tee dhelana atipua saangua dunia to ab-
hoasaka manga pogau inda mokoguna.
- 10 Sumaimo manga mia ambuli aose manga incia,
tee inda apotibhaaka saangu kasalaha uka
minaaka i manga incia.
- 11 Tee manga mia madhaki apogau, "Tuaapa
o Aulata'ala bheamataua opea ipewau-
mami?
Buaka Incia Momalangana dhaangia tee
imatauna?"
- 12 Kamatamea, mboo siimo manga mia madhaki:
manga incia atanangi torosu tee o harataana
ahandamo abhari.
- 13 Satotuuna asia-siamo kujagani ngangarandaku
mamudhaakana amangkilo,
tee kubhanui limaku to tandana inda kusala.
- 14 Roonamo saeoa akangkanaiaiku balaa,
tee saraneeo-saraneoo kutohukumu.
- 15 Ande kupogau, "Iaku gauku kupogau mboo
sumai,"
sumaimo iaku kuhianati siwuluna uuma-
timu.
- 16 Maka i wakutuuna ku'usaha to kuma'anaia,

- hali incia sumai amarasai mpuu to iaku;
17 siimpo kumataua o kapadhaana dhadhina
manga incia
wakutuuna kupesua i nuncana bhanuana
Aulata'ala.
- 18 Satotuuna, i tampa momararo udhika manga
incia,
tee upekandawua manga sakawana abinasa.
- 19 Manga incia abinasa sakijamata,
apaampea sakawana amofu minaaka i kam-
inghiri.
- 20 Manga mia madhaki bheaila mboomo pongipi
i wakutuuna o mia atobhangu i koleana.
E Kawasana Opu, kaudhania to manga incia
uhapusua wakutuuna ubhangu.
- 21 Wakutuuna ngangarandaku amaporo mpuu,
tee o baatiniku mboomo isusu-susu,
- 22 iaku kukabhongo-bhongo tee inda tee
ima'anaiku,
i aroamu iaku mboomo binata inda
moko'akala.
- 23 Moomini mboo sumai, iaku sadia i saripimu.
Ingkoo ukeni lima kaanaku.
- 24 Ingkoo utondaaku tee naasehatimu,
tee utarimaaku tee kahoromati naile itu.
- 25 Incema motulungiaku i sorogaa ande men-
cuana Ingkoo?
I dunia sii inda dhaangia ipeeluku, ande
mencuana Ingkoo.
- 26 Inyawa tee badaku amembali amofu tee abi-
nasa,

maka o Aulata'ala kakaana incaku
tee o tinaurakaku sa'umurua.

- ²⁷ Satotuuna o mia momaridhona minaaka i In-
gkoo bheabinasa.
Ingkoo bheupabinasa manga mia mohia-
natiko.
- ²⁸ Maka to iaku, tapanamo kalape ande kupo-
makasu tee Aulata'ala,
KAWASANA OPU Aulata'ala bhekupamem-
balia o tampana peulusaku
mamudhaakana kumembali kupetulatu-
laakea bhari-bharia ipewaumu!

74

*Laguna Kaporona Inca roonamo Bhanua Mo-
mangkilo Atopahancuru*

74:1-23

¹ Lagu kaadharina Asaf.

- E Aulata'ala, pokia Ingkoo ubhanaka ingkami?
Buaka ingkami tatomendeu sa'umurua?
Pokia pamurumu akarore-rore tee manga
dumba igembalamu?
- ² Maasangia uudhania o umatimu mopadhana
ipotibhaakamu i piamo itu,
lipu mopadhana itolosimu amembali lipu
tinaurakamu.
Udhania Gunu Sion,
tampa mopadhana iumbatimu to umboore-
sia.
- ³ Paporopea bhengkalamu i tanpa mohancuru
sa'umurua sumai;

bhari-bharia bara i nuncana tanpa momangkilo padhamo apahancurua musu.

⁴ Manga bhalimu akakee-kee, "Takanamo!" i tam-pamu momangkilo,
tee apakaro manga tombi to tandana ande
manga incia akana minaaka i ingkami.

⁵ Atokamata mboomo mia moangkana ndamuna
apekalanga-langea
to apale manga puuna kau i koo.

⁶ Bhari-bharia bara ibheloki
andamua tee apalua.

⁷ Manga incia atunu bhanua ibaadatimu
sakawana arata tee tana,
tee apanaajisi tampana mbooresamu.*

⁸ I nuncana ngangarandana manga incia apogau,
"Mai tapisakia bhari-bharia!"
Manga incia atunu bhari-bharia tampana
ibaadati i lipu sii.

⁹ Ingkami indamo uka takamata manga tanda
inda momentela,
samia nabii uka inda dhaangia,
inda samia uka i tanga-tangamami momataua
sakawana naepia bhari-bharia sii amembali.

¹⁰ E Aulata'ala, sakawana naepia manga bhali
bheaele-eleko?

Buaka sa'umurua o musu bheahina saromu?

¹¹ Pokia Ingkoo uhelaia pendua o lima kaanamu?

* **74:7 74:7** *mbooresamu*: I nuncana pogau Ibrani, "tampa mbooresana saromu;" sarona Aulata'ala apokana tee Aulata'ala karona.

Pokia Ingkoo soo usaku-saku limamu?
Pepadhaimea manga incia!

¹² Maka o Aulata'ala o rajaku minaaka i piamo itu.
Incia mopasalaamatina ingkami i dunia.

¹³ Tee kakaamu Ingkoo uweta tawo,
tee upasaki bhaana manga Lewiatan i tawo.

¹⁴ Ingkoo upekapuro manga bhaana Lewiatan,[†]
tee upamembalia kinandena manga binata
momboorena i tana matuu.

¹⁵ Ingkoo mobungkalena matana uwe tee umala;
sainamo manga umala mokouwena toro-
torosu, upekatuua.

¹⁶ Ingkoomo mopadhaangiana eo tee malo,
Ingkoomo modhikana matanaeo tee bula.

¹⁷ Ingkoo mopatotapuakana bhari-bharia tid-
hana alamu,
Ingkoo mopewauna bulaana paneo tee bu-
laana wao.

¹⁸ Udhania tuaapa o musumu aele-eleko, e
KAWASANA OPU,
lipu mokaafiri ahina saromu.

¹⁹ Bholi upasaraaka inyawana manu-manu jara-
jaramu i binata masega,
tee bholi umalinguakea to sa'umurua in-
yawana uumatimu motopisaki.

²⁰ Udhania o pojanjia ipewaumu tee ingkami,

74:13 74:13 Limb. 14:21. **74:14 74:14** Ayb. 40:20; Zab. 104:26;
Yes. 27:1. [†] **74:14 74:14** *Lewiatan*: Mahalukuna tawo mboomo
naga.

- roonamo manga tampa malalanda i dunia
sii abukeaka tee manga mia mopewauna
kasega.
- 21 Bholi utaroakea o mia motopisaki ambuli
atopekaea,
maka maasangia o mia monaraka tee mia
misikini bheapuji saromu.
- 22 E Aulata'ala, bhangumo, ewaakea o
parakaramu;
udhania ande manga mia mokaafiri ahinako
saeoa.
- 23 Bholi umalinguakea o suaranya manga bhalimu,
tee o karobhona manga mia moewangiko
apene torotorosu.

75

Kawasana Opu, Haakimu Mo'adili

75:1-11

- ¹ To kapalana molaguna.
Zaburuna Asaf to lagu: Bholi Upahancurua.
- ² Ingkami tasukuru i Ingkoo, e Aulata'ala;
ingkami tasukuru i Ingkoo roonamo
umakasu.
Manga mia apetulatulaaka bhari-bharia pe-
waumu inda momentela.
- ³ "I wakutuu mopadhana itantuakaku,
Iaku bhekuhaakimu tee ka'adili.
- ⁴ I wakutuuna alamu tee bhari-bharia antona
atolendu,
Iakumo bhemopekatangkana manga ariina.
Sela

- ⁵ To manga mia mosombo Iaku kupogau, 'Bholi usombo,'
kasiimpo to mia madhaki, 'Bholi upepujiaka kakaamu;
- ⁶ bholi upepujiaka kakaamu uewangi sorogaa, atawa upogau tee upataja bhorokomu.' "
- ⁷ Roonamo Incia Mokbanana minaaka i timbu tee minaaka i bhara,
Inciamo Mokbanana minaaka i tana matuu sakawana i tana mokogunu.*
- ⁸ Aulata'ala o haakimu;
Incia apaporitambe mia mosala tee apekalanga mia mobanara.
- ⁹ Roonamo pamuruna KAWASANA OPU mboomo tonde i limana,
akoantoaka uwena angguru mokobura, mobukeakana tee kajalona rampa.
Incia bhealali antona,
mamudhaakana o kulimpasana
bheasumpua tee apepadhaia
bhari-bharia mia madhaki i dunia.
- ¹⁰ Maka iaku sa'umurua bhekupakoleleaka giu incia sii,
Iaku bhekulaguaka lagu kapujia to Aulata'ala isombana Yakub.
- ¹¹ Iaku bhekupekakatu bhari-bharia kakaana mia madhaki,
maka o kakaana mia mobanara bhekurangania.

* **75:7 75:7** Dhaangia uka o kitabi tee Zaburu incia sii motoburina mboo sii, "Kahoromati inda aumba minaaka i timbu atawa minaaka i bhara, atawa uka minaaka i tana matuu."

76

Kawasana Opu, Haakimuna Bhari-bharia Lipu

76:1-13

¹ To kapalana molaguna.
Tee atikiakea kecapi. Zaburuna Asaf to lagu.

² Manga miana Yuda amatau Aulata'ala,
saronamaoge i Israel.

³ Bhanuana i Yerusalem,
tee tampana mbooresana i Gunu Sion.

⁴ Iwe sumakomo Incia akatuki bhari-bharia
manga ewangana potimbeana musuna,
bhari-bharia panana mokakila-kila,
katangkesina, tee hancuna.

Sela

⁵ Ingkoo ukocahea mpuu!
Alabhi umulia minaaka i manga gunu mod-
haangiana i zamani mangenge.

⁶ Hasilina potimbea padhamo atorampasi mi-
naaka i manga mia mobarani.*

Manga incia atokole sa'umurua;
inda dhaangia minaaka i tantarana sumai
momembalina moangkana limana uka.

⁷ E Aulata'ala isombana Yakub, roonamo kago-
rampangimu,
manga ajara tee mosawikia amalimpu.

⁸ Atotuu-totuu Ingkoo utomaeka mpuu!

* **76:6 76:6** *hasilina potimbea*: I zamani mangenge, ande saangu lipu atalo lipu mosagaanana, lipu mokana sumai bearampasi manga giu mokoharagaa mboomo maanusia, bulawa, pakea, tee binata tee abhaweana i lipuna.

Incema momembalina mopotaangina i
aroamu wakutuuna upamuru?

⁹ Minaaka i sorogaa uparangoakea o kambotuna
kahukumumu,

¹⁰ alamu uka amaeka tee inda tee uu'uuna
wakutuuna Aulata'ala abhangu to apa'adili
tee apasalaamati bhari-bharia mia
motopisaki i alamu.

Sela

¹¹ Satotuuna o pamurumu tee maanusia imem-
baliakamu utopuji,
tee bhilaana pamurumu sumai upamem-
balia kabhokena tangamu.

¹² Pojanjimo tee upomeamea o tolauna onimu
sumai i KAWASANA OPU, Aulata'alamu!
Taroakamo bhari-bharia modhaangiana i
saripina
abhawa pasombaana to Incia molaengana
imaeka.

¹³ Incia mopekamatena akalana manga mia
mokokuasa,
tee manga raja i dunia amaeka i aroana.

77

Ipewauna Kawasana Opu i Piamo itu

77:1-21

¹ To kapalana molaguna. Zaburuna Asaf to
Yedutun.

² Iaku kugora i Aulata'ala tee suara momandii,
i Aulata'ala kugora, mamudhaakana aperan-
goiaku.

- ³ I piamo itu, i eona kumaseke kupeelo Kawasana
Opu,
tee wakutuuna amalo kutanaaka limaku
inda kumangumangule;
ngangarandaku inda aunda atotautau.
⁴ Ande kuudhani Aulata'ala, kupekidei;
ande kupeudhaudhani,* ahanda amaule
ngangarandaku.

Sela

- ⁵ Ingkoo mopamembalina matakua sadhaadhaa
atobungkale;
alilaho o namisiku sabutuna inda amembali
kupogauaka opeopea.
⁶ Kufikifikiriaka zamani i piamo itu,
tee i tao- tao molapa.
⁷ Iaku kuudhani laguku i wakutuuna amalo,
kupeudhaudhani i nuncana ngangarandaku,
tee o rohiku apekaabha-abha,

⁸ "Buaka Kawasana Opu bheamanga bholi to
sa'umurua?
Tee indamo uka manga maasiaka?
⁹ Buaka atopadhamo o kaasina molagina?
Buaka amapupumo janjina sa'umurua?
¹⁰ Buaka o Aulata'ala amalingumo to manga
maasiaka?
Buaka i nuncana pamuruna Incia atutubhi
rahumatina?

Sela

- ¹¹ Kasiimpo kupogau, "Siimo kaporona incaku

* **77:4 77:4** kupeudhaudhani: Atawa "kupekidei;" dhaangia giu
apokana i aeati 77:7 tee 77:13uka.

ande o lima kaanana Momalangana Mpuu
indamo ajaganiaku."

¹² Iaku bhekuudhani opea mopadhana ipewauna
KAWASANA OPU.

Umbe, iaku bhekuudhani manga giu inda
momentela mopadhana ipewaumu i za-
mani i piamo itu.

¹³ Iaku bhekuudhaudhania i nuncana ngan-
garandaku bhari-bharia ikarajaamu,
tee kufikifikiria bhari-bharia giu momaoge
mopadhana ipewaumu.

¹⁴ Dhalamu amangkilo, e Aulata'ala,
Dewa iapai momaogena mboo
Aulata'alamami?

¹⁵ Ingkoomo Aulata'ala mopewauna giu inda mo-
mentela.
Ingkoo padhamo ususuaka kuasamu i tanga-
tangana manga lipu.

¹⁶ Tee limamu utolosi uumatimu,
siitumo siwuluna Yakub tee Yusuf.

Sela

¹⁷ E Aulata'ala, uwe akamatako,
uwe akamatako tee amaeka;
umbe, andalaoge uka atorende.

¹⁸ Ta'ina ngalu apasapo wao maranca,
tee o laiana uka akanduu-nduu;
manga anana panamu akakila-kila.

¹⁹ Ruuna guntumu atorango i nuncana tambusisi,
tee o bhibhitomu apekainawa dunia.
Alamu uka akolendu tee atorende.

²⁰ Dhalamu alaloi tawo,
tee udhala upolimba i andalaoge;

maka o tandarana aemu inda atokamata.

- ²¹ Ingkoo ugembalaaka uumatimu mboomo mia
mowuluna gulumana dumba
tee upake limana Musa tee Harun to akapalai
manga incia.

78

Kalapena Kawasana Opu tee Miana Israel
Mokodosa
78:1-72

¹ Lagu kaadharina Asaf.

- E lipuku, rangoa o kaadhariku,
taaia o talingamu tee opea ipogauakaku.
- ² Iaku bhekubungkale ngangaku to kupakawaaka
ibarati,
tee bhekupogauaka manga pogau rahasia
modhaangiana minaaka i zamani piamo
itu,
- ³ siitumo manga giu mopadhana irangomami tee
imataumami,
tee mopadhana ipetulatulaakana manga
opu-opuamami.
- ⁴ Ingkami inda bhetabuniakea minaaka i
anaanana manga incia,
maka ingkami bhetapetulatulaakea i siwu-
luna sapadhana ingkami
manga kapujia to KAWASANA OPU tee kakaana,
tee manga giu inda momentela mopadhana
ipewauna.

⁵ Incia padhamo apakawaaka tuturana to siwuluna Yakub,
tee apatotapuaka Hukumuna Taurati i tangatangana miana Israel.

Incia atumpu manga opu-opuata to aadhariakea i anana manga incia

⁶ mamudhaakana o siwulu bhemoumbana amataua,
siitumo manga anaana bhemolaahirina naile itu.

Kasiimpo manga incia uka bheaumba
tee apetulatulaakea i anana manga incia.

⁷ Tee mboo sumai manga incia bheadhika kaparacaeana i Aulata'ala,
tee inda amalinguaka opea ipewauna Aulata'ala,
maka ata'atia manga parintana;

⁸ tee bholi mboomo opu-opuana miana Israel,
adorohaka tee aewangiaku,
siitumo opu-opuana tee ngangarandana inda atotapu i Aulata'ala,
tee manga incia inda ata'atia.

⁹ Miana Efraim mokoewangaakana pana sumai,
abhalili tee apalai i eona potimbea.

¹⁰ Manga incia inda akenia pekatangka o pojanjiana tee Aulata'ala,
tee amendeu aose hukumuna.

¹¹ Manga incia amalinguakea opea mopadhana ikarajaana Kawasana Opu
tee amalinguaka manga giu inda momentela mopadhana ipakamataakana to manga incia.

- 12 I aroana opu-opuana manga incia, Aulata'ala
apewau giu inda momentela,
i atina Zoan i Tana Mesir.
- 13 Incia aweta tawo tee ataroakea manga incia
apolimba,
tee o uwe apekakatea mboomo rindi.
- 14 Wakutuuna pontanga eo manga incia atondaia
apapooseakea tee ta'ina ngalu,
tee wakutuuna malo manga incia apa-
pooseakea tee caheana waa.
- 15 Incia aweta manga bhatu i tana matuu,
tee adhawua manga asumpu ataralabhi-
labhi, mboomo minaaka i andalaoge.
- 16 Incia apalimba uwe minaaka i bhatu,
sabutuna o uwe sumai asiwulu mboomo
umala.
- 17 Maka manga incia dhaangiapo uka torotorosu
akodosa
tee adorohaka i Momalangana i tana matuu.
- 18 Manga incia acobai Aulata'ala i nuncana ngan-
garandana
tee atuntu kinande ipeeluna apokana tee
nawusuuna.
- 19 Manga incia aewangi Aulata'ala tee apogau,
"Amembali buaka o Aulata'ala apasiapu ki-
nande i tana matuu?
- 20 Atotuumo ande o bhatu abhebhea sabutuna
apidhiaka uwe
tee manga umala apasiwulua tee alua,

78:12 78:12 Limb. 7:8--12:32.

78:13 78:13 Limb. 14:21-22.

78:14 78:14 Limb. 13:21-22.

78:15 78:15-16 Limb. 17:1-7.

78:18 78:18-31 Limb. 16:2-15.

maka amembali buaka Incia manga
dhawuaka roti,
atawa amembali buaka Incia apasiapu dagi
to uumatina?"

- 21 Sabutuna o KAWASANA OPU apamuru waku-
tuuna arango giu incia sumai;
waa morore akangkanai uumatina Yakub,
tee o pamuruna ahandamo mpuu to miana
Israel,
- 22 roonamo manga incia inda a'iimani i Aulata'ala
tee inda aparacaea ande Incia
bhemopasalaamatina manga incia.
- 23 Maka Incia adhawu parintana to laiana,
tee abungkale manga bhambana sorogaa;
- 24 Incia apasapo waona manna* mamudhaakana
manga incia amembali akande,
tee mboo sumai Incia adhawuaka to manga
incia o gandum minaaka i sorogaa.
- 25 Maanusia akande rotina malaa'ekati;
Aulata'ala adhawuaka manga incia kinande
motaralabhi-labhi.
- 26 Incia atowii ngaluna timbu i laiana,
tee atowii ngaluna salata tee kuasana;
- 27 Incia apasapo waona dagi mboomo ngawu o
kabharina,
tee manu-manu mboomo kabharina bhone i
tawo.
- 28 Incia apakotibu manga manu-manu sumai i
tanga-tangana pokemaana,

78:24 78:24 Yah. 6:31. * 78:24 78:24 manna: Kinande
idhawuakana Aulata'ala to miana Israel ipasapona i tana matuu
saesao. Kamata Limb. 16:2-15.

- i saripina mbooresana manga incia.
- 29 Kasiimpo manga incia akande sakawana
amambosu mpuu,
roonamo Aulata'ala padhamo adhawuakea
opea ipeeluna manga incia apokana tee
nawusuuna.
- 30 Maka indapo uka manga incia atumpu incana,
siitumo tangasaana o kinande dhaangiapo i
nuncana ngangana manga incia,
- 31 pamuruna Aulata'ala aumba tee abhali manga
incia
tee ahobuti inyawana manga jampina manga
incia,
tee apekamate manga ana mangurana Israel.
- 32 Moomini mboo sumai, manga incia sadhaad-
haa akodosa,
manga incia inda aparacaea tee manga giu
inda momentela mopadhana ipewauna.
- 33 Rampaakanamo sumai, Kawasana Opu apeka-
mate manga incia mboomo sampearo
tahela poinunca,
tee o dhadhina manga incia aepadhaia
i nuncana balaa motomaeka mokawana
inda inamu-namu.
- 34 Siitumo ande Incia apekamate sagaa minaaka
i manga incia, siimpomo manga incia
apeeloa;
manga incia atobamo tee abhalili apeelo
Aulata'ala tee mpuu-mpuuna incana.
- 35 Manga incia audhanian ande o Aulata'ala gunu
bhatuna manga incia,
tee o Aulata'ala Momalanga motolosina
manga incia.

- 36 Maka manga incia atipu Aulata'ala tee ngan-
gana,
tee agau-gaua tee dhelana manga incia.
- 37 Ngangarandana manga incia inda atotapu i
Aulata'ala;
manga incia inda akeniaka janjina.
- 38 Maka roonamo Incia amaasiaka uumatina,
sumaimo Aulata'ala a'amponi kasalahana
manga incia tee inda apabinasea.
Sampe Incia uka amenturu ataangi amarana,
tee inda apalimba pamuruna.
- 39 Incia amataua ande o maanusia inda abakaa,
manga incia mboomo ngalu molalo tee inda
ambuli pendua.
- 40 Manga incia amenturu mpuu adorohaka tee
Aulata'ala,
tee apekaporo incana i tana matuu.
- 41 Dhaangia pia mpearo manga incia acobai
Aulata'ala,
tee apekaporo incana Momangkilona,
Aulata'ala isombana miana Israel.
- 42 Manga incia inda audhania o kuasana,
tee inda audhania i wakutuuna Incia atolosi
manga incia minaaka i bhalina;
- 43 i wakutuuna Incia apewau manga tanda inda
momentela i Tana Mesir,
tee manga muuzizati i atina Zoan.
- 44 Aulata'ala abhalii manga umala apamembalia
raa,
mboo sumai uka tee manga siwuluna uwe,

sabutuna manga miana Mesir inda amembali asumpua.

- ⁴⁵ Incia aumbaaka gulumana lale mosampa to mopepadhaina manga incia,
tee aumbaaka barakaka to mopahancuruna manga incia.
- ⁴⁶ Incia adhawuaka hasilina timpuana manga incia mamudhaakana akandea o ulo-ulo,
tee o hasilina kanguleana bukuna manga incia to akandea kabhoru.
- ⁴⁷ Incia apahancuru puuna angguruna manga incia tee wao bhatu,
tee manga puuna arana manga incia tee alona esi.
- ⁴⁸ Incia ataroaka o gulumana binatangana manga incia akangkanaia waona bhatu,
tee o gulumana kadhambaakana manga incia akangkanaia bherese.
- ⁴⁹ Aulata'ala arambasaka pamuruna mokaorore to manga incia;
amarana, lumbuna incana, tee kapiina incana,
mboomo sarombonga malaa'ekati moubanana to mopacilakana manga incia.
- ⁵⁰ Aulata'ala ataroakea o pamuruna akarore-rore,
tee inda ajoli-joli manga incia mamudhaakana atopabinasa,
maka o inyawana manga incia apasaraakea i panyaki imateaka.

- 51 Incia apekamate bhari-bharia ana umane
tumpe i Mesir,
siitumo bhaa-bhaana o kakaana manga incia
i pokemaa i Tana Ham.
- 52 Maka o uumatina karonā abhawea alimba
mboomo dumba.
Incia atonda uumatina i tana matuu
mboomo gulumana kadhambaaka.
- 53 Incia akapalai uumatina sakawana asalaamati,
sabutuna o uumatina inda amaeka;
sainamo musuna atanggalamu i nuncana
tawo.
- 54 Incia abhawa uumatina sakawana i tanana
momangkilo,
i gunu incia siimo, mopadhana
ipokawaakana tee lima kaanana.
- 55 Incia uka apadhencu manga lipu mosagaanana
minaaka i aroana uumatina,
kasiimpo apapodhawu-dhawuakea tee
ka'ukuru o lipu tinaurakana sumai to
manga incia,
tee ataroaka manga lipuna Israel ambooresi
kemana manga musuna.
- 56 Maka manga incia acobai Aulata'ala Moma-
langa,
tee adorohaka i Incia.
Manga incia inda aosea o parintana,
- 57 tee manga incia inda ata'ati tee ahianati pojan-
jiana tee Aulata'ala mboomo opu-opuana;

- manga incia inda amembali atotangkaaka
mboomo pana mobengko.
- 58 Manga incia apamembali Aulata'ala a'amara
tee tampana momalanga to apasombaaka
kurubani;
manga incia apamembali Aulata'ala akaura-
ura tee manga patuna dewana.
- 59 Wakutuuna o Aulata'ala arango giu incia
sumai, Incia apamuru,
tee amendeu atarima miana Israel sampeam-
pearo!
- 60 Incia amendeumo amboore i tampana mboore-
sana i Silo,[†]
siitumo o Kema Momangkilo, tampana
mbooresana i tanga-tangana maanusia.
- 61 Incia ataroakea o sorongana pojanjiana ato-
taangi,
tee o tanda kamuliangina amandawu i li-
mana bhali.[‡]
- 62 Incia ataroaka musu apekamate uumatina tee
hancu,
tee apawoa amarana i uumatina karona.
- 63 Manga ana umane momangurana manga incia
akandea waa
sabutuna inda atorango o laguna kawia to
manga kabuabua.
- 64 Manga imamuna manga incia amateaka
ewanga,

[†] **78:60 78:60** *Silo*: Tampana to Kema Momangkilo wakutuu
bhaa-bhaana miana Israel apesua i Tana Kanaan, wakutuuna
Baitulla indapo atopakakaro i Yerusalem. [‡] **78:61 78:61** *tanda*
kamuliangina: Giu incia sii apogauaka tee asusuaka wakutuuna
sorongana pojanjiana Kawasana Opu arampasia miana Filistin.

tee manga iaiarona imamu sumai inda
atangisi umanena.

65 Kasiimpo abhangumo o KAWASANA OPU
mboomo mia siimpo mobhanguna mokole,
mboomo jampi asambo-sambo sapadhana
asumpu angguru.

66 Incia apewau manga bhalina apalaiaka
karona;
Incia apewau manga incia amaea sa'umurua.

67 Incia amendeu siwuluna Yusuf
tee inda apili sukuna Efraim;

68 maka Incia apili sukuna Yuda,
siitumo Gunu Sion imaasiakana.

69 Incia apabhangu tampana momangkilo
mboomo kalangana laiana,
tee mboomo alamu, momatangka to
sa'umurua.

70 Aulata'ala apili Daud, o bhatuana,
tee aalea wakutuuna incia tangasaana aja-
gani gulumana dumba.

71 Aulata'ala aala Daud minaaka i karajaana
awulu manga dumba mopadudu sumai
tee apamembalia mogembalaakana siwu-
luna Yakub,
siitumo o miana Israel, uumatina tee tinau-
rakana.

72 Tee karelana totona incana o Daud agembal-
aaka uumatina,
tee kakidhana incia amataua tuaapa o
carana akapalai manga incia.

79

*Do'ana Uumati Motopisaki**79:1-13*

¹ Zaburuna Asaf.

E Aulata'ala, manga lipu inda momatauko ape-
suamo i nuncana tana tinaurakamu!

Manga incia apanaajisi Bhanuamu
Momangkilo;

manga incia padhamo apahancuru saangua
kota Yerusalem.

² Manga incia padhamo adhawuaka maeatina
manga bhatuamu

to kinandena manga manu-manu i laiana,
tee o dagina maeatina manga mia mosaalihi
to binata maila.

³ Manga incia padhamo alali raana manga mia
sumai mboomo uwe
i saangua kota Yerusalem, tee inda dhaangia
mokoburua.

⁴ Ingkami tamembalimo kahinana manga sarim-
banuamami,
tee tamembali kaele-ele tee giu ipogauakana
manga mia isaripimami.

⁵ E KAWASANA OPU, sakawana naepia? Buaka
Ingkoo bheupamuru to sa'umurua
tee amaramu bhearore mboomo waa roon-
amo ukaura-ura?

⁶ Pasapomea o pamurumu
i bhawona manga lipu inda momatauko,
tee i bhawona manga pamarinta

- inda mosombako!
7 Sababuna manga incia padhamo apepadhaia
uumatimu, siitumo siwuluna Yakub,
tee apahancuru mbooresana.
- 8 Bholi upatanggoaka to ingkami o kasalahana
manga opu-opuamami,
taroakamo o rahumatimu amadhei akawa i
ingkami
roonamo amatemo akalamami.
- 9 Manga tulungimo, e Aulata'ala mopasalaa-
matina ingkami,
to kaogesana saromu.
Rampaakanamo saromu,
manga rambasaka tee manga amponi mi-
naaka i dosa-dosamami.
- 10 Bholi utaroakea manga lipu mosagaanana
aabha,
"Iapai o Aulata'alana manga incia?"
Taroakamo ingkami takamatako wakutuuna
ubalasi raana manga bhatuamu
motopekamatena,
mamudhaakana manga lipu amataua.
- 11 Taroakamo o pekidheina manga mia moto-
taangi
akawa i aroamu;
rampaakanamo kaogena kuasamu,
taroakamo adhadhiaka manga mia mopad-
hana itantuaka to atopekamate.
- 12 Balasia manga lipu i saripimami sumai
pitu kali lipa o kahina mboomo mopad-
hana ipewauna manga incia to Ingkoo, e
Kawasana Opu!

- 13 Sumaimo ingkami o uumatimu, dumba igem-
balamu sii,
bhetasukuru i Ingkoo sa'umurua,
tee minaaka i siwulumami sakawana siwulu
bhemoumbana bheapetulatulaaka kaoge-
sana saromu.

80

Do'a to Kasalaamatina Miana Israel

80:1-20

¹ To kapalana molaguna. Aose lagu: Kamba-
kamba Bakung. Laguna kasakusii. Zaburuna
Asaf.

² Maasangia urangoa, e Gembalana miana Israel,
e Ingkoo mokapalaina siwuluna Yusuf
mboomo gulumana dumba!

Ingkoo mokokauncuramakana i bhawona manga
malaa'ekatina kerub,* utiumbamo tee ca-
heamu

³ i aroana Efraim, Binyamin, tee Manasye!
Susukamea o kuasamu
tee uumbamo to upasalaamati ingkami!

⁴ E Aulata'ala, pambulimea pendua o kadhaan-
giamami;

* **80:2 80:2** *manga malaa'ekatina kerub:* Malaa'ekati igam-
baraaka mboomo mahaluku mokopani, agambaraaka kalangana
Aulata'ala tee umbaana. Apogauakea ande kauncuramakana
KAWASANA OPU dhaangia i bhawona manga malaa'ekati kerub.
Dhaangia patuna rua malaa'ekati kerub i bhawona sorongana
pojanjia tee i piamo itu Musa atarima firimanina Aulata'ala
minaaka iwe sumai. Kamata Limb. 25:18-22.

taroakamo o roumu akocahea sabutuna ingkami bhetasalaamati.

⁵ E KAWASANA OPU, Aulata'alana saangua alamu,
sakawana naepia upamuru, moomini o uumatimu ado'a?

⁶ Ingkoo udhawua kaporona inca to kinandena manga incia,
tee lolu mobhari to uwe isumpuna.

⁷ Ingkoo umanga pamembali giu
ipotagaliakana manga lipu isaripimami,
tee o musumami uka manga ele-ele.

⁸ E Aulata'alana saangua alamu, pambulimea pendua o kadhaangiamami,
maasangia o roumu akocahea mamudhaakana ingkami tasalaamati.

⁹ Uumatimu mboomo puuna angguru Ingkoo ubhawe upalimbaia minaaka i Mesir;
upadhencu manga lipu mosagaanana, kasi-
impo o puuna angguru sumai upombulaia.

¹⁰ Ingkoo upekangkiloakea tana to incia,
kulesena atuwu tee apabuke saangua lipu.

¹¹ Manga gunu asalibumbuakea tee ngkamiamiana,
tee manga rahana atutubhi manga puuna aras momaoge.

¹² Manga rangkana adhola sakawana i tawo,
tee manga lolona akawa i Umala Efrat.

¹³ Pokia Ingkoo ubhongka manga tondona

sabutuna bhari-bharia mia molalo amembali
atobhe bhakena?

14 Bhawu abhembarua,
tee bhari-bharia binata maila akandea.

15 E Aulata'alana saangua alamu, maimo umbuli
i uumatimu,
tontomea minaaka i sorogaa tee
ukamatamea!

Maheruakamea o puuna angguru sii,

16 puuna angguru ipombulamu tee kuasamu,
tee o tunana ipekatangkamu to karomu.

17 Musu padhamo apale tee atunu puuna angguru
sii.

Maasangia manga incia abinasa
rampaakanamo kagorampangimu.

18 Maka taroakamo limamu adhaangia to mia i
weta i kaanamu,
siitumo to anana maanusia[†] ipekakaamu to
karomu.

19 Tee mboo sumai, ingkami inda bhetasowo
minaaka i Ingkoo;
jagania o dhadhimami, sumaimo ingkami
bhetasombako.

20 E KAWASANA OPU, Aulata'alana saangua
alamu, pambulimea pendua o kadhaangia-
mami,
taroakamo o roumu akocahea mamud-
haakana ingkami tasalaamati.

[†] 80:18 80:18 *anana maanusia*: Aipomo mia incia sumai rajana
miana Israel atawa amembali uka o Isa, momananeana asarongi
karona Anana Maanusia.

81

Lagu i Wakutuuna Pebhaanguiana Pojanjia

81:1-17

¹ To kapalana molaguna. Mboomo lagu Gitit.*
Zaburuna Asaf.

² Sambo-sambomo to Kawasana Opu, o kakaata.
Sambomo tee ukaunde-undemo to Aulata'ala
isombana Yakub.

³ Lagumo tee upakoonimeea o ganda-ganda,
pakoonimeea o kecapi momandii
upapooseakea tee suarana gambusu.

⁴ Towiimeea o torompe i bula mobhaau,
i wakutuuna kainawana bula, i eona
raraeata.

⁵ Siitumo saangu katotapu to miana Israel,
saangu hukumu minaaka i Aulata'ala isom-
bana Yakub.

⁶ Incia apatotapua amembali saangu kaudhania
to siwuluna Yusuf,
wakutuuna Incia aewangi Tana Mesir.

Iaku kurango suara inda imatauku,†

⁷ "Iaku padhamo kuangka bhawaamu minaaka i
awaamu,
tee o limamu kupalapea minaaka i langka
kasodhaamu.

* **81:1 81:1** *Gitit*: Zaburu incia sii aose suarana lagu tee gambusu
minaaka i Gat, siitumo sala saangu kota miana Filistin. Gat
sumai mopadhana imbooresina Nabii Daud wakutuuna apala-
iaka karoni minaaka i Raja Saul. † **81:6 81:6** *suara inda*
imatauku: Siitumo suarana Kawasana Opu mopogauna tee siwu-
luna Yusuf.

8 I nuncana kaseke ingkoo ugora, kasiimpo ku-
rambasakako.
Kulawani ingkoo minaaka i tanpa rahasiana
guntu,
tee laku padhamo kuuji ingkoo i matana uwe
Meriba.‡

Sela

9 E uumatiku, rangoa opea iudhaniakaku!
E Israel, ande mpuu ingkoo unda uperan-
goiaku!

10 Bholi dhaangia i tanga-tangamiu aulata'ala
mosagaanana,
tee bholimo usomba dewana lipu
mosagaanana.

11 Iakumo KAWASANA OPU, Aulata'alamu,
mobhawako ulimba minaaka i tana Mesir.
Bungkalea ngangamu pekaewa-ewa, tee
bhekuantokia kupabukea."

12 "Maka, o uumatiku amendeu aperangoiaku,
Israel amendeu atungku i aroaku.

13 Sababuna sumai, Iaku kutaroaka manga incia
amentagali torosu,
sabutuna manga incia adhadhi aose hae-
jatina karon.

14 Ande mpuu o uumatiku aunda aperangoiaku,
ande mpuu Israel aunda adhadhi mboomo
kapeeluku,

15 sumaimo bhekuagoria to kupekatalo musuna
manga incia,

‡ **81:8 81:8** *Meriba*: I tampana incia sumai manga miana Israel
inda tee uwena tee apeenci i Aulata'ala (kamatea Limb. 17:7).

81:10 81:10 Limb. 20:2-3.

tee kuewangi bhari-bharia bhalina manga incia.

¹⁶ Manga mia mobancina KAWASANA OPU naile itu bheatungku tee arengku i aroana, tee kahukumuna to manga incia bheanamisia sa'umurua.

¹⁷ Maka, bhekudhawuakako kinande minaaka i gandum momalapena mpuu, tee uka iaku bhekupekambosuakako golana uwani minaaka gunu bhatu."

82

Aulata'ala i nuncana Sidangina Sorogaa 82:1-8

¹ Zaburuna Asaf.

Aulata'ala akapalai sidangi i sorogaa.

Incia amembali haakimu mobhotukiakana parakara i tanga-tangana manga "aulata'ala,"*

² "Sakawana naepia ingkomiu bheuala kambotu tee cara inda mo'adili tee uewaaka manga mia madhaki?

Sela

†

* **82:1 82:1** *aulata'ala:* Pogau Ibranina "elohim" kananeana akoma'ana dewa atawa Kawasana Opu, maka i nuncana aeati incia sii tee 82:6 amembali akoma'ana manga malaa'ekati modorohaka i Aulata'ala, siitumo manga seetani. Bhanguna mboo manga "aulata'ala" sumai atohakimi i sidangina sorogaa incia sii.
† **82:2 82:2** *Sela:* Aipomo tandana to aunto wakutuuna lagu sumai atolaguaka, atawa o tanda to ahanda apekaogea o suarana, atawa onina gambusuna. Amembali uka to tanda to morangoa.

³ Ewaakamea o hakuna mia momisikini tee ana
maelu,
dhawuakea ka'adili to mia motopisaki tee
mia inda mokokadhaangia.

⁴ Pasalaamatia o mia momisikini tee mia
monaraka,
rambasakea manga incia minaaka i limana
mia madhaki."

⁵ Ingkomi uka inda umataua, ingkomi uka inda
uma'anaia,
ingkomi udhala i nuncana kalalanda;
bhari-bharia ariina alamu sii atolendu
tee tuturana ra'eati amarungga.

⁶ Iaku padhamo kufirimani, "Ingkomi sii 'manga
aulata'ala'
tee bhari-bharikomi sii o anana Momalan-
gana;

⁷ moomini mboo sumai, ingkomi bheumate
mboomo maanusia,
tee mboomo manga kaogesa, ingkomi uka
bheumate."

⁸ E Aulata'ala, kakaromo, adilia o dunia sii;
roonamo bhari-bharia lipu satotuuna o pe-
wauamu.

83

*Do'a Aemani i Aulata'ala to Ahukumuaka
Musuna Israel*

83:1-19

¹ Zaburuna Asaf to saangu lagu.

- ² E Aulata'ala, bholi inda tee uu'uumu,
bholi ukatongo-tongo tee usaku limamu, e
Aulata'ala!
- ³ Kamatamea, manga musumu apewau karobho,
manga mia mobanciko apekalangamo
bhaana.
- ⁴ Manga incia apadhaangia pomufaakati mad-
haki to aewangi uumatimu,
tee aposaangu to aewangi manga mia ijagan-
imu.
- ⁵ Pogauna manga incia, "Mai tapabinasea o
lipuna Israel,
mamudhaakana o sarona Israel inda atoud-
hani!"
- ⁶ Manga incia aposaangu i nuncana saangu hae-
jati,
tee apojanji to aewangiko.
- ⁷ Manga incia satotuuna o mia momboorena i
pokemaana Edom tee miana Ismail,
miana Moab tee miana Hagar,
- ⁸ Gebal, Amon, Amalek,
Tana Filistin tee ra'eatina Tirus.
- ⁹ Tee o Asyur uka aposaangu tee manga incia,
amembali motulungina siwuluna Lut.*

Sela

- ¹⁰ Pewaumea manga incia mboomo ipewaumu i
miana Midian,
tee mboomo ipewaumu i Sisera tee Yabin i
bhiwina Umala Kison,

* **83:9 83:9** *siwuluna Lut*: Lut o pinoanana Ibrahim, tee siwuluna minaaka i rua miaia anana Lut amembali lipu Moab tee Amon (kamata Bhaa. 19:36-38.) Bhari-bharia lipu idaftaraakana i aeati 7-9 aposarimbanua tee lipu Israel tee amembali apomusu.

- 11 mopadhana ipabinasamu minaaka i nuncana dunia,
tee o maeatina amembali karombu to pasub-
uruana tana.
- 12 Pamembalia o kaogesana manga incia mboomo Oreb tee Zeb,
patungkua o rajana manga incia mboomo Zebah tee Salmuna
- 13 mopogauna, "Mai takuasaia o lipu mbooresana Aulata'ala!"
- 14 E Aulata'ala, pamembalia manga incia mboomo ngawu mopolaka,
mboomo laena bhae ibhaleakana ngalu.
- 15 Mboomo waa motununa koo,
tee mboomo rorena waa mopekangauna manga gunu,
- 16 pajerea manga incia tee garuramu,
tee upekaekaia tee tambusisimu.
- 17 Taroakamea o rouna manga incia abukeaka aebu
tee taroakamo saromu, e KAWASANA OPU,
abalasiaka karona.
- 18 Taroakamo manga incia amaea tee amaidhi-
idhi incana sa'umurua;
taroakamo manga incia anamisi kaea tee amate.
- 19 Taroakamo manga incia amataua ande tangkanamo Ingkoo mokosarona KAWASANA OPU,
Momalangana i saangua dunia.

84

*Apemeliliaka Bhanuana Aulata'ala**84:1-13*

¹ To kapalana molaguna. Mboomo lagu Gitit.*
Zaburuna miana Korah.

² Tapanamo kasanaana o tampana mbooresamu,
e KAWASANA OPUNA saangua alamu!

³ Incaku apemeliliaka bhanuana KAWASANA
OPU,
sampemo kumalute roonamo pemeliliku
sumai.
Saangua badaku tee jiwaku akaunde-unde
to Aulata'ala modhadhi.

⁴ Manu-manu ntomintomi apotibhaaka bhanua
to karonu,
tee o manu-manu walawalangke apotib-
haaka saangu poteo,
to tampana adhika manga anana
i saripina manga tampana tunuana kuruban-
imu, e KAWASANA OPUNA saangua alamu,
e Rajaku tee Aulata'alaku.

⁵ Amasanaamo o mia momboorena i Bhanuamu,
Manga incia atorotorosu apujiko.

Sela

⁶ Amasanaamo mia mopotibhaakana kakaa mi-
naaka i Ingkoo,

* **84:1 84:1** *Gitit:* Akoma'ana minaaka i Gat, siitumo sala saangu kota miana Filistin. Gat sumai mopadhana imbooresina Nabii Daud wakutuuna apalaiaka karonu minaaka i Raja Saul.

- tee o ngangarandana apemeliliaka to aziara
i Gunu Sion.
- 7 Wakutuuna manga incia alalo i Mbolonga
Baka,[†]
tampa incia sumai abhaliia amembali
matana uwe.
- Bulaana wao bhaa-bhaana uka
abhari aumbaaka barakati to mbolonga
sumai.
- 8 Samangengena alingka sahandana uka o
kakaana,
sakawana apoaro tee Aulata'ala mobha-
woakana bhari-bharia dewa i Sion.
- 9 E KAWASANA OPU, Aulata'alana saangua
alamu, perangoia o do'aku.
Tilikimea, e Aulata'ala isombana Yakub!
Sela
- 10 Tontomea o raja mopadhana ipilimu, e
Aulata'ala,
kamatamea o rouna mia mopadhana ilan-
timu to katangkesina uumatimu.
- 11 Roonamo amalape saeo i aroana Bhanuamu
minaaka i sarewu eo i tampa mosagaanana.
Iaku labhina kumaasiaka kumembali mojan-
ina Bhanuana Aulata'alaku
minaaka i kumboore i kemana mia madhaki.
- 12 Roonamo KAWASANA OPU, Aulata'ala satotu-
una o matanaeo tee o katangkesita;

[†] 84:7 84:7 Mbolonga Baka: I nuncana pogau Ibrani *baka* amem-
bali akoma'ana "tangi" tee puuna murbei, jadi aipomo ma'anana
Mbolonga Tangi atawa Mbolonga Puuna Murbei.

Incia manga dhawuaka rahumati tee kamu-
liangi.
KAWASANA OPU sadia apewau kalape tee manga
mia
moosena dhala mobanara.

¹³ E KAWASANA OPUNA saangua alamu,
akaunde-undemo bhari-bharia mia mopara-
caeako!

85

*Do'ana Miana Israel i Aulata'ala Mamud-
haakana Atopasalaamati*

85:1-14

¹ To kapalana molaguna. Zaburuna miana
Korah.

² E KAWASANA OPU, Ingkoo padhamo upewau
malape to lipumu minaaka i piamo itu,
Ingkoo padhamo upekalapea pendua o kad-
haangiana miana Israel.

³ Ingkoo padhamo u'amponia o dosana uuma-
timu,
tee ututubhia bhari-bharia dosana manga
incia.

⁴ Bhari-bharia i'amaraakamu padhamo upaun-
toa,
tee upanaindamea o pamurumu moka-
rorena sumai.

⁵ Sii-sii pambulimea pendua o kadhaangiamami
mboomo i piamo itu, e Aulata'ala, manga
mopasalaamatina,

- tee upekaridhomea o pamurumu to ingkami.
- ⁶ Buaka sa'umurua Ingkoo bheupamuru tee ingkami?
Buaka sa'umurua bheutorotorosu u'amara tee ingkami tee siwulumami?
- ⁷ Buaka Ingkoo umendeu manga padhadhi pendua
mamudhaakana o uumatimu akaunde-unde rampaakanamo Ingkoo?
- ⁸ E KAWASANA OPU, susuakamea o kaasimu molagina to ingkami,
tee mangadhawuakamo kasalaamatimu.
- ⁹ Iaku gaku kuperangoi opea bheifirimaniakana
KAWASANA OPU, siitumo o Aulata'ala,
roonamo Incia bheafirimaniaka kasanaa to uumatina tee manga mia mosaalihi.
Maka manga incia bholi apendua akabhongo-bhongo.
- ¹⁰ Satotuuna o kasalaamati minaaka i Kawasana Opu amakasu tee manga mia momaekana tee Incia
mamudhaakana o kamuliangina amembali amboore i liputa.
- ¹¹ Kaasi molagina tee pojanjia inda momabhotu bheapokawa,
kabanara tee kasanaa bheaposakulaka.
- ¹² Kata'atina maanusia i Kawasana Opu bheatuwu minaaka i tana,
tee o kabanara bheapotonto minaaka i sorogaa.
- ¹³ KAWASANA OPU uka bhearahumatiaka kalapena,

- tee o liputa bheakohasiliaka timpua
motaralabhi-labhi.
14 Kabanara bheaporikanaaka dhalana
Aulata'ala,
tee apasiapuakea dhala to Incia.

86

Do'a Emaniana Tulungi minaaka i Manga Musu

86:1-17

¹ Do'ana Daud.

- E KAWASANA OPU, perangoiaku tee ulawani-
akumo,
roonamo kunaraka tee kumisikini.
² Jagania o inyawaku roonamo iaku kuta'atiko,
pasalaamatia o bhatuamu moparacaeana tee
Ingkoo.
³ Maasiakaaku, e Kawasana Opuku,
roonamo saeo kudo'a i Ingkoo.
⁴ Paunde-undemea o ngangarandana bhatuamu
sii,
roonamo i Ingkoomo tampaku kusomba, e
Kawasana Opu.
⁵ E Aualata'ala, Ingkoo umalape tee
upeka'amponi,
kaasimu molagina ataralabhi-labhi to bhari-
bharia mia modo'ana i Ingkoo.
⁶ E KAWASANA OPU, perangoimea o do'aku,
tee faduliakaaku wakutuuna kuemani tu-
lungi.
⁷ Wakutuuna kumaseke iaku kugora i Ingkoo
roonamo Ingkoo bheutarima do'aku.

- ⁸ Inda dhaangia mopokanana tee Ingkoo i tangatanga manga dewa, e Kawasana Opu, tee inda dhaangia mopokanana tee opea ipewaumu.
- ⁹ Bhari-bharia lipu ipadhaangiamu bheaumba tee asuju i aroamu, e Kawasana Opu, tee bheamuliangia o saromu.
- ¹⁰ Sababuna Ingkoo umakaa tee upewau manga giu inda momentela. Tangkanamo Ingkoo o Aulata'ala.
- ¹¹ E KAWASANA OPU, adhariaaku dhalamu, mamudhaakana kudhadhi kuosea kabanaramu; pekatangkea incaku mamudhaakana kuhoromati saromu.
- ¹² E Aulata'ala, KAWASANA OPU, iaku bhekupujiko tee mpuu-mpuuna incaku, tee bhekumuliangi saromu sa'umurua.
- ¹³ Roonamo kaasimu molagina amaoge mpuu to iaku, Ingkoo padhamo upasalaamatiaku minaaka i mate.
- ¹⁴ E Aulata'ala, manga mia mosombo ahumbuniaku; rombongana manga mia masega gauna apekamateaku, tee manga incia inda afaduliakako.
- ¹⁵ Maka Ingkoo e Kawasana Opu, satotuuna o Aulata'ala mobukeakana kaasi,

usabara tee ataralabhi-labhi o kaasimu molagina tee pojanjiamu tee iaku inda amabhotu.

- ¹⁶ Tontoaku tee umaasiakaakumo;
dhawuakea bhatuamu sii kakaamu tee upasalaamatiaku,
roonamo mboomo inaku, iaku uka kulaniko.
- ¹⁷ Dhawuakaaku saangu tanda ande Ingkoo umalape
mamudhaakana manga mia mobanciaku
amaea wakutuuna akamatea
ande Ingkoo, KAWASANA OPU, motulungiaku tee mopekatangkana incaku.

87

Sion, siitumo Yerusalem, Kotana Aulata'ala
87:1-7

- ¹ Zaburuna miana Korah, saangu lagu.

KAWASANA OPU apakaro kotana i bhawona tubuna gunu momangkilo.

- ² KAWASANA OPU amaasiaka bhambana lawana Sion
alabhi minaaka i bhari-bharia tampa mosagaanana modhaangiana i Israel, lipuna Yakub.

- ³ Manga mia apogauakako tee giu momulia,
e kotana Aulata'ala.

Sela

4 Pogauna Kawasana Opu, "Iaku bhekusarongi Rahab* tee Babel i tanga-tangana lipu momatauaku.
Tee uka o Tana Filistin, Tirus tee Etiopia,†
'Manga incia sii uka atoabhi amembali ra'eatina Sion.' "

5 Maka to Sion, manga mia bheapogau, "Mia incia sii tee mia incia sumai alaahiri i nuncana, tee o Aulata'ala Momalangana sakaro-karona bhemopektangkea."

6 KAWASANA OPU bhealentua wakutuuna daf-taraana manga lipu,
"Manga incia sii uka aabhia o ra'eatina Sion."
Sela

7 Apoose amanari, manga mia bhealagu, "Mi-naaka i Sion ingkita tatarima manga giu momalape
mboomo mia momboorena i saripina matana uwe."

88

Do'a i Wakutuuna Tamapii Makaa

88:1-19

1 Do'a to kapalana molaguna. Zaburuna miana Korah. Mboomo lagu: Kasukarana Kanarakaa.
Lagu kaadharina Heman, miana Ezrahi.

* **87:4 87:4** *Rahab*: Saro mosagaanana to asarongiaka Mesir mokoma'anana "asombo." † **87:4 87:4** Manga lipu moparacaeana tee Kawasana Opu bheatolentu mboomo mia molaahirina i Sion (kota Yerusalem), tee mboo sumai manga incia apesua i nuncana uumatina Aulata'ala.

² E KAWASANA OPU, e Aulata'ala mopasalaama-
tiaku,
iaku kukagora-gora o eo tee malo i aroamu.

³ Taroakamo o do'aku akawa i aroamu.
Maasangia urangoa o goraku.

⁴ Roonamo abharimo mpuu kunamisi kanarakaa,
tee saidhepo kumate.

⁵ Iaku kutolentu i tanga-tangana mia mopesuana
i liana koburu,
tee o kakaana bukuku kabilanga atopad-
hamo.

⁶ Iaku mboomo mia motobholi i tanga-tangana
mia mate,
mboomo mia motopekamate ipatidhole i
nuncana koburu,
tee indamo uudhaniaku uka,
roonamo kutorambasakamo minaaka i li-
mamu.

⁷ Ingkoo udhikaaku i nuncana koburu i tambe
mpuu,
i tampa momandala tee momalalanda.

⁸ Pamurumu amatamo mpuu kunamisia,
tee utaburiaku mboomo ewona tawo.

Sela

⁹ Ingkoo upekaridhoakaaku manga musirahaku,
tee upewaua manga incia amarikaaku.
Iaku kumboore i nuncana kurunga tee inda
amembali kulimba;

¹⁰ matakua amarea roonamo kanarakaa.
E KAWASANA OPU, saesaeo iaku kugora i
Ingkoo,
iaku kutaanaka limaku i Ingkoo.

- 11 Buaka Ingkoo bheupewau muuzizati to mia
mate? Inda!
Buaka o rohi bheabhangu to apuji Ingkoo?
Inda!
- Sela
- 12 Buaka o kaasimu molagina atopakoleleaka i
nuncana koburu,
tee o lele pojanjiamu inda amabhotu
atopakoleleaka i tampana pabinasaana
mia? Inda!
- 13 Dhaangia buaka momatauna muuzizatimu i
nuncana kalalanda,
tee momatauna kabanaramu i lipu tampana
sagala giu atomalinguaka? Inda!
- 14 Maka iaku kupekee kuemani tulungi i Ingkoo,
e KAWASANA OPU,
saeona mpuu akawamo o do'aku i aroamu.
- 15 E KAWASANA OPU, pokia Ingkoo
ubhanakaaku?
Pokia ubuniakea o roumu minaaka i karoku?
- 16 Minaaka dhaangia kumaidhiidhi kunarakaa
tee saidhepo kumate,
inda kukapoia kutanggo manga kamingkiri*
iumbaakamu.
- 17 Pamurumu moka-rore-rore akangkanaiaku;
kamingkiri ahumbuniaku sakawana kubi-
nasa.
- 18 Bhari-bharia sumai akangkanaiaku mboomo
mawa saeo
tee alibuaku minaaka i bhari-bharia rope.

* **88:16 88:16** *kamingkiri:* Kadhaangiana mia monamisina
karona amaeka mpuu tee ameri.

- 19 Manga sabhangkaku tee musirahaku upekarid-
hoakaaku minaaka i karoku;
sii-sii o sabhangkaku soomo kalalanda.

89

Pojanjiana Kawasana Opu tee Raja Daud *89:1-53*

- 1 Lagu kaadharina Etan, miana Ezrahi.*
- 2 Iaku bhekulaguaka lagu kaasina KAWASANA
OPU molagina sa'umurua,
tee ngangaku bhekupakoleleaka pojanjiamu
inda amabhotu sa'umurua zamani.
- 3 Iaku kupogau, "Kaasimu molagina amatangka
sa'umurua,
tee pojanjiamu inda momabhotu upatotapua
i laiana."
- 4 Kawasana Opu apogau, "Iaku padhamo kub-
hoke pojanjia tee mia ipiliku,
Iaku padhamo kupotunda tee Daud, bhatu-
aku,
- 5 'Iaku bhekupatotapuaka manga siwulumu
sa'umurua,
tee kubhangu kauncuramakamu to siwu-
lumu naile itu.' "

* **89:1 89:1** *Etan, miana Ezrahi*: Sifatu aarifuna Etan tee Heman atomatau mpuu, ruamiaia o miana Ezrahi (kamata 88:1). Manga ahali Kitabi Momangkilo aabhia ande o Etan miana Ezrahi sii satotuuna o saro mosagaanana to asarongiaka Yedutun, sala samia minaaka i talu mia (Asaf, Heman, tee Yedutun) ipatugasina Nabii Daud to akapalai lagu wakutuuna asambahea i Baitulla. **89:4 89:4-5** 2Sa. 7:12-16; 1Taw. 17:11-14; Zab. 132:11-12; Tul. 2:30.

Sela

- ⁶ E KAWASANA OPU, taroakamo manga mahalukuna sorogaa apuji manga giu inda momentela ipewaumu,
tee pojanjiamu inda momabhotu i tangatangana rombongana malaa'ekati mangkilo.
- ⁷ Incema buaka i laiana momembalina mopodhimbana tee KAWASANA OPU?
Incema buaka modhaangiana i tangatangana mahalukuna sorogaa momembalina motopapokana tee KAWASANA OPU?
- ⁸ Incia o Aulata'ala motohoromati i nuncana majilisina malaa'ekati momangkilo,
amaoge tee atomaeka alabhi minaaka i bhari-bharia modhaangiana i saripina.
- ⁹ E KAWASANA OPU, Aulata'alana saangua alamu,
incema buaka mopokanana tee ingkoo? Ingkoo umakaa, e KAWASANA OPU,
tee sadia ubukeaka pojanjia inda momabhotu.
- ¹⁰ Ingkoo mokuasaina ewona tawo;
ande o ewo amalanga, Ingkoo mopekalinoo.
- ¹¹ Ingkoo mopahancuruna Rahab[†] mboomo maeati;
Ingkoo mopapogaa-gaana manga musumu tee kakaamu.
- ¹² Laiana o pewauamu tee o alamu o pewauamu uka.

[†] 89:11 89:11 *Rahab*: Mahaluku seetani.

- Ingekoo mopadhaangiana dunia tee bhari-bharia antona.
- 13 Napa tee salata, Ingekoo mopadhaangiaia;
Gunu Tabor tee Hermon uka asambo-sambo roonamo saromu.
- 14 Limamu amaoge,
lima kaanamu atopekalanga tee kakaana momulia.
- 15 Kabanara tee ka'adili amembali o fondasina kauncuramakamu,
kaasi molagina tee pojanjiamu inda momabhotu atokamata i nuncana bhari-bharia pewaumu.
- 16 Amasanaamo o lipu mosambo-sambona mopujiko,
modhadhina i nuncana caheana roumu, e KAWASANA OPU!
- 17 Roonamo saromu manga incia akaunde-unde saeo,
tee roonamo kabanaramu manga incia apujiko.
- 18 Ingekoo o kamuliana kakaana manga incia,
tee roonamo kalapemu, ingkami tahandamo tamakaa.
- 19 Katangkesimami o pewauana KAWASANA OPU,
siitumo o rajamami pewauana Aulata'ala Momangkilo isombana miana Israel.
- 20 I piamo itu, i nuncana pokamataana mia Ingekoo ufirimani
i manga mia mota'atiko, mboosii,
"Taku padhamo kutulungi samia o mia mobarani,

- Iaku padhamo kupekalanga samia ipiliku
minaaka i lipu sumai.
- 21 Iaku padhamo kupokawaaka Daud, o bhatu-
aku,
tee padhamo kulantia tee mina hususuku
momangkilo.
- 22 Limaku sadhaadhaa bheajagania,
sampemo limaku uka bheku-
pekatangkaakea.
- 23 Musu inda bheamembali ahumbunia,
tee inda bheapisakia mia madhaki.
- 24 Iaku bhekupahancuru manga bhalina i aroana,
tee kupabinasa manga mia mobancia.
- 25 Pojanjiaku inda bheamabhotu tee kaasiku mo-
lagina bheapobhawa tee incia,
tee roonamo saroku o bheajulu o kakaana.
- 26 Iaku bhekupamembali limana akuasai tawo,
tee o lima kaanana akuasai manga umala.
- 27 Incia bheagora i Iaku, 'Ingkoomo o Amaku,
Aulata'alaku, tee gunu bhatu mopasalaama-
tiaku!'
- 28 Iaku uka bhekuangkea to amembali ana
tumpeku,
tee kupamembalia momalangana mpuu mi-
naaka i bhari-bharia manga raja i dunia.
- 29 To sa'umurua bhekudhambaakea o kaasiku
molagina to incia,
tee o pojanjiaku tee incia bheasadhaadhaa
amatangka.
- 30 Bhekupewaua o siwuluna adhaangia
sa'umurua,

tee o kauncuramakana bhekupotaangiakea
kangengena laiana dhaangiapo i bhawona
dunia.

³¹ Ande manga anana inda ata'ati tee hukumuku,
tee o dhadhina inda aose tuturaku,

³² tee ande manga incia inda aose opea mopad-
hana ipatotapuakaku,
tee inda aose manga parintaku,

³³ sumaimo bhekuhukumua manga incia tee
kasambina lauro,
tee bhekubhebhea roonamo dosana manga
incia.

³⁴ Maka Iaku inda bhekubhotukia o kaasiku mo-
lagina to incia,
tee inda bhekumalinguakea pojanjiaku inda
momabhotu.

³⁵ Iaku sadhaadhaa kupamondo pojanjiaku,
tee opea mopadhana ifrimaniakaku inda
bhekubhaliia.

³⁶ Sampearo to sa'umurua Iaku kusumpa to
kangkilona saroku,
tee inda bhekugau-gau Daud.

³⁷ Siwuluna bheadhaangia to sa'umurua,
tee o kauncuramakana bheasadhaadhaa i
aroaku mboomo matanaeo,

³⁸ bheasadhaadhaa sa'umurua mboomo bula,
mosakusiiakea minaaka i laiana."

Sela

³⁹ Maka sii-sii Ingkoo umendeua tee ubholia;
Ingkoo upamuru tee mia mopadhana ilan-
timu.

⁴⁰ Ingkoo ubhotuki janjimu tee bhatuamu,

- tee o mahakotana upekarombuakea tee
ngawuna tana.
- 41 Upatobhatea bhari-bharia manga rindina
kotana,
tee upahancurua manga bentena.
- 42 Bhari-bharia mia molalo amanako pewauana;
incia amembali giuna kaele-ele to manga
sarimbanuana.
- 43 Ingkoo upekalanga lima kaanana manga
bhalina,
tee bhari-bharia musuna upewaua akaunde-
unde.
- 44 Ingkoo uka upamembali matana ewangana
rajamami inda akoampadhea,
tee inda utulungia i nuncana potimbea.
- 45 Upauntoa o kuasana momuliana,
tee o kauncuramakana utudhaakea i tana.
- 46 Upekampodhoa o umuruna rajamami wakutu-
una amangura,
tee usalibumbungiakea tee kaea.

Sela

- 47 Sakawana naepia uka e KAWASANA OPU?
Buaka bheubuniaka karomu sa'umurua?
Sakawana naepia o pamurumu akarore-rore
mboomo waa?
- 48 Udhania, tapanamo kampodho o dhadhiku sii,
tapanamo sia-siana dhadhina bhari-bharia
maanusia ipadhaangiamu!
- 49 Incema buaka o maanusia momembalina mod-
hadhina torosu tee inda amate?
Tee incema momembalina mopasalaamatina
inyawana tee alapa minaaka i mate?

Sela

50 E Kwasana Opu, i iapai o kaasimu molagina i
piamo itu
mopadhana ijanjiakamu to Daud tee katunda
i nuncana pojanjiamu inda momabhotu?

51 E Kwasana Opu, udhania tuaapa o bhatuamu
sii atohina;
incaku atanggo kahinana bhari lipu.

52 Manga musumu ahina raja mopadhana ilan-
timu, e KAWASANA OPU,
manga incia aele-elea iapaipo uka o
lingkaana.

53 Pujimo KAWASANA OPU to sa'umurua!
Aamin, ya aamin!

BOKU I PATA ANGUNA:

90

ZABURU 90--106

Kwasana Opu, Tampana Peulusa Sa'umurua 90:1-17

¹ Do'ana Musa, bhatuana Aulata'ala.

E Kwasana Opu, Ingkoomo tampamami tapeulu
to sa'umurua.

² Indapo manga gunu atopadhaangia,
indapo alamu tee dunia sii upamembalia,
Ingkoomo Aulata'ala mobakaa, inda tee auwalina
inda tee aahirina.

³ Ingkoo ubhalii maanusia amembali ngawuna
tana,

firimanimu, "Mbulimo i asalamu e anana
maanusia."

⁴ I nuncana pokamatamu sarewu tao
apokana mboomo eo iawi siimpo molapana,
atawa mboomo sapolika jagaana malo.

⁵ Ingkoo upepadhai dhadhimami mboomo
tapongipi,
mboomo rumpu motuna saeona;

⁶ wakutuuna saeona o rumpu atuwu tee atuna,
maka wakutuuna konowia amalau tee am-
atuu.

⁷ Sababuna ingkami tamofu roonamo amaramu,
tee ingkami tatokidha roonamo pamurumu.

⁸ Manga kasalahamami udhikaia i aroamu
tee o dosamami motobuniaka atokamata i
nuncana caheana roumu.

⁹ Sababuna bhari-bharia eomami tanamisi pamu-
rumu mokaore-rore,
tee talaloi tao-taomami mboomo kadheina
tapoinunca.

¹⁰ Kangengena dhadhimami tangkanamo pitu
pulu tao,
atawa ande amakaa o bukomami koroo
akawa walu pulu tao,

maka manga eo momalape mpuu ipotib-
haakamami tangkanamo kasukara tee
kanarakaa;
dhadhimami amampodho tee amasimba,
sapadhana sumai tamofumo.

- 11 Incema buaka momatauna kaogena amaramu?
Pamurumu amaoge mpuu apokana mboomo
mia amaekako.
- 12 Manga adharimo to tagagari eo-eomami mo-
mampodhona sii
mamudhaakana ingkami tapotibhaaka o
ngangaranda mo'aarifu.
- 13 E KAWASANA OPU, mbulimo. Sakawana
naepia Ingkoo u'amara?
Maasiakapea manga bhatuamu.
- 14 Patumpua o incamami i wakutuuna saeona tee
kaasimu molagina
mamudhaakana ingkami tasambo-
sambo tee takaunde-unde sa'umuria
dhadhimami.
- 15 Pasanaaia o incamami, apokana mboomo upe-
wau eo-eomami i piamo itu asukara,
tee apokana tee tao-tao itanggomami waku-
tuuna tanamisi kanarakaa.
- 16 Taroakamo opea ipewaumu akamatea manga
bhatuamu,
tee o kuasamu momulia sumai akamatea
anaanamami.
- 17 Taroakamo kabarakatina Kawasana Opu,
Aulata'alamami, dhaangia to ingkami.
Pekatangkea o angkana limamami, mamud-
haakana usahamami akohasili!

91

I nuncana Kajaganina Kawasana Opu *91:1-16*

- 1 Mia modhadhina i nuncana kajaganina
Aulata'ala Momalanga,

- bheamboore i nuncana peulusana Kawasana
Opu Mokokuasa,
² bheapogau i KAWASANA OPU,
"Ingkoomo o tampana peulusaku tee o ben-
tena potaangiaku; Aulata'alaku, ipara-
caeaku."
³ Incia bhemorambasakako minaaka i katapu,
tee minaaka i panyaki imateaka.
⁴ Incia bheasalibumbungiakako tee panina,
tee ingkoo bheu'amani i nuncana peulusana.
Incia atoparacaea tee bheamembali
katangkesi tee o bentemu.
⁵ Ingkoo inda bheumaeka tee balaa moumbana i
wakutuu malo,
atawa o kahumbuni inda inamu-namu
moumbana i wakutuu eo.
⁶ Ingkoo inda bheumaeaka tee panyaki imateaka
moumbana i nuncana kalalanda,
atawa tee kalelei ibinasaaka moumbana i
wakutuu pontanga eo.

⁷ Moomini sarewu mia amate i saripimu,
tee sapulu rewu mia amate i weta i kaanamu,
maka ingkoo inda bheucilaka.
⁸ Ingkoo tangkanamo bheutontoa tee matamu
karomu,
tee ukamatea tuaapa Aulata'ala
bheahukumu mia madhaki.

⁹ Roonamo KAWASANA OPU upamembalia tam-
pana peulusamu,
tee Aulata'ala Momalanga upamembalia
mbooresamu,
¹⁰ siitumo ingkoo inda bheucilaka,

tee balaa bheamaridho minaaka i bhanu-
amu.

- 11 Roonamo Incia bheatumpu manga
malaa'ekatina to apobhawa tee ingkoo,
mamudhaakana ajaganiko iapaipo uka o
lingkaamu.
- 12 Manga malaa'ekati sumai bheaangkako tee rua
mbalia limana
mamudhaakana o aemu inda atosunu i
bhatu.
- 13 Singa tee ulo bheulempagia,
singa mangura tee ulo mokobisa bheulanda-
landakia.
- 14 Firimanina Kawasana Opu, "Roonamo manga
mia momaasiakaaku, bhekupasalaamatia;
tee Iaku bhekujagani manga mia
momatauna saroku.
- 15 Wakutuuna manga incia agoraakaaku, siitumo
Iaku bhekulawania;
Iaku bhekupobhawa tee manga incia i nun-
cana kaseke,
tee bhekupasalaamatia tee kumuliangia.
- 16 Tee umuru marambe bhekupatumpua incana,
tee bhekususakea ande Iaku bhe-
mopasalaamatia."

92

Kawasana Opu o Haakimu Mo'adili
92:1-16

- ¹ Zaburuna saangu lagu to eona Saputuu.*
- ² Tapanamo kalape tasukuru i KAWASANA OPU
tee talaguaka manga lagu kapujia to saromu,
e KAWASANA OPU Momalanga;
- ³ to tapakoleleaka kaasimu molagina i wakutuu
saeona
tee tuaapa Ingkoo ukeniaka pojanjiamu inda
momabhotu i wakutuu malo,
- ⁴ poose tatiki gitari sapulu taliana,
tee taoseakea gambusu tee kecapu.
- ⁵ Roonamo Ingkoo, e KAWASANA OPU, upaunde-
undeaku tee opea mopadhana ipewaumu;
iaku kusambo-sambo tee opea mopadhana
ikarajaamu.
- ⁶ Amaoge mpuu bhari-bharia ipewaumu, e
KAWASANA OPU,
amandala mpuu o fikirimu tee amarasai to
tama'anaia!
- ⁷ Mia mokabhongo-bhongo inda bheamembali
amataua,
mia mokurana fikirina inda bheama'anaia o
giu incia sumai:
- ⁸ Moomini manga mia madhaki atuwu mboomo
rumpu,
tee o mia madhaki ahandamo abhari,
maka manga incia sadhaadhaa bheatopabinasa
sa'umurua.
- ⁹ Maka Ingkoo i tampa momalanga
sa'umurua e KAWASANA OPU.

* **92:1 92:1** *Saputuu*: Eo pitu eona (Saputuu) ipepaliakana manga miana Israel minaaka i parintana Aulata'ala to eo to poniuntoa tee ibaadati.

- 10 Roonamo manga musumu, e KAWASANA OPU,
roonamo manga musumu bheabinasa;
tee bhari-bharia mia madhaki bheupapogaa-
gaaia.
- 11 Maka upamembaliaku kumakaa mboomo
karambau,
tee ulaliakaaku mina bhaau to ubarakatiaku.
- 12 Mataku akamatamo kandawuna manga
musuku,
tee o talingaku arangomo katalona manga
mia madhaki mobhaliaku.
- 13 Mia mobanara bheatuwu tee akobhake torosu
mboomo puuna horomaa,
tee incia bheamaoge mboomo puuna aras i
Libanon.
- 14 Manga incia mboomo puuna kau ipombula i
aroana Bhanuana KAWASANA OPU,
tee ajulu o kaogena i aroana Bhanuana
Aulata'alata.
- 15 Moomini ako'umurumo dhaangiapo uka akob-
hake,
tee asadhaadhaa asuburu tee amaijo o
tawana,
- 16 manga miana mobanara sumai apakoleleaka
ande o KAWASANA OPU sumai abanara.
Incia o gunu bhatuku, tee sadia apewau
mo'adili.

93

Kawasana Opu o Raja Sa'umurua
93:1-5

- ¹ KAWASANA OPU o Raja, Incia abukeaka kamu-
liangi!
KAWASANA OPU abukeaka kuasa, tee apa-
tokamata kakaana.
Incia apakakaro dunia tee inda dhaangia
momembalina mohudhalia.
- ² Kauncuramakamu amatangka minaaka i
zamani mangenge,
tee Ingkoo udhaangiamo minaaka i dunia
indapo dhaangia.
- ³ Manga umala mokalua-lua ahandamo apekaoge
suarana, e KAWASANA OPU,
manga umala mokalua-lua ahandamo
apekaoge suarana,
manga umala mokalua-lua ahandamo
apekaoge ruuna ewona.
- ⁴ Maka minaaka i suarana uwe momaoge,
tee minaaka i ewona tawo momakaa,
alabhi amaoge KAWASANA OPU i tampa mo-
malanga.
- ⁵ E KAWASANA OPU, hukumumu abakaa
sa'umurua,
Kangkilo alaenga i nuncana Bhanuamu
sa'umurua zamani.

94

Kawasana Opu, Pambela Ka'adili

94:1-23

- ¹ E Aulata'ala, Ingkoomo KAWASANA OPU mobal-
asina kadhaki.
Potokamatamea ande Ingkoo mobalasina
kadhaki, e Aulata'ala!

- 2 Maasangia ahukumua, e haakimuna dunia;
hukumua manga mia mosombo apokana tee
pewauna!
- 3 Sakawana naepia manga mia madhaki, e
KAWASANA OPU,
sakawana naepia, manga mia madhaki
akaunde-unde?
- 4 Manga incia ataburaka pogau mosombo mi-
naaka i ngangana,
tee bhari-bharia mia mopewauna kadhaki
sumai apekalanga karon.
- 5 Manga incia apisaki uumatimu, e KAWASANA
OPU,
tee apahancuru tinaurakamu.
- 6 Manga incia apekamate iaiaro tee mia dhaga,
tee apekamate ana maelu.
- 7 Pogauna manga incia, "KAWASANA OPU inda
akamatea,
Aulata'alana Yakub isombana miana Israel
inda atontoa."
- 8 Perangoimea, e manga mia mokabhongo-
bhongo i tanga-tangana lipu sii!
E manga mia mokabhongo-bhongo, naepia
buaka ingkomiu bheumembali u'aarifu?
- 9 Incia modhikaakea talinga,
inda mungki Incia inda aporango!
Incia mopamodelena mata,
inda mungki Incia inda apokamata!
- 10 Incia mosasina manga lipu tee moadharina
maanusia,
dhaanamo Incia bheahukumua uka!
- 11 KAWASANA OPU amataua haejatina maanusia,

ande bhari-bharia sumai inda tee ma'anana.

12 Masanaamo mia iadharimu, e KAWASANA
OPU,
tee udhawua kaadhari minaaka i huku-
mumu;

13 upasanaa incana i wakutuuna kasukara,
sakawana mia madhaki apesua i nuncana
bhalona katapu.

14 Roonamo KAWASANA OPU inda bheabhanaka
uumatina,
tee Incia inda bheabholi miana lipuna mo-
membalina tinaurakana;

15 sababuna ka'adili bheambuli pendua to manga
mia mobanara,
tee bhari-bharia mia momakatena incana
bheaose.

16 Incema buaka moewaakaaku i manga mia
madhaki?

Incema buaka bhemopoaroakaaku to ae-
wangi manga mia mopewauna kadhaki?

17 Ande mencuana KAWASANA OPU motulun-
giaku,
saidhepo kumate i tampa momalino.

18 Wakutuuna kufikiri, "Aeku asindoli,"
sumaimo kaasina KAWASANA OPU molagina
motukoaku.

19 Wakutuuna abhari fikiriku i nuncana baa-
tiniku,
Ingkoo utautauaku, sumaimo kukaunde-
unde.

- 20 Inda mungki Ingkoo uposaangu tee manga
kaogesa momadhaki,
mopewauna kasalaha alaloi katotapuna inda
mo'adilina.
- 21 Manga incia apomufakati aewangi dhadhina
mia mobanara,
tee ahukumu mate manga mia inda mosala.
- 22 Maka KAWASANA OPU mboomo kota bente
moewaakaaku,
tee Aulata'ala amembali gunu bhatu tam-
pana peulusaku.
- 23 Incia bheahukumu manga mia madhaki
apokana tee pewauna,
tee bheapabinasea roonamo dosana.
KAWASANA OPU, Aulata'alata bheapabinasa
manga incia.

95

Horomati tee Ta'atia Kawasana Opu

95:1-11

- 1 Mai tasambo-samboaka to KAWASANA OPU!
Mai tasambo-sambo tee takaunde-unde to
gunu bhatu kasalaamatita!
- 2 Mai tapoaro i aroana tee taemani sukuru,
tee tasambo-sambo to Incia tee talaguakea
lagu kapujia!
- 3 Roonamo KAWASANA OPU o Aulata'ala mo-
maoge,
tee Incia o Raja momaoge mokuasaina bhari-
bharia dewa.
- 4 Manga tampa momandala mpuu i alamu ad-
haangia i nuncana limana,
tee manga lolona gunu uka o pewauana.

⁵ Incia mokuasaina tawo, roonamo Incia mopad-
haangiaia,
tee ati uka, o angkana limana.

⁶ Mai tasuju tasomba Incia,
tasuju i aroana KAWASANA OPU mopad-
haangiana ingkita.

⁷ Roonamo Inciamo o Aulata'alata,
tee ingkita o uumati idhambaakana,
tee o gulumana dumba igembalaakana limana.

Eo sii ande urango suarana,
⁸ bholimo umentagali mboomo i Meriba,
tee mboomo wakutuuna i Masa, i tana
matuu,

⁹ wakutuuna o opu-opuamiu acobaiaku
tee aujiaku moomini manga incia padhamo
akamata opea ikarajaaku.

¹⁰ Pata pulu tao o kangengena kumarika manga
mia incia sumai.
Firmaniku, "Manga incia o lipu mosalad-
hala,
tee inda aose parintaku."

¹¹ Rampaakanamo sumai, Iaku kupotunda i nun-
cana pamuruku,
"Manga incia inda bheapesua i tampana po-
niuntoa mopadhana ijanjiakaku to manga
incia, siitumo i Kanaan."

96

Kawasana Opu, Aulata'ala tee Haakimu i Saangua Dunia

96:1-13

- ¹ Laguakamo lagu bhaau to KAWASANA OPU,
Lagumo to KAWASANA OPU, e saangua dunia!
- ² Lagumo to KAWASANA OPU tee upujimo saronā!
Pakoleleakea saesaeo o kasalaamati minaaka i Incia.
- ³ Petulatulaakea o kamuliangina i tanga-tangana manga lipu,
tee upetulatulaakea manga pewauna inda momentela i bhari-bharia uumatina maanusia.
- ⁴ Sababuna o KAWASANA OPU amaoge tee atop-
uji mpuu.
Incia alaenga atomaeka alabhi minaaka i bhari-bharia dewa.
- ⁵ Bhari-bharia dewa isombana manga lipu sato-
tuuna o barahala,
maka o KAWASANA OPU mopadhaangiana laiana.
- ⁶ Incia amaoge tee amulia;
kuasa tee kakesa dhaangia i tampana momangkilo.
- ⁷ Akuimea o KAWASANA OPU, e uumatina maanusia,
akuimea o KAWASANA OPU o kamuliangina tee kakaana!

- 8 Akuimea o kamuliangina saronā to KAWASANA OPU,
bhawamo pasombaa tee uumbamo i aroana
Bhanuana Aulata'ala!
- 9 Sujumo usomba KAWASANA OPU tee upake
pakea momangkilo;
maekamo tee urengkumo i aroana, e saan-
gua alamu!
- 10 Pakoleleakea i tanga-tangana manga lipu,
"KAWASANA OPU sumai o Raja!
Atotuu-totuu o alamu amatangka tee inda
akohudha,
Incia bheahaakimu manga lipu tee ka'adili."
- 11 Taroakamo o laiana akaunde-unde tee o dunia
asambo-sambo;
taroakamo o tawo akanduu-nduu tee bhari-
bharia modhaangiana i nuncana,
- 12 taroakamo inawu akaunde-unde tee bhari-
bharia modhaangiana i bhawona.
I wakutuu incia sumai bhari-bharia puuna
kau i koo bhealagu roonamo akaunde-
unde
- 13 i aroana KAWASANA OPU, roonamo Incia
bheaumba,
roonamo Incia bheaumba to ahaakimu
alamu.
Incia bheahaakimu dunia tee ka'adili,
tee bhari-bharia lipu tee kabanarana.

97

KAWASANA OPU o Raja Momaoge
97:1-12

- 1 KAWASANA OPU o Raja! Taroakamo alamu
akaunde-unde;
taroakamo o pulo-pulo mobhari sumai
akaunde-unde!
- 2 Ta'ina ngalu tee kalalanda abulilingi
KAWASANA OPU,
kabanara tee ka'adili amembali
polandakana kauncuramakana.
- 3 Waa arore i aroana,
apekangau manga bhali i saripina.
- 4 Manga bhibhitona asuluwi alamu,
tee o dunia akamatamea tee arengku.
- 5 Manga gunu arere mboomo taru i aroana
KAWASANA OPU,
i aroana Aulata'alana saangua alamu.
- 6 Laiana apakoleleaka kabanarana,
tee bhari-bharia lipu akamata kamuliangina.
- 7 Bhari-bharia mia mosombana barahala
bheatopekaea,
siitumo manga incia mosomboakana karona
roonamo barahalana;
bhari-bharia dewa bheasuju tee asomba i
aroana Kawasana Opu.
- 8 Ra'eatina Sion akaunde-unde tee manga kampo
modhaangiana i Tana Yuda uka amasanaa,
wakutuuna arango kambotumu, e
KAWASANA OPU.
- 9 Ingkoomo, e KAWASANA OPU, Momalangana i
bhawona saangua alamu;
Ingkoo utomuliangi mpuu alabhi minaaka i
bhari-bharia dewa.

- ¹⁰ E ingkomiu momaasiakana KAWASANA OPU,
bancimea o kadhaki!
Sababuna KAWASANA OPU ajagani dhad-
hina uumatina mosaalihi,
tee arambasakea manga incia minaaka i li-
mana mia madhaki.
- ¹¹ Kainawa asuluwi mia mobanara,
tee o kasanaa to mia momakatena incana.
- ¹² E manga mia mobanara, kaunde-undemo roon-
amo KAWASANA OPU,
tee usukurumo to saroni momangkilo.

98

Wakutuuna Pasalaamatia Amakasumo

98:1-9

¹ Zaburu.

- Laguakamo lagu bhaau to KAWASANA OPU
roonamo Incia padhamo apewau manga giu
inda momentela;
kasalaamati padhamo akarajaaia lima
kaanana,
siitumo o lima kaanana momangkilo.
- ² KAWASANA OPU apakoleleaka kasalaamatina;
Incia apaumbaaka ka'adilina i aroana
matana manga lipu.
- ³ Incia audhania o kaasina molagina tee akeniaka
pojanjiana inda momabhotu
to siwuluna Israel.
Saangua dunia padhamo akamatea
o kasalaamati minaaka i Aulata'alata.
- ⁴ Sambo-sambomo to KAWASANA OPU, e saangua
dunia!

Kaunde-undemo tee usambo-sambomo, tee
ulaguakamea manga lagu kapujia!

⁵ Laguakamea o lagu kapujia to KAWASANA OPU,
poose umagasiaakea tee kecapi tee suara
momandii,

⁶ tee torompe tee sangkakala tee suara momandii.
Sambo-sambomo i aroana Raja, siitumo o
KAWASANA OPU!

⁷ Taroakamo o tawo akanduu-nduu tee bhari-
bharia modhaangiana i nuncana,
tee uka o dunia tee bhari-bharia momboore-
sia.

⁸ Taroakamo manga umala asambo-sambo,
tee manga gunu alagu apobhawa-bhawa
roonamo akaunde-unde

⁹ i aroana KAWASANA OPU
roonamo Incia aumba to ahaakimu dunia.

Incia bheahaakimu alamu tee kabanara,
tee ahaakimu manga lipu tee ka'adili.

99

Kawasana Opu, Raja Momangkilo
99:1-9

¹ KAWASANA OPU satotuuna o Raja!
Sumaimo manga lipu arengku!

Incia auncura i kauncuramakana i bhawona
manga malaa'ekati kerub;*

taroakamo o dunia akohudha!

² KAWASANA OPU momaoge i Sion;

Incia amalanga alabhi minaaka i bhari-
bharia lipu.

³ Taroakamo manga incia apuji saromu mo-
maoge tee motomaekana sumai.

Incia amangkilo mpuu!

⁴ Raja Momakaa, momaasiakana ka'adili,

Ingkoo upadhamo upatotapu kabanara;

Ingkoo upadhamo uewaaka hukumu tee ka'adili
i tanga-tangana miana Israel.

⁵ Pekalangea o KAWASANA OPU, Aulata'alata, tee
usujumo usomba i polandakana aena!

Incia amangkilo mpuu!

⁶ Musa tee Harun adhaangia i tanga-tangana
manga imamuna,

Samuel† atolentu i tanga-tangana manga mia
mogoraakana sarona.

Manga incia agora i KAWASANA OPU, tee
Incia alawania.

* **99:1 99:1** *manga malaa'ekati kerub:* Malaa'ekati igam-
baraaka mboomo mahaluku mokopani, agambaraaka kalangana
Aulata'ala tee umbaana. Apogauakea ande kauncuramakana
KAWASANA OPU dhaangia i bhawona manga malaa'ekati kerub.
Dhaangia patuna rua malaa'ekati kerub i bhawona sorongana
pojanjia tee i piamo itu Musa atarima firimanina Aulata'ala
minaaka iwe sumai. Kamata Limb. 25:18-22. † **99:6 99:6**
Samuel: Nabii Samuel molantina Daud to amembali rajana miana
Israel.

⁷ Incia afirimani minaaka i ariina ta'ina ngalu i
manga incia;
manga incia akenia pekatangka manga par-
intana,
tee manga katotapu mopadhana
idhawuakana to manga incia.

⁸ E KAWASANA OPU, e Aulata'alamami,
Ingkoo padhamo ulawani manga incia.
Ingkoo o Aulata'ala mo'amponina dosana miana
Israel,
maka Ingkoo uka mohukumuna manga incia
wakutuuna apewau kasalaha.

⁹ Pekalangea o KAWASANA OPU, Aulata'alata,
tee usujumo usombaia i gununa momangk-
ilo;
roonamo o KAWASANA OPU Aulata'alata,
amangkilo.

100

Pujimo Kawasana Opu i nuncana Bhanuana
100:1-5

¹ Zaburu to kurubani kasukuru.

Sambo-sambomo to KAWASANA OPU, e saangua
alamu!

² Sambaheamo i KAWASANA OPU tee
ukaunde-undemo,
umbamo i aroana tee ulaguaka lagu-lagu
momasanaa.

³ Mataumea ande o KAWASANA OPU sumai o
Aulata'ala.

Inciamo manga padhaangiana, tee ingkita o
pewauana;
ingkitamo o uumatina tee dumba-dumba
igembalana.

⁴ Pesuamo ulaloi bhambana lawana upoose
ulaguaka lagu kasukuru,
upesua i aroana Bhanuana Aulata'ala upoose
upujia.
Sukurumo i Incia tee upujimo saronu.

⁵ Roonamo o KAWASANA OPU sumai amalape;
kaasina molagina abakaa sa'umurua,
tee Incia akeni janjina sa'umurua zamani.

101

Tolauna Onina Raja

101:1-8

¹ Zaburuna Daud.

Iaku bhekulaguaka lagu to kaasina molagina tee
ka'adili,
to Ingkoo, e KAWASANA OPU, iaku bheku-
laguaka lagu kapujia.

² Iaku bhekupengkaadhariaka carana mamud-
haakana kudhadhi inda tee kasalahaku.
Naepia bhekupotibhaaka dhala sumai?

Iaku bhekudhadhi tee kakatena totona incaku i
nuncana bhanuaku.

³ Iaku inda bhekudhikaia i aroaku
giu inda mokoampadhea.

Iaku kubancia o pewau motagalina Aulata'ala;
giu incia sumai amaridho tee iaku.

⁴ Iaku bhekupekaridho karoku tee fikiri inda
mototo,
tee kumendeu kumatau tee saangu giu uka
momadhaki.

⁵ Incemapo uka mofitanaana sarimbanuana i
talikuna
bhekupabinasea.

Iaku inda bhekusabara
to mia mosombo tee momalangana incana.

⁶ Iaku kumaasiaka manga mia mota'atina tee
Aulata'ala,
mamudhaakana manga incia amembali am-
boore tee iaku.

Mia modhadhina i dhala inda mosala,
inciamo bhemolaianiaku.

⁷ Pande gau-gau
inda bheamboore i bhanuaku;
mia mobhoasakana kagau-gau
inda bheasadhaadhaa i aroaku.

⁸ Saesao bhekupabinasea
bhari-bharia mia madhaki i lipu sii,
mamudhaakana kupomofu bhari-bharia mia
mopewauna kadhaki
minaaka i kotana KAWASANA OPU.

102

Do'a Emaniana Tulungi tee Do'a to Sion
102:1-29

¹ Do'ana samia monarakaana, i wakutuuna
amangule tee amalute apeenci i aroana
KAWASANA OPU.

² E KAWASANA OPU, maasangia urangoa o
do'aku;

taroakamo o goraku akawa i Ingkoo.

³ Bholi ubuniakea o roumu minaaka i iaku
i eona kunamisi kanaraka.

Perangoiaku;

i eona kugora madheimo ulawaniaku,

⁴ roonamo o dhadhiku aila mboomo ombu,
tee manga bukuku amangau mboomo dha-
lika.

⁵ Ngangarandaku mboomo ibhebhe tee amalau
mboomo rumpu,
sabutuna amawala kukande.

⁶ Roonamo kakaana suaraku kupeenci,
badaku soomo buku.

⁷ Iaku mboomo manu-manu koa i tana matuu,
mboomo koa maidhiidhi i tampa mohancuru
tee momalino.

⁸ Iaku Inda amembali kukole,
mboomo manu-manu modhadhina sambaa-
mbaana i bhawona padhana bhanua.

⁹ Saeoa ahinaaku manga musuku;
manga incia aele-eleaku tee apake saroku to
katunda.

¹⁰ Iaku kukande rapu mboomo roti,
giu isumpuku apojaloaka lolu,

¹¹ roonamo amaramu tee pamurumu;
uangkaaku, kasiimpo ubhanakaaku.

¹² Saesaeo dhadhiku mboomo ngkamia-mia i
wakutuuna konowia,

tee kumalau mboomo rumpu.

- 13 Maka Ingkoo, e KAWASANA OPU, ukokauncu-
ramaka sa'umurua;
saromu asadhaadhaa atoudhani sa'umurua
zamani.
- 14 Ingkoo bheubhangu tee umaasiaka Sion,
roonamo wakutuunamo to umaasiakea,
tee akawamo wakutuu itantuakana.
- 15 Manga bhatuamu amaasiaka manga bhatuna
Kota Sion,
moomini o bhatuna amembalimo ngawu.
- 16 Sumaimo manga lipu amembali amaeka tee
sarona KAWASANA OPU,
tee bhari-bharia raja i alamu amaeka tee
pewaumu momulia.
- 17 KAWASANA OPU bheabhangu Sion pendua,
tee Incia bheaumba i nuncana kamuliangina.
- 18 Incia bheaperangoi do'ana manga mia
monaraka,
tee o KAWASANA OPU inda bheamendeu
do'ana manga incia.
- 19 Buria bhari-bharia o giu incia sumai to siwulu
bhemoumbana naile itu,
mamudhaakana o lipu bhemolaahirina naile
itu apuji KAWASANA OPU.
- 20 KAWASANA OPU apotonto minaaka i kalan-
gaana i tampana momangkilo,
minaaka i sorogaa Incia apotonto i alamu,
- 21 to aperangoi pekidheina mia itorongku
tee arambasaka manga mia mopadhana itan-
tuaka to atopekamate;

- 22 mamudhaakana o saroni KAWASANA OPU
atopetulatulaaka i Sion,
tee bheatopuji i Yerusalem,
- 23 wakutuuna manga lipu tee manga pamarin-
tana,
aporomusaka to asambahea i KAWASANA
OPU.
- 24 KAWASANA OPU apaila kakaaku wakutuuna
dhaangiapo kumangura,
tee apekampodho umuruku.
- 25 Kasiimpo kupogau, "E Aulata'alaku, bholi uala
inyawaku i pomuntangaana umuruku,
Ingkoo usadhaadhaa dhaangia sa'umurua
zamani."
- 26 I piamo itu Ingkoo upadhaangia ariina dunia;
umbe, laiana uka karajaana limamu.
- 27 Bhari-bharia sumai bheamofu, maka Ingkoo
usadhaadhaa udhadhi sa'umurua.
Bhari-bharia sumai bheamalusa mboomo
pakea,
Ingkoo bheubhalii alamu sii mboomo satuwu
juba
tee bhari-bharia uka bheako'aahiri.
- 28 Maka Ingkoo asadhaadhaa inda ubhalii,
tee o dhadhimu inda bheako'aahiri.
- 29 Anamami bheamboore tee ka'amani,
tee o siwuluna manga incia bheasadhaadhaa
i aroamu.

103

Pujimo Kwasana Opu, E Ngangarandaku!
103:1-22

¹ Zaburuna Daud.

Pujimo KAWASANA OPU, e ngangarandaku!
E saangua baatiniku, pujimea o sarona mo-
mangkilo!

² Pujimo KAWASANA OPU, e ngangarandaku,
tee bholi umalinguakea bhari-bharia
kalapena.

³ Incia mo'amponina bhari-bharia kasalahamu,
tee Incia mopauntona bhari-bharia
panyakimu.

⁴ Incia mopasalaamatina inyawamu minaaka i
koburu,
tee Incia modhawuko rahumati tee kaasina
molagina.

⁵ Incia mopatumpuna incamu tee kalape.
Sabutuna ingkoo usadhaadhaa umangura
mboomo manu-manu bunia.

⁶ KAWASANA OPU mokaarajaana hukumu tee
ka'adili
to bhari-bharia mia motopisaki.

⁷ Incia asusuaka dhalana to Musa
tee apaumbaaka opea mopadhana ipewauna
to miana Israel.

⁸ Sababuna o KAWASANA OPU abukeaka kaasina
inca tee rahumati,
Incia sadia asabara tee o kaasina molagina
ataralabhi-labhi.

⁹ Incia inda mangaraeaka torotorosu,
tee inda bhea'amara to sa'umurua.

¹⁰ Incia inda manga hukumu apokana tee dosata,
atawa mangabalasi apokana tee kasalahata.

- 11 Roonamo mboomo kalangana laiana i bha-
wona alamu,
mboo sumaimo o kaogena kaasina molagina
to manga mia momaekaia.
- 12 Mboomo karidhona minaaka i timbu
sakawana i bhara,
mboo sumaimo Kawasana Opu ahapusu
manga dosata tee abhanakea pekaridho
minaaka i karota.
- 13 Mboomo samia ama amaasiaka manga anana,
mboo sumaimo o KAWASANA OPU amaasi-
aka manga mia momaekaia.
- 14 Roonamo Incia amataua tuaapa ingkita
tatopebhangu;
Incia amataua ande ingkita sii tangkanamo
ngawu.
- 15 Maanusia o dhadhina amampodho mboomo
rumpu;
manga incia akokamba mboomo kamba-
kamba i inawu;
- 16 ande atowiia ngalu, amalaumo o kamba-
kamba sumai,
tee o tampana indamo atomatau uka.
- 17 Maka o kaasi molagina KAWASANA OPU
sadhaadhaa abakaa to manga mia mo-
maekaia,
tee o kabanarana to anana tee siwuluna
manga incia,
- 18 siitumo to manga incia mokeniakana pojan-
jiana
tee moudhania to aose manga parintana.

- 19 KAWASANA OPU padhamo apatotapuaka
kauncuramakana i sorogaa,
tee o pamarintana akuasai bhari-bharia
ipadhaangiana.
- 20 E bhari-bharia malaa'ekati pujimo KAWASANA
OPU,
e manga malaa'ekati mobarani momakaa tee
mopewauna firimanina,
tee mota'atina tee opea ibhoasakana!
- 21 E bhari-bharia tantarana i sorogaa pujimo
KAWASANA OPU,
e manga bhatuana moosena parintana!
- 22 Pujimo KAWASANA OPU, e bhari-bharia ma-
haluku ipadhaangiana,
i sagala tanpa ikuasaina!
Pujimo KAWASANA OPU, e ngangarandaku!

104

*Kaogesana Kawasana Opu i nuncana Bhari-
bharia Ipadhaangiana*

104:1-35

- ¹ Pujimo KAWASANA OPU, e ngangarandaku!

E KAWASANA OPU, e Aulata'alaku! In-
gkoomo momaogena!
Ingkoo uposalibumbuaka kaogesa tee kamu-
liangi,
² tee upakana kainawa mboomo juba.
Ingkoo ubhakesaka laiana mboomo saangu
kema,
³ tee upakaro ariina bhanuamu i uwe i bha-
wona kubana laiana.
Manga ta'ina ngalu upamembalia karetaamu,

- tee Ingkoo usawi i bhawona ngalu.
4 Ngalu upamembalia potumpuamu,
tee o bherese amembali bhatuamu.
- 5 Ingkoo udhika alamu i bhawona fondasina tee
upekatangkea,
sabutuna inda bheakohudha sa'umurua.
- 6 Ingkoo apake andalaoge mboomo juba to usal-
ibumbu alamu,
o uweni mawa apene atutubhi manga gunu.
- 7 Roonamo pamurumu o uwe sumai asiwulu
makaa tee apalai,
tee roonamo arango ruuna guntumu o uwe
sumai apalai pekadhei.
- 8 Uwe sumai akompa i manga gunu tee asapo i
nuncana manga mbolonga,
i tampa mopadhana itantuakamu to uwe
sumai.
- 9 Ingkoo padhamo utantuakea o tidha inda mo-
membalina ilaloina
mamudhaakana o uwe sumai inda apendua
uka asalibumbu alamu.
- 10 Ingkoo upewau matana uwe alua i manga
mbolonga,
kasiimpo asiwulu i tanga-tangana manga
gunu,
- 11 tee apasumpu bhari-bharia binata maila;
apaila katuuna bhorokona manga keledai
maila.
- 12 I bhiwina uwe sumai manga manu-manu i
antara amboore,
kasiimpo manga incia apekawowo i tanga-
tangana manga puuna kau.

- 13 Minaaka i paana bhanuamu upasapoakea wao
to manga gunu;
alamu abukeaka hali momalape mopadhana
ipadhaangiamu.
- 14 Ingkoo mopatuwuna rumpu to binata kadham-
baaka,
tee upatuwu penembula to maanusia
mamudhaakana o alamu amembali ako-
hasiliaka giuna ikande,
15 siitumo o angguru ipeeluna maanusia,
mina zaitun mopewauna rou akocahea,
tee o roti mopekatangkana dhadhina maanu-
sia.
- 16 Manga puuna kauna KAWASANA OPU apotib-
haaka wao motaralabhi-labhi,
siitumo manga puuna aras i Libanon ipom-
bulana karona.
- 17 Iwe sumaimo manga manu-manu akarajaa
poteona,
manu-manu ranggung* akarajaa bhanuana i
puuna sanobar.
- 18 Manga gunu momalanga amembali tanpa
mbooresana bhembe maila,
tee manga kabumbu mokobhatu amembali
tampana peulusana paapaando.†
- 19 Ingkoo upadhaangia bula to amembali tanda to
motantuakana wakutuuna bula mobhaau,

* **104:17 104:17** *manu-manu ranggung*: Manu-manu incia sii o bhanguna mboomo manu-manu hoo, aena amarate tee o kalangana badana alabhi sametere, tee o tampana apeelo kinande i uwe tee i ati, tee o poteona i puuna kau momalanga. † **104:18 104:18** *paapaando*: Binata incia sii isarongiaka kancil i nuncana pogau Indonesia.

- tee o matanaeo amataua naepia o wakutu-
una bheatondu.
- 20 Ingkoo mopadhaangiana kalalanda, kasiimpo
amembali amalo,
i wakutuumo incia sumai sagala binata i koo
aposawe.
- 21 Manga singa mangura akomburu apeelo kinan-
dena,
aemani kinande minaaka i Aulata'ala.
- 22 Matanaeo uka abhete,
kasiimpo manga binata sumai ambuli
apotidhole i nuncana mbooresana.
- 23 Kasiimpo maanusia alimba to akarajaa,
tee apajala usahana sakawana konowia.
- 24 E KAWASANA OPU, abhari mpuu mopadhana
ipewaumu!
Tee hikimati upamembalia bhari-bharia;
alamu abukeaka tee mahalukumu.
- 25 Kamatea o tawo momaewa motobhakesakana
sumai,
iwe sumako dhaangia tee sagala giu ma-
haluku mopondele inda atogagari o kabha-
rina,
dhaangia o binata momaidhiidhi tee manga
binata maoge.
- 26 Iwe sumai manga kapala adhala,
tee iwe sumai uka o Lewiatan‡ mopadhana
ipadhaangiamu amagamagasia.
- 27 Bhari-bharia aharapu i Ingkoo,

‡ 104:26 104:26 *Lewiatan*: Mahaluku maoge i tawo mboomo
naga. Kamata 74:14.

- mamudhaakana udhawua kinande ande
akawa wakutuuna.
- 28 Wakutuuna udhawuakea kinande,
manga incia arombusakea;
wakutuuna ubungkale limamu,
manga incia akandea sakawana amambosu.
- 29 Wakutuuna ubuniaka roumu,
manga incia atokidha;
Wakutuuna uala poinuncana, amatego manga
incia,
kasiimpo ambuli pendua amembali ngawu.
- 30 Maka ande manga incia udhawua poinunca,§
manga incia atopamembali;
Ingkoo udhawu dhadhi bhaau to alamu.
- 31 Taroakamo o kamuliangina KAWASANA OPU
asadhaadhaa sa'umurua;
taroakamo KAWASANA OPU akaunde-unde
tee opea mopadhana ipewauna!
- 32 Wakutuuna Incia atonto alamu, sumaimo o
alamu akorende,
tee wakutuuna adhingku manga gunu, sabu-
tuna akoombu manga gunu incia sumai!
- 33 Iaku bhekulaguaka lagu to KAWASANA OPU
sa'umurua dhadhiku;
iaku bhekupuji Aulata'alaku kananteana
dhaangiapo kudhadhi.
- 34 Maasangia opea ifikiriku amasanaakea incana;
iaku bhekukaunde-unde roonamo
KAWASANA OPU.
- 35 Taroakamo o mia mokodosa amapupu mi-
naaka i bhawona alamu,

§ 104:30 104:30 *udhawua poinunca*: Amembali uka akoma'ana
"ulamboko rohimu."

tee manga mia madhaki indamo dhaangia.

Pujimo KAWASANA OPU, e ngangarandaku!
Pujimo KAWASANA OPU!

105

*Manga Kapujia to Pewauna Kawasana Opu i
Zamani Mangenge*

105:1-45

- ¹ Sukurumo i KAWASANA OPU, tee ugoraakamo saronā,
pakoleleakea opea ipewauna i tanga-tangana manga lipu!
- ² Lagumo to Incia, tee upuji-pujimea;
petulatulaakamea bhari-bharia ipewauna inda momentela!
- ³ Kaunde-undemo roonamo saronā momangkilo;
taroakamo akaunde-undeaka manga mia mopeelona KAWASANA OPU.
- ⁴ Sadioamo upeelo KAWASANA OPU tee uemani kakaā minaaka i Incia;
sadioamo upeeloa.
- ⁵ Udhania manga pewauna inda momentela mopadhana ikarajaana,
manga muuzizatina, tee manga kambotu ipakawaakana,
- ⁶ e siwuluna Ibrahim, o bhatuana Aulata'ala,
e siwuluna Yakub, uumati ipilina Kawasana Opu!
- ⁷ KAWASANA OPU satotuuna o Aulata'alata;
kambotuna atopake i saangua alamu.
- ⁸ Incia sadia bheaudhania o pojanjiana,

- tee firimani mopadhana iparintaakana
sa'umurua to siwulu bhemoumbana naile
itu,
- ⁹ siitumo o pojanjia ibhokena tee Ibrahim,
tee o sumpana tee Ishak,
- ¹⁰ Incia apekatangka sumpa incia sumai to Yakub
amembali saangu katotapu,
tee amembali pojanjia mobakaa to miana
Israel,
- ¹¹ firimanina, "Tana Kanaan bhekudhawuaka to
ingkoo,
amembali tinaurakamu."
- ¹² Wakutuuna miana Israel o kabharina
tangkanamo saidhe,
saidhemea, tee manga incia amboore
mboomo mia dhaga iwe sumai,
- ¹³ manga incia apekalingka-lingka minaaka i
saangu lipu sakawana i lipu mosagaanana,
minaaka i saangu pamarinta sakawana i
pamarintana lipu mosagaanana.
- ¹⁴ Maka o KAWASANA OPU inda ataroaka incema
uka mopisakina manga incia.
KAWASANA OPU audhaniaka manga raja to
ajagani manga incia,
- ¹⁵ "Bholi ukia-kiaia manga mia ipiliku,
tee bholi upacilaka manga nabiiku!"
- ¹⁶ Wakutuuna o KAWASANA OPU aumbaaka bal-
aana kaara to lipu incia sumai,

105:9 **105:9** Bhaa. 12:7; 17:8; 26:3. **105:10** **105:10-11** Bhaa.
28:13. **105:14** **105:14-15** Bhaa. 20:3-7. **105:16** **105:16** Bhaa.
41:53-57.

- tee apahancuru bhari-bharia kinande mod-
haangiana iwe sumai,
- 17 KAWASANA OPU atumpumo samia
moporikanaakana manga incia,
saronā mia incia sumai o Yusuf, mopadhana
iaso amembali bhatua.
- 18 Aena apekambelaakea tee rante,
bhorokona atobhokeaka tee rante minaaka i
ase;
- 19 sabutuna opea ipekilalaakana Yusuf atopa-
mondomo,
KAWASANA OPU afirimani ande o Yusuf aba-
nara.
- 20 Rajana Mesir momaogena kuasana sumai,
atumpu mia to apabebasi Yusuf minaaka i
katorongku.
- 21 Incia aangkea amembali samia momalangana
pangkatina i nuncana maligena raja,
tee o raja adhawua kuasa to mo'urusuna
bhari-bharia harataana,
- 22 tee uka adhawua kuasa to a'atoro manga pa-
gawena raja peepeeluana incana,
tee aadhariaka hikimati to manga mancuana
monaasehatina raja.
- 23 Kasiimpo Yakub aumba i Mesir,
Yakub amboore i Tana Ham* mboomo samia
dhaga.

105:17 105:17 Bhaa. 37:28; 45:5. 105:18 105:18-19 Bhaa. 41:13.

105:20 105:20 Bhaa. 41:14. 105:21 105:21 Bhaa. 41:39-41.

105:23 105:23 Bhaa. 46:6; 47:11. * 105:23 105:23 Tana Ham:

Saro mosagaanana to Tana Mesir.

- 24 KAWASANA OPU, apamembalia o uumatina
ajulu o kabharina,
tee apamembalia manga incia alabhi o
kakaana minaaka i bhalina.
- 25 Kasiimpo KAWASANA OPU abhalii incana
manga miana Mesir to abanci uumatina,
tee atipu miana Israel.
- 26 Sumaimo Incia alamboko Musa,
tee Harun, bhatuana mopadhana ipilina.
- 27 Rua-rua miaia apadhaangia manga giu inda
momentela minaaka i Kawasana Opu i
tanga-tangana manga miana Mesir sumai,
tee apewau manga muuzizati i Tana Ham.
- 28 Kawasana Opu aumbaaka kalalanda, sumaimo
amalalandamo o lipu incia sumai
maka o miana Mesir inda aose firimanina.
- 29 Incia abhalii uwena miana Mesir amembali
raa,
tee apekamate bhari-bharia ikanena manga
incia.
- 30 Manga barakaka abuke i lipuna manga incia
sampe apesua uka i nuncana kolemana raja.
- 31 Kawasana Opu afirimani, sabutuna aumbamo
manga lale mosampa,
tee ngkonunu apabuke saangua lipu.
- 32 Incia apasapo waona esi,
tee bhibhito mokakila-kila i saangua lipuna
manga incia.
- 33 Incia apabinasa puuna angguru tee puuna ara,

105:24 105:24 Limb. 1:7-14. 105:26 105:26 Limb. 3:10; 4:14-15.

105:28 105:28 Limb. 10:21-23. 105:29 105:29 Limb. 7:17-21.

105:30 105:30-31 Limb. 8:1-24. 105:32 105:32 Limb. 9:22-25.

- tee apatobhata bhari-bharia manga puuna
kau i lipuna manga incia.
- 34 Kawasana Opu afirimani uka, kasiimpo aum-
bamo manga kabhoru,
tee o kabhoru mopolaka kabharina inda ato-
gagari.
- 35 Kabhoru sumai akande bhari-bharia penem-
bula i lipuna manga incia,
tee apepadhaia bhari-bharia hasilina in-
awuna manga incia.
- 36 Kawasana Opu uka apekamate bhari-bharia
ana tumpe umane modhaangiana i lipuna
incia sumai
siitumo bhaa-bhaana o kakaana manga in-
cia.
- 37 Kasiimpo Aulata'ala apalimba miana Israel
apoose abhawa pera tee bulawa,
bhari-bharia manga incia amalape
o namisina tee amakaa o bukuna
wakutuuna alimba minaaka i Mesir.
- 38 Miana Mesir akaunde-unde wakutuuna manga
incia alingka abholi lipu sumai
roonamo miana Mesir amaeka mpuu tee
miana Israel.
- 39 Aulata'ala abhakesaka ta'ina ngalu to apapeulu
uumatina,
tee waa to kasuluwi i wakutuuna amalo.
- 40 Manga incia aemani kinande i Aulata'ala, sabu-
tuna o Aulata'ala alambokoakea manu-
manu sonta,

105:34 105:34 Limb. 10:12-15. 105:36 105:36 Limb. 12:29.
105:37 105:37-38 Limb. 12:33-36. 105:39 105:39 Limb.
13:21-22. 105:40 105:40 Limb. 16:2-15.

- tee manga incia apekambosuakea roti mi-
naaka i laiana.
- ⁴¹ Awetaia o bhatu maoge, kasiimpo apidhimo o
uwe,
asiwulu mboomo umala i tana matuu,
- ⁴² roonamo Incia audhani firimanina momangk-
ilo,
tee audhani Ibrahim o bhatuana sumai.
- ⁴³ Jadi Incia abhawa uumatina alimba tee
akaunde-unde,
tee manga mia ipilina alagu tee asambo-
sambo.
- ⁴⁴ Aulata'ala adhawuakea tanana manga lipu
mosagaanana to manga incia,
sabutuna manga incia apotibhaaka
harataana manga lipu incia sumai.
- ⁴⁵ Tee mboo sumai, manga incia amembali akenia
pekatangka manga katotapuna,
tee aose kaadharina.
- Pujimea o KAWASANA OPU!

106

*Kaasina Molagina Kawasana Opu tee Kakaana
Incana Miana Israel
106:1-48*

¹ Pujimea o KAWASANA OPU!

Sukurumo i KAWASANA OPU, roonamo Incia
amalape,
kaasina molagina abakaa sa'umurua.

- ² Incema momembalina mopetulatulaakana giu
maoge mopadhana ipewauna KAWASANA
OPU,
atawa apaperangoiakea sagala kapujia to In-
cia?
- ³ Amasanaamo manga mia mopewauna ka'adili,
tee modhadhina i nuncana kabanara.
- ⁴ E KAWASANA OPU, udhaniaku wakutuuna upe-
wau malape i uumatimu;
bholi umalinguakaaku wakutuuna upasalaa-
mati manga incia.
- ⁵ Mamudhaakana amembali kukamata kalapena
dhadhina manga mia ipilimu,
mamudhaakana amembali kumasanaa i
nuncana kaunde-undena manga miana
lipumu,
tee mamudhaakana amembali kupujiko
kupobhawa-bhawa tee uumati
momembalina tinaurakamu.
- ⁶ Ingkami padhamo tapewau dosa mboomo opu-
opuamami;
ingkami padhamo tapewau kasalaha tee ta-
dorohaka.
- ⁷ Wakutuuna i Mesir,
opu-opuamami inda ama'anaia manga giu
inda momentela ipewaumu;
manga incia inda audhania o kaasimu molagina
motaralabhi-labhi sumai,
maka manga incia adorohaka i Aulata'ala
Momalanga i bhiwina Tawo Towu Lambe.

- 8 Maka o Kawasana Opu apasalaamati manga incia to ajagani sarona karonā,
mamudhaakana amataua o kaogena kuasana.
- 9 Incia agorampangi Tawo Towu Lambe sabutuna amatuumo o tawo sumai,
kasiimpo abhawa manga incia apolimba i tawo mboomo adhala i tana matuu.
- 10 Jadi o Kawasana Opu apasalaamati manga incia minaaka i kuasana manga mia mobancia,
tee arambasakea manga minaaka i limana musu.
- 11 Uwena tawo apatondū bhalina manga incia;
inda samia uka mosalaamatina.
- 12 I wakutuu incia sumai manga incia apara-caemo tee opea ifirimaniakana,
tee alaguaka manga kapujia to Incia.
- 13 Maka manga incia amasimba mpuu amalin-guaka opea ipewauna Kawasana Opu,
tee inda aantagi to arango opea ihaejati-akana to manga incia.
- 14 Manga incia akuasaia nawusuu to akande i tampa momalino,
tee auji Aulata'ala mamudhaakana abukuti-iakea o kuasana i tana matuu.
- 15 Kawasana Opu adhawuakea opea iemanina manga incia,
maka apoose alambokoakea tee panyaki imembaliakana manga incia amangkuru.

- 16 Wakutuuna i pokemaa manga incia amapii incana tee Musa,
tee amapii incana uka tee Harun, mia momangkilo ipilina KAWASANA OPU.
- 17 Alamu apoweta kasiimpo adhoku Datan,
tee o tana atutubhi manga moosena Abiram.*
- 18 Waa uka arore i tanga-tangana manga incia,
rorena waa apekangau manga mia madhaki.
- 19 Manga incia akarajaa patu anana sapi i Horeb,
kasiimpo asomba patu motorabu sumai.
- 20 Tee mboo sumai, manga incia padhamo abholosi kamuliangina Aulata'ala
tee patuna sapi mokandena rumpu.
- 21 Manga incia amalinguaka Aulata'ala
mopasalaamatina manga incia,
mopadhana mopewauna manga giu momaoge i Mesir.
- 22 Siitumo Incia apewau manga giu inda momentela i Tana Ham,
tee manga giu motomaeka i bhiwina Tawu Towu Lambe.
- 23 Siitumo sababuna o Kawasana Opu afirimani
ande bheapabinasa manga incia
maka ataangia Musa, mia ipilina.
Musa ataangi pamuruna Kawasana Opu to
manga incia,
sabutuna amarana auntomo tee inda apabinasea.

* **106:17 106:17** *Datan...Abiram:* Datan tee Abiram akapalai saangu rombongana miana Israel modorohakana i Harun tee Musa. Manga mia incia sumai akangkanaia hisabuna Kawasana Opu. **106:19 106:19** Limb. 32:1-14.

- 24 Kasiimpo manga incia amendeu apesua i lipu
momangada sumai,
tee inda aparacaea firimanina.
- 25 Manga incia akamburu-mburu i nuncana kem-
ana,
tee inda aperangoi firimanina KAWASANA
OPU.
- 26 Siitumo sababuna Incia aposumpa
ande bheapekamate manga incia i tana
matuu,
- 27 tee o siwuluna manga incia bheapapogaa-gaaia
i tanga-tangana manga lipu,
tee apasaraakaakea i lipu mosagaanana.
- 28 Manga incia uka asomba dewa Baal i Gunu
Peor,
tee akande manga kurubani isumbele to
manga barahala inda modhadhi.
- 29 Manga giu incia sumai amapiiakea incana
KAWASANA OPU,
sabutuna aumbamo o panyaki imateaka i
tanga-tangana manga incia.
- 30 Maka o Pinehas aumba ahukumu manga mia
mosala,
sabutuna auntomo o panyaki imateaka
sumai.
- 31 Pewauna Pinehas sumai amembali saangu jasa
tee giu mobanara to incia
sakawana sa'umurua zamani.
- 32 Manga incia apekapii incana KAWASANA OPU
i saripina matana uwe i Meriba
sabutuna o Musa anarakaa roonamo pe-
wauna manga incia,

- 33 sababuna manga incia apekarewu incana
Musa,
sabutuna incia abhoasaka manga pogau inda
ifikirina porikana.
- 34 Manga incia uka inda apabinasa manga lipu i
Kanaan,
mboomo iparintaakana KAWASANA OPU to
manga incia,
- 35 maka manga incia aporomu tee manga miana
lipu incia sumai,
tee asiringi pewauna manga incia.
- 36 Miana Israel asomba manga barahalana miana
Kanaan,
sabutuna o giu incia sumai amembali katapu
to manga incia.
- 37 Manga incia apasombaakea o anana, malape o
ana umane atawa o ana bhawine
amembali kurubani to manga seetani.
- 38 Manga incia apekamate manga mia inda mos-
ala,
siitumo o raana anana manga incia,
ipasombaakana amembali kurubani to
manga barahala i Kanaan,
sabutuna o lipu sumai amarombuaka raa.
- 39 Sumaimo manga incia apekarombu karoni tee
opea ipewauna,
tee o fe'elina mboomo bhawinena dhala.†

† **106:39 106:39** Pokaiana Kawasana Opu tee Israel agam-
baraaakea mboomo ibaratina umane tee bhawinena. Wakutuuna
Israel asomba barahala sumai agambaraaakea tee ibaratina Israel
azina tee bhawinena dhala.

- 40 Siitumo sababuna o pamuruna KAWASANA
OPU akarore-rore to uumatina,
tee amarika akamata lipuna uumatina
karona.
- 41 Sumaimo Kawasana Opu apasarakaaka manga
incia i manga lipu mosagaanana,
sabutuna manga incia akuasaia musuna.
- 42 Manga incia apisakia musuna,
sabutuna o miana Israel atokuasai tee ato-
talo.
- 43 Amenturu o Kawasana Opu atulungia,
maka manga incia sadia adorohaka tee opea
ihaejatiakana,
sabutuna manga incia atondu i nuncana
dosa.
- 44 Maka o Kawasana Opu akamatea o ka-
narakaana manga incia
wakutuuna arangoa o gorana.
- 45 Rampaakanamo Incia afaduli tee manga incia,
Kawasana Opu audhanimea o pojanjiana,
tee amaasi akamata manga incia apokana tee
kaasina molagina motaralabhi-labhi.
- 46 Rampaakanamo Kawasana Opu, manga incia
apotibhaaka rahumati
sabutuna manga musuna amaasiakea.
- 47 Manga pasalaamatimo, e KAWASANA OPU, e
Aulata'alamami!
Manga romusakamo tee manga pambulimo
minaaka i lipuna mia,
mamudhaakana ingkami tamembali tasukuru i
saromu momangkilo
tee takaunde-unde wakutuuna tapuji-pujiko.

48 Atopujimo o KAWASANA OPU, Aulata'ala isom-
bana miana Israel,
sii-sii tee sa'umurua!
Taroakamo bhari-bharia mia apogau, "Aamin!"
Pujimea o KAWASANA OPU!

BOKU I LIMA ANGUNA:

107

Zaburu 107--150

*Kasukuru Minaaka i Manga Mia Ipasalaa-
matina Kawasana Opu*

107:1-43

- 1 Sukurumo i KAWASANA OPU roonamo Incia
amalape,
tee kaasina abakaa sa'umurua.
- 2 Taroakamo o giu incia sumai abhoasakea
manga mia mopadhana itolosina
KAWASANA OPU,
siitumo manga incia mopadhana itolosina
minaaka i kanarakaa,
- 3 tee mopadhana iromusakana minaaka i manga
lipu mosagaanana,
minaaka i timbu tee minaaka i bhara,
minaaka i napa tee minaaka i salata.
- 4 Dhaangia uka manga mia mopekalingka-
lingkana i tana matuu,
tee inda amatau dhala moporopena i kampo
imbooresina mia.
- 5 Manga incia amaara tee amatau bhorokona,
tee ailamo bhari-bharia iharapuna.

- 6 Manga incia agora tee aemani tulungi i
KAWASANA OPU i wakutuuna kaseke,
kasiimpo Incia arambasakea manga mi-
naaka i kanarakaana,
7 tee atondaia alaloi dhala momakate,
sabutuna manga incia akawa i kampo im-
booresina mia.
8 Taroakamo manga incia asukuru i KAWASANA
OPU roonamo kaasina molagina,
tee roonamo manga giu inda momentela
ipewauna to maanusia,
9 sababuna Incia apatumpu incana mia momatu-
una bhorokona,
tee apekambosu mia momaara tee giu mo-
malape.
- 10 Sagaa minaaka i manga incia auncura i nun-
cana kalalanda tee kagalapu,
manga mia itaangi i katorongku amaporo
incana tee atobhoke tee rante ase,
11 roonamo manga incia adorohaka tee firiman-
ina Aulata'ala,
tee amendeu atarima kaadharina Kawasana
Opu Momalanga.
- 12 Siitumo sababuna Incia apisaki ngangaran-
dana manga incia tee karajaa matamo,
manga incia amandawu tee inda dhaangia
motulungia.
- 13 Kasiimpo manga incia agora i KAWASANA OPU
i wakutuuna kaseke,
tee Incia apasalaamatia manga minaaka i
kanarakaana;
14 Manga incia apalimbaia minaaka i kalalanda
tee kagalapu,

- tee abhotukimea o kabhokena rantena
manga incia.
- 15 Taroakamo manga incia asukuru i KAWASANA
OPU to kaasina molagina,
tee manga giu inda momentela ipewauna to
maanusia,
- 16 roonamo Incia apasaki manga bhamba tam-
baga,
tee atumpo manga kapasona bhamba mo-
tokarajaana minaaka i ase.
- 17 Dhaangia uka momembalina mokabhongo-
bhongo roonamo fe'elina manga incia
modorohaka,
tee roonamo kasalahana karonu, manga in-
cia atosikisaa.
- 18 Manga incia amendeu akande opea uka,
tee o ajalana manga incia amakasumo.
- 19 Kasiimpo, manga incia agora aemani tulungi i
KAWASANA OPU i wakutuuna kaseke,
tee Incia apasalaamatia manga minaaka i
kanarakaa.
- 20 KAWASANA OPU afirimani, tee o firimanina
sumai amembali apaunto kapiina manga
incia,
tee apasalaamatia manga minaaka i bhalona
koburu.
- 21 Taroakamo manga incia asukuru i KAWASANA
OPU roonamo kaasina molagina,
tee roonamo manga giu inda momentela
ipewauna to maanusia.
- 22 Taroakamo manga incia abhawa pasombaa
kasukuru,

tee apokoleleakea bhari-bharia ipewauna
apoose asambo-sambo!

23 Dhaangia uka mosapona mokarajaana i kapala
i tawo,
siitumo manga mia mopodhagana i an-
dalaoge.

24 Manga incia akamatea bhari-bharia ipewauna
KAWASANA OPU,
tee manga giu inda momentela ipewauna i
andalaoge.

25 Incia afirimani, sabutuna akawamo ngalu tee
garura
moangkana manga ewona tawo pekalanga-
lana.

26 Manga incia atoangka sakawana i antara, kasi-
impo atotudhaaka i andalaoge.
Manga incia akailanga kabaranina roonamo
apoaro tee balaa.

27 Manga incia alingka kabhele-bhele tee adida
mboomo mia malango,
tee ailamo o akalana.

28 Kasiimpo manga incia agora aemani tulungi i
KAWASANA OPU i wakutuuna kaseke,
tee manga incia arambasakea minaaka i ka-
narakaa,

29 tee apaunto garura,
sabutuna manga ewo i tawo amembali ama-
lino.

30 Kasiimpo manga incia akaunde-unde roonamo
amalinomo,
tee Incia abhaweana manga i labusa iporo-
peana.

- 31 Taroakamo manga incia asukuru i KAWASANA
OPU roonamo kaasina molagina,
tee roonamo manga giu inda momentela
ipewauna to maanusia!
- 32 Taroakamo manga incia amuliangia i tanga-
tangana poromusakaana uumatina,
tee apujia i nuncana majilisina manga man-
cuanana lipu.
- 33 Incia abhalii manga umala amembali tana
matuu,
tee manga matana uwe amembali tana inda
mokouwe.
- 34 Tana mosuburu apamembalia tana mokogara
inda momembalina ipombulaaka penem-
bula
roonamo kadhakina manga mia momboore-
sia.
- 35 Incia uka abhalii tana matuu amembali kolam,
tee o tana inda mokouwe apamembalia
manga matana uwe.
- 36 KAWASANA OPU ataroaka manga mia mo-
maara amboore iwe sumai,
kasiimpo manga incia abhangu kota to tam-
pana mbooresana.
- 37 Manga incia ahewi manga inawu tee apombu-
laakea puuna angguru,
tee apotibhaaka timpua mobhari.
- 38 Minaaka i kabarakatina Kawasana Opu, manga
incia ajulu o kabharina,
tee Incia inda ataroaka binata kadham-
baakana akura o kabharina.

- ³⁹ Maka sapadhana sumai, manga incia atalomea
musuna, sabutuna o kabharina akuramo
tee atungku i aroana bhalina,
roonamo o musu apisaki tee apacilaka
manga incia tee apekaporoa incana.
- ⁴⁰ KAWASANA OPU apasapoakea kahina to
manga kaogesana lipuna,
manga incia apewaua apekalingka-lingka i
tana matuu tee inda apotibhaaka dhala.
- ⁴¹ Maka o mia misikini aangkea minaaka i ka-
narakaana,
tee manga incia apamembalia ajulu o kabha-
rina mboomo gulumana dumba.
- ⁴² Manga mia mobanara akamatea o giu incia
sumai tee akaunde-unde,
maka o ngangana mia madhaki atosoncongi.
- ⁴³ Taroakamo manga mia mo'aarifu akamata
bhari-bharia o giu incia sii,
tee afahamua o kaasina KAWASANA OPU
molagina.

108

Sukuru tee Do'a
(57:8-12; 60:7-14)

- ¹ Lagu. Zaburuna Daud.
- ² Ngangarandaku amatangka, e Aulata'ala!
Gauku bhekulaguaka lagu kapujia to Ingkoo.
Bhangumo, e inyawaku!
- ³ Iaku bhekubhangu tee kumagasiaaka gambusu
tee kecapi!

Iaku bhekubhangu raneeooge!

⁴ Iaku bhekusukuru i Ingkoo i tanga-tangana
manga lipu, e KAWASANA OPU,
tee kulaguaka manga lagu kapujia i manga
lipu mosagaanana.

⁵ Sababuna o kaasimu molagina amaoge akawa i
laiana,
tee kabanaramu akawa i ta'ina ngalu.

⁶ E Aulata'ala, susuakea kaogesamu i laiana,
tee kamuliangimu i saangua alamu.

⁷ Mangapakana tee kuasamu tee uperangoimea o
do'aku,
mamudhaakana manga mia imaasiakamu
atopasalaamati.

⁸ Aulata'ala padhamo afirimani i tampana mo-
mangkilo,
"Iaku gauku kukaunde-unde, tee
kupodhawu-dhawuaka Tana Sikhem,
tee ku'ukuru Mbolongana Sukot."

⁹ Gilead tee Manasye o pewauaku,
Efraim mboomo helem minaaka i ase moja-
ganina bhaaku,
tee Yuda katukona pamarintaku.

¹⁰ Maka o Tana Moab amembali palangga tam-
pana bhanuiana aeku,
tee i bhawona Tana Edom kutudhaaka san-
daliku.
E Tana Filistin, Iaku kusambo-sambomo
roonamo padhamo kotaloko!"

- 11 Incema bhemobhawaaku i kota mokobentena
makaa sumai?
Incema momembalina mo'antaraaku
sakawana i Edom?
- 12 E Aulata'ala, buaka mencuana Ingkoo mangab-
hanakana?
E Aulata'ala, Ingkoo inda umaju upobhawa
tee tantaramami to taewangi musu.
- 13 Manga tulungi minaaka i musu,
roonamo o katulungina maanusia inda ako-
guna.
- 14 Tapobhawa tee Aulata'ala ingkita tamembali
tatalo musuta,
sababuna Incia bhemopahancuruna musuta.

109

Do'ana Mia Motofitanaa

109:1-31

- ¹ To kapalana molaguna. Zaburuna Daud.

- Bholi inda tee uu'uumu,
e Aulata'ala ipuji-pujiku.
- ² Roonamo ngangana manga mia madhaki tee
pande gau-gau padha apogauakaaku mad-
haki;
manga incia afitanaaku tee dhela mogau-
gau.
- ³ Pogau ibhoasakana manga incia abukeaka ka-
bancia,
tee aewangiaku inda ako'alasa.
- ⁴ Manga incia araeakaaku kupewau kadhaki to
abalasi kaasiku,
moomini i tangasaana kudo'aakea.
- ⁵ Jadi manga incia abalasi kalapeku tee kadhaki,

tee abalasi kaasiku tee kabancia.

- ⁶ Angkamo o mia madhaki to alawani musuku,
taroakamo o mia i weta kaanana to araeakea.
- ⁷ Ande ato'adili, taraoakamo incia atobhotukiaka
amembali mia mosala,
tee do'ana atoabhi dosa.
- ⁸ Maasangia o umuruna amampodho,
tee taroakamo kauncuramakana aalea mia
mosagaanana.
- ⁹ Taroakamo manga anana amembali amaelu,
tee o bhawinena amembali iaiaro.
- ¹⁰ Taroakamo manga anana apekalingka-lingka
tee apengkaemani,
maasangia manga incia atopadhencu mi-
naaka i karunggana bhanuana.
- ¹¹ Maasangia o mia pande giwuna dhosa aalea
bhari-bharia pewauana modhaangiana i
karena,
tee maasangia mia mosagaanana arampasia
hasilina usahana.
- ¹² Bholi dhaangia samia uka momalapena incana
tee incia,
atawa momaasiakana manga ana-anana mo-
maeluna sumai.
- ¹³ Taroakamo bhari-bharia siwuluna atopabi-
nasa,
tee o sarena atomalinguaka i siwulu muri-
murina.
- ¹⁴ Taroakamo kasalahana opu-opuana sadhaad-
haa audhania KAWASANA OPU,
tee inda ahapusu dosana inana.
- ¹⁵ Taroakamo kasalahana sadhaadhaa i aroana
KAWASANA OPU,

- tee inda dhaangia uka moudhanina mia incia
sumai i alamu,
- 16 roonamo incia inda dhaangia audhani kalape,
tangkanamo apadhende mia monarakaa tee
mia motopisaki,
tee mia momaporona incana sakawana am-
ate.
- 17 Incia sadia apekatunda, jadi taroakamo o
katundana akangkanai karona!
Incia amendeu ado'aaka tee abarakati mia
mosagaanana, jadi taroakamo o barakati
amaridho minaaka i karona!
- 18 Incia apake katunda mboomo bajuna,
maasangia katunda sumai apesua i nuncana
badana mboomo uwe,
tee apesua i nuncana buku-bukuna mboomo
mina.
- 19 Taroakamo o katunda sumai amembali
mboomo juba ipakena to mosalibum-
bungiakana karona,
tee mboomo kabhokena tanga mosadiana
abhokeaka tangana.
- 20 Taroakamo o giu incia sii amembali ka-
balasina KAWASANA OPU to manga mia
moraekaaku,
tee manga mia mopogauakaaku madhaki.
- 21 Maka Ingkoo, e KAWASANA OPU, e
Aulata'alaku, tulungiakumo roonamo
saromu,
tee upasalaamatiaku roonamo kalapemu tee
kaasimu molagina.
- 22 Roonamo iaku sii kunarakaa tee kumisikini,

- tee i nuncana karoku amambela o ngan-
garandaku.
- ²³ Iaku kuila mboomo ngkamia-mia i wakutuuna
konowia;
inyawaku mboomo kabhoru itantamaka.
- ²⁴ Toputuku arengku roonamo kupoasa,
tee o badaku amangkurumo.
- ²⁵ Mia moraeakaaku ahinaaku;
wakutuuna akamataaku, manga incia
alengko-lengko bhaana.
- ²⁶ E KAWASANA OPU, e Aulata'alaku, tulungiaku.
Pasalaamatiaku apokana tee kaasimu molag-
ina.
- ²⁷ Taroakamo o musuku amataua ande bhari-
bharia sumai ipewauna limamu,
tee amataua ande Ingkoo mopewaua e
KAWASANA OPU.
- ²⁸ Taroakamo manga incia apekatunda, maka
Ingkoo ubarakatiaku.
Taroakamo manga incia apotibhaaka kaea,
maka o bhatuamu sii bheakaunde-unde.
- ²⁹ Taroakamo manga mia moraeakaaku apake
ka'aebu to bajuna,
tee taroakamo manga incia aposalibum-
buaka kaeana mboomo juba motutubhina
karona.
- ³⁰ Iaku sadia bhekusukuru i KAWASANA OPU tee
ngangaku,
tee bhekupujia i tanga-tangana mia bhari
- ³¹ roonamo Incia aewaaka mia misikini

to apasalaamatia minaaka i manga mia mo-
hukumua.

110

*Al Masi sumai Momembalina Raja tee Imamu
110:1-7*

¹ Zaburuna Daud.

Mboo siimo o firimanina KAWASANA OPU to
Opuku,*
"Uncuramo i weta kaanaku,
sakawana kupewau manga musumu amem-
bali polandakana aemu."

² KAWASANA OPU bheapekaewa pamarintamu
minaaka i Kota Sion.
Kokuasamo i tanga-tangana manga
musumu!

³ Ra'eatimu arela bheamaju tee totona incana,
i eona ukapalai manga pasukamu
i bhawona manga gunu momangkilo.
Manga ana manguramu bheaumba i aroamu,
mboomo alo mosapona i wakutuuna raneeo.

⁴ KAWASANA OPU padhamo apotunda
tee Incia inda bheahelaia pendua o kambo-
tuna,
"Ingkoo satotuuna o imamu to sa'umurua

110:1 110:1 Mat. 22:44; Mrk. 12:36; Luk. 20:42-43; Tul. 2:34-35;
1Kor. 15:25; Kol. 3:1. * **110:1 110:1** *Opuku*: Iwe sii o Kawasana
Opu afrimani i Opuna Nabii Daud. Mboomo motoburina i
nuncana Kitabi Lele Malape, Opu sumai atosarongiaka Isa Al Masi
(kamata Mat. 22:44).

mboomo tuturana Malkisedik."[†]

- ⁵ Kawasana Opu dhaangia i weta kaanamu;
 Incia bheapahancuru manga raja i eona pamuruna.[‡]
- ⁶ Incia bheahukumu manga lipu,
 sabutuna o lipu sumai abukeaka tee manga maeati.
 Incia bheapasaki bhaana manga musuna i saangua alamu.
- ⁷ Incia bheasumpu minaaka i saangu umala modhaangiana i bhiwina dhala,
 siitumo incia bheaangka bhaana roonamo padhamo atalo manga musuna.

111

Kalapena Kawasana Opu

111:1-10

¹ Pujimea o KAWASANA OPU!

Iaku bhekusukuru i KAWASANA OPU tee mpuu-mpuuna incaku
 i tampa poromusakaana mia momakatena incana
 tee i tampana poromusakaana uumati.

[†] **110:4 110:4** *Malkisedik:* Imamu tee rajana Salem moubana i Abram sapadhana incia atalo Raja Kedorlaomer tee manga raja mopobhawana tee incia. Siitumo incia momembalina polanciringa mopokanana tee Al Masi bhemoumbana tee bhemo-toangkana to amembali raja tee imamu. Kamata Bhaa. 14:17-24 tee Ibr. 7:1-28. [‡] **110:5 110:5** *Incia bheapahancuru manga raja i eona pamuruna:* I wakutuuna aahirina zamani, Opu sumai bheapekatalo bhari-bharia pamarinta inda mo'adili (kamata Zab. 110:1; 2:6-9).

- 2 Tapanamo inda amentela ipewauna
KAWASANA OPU,
alaenga mpuu afikiria bhari-bharia mia
mo peelua,
- 3 pewauna amulia tee atopuji,
kabanarana sadhaadhaa to sa'umurua.
- 4 Incia apatokamata manga pewauna inda mo-
mentelana
mamudhaakana sadhaadhaa taudhanian;
KAWASANA OPU sumai amalape incana tee
amaasiaka uumatina.
- 5 KAWASANA OPU adhawu razakii i mia mo-
maekaia,
Incia sadhaadhaa audhani janjina.
- 6 KAWASANA OPU padhamo asusuaka kuasana i
uumatina,
tee manga incia adhawuakea tana tinau-
rakana manga lipu.
- 7 KAWASANA OPU apewau adili tee amem-
bali atoparacaea i nuncana bhari-bharia
ipewauna,
tee bhari-bharia parintana atoparacaea.
- 8 Bhari-bharia sadhaadhaa amatangka to
sa'umurua,
tee apewaua i nuncana ka'adili tee kabanara.
- 9 KAWASANA OPU padhamo apabebasi
uumatina,
tee apatotapuaka pojanjiana to sa'umurua.
Sarona amangkilo tee amaoge!
- 10 Mia momaekana i KAWASANA OPU satotuuna
o auwalina mia amembali a'aarifu;
bhari-bharia mia mopewaua apotibhaaka fa-
hamu momalape.

Kapujia to KAWASANA OPU asadhaadhaa
sa'umurua!

112

Kasanaana Mia Malape

112:1-10

¹ Pujimea o KAWASANA OPU!

Amasanaamo mia momaekana i KAWASANA
OPU,
mo peeluna mpuu manga parintana.

² Manga opu-opuana bheakokuasa i alamu,
tee siwulu momakatena incana bheato-
barakati.

³ Harataa tee karangkaea dhaangia i nuncana
bhanuana,
tee kabanarana manga incia sadhaadhaa to
sa'umurua.

⁴ Moomini i nuncana kalalanda, dhaangia tee
kainawa to mia mosaalihi;
siitumo to mia momalape, momaasi, tee
mobanara.

⁵ Akodhawuamo o mia mobukeakana kaasi tee
momenturuna mopekpadhaakana doina,
tee a'adili i nuncana bhari-bharia karajaana.

⁶ Roonamo iimanina mia mobanara inda bheako-
hudha sa'umurua,
tee bheatoudhani sa'umurua.

⁷ Manga incia inda amaeka tee lele madhaki;
incana amatangka roonamo aparacaea i
KAWASANA OPU.

⁸ Incana amatangka tee manga incia inda
amaeka;

- sabutuna manga incia bheakamata manga musuna amatalo.
- 9 Tee relana totona incana, manga incia sadia asadakaa i mia misikini.
Kabanarana sadhaadhaa to sa'umurua;
manga incia akokuasa tee atohoromati.
- 10 Manga mia madhaki akamata giu incia sumai asabhaakea randana;
manga incia uka apakiri-kiri ngincina, kasi-impofu amofu.
Opea ihaejatiakana mia madhaki inda bheamembali.

113

Kawasana Opu Apekalanga Mia Momaidhiidhi
113:1-9

- 1 Pujimea o KAWASANA OPU!
Pujimea, e manga bhatuana KAWASANA OPU,
pujimea o sarona KAWASANA OPU!
- 2 Bhari-bharia kapujia to sarona KAWASANA OPU,
sii-sii sampe sa'umurua!
- 3 Pepuu minaaka i abhete matanaeo sakawana asoo matanaeo,
sarona KAWASANA OPU alaenga atopuji.
- 4 KAWASANA OPU amalanga tee akokuasa i bha-wona bhari-bharia lipu,
tee kamuliangina alabhi amalanga minaaka i laiana.
- 5 Incema buaka mboomo KAWASANA OPU,
Aulata'alata,

- mokokauncuramakana i tampa momalanga,
6 tee mopa'ungkona karonā to apotonto
i laiana tee i alamu?
7 Incia aangka mia misikini minaaka i ngawu,
tee apalimba mia monarakaā minaaka i
kabumbuna ngawu
8 to apauncura manga incia aposaangu tee manga
kaogesa
minaaka i uumatina.
9 Incia arahumatiakea anaana i manga bhawine
mokomba,*
sabutuna o bhawine sumai akaunde-unde i
nuncana bhanuana.

Pujimea o KAWASANA OPU!

114

Wakutuuna Miana Israel Alimba minaaka i Mesir

114:1-8

- 1 Wakutuuna miana Israel alimba minaaka i
Mesir,
siitumo wakutuuna siwuluna Yakub abholi
lipu moposalana pogauna sumai,
2 Kawasana Opu apamembali Yuda tampana mo-
mangkilo,
tee Israel amembali tampana pamarintana.
3 Tawo Towu Lambe akamata KAWASANA OPU
sabutuna apalai tee amembali amatuu,

* **113:9 113:9** *bhawine mokomba*: Bhawine inda momembalina mokoana. **114:1 114:1** Limb. 12:51. **114:3 114:3** Limb. 14:21.

- Umala Yordan ambuli i talikuna.*
4 Manga gunu apekalumpa-lumpa mboomo
dumba umane,
tee manga kabumbu apekatiba-tiba mboomo
anana dumba.
- 5 E Tawo Towu Lambe, apokia upalai?
E Umala Yordan, apokia umbuli i talikumu?
6 E manga gunu, apokia upekalumpa-lumpa
mboomo dumba umane,
tee manga kabumbu, apokia upekatiba-tiba
mboomo anana dumba?
- 7 E alamu, torendemo i aroana Kawasana Opu,
i aroana Aulata'ala isombana Yakub,
8 mopamembalina uwe alimba minaaka i nun-
cana bhatu sakawana amembali tampana
lembokana uwe to asumpuaka miana
Yahudi,
tee o bhatu dhempa amembali matana uwe.

115

Kamuliangi Tangkanamo to Kawasana Opu 115:1-18

- 1 Mencuana ingkami, e KAWASANA OPU, men-
cuana ingkami,
maka soomo saromu molaengana imuliangi,
roonamo kaasimu molagina tee umembali
utoparacaea.

* **114:3 114:3** Aeati 3 tee 5 apogauaka rua mpearo Aulata'ala
abungkale dhala i tanpa mokouwe to miana Israel wakutuuna
manga incia abholi Mesir tee apesua i Tana Kanaan. **114:8**
114:8 Limb. 17:1-7.

- ² Pokia manga lipu mosagaanana bheapogau,
"I iapai o Aulata'alana manga incia?"
- ³ Aulata'alamami dhaangia i sorogaa,
Incia bheapewau opeapo uka ipeeluna.
- ⁴ Barahalana manga lipu sumai minaaka i bu-
lawa tee pera,
ikarajaana limana maanusia.
- ⁵ Manga barahala sumai akomuncu, maka inda
amembali apogau,
akomata, maka inda amembali apokamata,
- ⁶ akotalinga, maka inda amembali aporango,
akoango, maka inda amembali apebhau,
- ⁷ akolima, maka inda dhaangia momembalina
ipererena,
akoe, maka inda amembali alingka,
tee inda amembali uka apalimba suara mi-
naaka i goncona.
- ⁸ Manga mia mokaajaia amembali apokana tee
barahala sumai,
tee bhari-bharia mia moparacaeana i bara-
hala sumai.
- ⁹ E Israel, paracaeamo i KAWASANA OPU!
Incia motulungikomiu tee amembali
katangkese mojanikomiu.
- ¹⁰ E manga imamu mominaakana i siwuluna
Harun, paracaeamo i KAWASANA OPU.
Incia motulungikomiu tee amembali
katangkese mojanikomiu.
- ¹¹ E manga mia momaekana tee KAWASANA OPU,
paracaeamo i KAWASANA OPU!

Incia motulungikomiu tee amembali
katangkesi mojaganikomiu.

- 12 KAWASANA OPU manga udhani tee bhea-
mangabarakati,
Incia bheabarakati miana Israel,
tee bhari-bharia imamu mominaakana i si-
wuluna Harun,
13 tee Incia bheabarakati manga mia momaekana
tee KAWASANA OPU,
malape o kaogesa atawa o mia momaidhi-
idhi.
- 14 Maasangia KAWASANA OPU apekabharia o
siwulumu,
malape to ingkoo atawa to manga anamu.
- 15 Maasangia ingkoo abarakatiko KAWASANA
OPU,
mopadhaangiana laiana tee alamu!
- 16 Laiana momalanga sumai o pewauana
KAWASANA OPU,
maka o alamu sii padhamo adhawuakea to
anana maanusia.
- 17 Manga mia momate inda bheapuji-puji
KAWASANA OPU,
mboo sumai uka manga mia mosapona i
duniana mia mate momalino,
- 18 maka ingkita dhaangiapo modhadhina sii bhe-
mopujina KAWASANA OPU
pepuu sii-sii sakawana sa'umuraa.

Pujimea o KAWASANA OPU!

116

Alapa minaaka i Katapu Imateaka

116:1-19

- ¹ Iaku kumaasiaka KAWASANA OPU, sababuna
Incia arango
goraku tee bhari-bharia iemaniku.
- ² Roonamo Incia aperangoiaku,
sumaimo bhekugora i Incia sa'umurua
dhadiku.
- ³ Manga katapu imateaka abulilingiaku,
kanarakaa i nuncana koburu angkakanaiku,
iaku kunamisi kaseke tee kaporo.
- ⁴ Kasiimpo kugoraaka saroni KAWASANA OPU,
"E KAWASANA OPU, pasalaamatia o in-
yawaku!"
- ⁵ KAWASANA OPU satotuuna amalape tee abanara;
Aulata'alata satotuuna amaasiaka uumatina.
- ⁶ KAWASANA OPU ajagani manga mia inda momembalina motulungina karona.
Wakutuuna inda tee kakaaku, Incia
mopasalaamatiaku.
- ⁷ E ngangarandaku, tanangimo pendua
roonamo KAWASANA OPU padhamo apewau
malape tee ingkoo.
- ⁸ E KAWASANA OPU, Ingkoo padhamo upasalaa-
mati inyawaku minaaka i mate,
ujagani maku mamudhaakana inda kutingi,

- tee upekatangka aeku mamudhaakana inda atosunu.
- ⁹ Iaku bhekudhala i aroana KAWASANA OPU,
i lipuna manga mia modhadhi.
- ¹⁰ Iaku sadhaadhaa kuparacaea, moomini waku-
tuuna kupogau,
"Iaku kunarakaa mpuu."
- ¹¹ I wakutuuna kubingu kupogau,
"Bhari-bharia mia inda amembali atopara-
caea."
- ¹² Opea buaka momembalina ipasombaakaku i
KAWASANA OPU to kubalasiaka
bhari-bharia kalapena incana to karoku?
- ¹³ Iaku bhekuangka tondena kasalaamati*
tee kugoraaka sarena KAWASANA OPU.
- ¹⁴ Iaku bhekutolosi tolauna oniku i KAWASANA
OPU
i aroana bhari-bharia uumatina.
- ¹⁵ Akoharagaa i matana KAWASANA OPU
matena manga mia mosaalihi.
- ¹⁶ E KAWASANA OPU, satotuuna iaku sii o bhatu-
amu.
Iakumo bhatuamu, o anana minaaka i bhat-
uamu bhawine.
Ingkoo padhamo urambasakaaku minaaka i
kabhokeku.

116:10 116:10 2Kor. 4:13. * **116:13 116:13** *tondena kasalaamati*: Miana Israel kananeana apasombaaka angguru i nuncana tonde to tandana asukuru roonamo padhamo apasalaamatia Kawasana Opu.

- 17 Iaku bhekupasombaaka kurubani sukuru to
Ingkoo[†]
tee kugoraaka sarena KAWASANA OPU.
18 Iaku bhekutolosi tolauna oniku i KAWASANA
OPU
i aroana bhari-bharia uumatina,
19 i tanalapana Baitullana KAWASANA OPU,
i tanga-tangamu, e Yerusalem!

Pujimea o KAWASANA OPU!

117

*Pujimo KAWASANA OPU, E Bhari-bharia Lipu
117:1-2*

- 1 Pujimo KAWASANA OPU, e bhari-bharia lipu!
Muliangimea Incia, e bhari-bharia lipu!
2 Roonamo amaoge o kaasina molagina to ingkita
tee KAWASANA OPU amembali atoparacaea
sa'umurua.

Pujimo KAWASANA OPU!

118

*Laguna Kasukuru Roonamo Takana
118:1-29*

- 1 Sukurumo i KAWASANA OPU roonamo Incia
amalape,
kaasina molagina abakaa sa'umurua.

[†] **116:17 116:17** pasombaaka kurubani sukuru to Ingkoo:
Kawasana Opu inda afaraluu opeopea to atopasombaaka i Incia
(kamata Zab. 50:9-13). Bhari-bharia ipasombaaka satotuuna to
amuliangi Incia, asukuru i Incia, tee mamudhaakana audhanian
Aulata'ala. **117:1 117:1** Rom. 15:11. **118:1 118:1** Zab.
100:4-5.

- 2 Taroakamo miana Israel apogau,
"Kaasina molagina abakaa sa'umurua."
- 3 Taroakamo siwuluna Harun apogau,
"Kaasina molagina abakaa sa'umurua."
- 4 Taroakamo bhari-bharia mia momaekana i
KAWASANA OPU apogau,
"Kaasina molagina abakaa sa'umurua."
- 5 I nuncana kaseke iaku kugora i KAWASANA
OPU,
KAWASANA OPU alawaniaku tee apekalale-
saia o ngangarandaku.
- 6 Iaku inda bhekumaeka roonamo KAWASANA
OPU apoose tee iaku;
maanusia inda amembali apewau opeopea
tee iaku.
- 7 KAWASANA OPU apoose tee iaku to atulun-
giaku,
iaku bhekukamata manga mia mobanciaku
atotalo.
- 8 Salabhina kupeulu i KAWASANA OPU,
tee kuparacaea i maanusia.
- 9 Salabhina kupeulu i KAWASANA OPU,
tee kuparacaea i manga kaogesa.
- 10 Bhari-bharia lipu alibuaku,
maka tee kuasana KAWASANA OPU, manga
incia kutaloa!
- 11 Manga incia alibuaku; umbe, manga incia
alibuaku minaaka i bhari-bharia rope,
maka tee kuasana KAWASANA OPU, manga
incia kutaloa!
- 12 Manga incia alibuaku mboomo uwani,

maka manga incia atopekatalo i nuncana
sakija mata mboomo waa motununa
rumpu mokorui-rui.

Tee kuasana KAWASANA OPU, manga incia
kutaloa!

¹³ Iaku amakaa kutojumpuraka sabutuna said-
hepo kumandawu,
maka o Kawasana Opu atulungiaku.

¹⁴ KAWASANA OPU o kakaaku tee kapujiaku.
Incia amembalimo kasalaamatiku.

¹⁵ Dhaangia o suarana sambo-sambo tee kaman-
gantalo
i nuncana kemana manga mia mobanara,
"Lima kaanana KAWASANA OPU apewau
manga giu momaoge!"

¹⁶ Lima kaanana KAWASANA OPU
atopekalanga!
Lima kaanana KAWASANA OPU apewau
manga giu momaoge!"

¹⁷ Iaku inda bhekumate, maka kudhadhi
tee kupakoleleaka manga pewauna
KAWASANA OPU.

¹⁸ KAWASANA OPU padhamo ahukumuaku
pekakaa,
maka Incia inda apasaraakaaku i mate.

¹⁹ Bungkaleakaaku manga bhambana lawana ka-
banara,
mamudhaakana iaku bhekupesua tee
kusukuru i KAWASANA OPU.

- 20 Siimo bhambana lawana KAWASANA OPU,
manga mia mobanara bheapesuaikia alaloia.
- 21 Iaku bhekusukuru tee Ingkoo, roonamo Ingkoo
padhamo ulawani do'aku,
tee umembalimo mopasalaamatiaku.
- 22 Bhatu ibhanakana manga pandena bhanua
amembalimo bhatu parapuu mobhaa-
bhaana.
- 23 Siimo pewauna KAWASANA OPU,
inda amentela i matata.
- 24 Siimo o eo ipadhaangiana KAWASANA OPU,
maimo tasambo-sambo tee takaunde-unde
rampaakanamo Incia.
- 25 E KAWASANA OPU, manga pasalaamatimo!
E KAWASANA OPU, manga dhawumo ka-
mangantalo!
- 26 Atobarakatimo incia moubana i nuncana
sarona KAWASANA OPU!
Ingkami taemaniakako barakati minaaka i
nuncana Baitullana KAWASANA OPU.
- 27 KAWASANA OPU o Aulata'ala,
tee Incia manga suluwina.
Bhokemea o kurubanina rareaea sumai tee rabuta
i manga tanduna singkuna tampana tunuana
kurubanina KAWASANA OPU.
- 28 Ingkoomo o Aulata'alaku, iaku bhekusukuru
tee Ingkoo;

118:22 118:22-23 Mat. 21:42; Mrk. 12:10-11; Luk. 20:17; Tul. 4:11; 1Ptr. 2:7. **118:26 118:26** Mat. 21:9; 23:39; Mrk. 11:9; Luk. 13:35; 19:38; Yah. 12:13. **118:27 118:27** Limb. 27:1-2.

Ingkoomo o Aulata'alaku, iaku bhekumu-
liangiko!

²⁹ Sukurumo i KAWASANA OPU roonamo Incia
amalape
tee kaasina molagina abakaa sa'umuruu.

119

*Amasanaamo Mia Moosena Hukumuna
KAWASANA OPU*^{*†}
119:1-176

¹ Amasanaamo mia modhadhina inda tee kasala-
hana,
tee adhadhi aose hukumuna KAWASANA
OPU.

² Amasanaamo mia moosena manga tuturana,
mopeeloa tee mpuu-mpuuna incana,

³ tee inda apewau kadhaki,
maka adhadhi aose manga dhalana.

⁴ Manga kasameamu padhamo upatotapuakea,

* **119: 119:0** Zaburu 119 akoantoaka manga kapujia to Hukumuna Aulata'ala idhawuakana to miana Israel alaloi Nabii Musa. Zaburu 119 apake modele akrostik (apokana tee Zaburu 9-10, 25, 34, 37, 111, 112). Polanciringana pogau akrostik asusuaka modelena kabhanti mopakena horofu Ibrani atosau-sau malape i auwalina saasaangu aeati. Jadi, walu aeati i nuncana weta bhaa-bhaana i nuncana Zaburu 119 apepuungia tee horofu Ibrani, *alef*; walu aeati i nuncana weta iruaanguna apepuungia tee horofu iruaanguna oni Ibrani, *bet*; walu aeati i nuncana weta italuanguna apepuungia tee horofu italuanguna oni Ibrani, *gimel*; tee mosagaanana uka. † **119: 119:0** Zaburu 119 apogauakea ande manga hukumu ipakawaakana i Musa, siitumo o Taurati, giu incia sumai aminaaka i Aulata'ala, mencuana minaaka i maanusia. Kawasana Opu mokarajaaia tee mopatotapua.

- mamudhaakana atokeniaka mpuu-mpuu.
- ⁵ Maasangia o bhengkalaku amatangka
mamudhaakana kuosea mpuu-mpuu manga
katotapumu!
- ⁶ Sumaimo, iaku inda bhekupotibhaaka kaea
ande iaku kuperangoi bhari-bharia parin-
tamu.
- ⁷ Iaku bhekusukuru i Ingkoo tee kakatena totona
incaku
wakutuuna kupengkaadhariaaka manga tutu-
ramu mobanara
- ⁸ Iaku bhekukeniakea mpuu-mpuu manga kato-
tapumu,
bholi sampeampearo ubholiaku.
- ⁹ Tee opea o mia mangura ajagani pemingkuina
mamudhaakana sadhaadhaa amangkilo?
Ajagania alaloi pemingkuina apokana tee
firmanimu.
- ¹⁰ Iaku kupeeloko tee mpuu-mpuuna incaku;
bholi utaroakaaku kusaladhala minaaka i
parintamu.
- ¹¹ Firmanimu kudhikaia i nuncana ngangaran-
daku
mamudhaakana inda kukodosa tee Ingkoo.
- ¹² Bhari-bharia kapujia to Ingkoo, e KAWASANA
OPU!
Adhariaakaaku manga katotapumu.
- ¹³ Tee bhiwiku kupetulatulaaka
bhari-bharia tutura ibhoasakamu.
- ¹⁴ Iaku kukaunde-unde kuose manga tuturamu,
mboomo mokopewauaakana sagala giuna
harataa.

- 15 Iaku bhekufikiria mpuu-mpuu manga kasameamu,
tee bhekukamatea manga dhalamu.
- 16 Iaku bhekukaunde-unde roonamo manga katotapumu,
tee inda bhekumalinguakea o firimanimu.
- 17 Pewaumo giu malape i bhatuamu mamudhaakana sadhaadhaa kudhadhi,
tee bhekukeniakea mpuu-mpuu o firimanimu.
- 18 Bungkalea o mataku mamudhaakana bhekukamata
manga giu inda momentela minaaka i hukumumu.
- 19 Iaku samia dhaga i dunia sii,
bholi ubuniakea o parintamu minaaka i karoku.
- 20 Incaku amapii roonamo sadia kupemeliliaka manga tuturamu.
- 21 Ingkoo ugorampangi manga mia mosombo,
siitumo manga mia mototunda,
mosaladhalana minaaka i parintamu.
- 22 Pekaridhoakaaku minaaka i kaele-ele tee kahnana manga incia,
roonamo kuose manga tuturamu.
- 23 Moomini manga kaogesa apomufakati to aewangiaku,
bhatuamu sii bheafikiria mpuu-mpuu manga katotapumu.
- 24 Manga tuturamu amembali kapeeluku
tee amembali monaasehatiaku.
- 25 Inyawaku apika tee ngawu roonamo kumatalo;

- padhadhiaku apokana tee firimanimu.
- 26 Iaku padhamo kupetulatulaaka dhalana
dhadiku, Ingkoo ulawaniaku;
adhariakaaku manga katotapumu.
- 27 Tulungiaku mamudhaakana kumembali
kuma'anaia manga kasameamu,
sumaimo iaku bhekufikiria mpuu-mpuu
manga pewaumu inda momentela sumai.
- 28 Inyawaku atangi roonamo kaporona inca,
pekatangkaaku apokana mboomo firiman-
imu.
- 29 Pekaridhoakaaku minaaka i dhala inda moba-
nara,
tee roonamo kalapena incamu, uadhari-
akaakumo o hukumumu.
- 30 Iaku kupili dhala mobanara;
manga tuturamu padhamo kudhikaia i
aroaku.
- 31 Iaku padhamo kukeniaka bhari-bharia o tutu-
ramu, e KAWASANA OPU;
bholi utaroakaaku kupotibhaaka kaea.
- 32 Iaku kuose manga parinta isusuakamu
roonamo Ingkoo mopekalesana
ngangarandaku.
- 33 E KAWASANA OPU, adhariakaaku manga kato-
tapumu
sumaimo bhekuosea sakawana kumate.
- 34 Pamembaliaku kuma'anaia hukumumu ma-
mudhaakana kuta'atia,
tee kukeniakea pekatangka tee mpuu-
mpuuna incaku.
- 35 Tondaakumo mamudhaakana kudhadhi kuose
manga parintamu,

- roonamo giumo incia sumai ipeeluku.
- ³⁶ Pamembalia o ngangarandaku to aose manga tuturamu,
mencuana kupeelo laba.
- ³⁷ Pekaridhoakaaku o matakua minaaka i manga giu mosia-sia,
padhadhiaku i nuncana manga dhalamu.
- ³⁸ Pekatangkea o janjimu i bhatuamu,
idhawuakamu to mia momaekako.
- ³⁹ Pekaridhoakaaku o kahina imaekaku sumai roonamo manga tuturamu amalape.
- ⁴⁰ Satotuuna kupemeliliaka manga kasameamu;
padhadhiaku i nuncana kabanaramu.
- ⁴¹ E KAWASANA OPU, maasangia o kaasimu molagina aumbatiaku,
tee o kasalaamatimu apokana tee janjimu.
- ⁴² Tee mboo sumai, amembali kulawani manga mia mohinaaku
roonamo kuparacaea i Firimanimu.
- ⁴³ Bholi sampeampearo ualea pendua manga firimanimu mobanara minaaka i ngangaku,
roonamo kuparacaea tee tuturamu.
- ⁴⁴ Iaku bhekutorotorosu kukeniakea pekatangka o hukumumu
to sa'umurua.
- ⁴⁵ Iaku bhekudhadhi i nuncana kalalesa roonamo kupeelo manga kasameamu.
- ⁴⁶ Iaku uka bhekupogauaka manga tuturamu i aroana manga raja,
tee iaku inda bhekumaea.
- ⁴⁷ Iaku kumasanaa roonamo manga parintamu imaasiakaku sumai.

- 48 Iaku bhekuangka limaku to kumuliangiaka
manga parintamu imaasiakaku sumai,
tee bhekufikiria mpuu-mpuu manga katota-
pumu.
- 49 Udhania o firimani ipakawaakamu to bhatu-
amu
roonamo firimanimu sumai mopamembali-
aku dhaangia tee iharapuku.
- 50 Siimo mohiburuaku i nuncana kanarakaaku
ande o janjimu sumai mopadhadhiaku.
- 51 Mia mosombo ahinaaku mpuu,
maka iaku inda kusaladhala minaaka i huku-
mumu.
- 52 Wakutuuna kuudhani manga tuturamu mod-
haangiana minaaka i piamo itu,
sumaimo atohiburumo incaku, e
KAWASANA OPU.
- 53 Amasodho o ngangarandaku roonamo mia
madhaki
tee mia inda moosena hukumumu.
- 54 Kangengena dhadhiku momampodho i alamu
sii,
katotapumu kupamembalia manga lagu ka-
pujiaku.
- 55 Wakutuuna amalo kuudhanimo saromu, e
KAWASANA OPU,
tee kukeniakea pekatangka o hukumumu.
- 56 Barakatimo incia sii momembalina dhawuku
roonamo padhamo kuose manga
kasameamu.
- 57 KAWASANA OPU o dhawuku,
iaku padhamo kupojanji to kukeniakea
pekatangka o firimanimu.

- 58 Iaku kuemani kaasina incamu tee mpuu-
mpuuna incaku,
maasiakaaku apokana tee janjimu.
- 59 Iaku kufikiri dhalana dhadhiku,
tee kubhotukiakea to kumbuli kuose manga
tuturamu;
- 60 kupekadhei tee inda kupekanoe-noe
to kukeniakea pekatangka manga parin-
tamu.
- 61 Mia madhaki ataakaaku katapu,
maka iaku inda kumalinguaka hukumumu.
- 62 Pontanga malo iaku bhekubhangu to kupujiko,
roonamo manga tuturamu mobanara.
- 63 Iaku kuposabhangka tee bhari-bharia mia mo-
maekako,
tee mokenina pekatangka manga
kasameamu.
- 64 E KAWASANA OPU, alamu sii abukeaka tee
kaasimu molagina;
adhariakaaku manga katotapumu.
- 65 Ingkoo padhamo upewau kalape i bhatuamu,
apokana tee firmanimu, e KAWASANA OPU.
- 66 Dhawuakaaku hikimati tee ilimuu,
roonamo kuparacaea tee manga parintamu.
- 67 Wakutuuna indapo uhukumuaku, iaku kusal-
adhala,
maka sii-sii kukeniakea pekatangka o firi-
manimu.
- 68 Ingkoo umalape tee upewau kalape;
adhariakaaku manga katotapumu.
- 69 Mia mosombo afitanaaku,
maka iaku kuose manga kasameamu tee
mpuu-mpuuna incaku.

- 70 Incana manga incia amakapa mboomo tabha
sabutuna inda anamisi opeopea,
maka iaku kumaasiaka hukumumu.
- 71 Amalape uka to iaku ande kutopisaki
mamudhaakana kumembali kupengkaad-
hariaka manga katotapumu.
- 72 Hukumu ibhoasakamu alabhi o kalapena to
iaku
minaaka i rewuna tibhana bulawa tee pera.
- 73 Limamumo mopamembaliaku tee mopeb-
hanguaku;
dhawuaku katau mamudhaakana
kumembali kupengkaadhariaka manga
parintamu.
- 74 Manga mia momaekako bheakamataaku tee
akaunde-unde
roonamo kuharapu i firimanimu.
- 75 E KAWASANA OPU, iaku kumataua ande o
tuturamu abanara,
tee moomini padhamo upanarakaaku, In-
gkoo sadhaadhaa umembali utoparacaea.
- 76 Taroakamo kaasimu molagina mohiburuaku,
apokana tee janjimu i bhatuamu.
- 77 Taroakamo rahumatimu aumba i iaku mamud-
haakana kudhadhi,
roonamo hukumumu satotuuna ipeeluku.
- 78 Taroakamo mia mosombo amaea,
roonamo manga incia afitanaaku inda tee
sababuna,
maka iaku bhekufikiria mpuu-mpuu manga
kasameamu.
- 79 Taroakamo manga mia momaekako aumbati-
aku,

- siitumo manga incia momatauna manga tukuramu.
- 80 Maasangia o ngangarandaku inda alimba mi-naaka i manga katotapumu
mamudhaakana iaku inda kupotibhaaka kaea.
- 81 Ngangarandaku apemeliliaka kasalaamati mi-naaka i Ingkoo,
iaku kuharapu i firimanimu.
- 82 Mataku amarea roonamo kupemeliliaka jan-jimu;
iaku kupogau, "Naepia buaka Ingkoo bheuhibuaku?"
- 83 Moomini iaku mboomo saangu kadhuna angguru momalusa,
iaku inda kumalinguakea manga katotapumu.
- 84 Sakawana naepia buaka o bhatuamu tabeana bheaantagiko?
Naepia buaka Ingkoo bheuhukumu manga mia mopajereaku?
- 85 Manga mia mosombo padhamo aseli kabhalongko to karoku,
siitumo manga mia inda mota'atina tee hukumumu.
- 86 Bhari-bharia parintamu atoparacaea.
Tulungiaku, roonamo manga incia apajereaku inda tee sababuna!
- 87 Saidhepo manga incia apekamateaku,
maka iaku inda kubholia manga kasameamu.
- 88 Padhadhiaku apokana tee kaasimu molagina

mamudhaakana kukeniakea mpuu-mpuu
manga tutura ipakawaakamu.

- ⁸⁹ E KAWASANA OPU, firimanimu amatangka
sa'umurua i sorogaa.
- ⁹⁰ Ingkoo amembali utoparacaea sa'umurua za-
mani;
Ingkoo upekatangka alamu sabutuna asad-
haadhaa adhaangia.
- ⁹¹ Manga tuturamu asadhaadhaa sakawana sii-sii
roonamo bhari-bharia modhaangia o bhatu-
amu.
- ⁹² Ande o hukumumu inda amembali giu
imasanaakana incaku,
sumaimo dhaanamo kubinasa i nuncana ka-
narakaaku.
- ⁹³ Inda sampeampearo bhekumalinguakea
manga kasameamu,
roonamo alaloi bhari-bharia giu incia sumai
Ingkoo upadhadhiaku.
- ⁹⁴ Iaku sii o pewauamu; pasalaamatiaku,
roonamo iaku padhamo kupeeloa manga
kasameamu.
- ⁹⁵ Manga mia madhaki aantagiaku to apabi-
nasaaku,
maka iaku bhekufikiria mpuu-mpuu manga
tuturamu.
- ⁹⁶ Bhari-bharia ikamataku dhaangia tee batasina,
moomini o giu mosangka,
maka o parintamu amaewa mpuu.
- ⁹⁷ Tapanamo kumaasiakea o hukumumu!
Iaku kufikiria mpuu-mpuu saeoa.

- 98 Manga parintamu apamembaliaku ku'aarifu
minaaka i manga musuku,
roonamo bhari-bharia giu incia sumai sadia
adhaangia i karoku.
- 99 Katauku alabhi o kabharina minaaka
imatauna manga guruku,
roonamo kufikiria mpuu-mpuu manga tutu-
ramu.
- 100 Kumembali kuma'anaia alabhi minaaka i
manga mancuana,
roonamo iaku kuose manga kasameamu.
- 101 Kutaangia o aeku minaaka i bhari-bharia
pewau madhaki,
mamudhaakana kumembali kukenia mpuu-
mpuu o firimanimu.
- 102 Iaku inda kusaladhala minaaka i manga tutu-
ramu,
roonamo Ingkoomo mopadhana moadhari-
aku.
- 103 Tapanamo kameko o firimanimu,
alabhi o kamekona minaaka i golana uwani!
- 104 Minaaka i manga kasameamu kupotibhaaka
katau,
siitumo sababuna kubancia bhari-bharia
dhala inda mobanara.
- 105 Firimanimu mboomo kanturu mosuluwina
bhengkalaku,
tee mopekainawana dhalaku.
- 106 Iaku padhamo kuposumpa tee bheku-
pekatangkea pendua,
ande bhekukeniakea mpuu manga tuturamu
mobanarana sumai.
- 107 Iaku kunarakaa mpuu,

- e KAWASANA OPU, padhadhiaku pendua
apokana tee firimanimu.
- 108 Maasangia utarimaia o pasombaana kare-
lana incaku, siitumo manga kapujiaku, e
KAWASANA OPU,
tee uadhariaaku manga tuturamu.
- 109 Iaku sadia kutaaka inyawaku,
maka iaku inda kumalinguakea o huku-
mumu.
- 110 Manga mia madhaki ataa katapu to iaku,
maka iaku inda kusaladhala minaaka i
manga kasameamu.
- 111 Manga tuturamu kupamembalia dhawuku
mobakaa,
roonamo bhari-bharia sumai satotuuna
mopaunde-undena incaku.
- 112 Iaku padhamo kubhawe a o ngangarandaku to
kupewauaka manga katotapumu
to sa'umurua, sakawana aahirina dhadhiku.
- 113 Iaku kubancia manga mia inda mototona
incana,
maka kumaasiakea o hukumumu.
- 114 Ingkoomo tampana peulusaku tee katangkesi
mojaganiaku;
iaku kuharapu i firimanimu.
- 115 Pekaridhomo minaaka i iaku, e manga mia
mopewauna madhaki,
mamudhaakana kumembali kuose manga
parintana Aulata'alaku.
- 116 Pekakaaku apokana tee janjimu mamud-
haakana kudhadhi,
tee bholi upekaeaku i nuncana harapuku.
- 117 Tukoaku mamudhaakana kutopasalaamati,

- tee sadia bhekuhoromatia manga katotapumu.
- 118 Ingkoo umendeu bhari-bharia mia mosaladhalana minaaka i manga katotapumu, roonamo inda akoguna o katipuna manga incia.
- 119 Ingkoo uabhia bhari-bharia mia madhaki i alamu mboomo karombuna pera; siitumo sababuna kumaasiakea manga tuturamu.
- 120 Badaku arengku roonamo kumeakako, tee kumaeka tee manga tuturamu.
- 121 Iaku padhamo kupewau ka'adili tee kabanara, bholi upasaraakaaku i manga mia mopisakiaku.
- 122 Pojanjimo ande o bhatuamu bheamalape; bholi utaroakaaku apisakiaku manga mia mosombo.
- 123 Mataku amarea roonamo kuantantagi kasalaamati minaaka i Ingkoo, tee utolosia o janjimu mobanara sumai.
- 124 Pewaumo to iaku apokana tee kaasimu molagina, tee uadhariakaaku manga katotapumu.
- 125 Iaku o bhatuamu; dhawuaku ma'ana, mamudhaakana kumataua manga tuturamu.
- 126 Akawamo wakutuuna to KAWASANA OPU abhangu tee ahukumu manga incia, roonamo manga incia inda ata'ati hukumu.
- 127 Siitumo sababuna, kumaasiaka manga parintamu

- alabhi minaaka i bulawa, alabhi minaaka i
bulawa asilii.
- 128 Siitumo sababuna, kupekakate dhalaku to
kuose bhari-bharia kasameamu;
tee kubancia bhari-bharia dhala inda moba-
nara.
- 129 Manga tuturamu inda amentela;
sababuna sumai kuosea.
- 130 Wakutuuna firimanimu sumai atopatinda,
amembali adhawuaka kainawa
tee adhawuaka ma'ana to mia inda mo-
matauna opeopea.
- 131 Iaku kubungkale ngangaku tee kukahaahaa,
roonamo kupemeliliaka manga parintamu.
- 132 Tontoakumo tee umaasiakaakumo,
mboomo kananea ipewaumu to mia mo-
maasiakana saromu.
- 133 Pekatangkea o bhengkalaku tee firimanimu,
tee bholi utaroakaaku akuasaiaku kadhaki.
- 134 Tolosiakumo minaaka i manga mia mopisaki-
aku
mamudhaakana kumembali kukeniakea
mpuu-mpuu manga kasameamu.
- 135 Taroakamo roumu akocahea i bhawona
karoku,
tee uadhariaakaaku manga katotapumu.
- 136 Loluku asiwulu mboomo umala,
roonamo mia inda akeniakea mpuu-mpuu o
hukumumu.
- 137 E KAWASANA OPU, Ingkoo u'adili
tee manga tuturamu uka abanara.
- 138 Manga tuturamu padhamo upatotapuakea i
nuncana kabanara

- tee alaenga atoparacaea.
- 139 Amaraku ahanda mpuu i nuncana karoku
roonamo manga musuku amalinguaka firimanimu.
- 140 Janjimu atouji mpuu;
rampaakanamo sumai kumaasiakea.
- 141 Iaku sii kumaidhiidhi tee kumembali mia
mohina,
maka iaku inda kumalinguakea manga
kasameamu.
- 142 Kabanaramu atotuu sa'umurua,
tee o hukumumu atoparacaea.
- 143 Kaseke tee kanarakaa akangkanaiaiku,
maka manga parintamu apasanaa ngangarandaku.
- 144 Manga tuturamu abanara sa'umurua;
dhawuaku katau mamudhaakana kudhadhi.
- 145 Iaku kugora tee mpuu-mpuuna incaku; lawaniakumo, e KAWASANA OPU.
Iaku bhekuosea manga katotapumu.
- 146 Iaku kugora i Ingkoo; pasalaamatiaku,
mamudhaakana bhekukenia mpuu-mpuu
manga tuturamu.
- 147 Indapo raneeooge, kubhangumo tee kugora
kuemani tulungi;
iaku kuharapu i firimanimu.
- 148 Samaloa inda kukole
mamudhaakana amembali kufikiria mpuu-mpuu o firimanimu.
- 149 Maasangia urangoa o do'aku apokana tee
kaasimu molagina.
E KAWASANA OPU, padhadhiaku apokana
tee ka'adilimu.

- 150 Manga mia mopajereaku tee haejati madhaki
 amakasumo;
 manga incia amaridho minaaka i huku-
 mumu.
- 151 Maka Ingkoo umakasu, e KAWASANA OPU,
 tee bhari-bharia parintamu abanara.
- 152 Minaaka i piamo itu kumataua minaaka i
 manga tuturamu
 ande Ingkoo padhamo upatotapuakea to
 sa'umurua.
- 153 Kamatamea o kanarakaaku tee upasalaamati-
 akumo,
 roonamo inda kumalinguakea o hukumumu.
- 154 Ewaakea o parakaraku tee upabebasiaku,
 padhadhiaku apokana mboomo janjimu.
- 155 Kasalaamatimu sumai amaridho minaaka i
 manga mia madhaki
 roonamo manga incia inda apeelo katota-
 pumu.
- 156 Tapanamo kaoge o rahumatimu, e
 KAWASANA OPU!
 Padhadhiaku apokana mboomo manga tutu-
 ramu.
- 157 Abhari o mia mopajereaku tee momusuiaku,
 maka inda kusaladhala minaaka i manga
 tuturamu.
- 158 Iaku kumarikaia manga pande hiaanati
 sumai,
 roonamo manga incia inda aose firimanimu.
- 159 Kamatea tapanamo kaasiku tee manga
 kasameamu, e KAWASANA OPU!
 Jagania o inyawaku apokana tee kaasimu
 molagina.
- 160 Bhari-bharia ipogauakamu atotuu,

tee bhari-bharia tuturamu mobanara sumai
abakaa sa'umurua.

- 161 Manga kaogesa apajereaku inda tee sababuna,
maka tangkanamo firimanimu imaekaku.
- 162 Janjimu apewauaku kukaunde-unde,
mboomo mia mopotibhaakana harataa mob-
hari minaaka i potimbea.
- 163 Bhari-bharia kagau-gau kubancia,
maka o hukumumu kumaasiakea.
- 164 Pitu mpearo saeo kupujiko,
roonamo tuturamu mo'adili.
- 165 Mia momaasiakana hukumumu a'amani tee
amasanaa o dhadhina,
inda dhaangia giu momembalina iman-
dawuakana manga incia.
- 166 Iaku kuantagi kasalaamati minaaka i Ingkoo,
e KAWASANA OPU,
tee manga parintamu kupewaua.
- 167 Iaku kuta'atia manga tuturamu,
tee kumaasiakea tee mpuu-mpuuna incaku.
- 168 Iaku kuta'ati manga kasameamu tee tutu-
ramu,
roonamo ukamatea sagala giu ipewauku.
- 169 Maasangia o goraku akawa i Ingkoo, e
KAWASANA OPU;
dhawuaku ma'ana mopokanana tee janjimu.
- 170 Taroakamo iemaniku akawa i Ingkoo;
pasalaamatiaku apokana tee janjimu.
- 171 Taroakamo bhiwiku sadia apujiko,
roonamo padhamo uadhariakaaku manga
katotapumu.
- 172 Taroakamo o dhelaku alaguaka janjimu,

- roonamo bhari-bharia parintamu abanara.
 173 Taroakamo limamu sadia atulungiaku,
 roonamo iaku padhamo kupili manga
 kasameamu.
 174 Iaku kupemeliliaka kasalaamati minaaka i
 Ingkoo, e KAWASANA OPU,
 tee o hukumumu apaunde-undeaku.
 175 Taroakamo kudhadhi, mamudhaakana kupu-
 jiko,
 tee maasangia manga tuturamu atulungiaku.
 176 Iaku kusaladhala mboomo dumba momam-
 buu;
 sumaimo uumbamo tee upokawaaka bhatu-
 amu,
 roonamo inda kumalinguakea manga parin-
 tamu.

120

*Do'a Emaniana Kasalaamati minaaka i Fitanaa
 120:1-7*

¹ Laguna ziara.*

I nuncana kanarakaaku kugora i KAWASANA
 OPU,

tee Incia alawaniaku.

² "E KAWASANA OPU, maasangia urambasakaaku
 minaaka i bhiwi mogau-gau
 tee dhela mopekatiyu."

³ Opea bheidhawuakana to ingkoo,
 tee opea bheiranganina to ingkoo,

* **120:1 120:1** ziara: Aipomo manga Zaburu 120-134 ilaguakana
 miana Israel wakutuuna apene aziara i Kota Yerusalem i tana
 mokogunuana.

- e pande tipu?
- ⁴ Samia suludadu bheapanako tee pana mo-
matadha
tee atunuakako tee weona waa!
- ⁵ Kucilakamo roonamo kumboore mboomo
samia dhaga i Mesekh,
tee tabeana kumboore i tanga-tangana kem-
ana miana Kedar![†]
- ⁶ Amangengemo laulau kumboore
kupoose tee manga mia mobancina dhadhi
pomalape.
- ⁷ Iaku gauku kudhadhi pomalape,
maka ande kupogau mamudhaakana ingkita
tadhadhi pomalape,
manga incia gauna apotimbe.

121

KAWASANA OPU, Mojaganina Israel

121:1-8

- ¹ Laguna ziara.

- Iaku kupotingara i manga gunu,
minaaka iapai bheakawa o katulungi to
iaku?
- ² Katulungiku aumba minaaka i KAWASANA OPU,
mopadhaangiana laiana tee alamu.
- ³ Incia inda bheataroakako usindoli;
Incia mojaganiko tee inda akole.
- ⁴ Satotuuna, Incia mojaganina Israel

[†] **120:5 120:5** *Mesekh ... Kedar: Miana Mesekh tee Kedar atoabhi
mia masega tee inda akofe'eli.*

inda bheamangkoo matana atawa atokole.

⁵ KAWASANA OPU mojaniko,
KAWASANA OPU o peulusamu i weta
kaanamu.

⁶ Matanaeo inda bheapacilakako i wakutuuna eo,
atawa o bula i wakutuuna amalo.*

⁷ KAWASANA OPU bheajaganiko minaaka i balaa,
Incia bheajagani inyawamu.

⁸ KAWASANA OPU bheajaganiko wakutuuna
uumba tee ulingka,
pepuu sii-sii sakawana sa'umurua.

122

Do'ana Kasanaa to Miana Yerusalem

122:1-9

¹ Laguna ziarana Daud.

Iaku kukaunde-unde wakutuuna o mia apogau
tee iaku,
"Mai talingkaaka i Bhanuana KAWASANA
OPU!"

² Sii-sii aemami akakaro
i bhambana lawamu, e Yerusalem!

³ Yerusalem padhamo atopakaro
amembali kota mototapi momakaa tee mo-
matangka.

⁴ Iwe siimo manga lipu aziara,
siitumo uumatina manga lipu ipilina
KAWASANA OPU,

* **121:6 121:6** Ma'anana mia bhea'amani i wakutuuna eo tee
malo.

- to aumba asukuru i Incia
mboomo manga tutura mopadhana iparin-
taakana to miana Israel.
- 5 Iwe siimo manga rajana Israel, siitumo manga
siwuluna Raja Daud auncura i kauncura-
makana
tee adhawuaka kambotuna mo'adili to
lipuna.
- 6 Do'amo to kasanaana Yerusalem,
"Maasangia bhari-bharia mia momaasiakako
apotibhaaka ka'amani.
- 7 Maasangia dhaangia tee kasanaa i nuncana
lipumu,
tee ka'amani i nuncana manga bentemu."
- 8 Rampaakanamo manga witinaiku tee manga
sabhangkaku momboorena iwe sumai,
iaku bhekupogau, "Maasangia umasanaa!"
- 9 Rampaakanamo Bhanuana KAWASANA OPU,
Aulata'alata dhaangia iwe sumai,
iaku bhekupeeloakako kalape.

123

Taharapu i Rahumatina Kawasana Opu

123:1-4

- 1 Laguna ziara.
- I Ingkoomo kupotingara,
e Ingkoo mokokauncuramakana i sorogaa!
- 2 Kamatea, mboomo samia bhatua umane
moposaronakana i opuna,
tee mboomo samia bhatua bhawine mo-
posaronakana i opuna bhawine,

mboo siitumo ingkita taposaronaka i KAWASANA
OPU, Aulata'alata,
sakawana manga maasiaka.

³ Manga maasiakapo e KAWASANA OPU, manga
maasiakapo,
roonamo amenturumo mpuu ingkami tato-
hina.

⁴ Ingkami tamambosuakamo
kaele-elena manga mia moabhina karona
amulia,
tee kahinana manga mia mosombo.

124

Atopujimo Motulungina Miana Israel
124:1-8

¹ Laguna ziara. Zaburuna Daud.

Ande mencuana o KAWASANA OPU mopob-
hawana tee ingkita
taroakamo miana Israel apogau mboo sumai,

² ande mencuana KAWASANA OPU mopob-
hawana tee ingkita
wakutuuna mangahumbuni bhalita,

³ sumaimo manga incia mangadhoku
takadhadhi-dhadhi
wakutuuna o amarana manga incia akarore-
rore to ingkita.

⁴ Sumaimo o uwena mawa mangapaampe,
tee o siwuluna uwena umala momaranca
mangapatondu,

⁵ sumaimo o uwe mokalua-lua sumai
akangkanaimo ingkita.

- ⁶ Atopujimo o KAWASANA OPU, inda manga-pasaraaka
tamembali kinandena manga incia.
- ⁷ Ingkita talapamo mboomo manu-manu
minaaka i katapuna manga pande pekaose.
Katapu sumai amabhotumo,
tee ingkita uka talapamo.
- ⁸ Katulungita aumba minaaka i KAWASANA OPU
mopadhaangiana laiana tee alamu.

125

*Amani i nuncana Peulusana KAWASANA OPU
125:1-5*

- ¹ Laguna ziara.

- Manga mia moparacaeana i KAWASANA OPU,
mboomo Gunu Sion momatangka tee inda
amembali atohudha,
tee asadhaadhaa sa'umurua.
- ² Mboomo manga gunu ajagani Yerusalem,
mboomo uka KAWASANA OPU ajagani
uumatina
pepuu sii-sii sakawana sa'umurua.
- ³ Raja momadhaki inda bheakeni pamarintana
sa'umurua
i lipuna manga mia mobanara,
mamudhaakana manga mia mobanara sumai
inda aose
to apewau kadhaki.

- ⁴ E KAWASANA OPU, maasangia upewau kalape i
manga mia momalape,
tee i manga mia momakatena incana.
- ⁵ Maka manga mia mosaladhala moosena dha-
lana karonā mopekabelo-belo,
bheapadhencua KAWASANA OPU apobhawa
tee manga mia mopewauna kadhaki.

Amasanaamo miana Israel!

126

Kaharapu i nuncana Kanarakaa
126:1-6

- ¹ Laguna ziara.

Wakutuuna KAWASANA OPU apambuli kadhaan-
giana Sion* amembali amalape pendua,
ingkita mboomo mia mopongipi.

- ² Wakutuu incia sumai o ngangata apotawa roon-
amo tamasanaa
tee o dhelata asambo-sambo roonamo
takaunde-unde.

Sabutuna manga lipu mosagaanana apogau,
"KAWASANA OPU padhamo apewau giu mo-
maoge to manga incia."

- ³ KAWASANA OPU padhamo apewau giu mo-
maoge to ingkita,
sababuna sumai takaunde-undemo.

- ⁴ E KAWASANA OPU, maasangia upambulia pen-
dua o kadhaangiamami momalape,

* **126:1 126:1** *Sion*: Sarona mosagaanana to Kota Yerusalem.

mboomo umala i Tana Negeb akouwe pen-
dua i bulaana wao.

⁵ Manga mia mohewina apoose atangi,
naile itu bheatimpu tee asambo-sambo.

⁶ Mia molimbana minaaka i bhanua tee amaasi
apoose abhawa wine to ahewia,
dhaanamo bheambuli asambo-sambo
apoose abhawa hasilina timpuana.

127

Rahumatina Kawasana Opu Auwalina
Kasalaamati
127:1-5

¹ Lagu ziarana Sulaiman.

Ande mencuana KAWASANA OPU mopakarona
bhanua,
asia-siamo kangulena mia mopakaroa.

Ande mencuana KAWASANA OPU mojangana
kota,
asia-siamo manga suludadu mojangania.

² Asia-siamo ubhangu saeona,
tee ukarajaa torotorosu inda uunto-unto
sakawana pontanga malo,
tee ukande kinande ipotibhaakamu minaaka
i kanguleana bukumu tee ulilaho;
roonamo Aulata'ala adhawu mia imaasi-
akana i wakutuuna akole.

³ Satotuuna ana umane sumai o rahumati mi-
naaka i KAWASANA OPU,
tee o antona kadhuma satotuuna saangu
fahala.

⁴ Mboomo anana pana i limana samia suludadu,

mboo sumaimo manga ana umane i wakutu-
una amangura.

⁵ Amasanaamo mia mopabukena

dhingkanana panana tee anana pana.

Incia inda bheapotibhaaka kaea,

wakutuuna apogau tee manga musuna i
bhambana lawa kota.

128

Rahumatina to Mobhawana Bhanua

128:1-6

¹ Laguna ziara.

Amasanaamo o mia momaekana i KAWASANA
OPU,

tee adhadhi aose parintana.

² Ingkoo bheukande minaaka i hasilina kan-
guleana bukumu;

ingkoo bheumasanaa, tee o dhadhimu bhea-
malape.

³ Bhawinemu bheamembali mboomo puuna
angguru mosuburu

i nuncana bhanuamu,

tee manga anamu mboomo tunana puuna zaitun
i saripina mejamu.

⁴ Satotuuna, mboo sumaimo rahumati bhead-
hawuaka

to mia momaekana i KAWASANA OPU.

⁵ Maasangia o KAWASANA OPU abarakatiko mi-
naaka i Sion.

Maasangia ingkoo ukamata Yerusalem inda
akakurangaaka opeopea

sa'umurua dhadhimu.

⁶ Maasangia ingkoo ukamata manga opu-opuamu
minaaka i manga anamu!

Amasanaamo miana Israel!

129

Aemani Kahukumu to Manga Musuna

129:1-8

¹ Laguna ziara.

"Pepuu dhaangia kumangura amenturumo
mpuu apanarakaaku manga musuku,"

taroakamo miana Israel apogau mboo sumai,

² "Pepuu dhaangia kumangura amenturumo
mpuu apanarakaaku manga musuku,
maka manga incia inda amembali ataloaku.

³ Manga incia apekambela awaaku mboomo tana
ibhingkuni,
amaarate tee amandala o kambelana
awaaku mboomo pande poinawu
mobhingkunina tana.

⁴ KAWASANA OPU abanara.

Incia padhamo atumpo rabuta ibhokena
manga mia madhaki mamudhaakana
mangarambasaka minaaka i kuasana mia
madhaki.

⁵ Taroakamo bhari-bharia mia mobancina Sion
asowo tee amaea.

⁶ Taroakamo manga incia mboomo rumpu i bha-
wona padhana bhanua
amalau wakutuuna tangasaana atuwu;

⁷ manga pande dhodhona gandum inda awelia,

tee manga pande bhokena timpua inda ab-
hokea rampaakanamo rumpu sumai inda
akoguna.

⁸ Sabutuna manga mia molalo inda bheapogau,
"Maasangia abarakatiko KAWASANA OPU,
Ingkami tabarakatiko i nuncana sarona
KAWASANA OPU."

130

Do'a i nuncana Kanarakaa

130:1-8

¹ Laguna ziara.

Minaaka i mbolongana kanarakaa iaku kugo-
raakako, e KAWASANA OPU!

² E Kawasana Opu, maasangia urangoa o
suaraku!
Taroakamo uperangoia opea iemaniku.

³ E KAWASANA OPU, ande Ingkoo utorotorosu
uudhani dosamami,
incema bhemomembalina abebasi minaaka
i kahukumumu, e Aulata'ala?

⁴ Maka Ingkoo sadia usiapu to upeka'amponi,
mamudhaakana o mia amembali ahoro-
matiko.

⁵ Iaku kuantagi katulungina KAWASANA OPU,
tee o janjina kuharapua.

⁶ Ngangarandaku aharapuaka Kawasana Opu
alabhi minaaka i pande jagana kota mopemelil-
iakana akawa o wakutuuna matanaeo
akotila.

- ⁷ E Israel harapumo i KAWASANA OPU!
Roonamo KAWASANA OPU dhaangia tee
kaasina molagina,
tee Incia sadia bheamangapasalaamati.
⁸ Incia bhemopabebasina Israel
minaaka i bhari-bharia kasalahana.

131

Pasarakaaka Karota i KAWASANA OPU
131:1-3

- ¹ Laguna ziara. Zaburuna Daud.

- E KAWASANA OPU, iaku inda kusombo,
tee inda kupanda'ente mia.
Iaku inda kupajere manga hali
momaoge atawa manga giu inda momentela
to karoku.
² Satotuuna, padhamo kupatanangi ngangaran-
daku,
mboomo anaana indamo adudu maka
dhaangiapo i nuncana sangoana inana,
Umbe, ngangarandaku atanangimo mboomo
anaana indamo adudu.
³ E miana Israel, harapumo i KAWASANA OPU,
pepuu sii-sii sakawana sa'umurua.

132

Raja Daud tee Kota Sion, Ipilina KAWASANA
OPU
132:1-18

- ¹ Laguna ziara.

E KAWASANA OPU, maasangia uudhani Daud,
tee bhari-bharia kanarakaana inamisina.

² Incia padhamo aposumpa i KAWASANA OPU,
tee ajanji i Aulata'ala Momakaa isombana
Yakub,

³ "Satotuuna, iaku inda bhekupesua i nuncana
kema mbooresaku
atawa kukole i kolema;

⁴ Satotuuna inda bhekutokole
atawa amangkoo mataku

⁵ ande indapo kupotibhaaka tampa to
KAWASANA OPU,
tee saangu mbooresa to Aulata'ala Momakaa
isombana Yakub."

⁶ Satotuuna, ingkita padhamo tarangoa o poka-
iana tee Sorongana Pojanjia* sumai i Bait
Lahim,
tee padhamo tapotibhaakea i Tana Yaar.†

⁷ Maimo talingkaaka i mbooresana i Yerusalem!
Maimo tasuju tee tasombaia i aroana kaun-
curamakana.

⁸ E KAWASANA OPU, pekadheimo ulingka i tampa
mbooresamu,
tee upobhawa tee Soronga Pojanjia, tandana
Ingkoo ukokuasa.

* **132:6 132:6** *Sorongana Pojanjia*: Sorongana kau motandaina umbana Aulata'ala i tanga-tangana uumatina tee amembali tampana to adhika rua katongkana bhatu mokoantona sapulu firimanina Aulata'ala idhawuakana i Nabii Musa (kamata Limb. 20:1-17; 31:18). † **132:6 132:6** *tapotibhaakea i Tana Yaar*: Zaburu incia sii apogauaka kajadia wakutuuna Daud amembali raja tee abhawa Soronga Pojanjia minaaka i Tana Yaar sakawana i Yerusalem.

- 9 Maasangia manga imamu sadia apewau kaba-
nara,
tee taroakamo manga mia mosaalihi
asambo-sambo tee akaunde-unde.
- 10 Roonamo Daud, o bhatuamu,
bholi umendeua o raja mopadhana ilantimu.
- 11 KAWASANA OPU padhamo aposumpa mpuu-
mpuu tee Daud,
tee Incia inda bheamalinguaka opea ijanji-
akana,
"Samia anamu minaaka i karomu
bhekupamembalia raja."
- 12 Ande manga anamu akeniakea mpuu-mpuu o
pojanjiaku
tee ata'atia manga parinta bheiadhariakaku
to manga incia,
sumaimo manga opu-opuana uka bheamembali
raja
sakawana sa'umurua."
- 13 KAWASANA OPU padhamo apili Sion,
tee gauna apamembalia tampana mboore-
sana.
- 14 "Siimo mbooresaku sakawana sa'umurua,
Iwe siimo bhekumboore roonamo kupeelua.
- 15 Iaku bhekudhawuakea bhaku motaralabhi-
labhi,
tee bhekupekambosuakea tee roti manga
mia misikini.
- 16 Manga imamuna Yerusalem bheasusuaka
kasalaamati moumbana minaaka i Iaku,
tee manga mia mosaalihi bheasambo-sambo
tee akaunde-unde.
- 17 Iwe sumakomo bhekuangka siwuluna Daud;

Iaku bhekupamembali o siwuluna aparinta
sakawana sa'umurua mboomo sulu mo-
mainawana torosu.

- ¹⁸ Manga musuna bhekupekaeia,
maka incia, bhekupakanaakea mahakota
bhemokakila-kila i bhaana."

133

Powitinai Mopomalape

133:1-3

- ¹ Laguna ziara. Zaburuna Daud.

Kamatea, tapanamo kalape tee kangada
ande manga witinai adhadhi apomaamaasi-
aka.

- ² Giu incia sumai mboomo mina-mina mawondu
mokoharagaa i bhawona bhaa,
asiwulu apekabhaho jangku,

i jangkuna Harun,
kasiimpo asapo sakawana i bhorokona
jubana.

- ³ Giu incia sumai mboomo alo i Gunu Hermon,
mosapona i bhawona manga gunu i Sion
roonamo iwe sumakomo KAWASANA OPU apas-
apo barakatina,
siitumo dhadhi to sa'umurua.

134

Lagu Kapujia i Wakutuuna Amalo

134:1-3

- ¹ Laguna ziara.

Mai, pujimo KAWASANA OPU, e bhari-bharia
bhatuana KAWASANA OPU

- molaianina i Bhanuana KAWASANA OPU i
wakutuuna amalolo!
- ² Angkamea o limamiu upaporopea i tampa mo-
mangkilo,
tee upujimo KAWASANA OPU!
- ³ Maasangia KAWASANA OPU, siitumo Incia
mopadhaangiana laiana tee alamu,
abarakatiko minaaka i Sion.

135

Tangkanamo Kawasana Opu Molaengana Ipuji 135:1-21

- ¹ Pujimo KAWASANA OPU!*
- Pujimo sarona KAWASANA OPU!
Pujimea, e manga bhatuana KAWASANA
OPU,
- ² e manga mia molaianina i Bhanuana
KAWASANA OPU
i tanalapa i aroana Bhanuana Aulata'alata.
- ³ Pujimo KAWASANA OPU roonamo Incia
amalape,
laguakamea manga lagu kapujia to sarona,
roonamo sarona amakesa.
- ⁴ KAWASANA OPU padhamo apili Yakub to
karona,
tee o miana Israel apamembalia pewauana
imaasiakana.

* **135:1 135:1** *Pujimo KAWASANA OPU!* nuncana pogau Ibrani,
oni incia sii *Haleluya*. Mboo sumai uka i kapadhaana zaburu incia
sii.

- ⁵ Satotuuna kumataua ande o KAWASANA OPU
amaoge mpuu,
tee o Aulata'alata alabhi o kaogena minaaka
i bhari-bharia dewa.
- ⁶ KAWASANA OPU apewau opea ipeeluna,
malape i sorogaa atawa i alamu,
malape i tawo atawa i andala.
- ⁷ Incia aumbaaka gawu minaaka i tapana alamu,
Incia apatiumba bhibhito apoose tee wao,
tee apalimba ngalu minaaka i tampana atod-
hika.
- ⁸ Incia mopekamatena manga anaana tumpe i
Mesir,
malape maanusia atawa o binata.
- ⁹ Incia mopadhaangiana manga tanda tee manga
muuzizati
i tanga-tangana miana Mesir,
aewangi Firaun tee bhari-bharia pagawena.
- ¹⁰ Incia mopekatalona manga lipu
tee apekamate manga raja momakaa--
- ¹¹ siitumo Sihon rajana Amori, tee Og rajana
Basan,
tee bhari-bharia raja i Kanaan.
- ¹² Kasiimpo adhawuaka manga lipuna Kanaan to
apamembalia pusaka,
siitumo o pusaka to miana Israel o uumatina
sumai.
- ¹³ E KAWASANA OPU, saromu abakaa,
e KAWASANA OPU, bhari-bharia siwulu
bheaudania sa'umurua opea ipewaumu.

- 14 KAWASANA OPU bheaewaaka parakarana
uumatina,
tee amaasiaka manga bhatuana.
- 15 Barahalana manga lipu inda mosombako
atokarajaa minaaka i bulawa tee pera,
ikarajaana limana maanusia.
- 16 Manga barahala sumai akomuncu, maka inda
amembali apogau;
akomata, maka inda apokamata;
- 17 akotalinga, maka inda aporango.
Manga incia inda dhaangia o poinuncana.
- 18 Bhari-bharia mia mokaarajaana barahala tee
bhari-bharia moparacaeia
bheamembali mboomo barahala sumai tee
inda bheamembali apewau opeopea uka.
- 19 E siwuluna Israel, pekaogemo sarona
KAWASANA OPU!
E manga imamu, siwuluna Harun, pekao-
gemo sarona KAWASANA OPU!
- 20 E siwuluna Lewi, pekaogemo sarona
KAWASANA OPU!
E manga mia momaekana i KAWASANA OPU,
pekaogemo sarona KAWASANA OPU!
- 21 Pekaogemo sarona KAWASANA OPU minaaka i
Sion;
Incia momboorena i Yerusalem.†

135:15 135:15-18 Zab. 115:4-8; Wah. 9:20. † **135:21 135:21**
Incia momboorena i Yerusalem: Moomini o Aulata'ala adhaangia
i saangua alamu sii, maka Incia padhamo apatotapuaka Kota
Yerusalem minaaka i zamanina Israel apamembalia to Bhanua
Momangkilo to apogauaka umbaana tee ajagani sarona.

Pujimo KAWASANA OPU!

136

Kaasina Kawasana Opu to Miana Israel

136:1-26

- ¹ Sukurumo i KAWASANA OPU, roonamo Incia amalape,
 kaasina abakaa sa'umurua.
- ² Sukurumo i Aulata'alana sagala Aulata'ala,
 kaasina abakaa sa'umurua.
- ³ Sukurumo i Kawasana Opuna sagala opu,
 kaasina abakaa sa'umurua.
- ⁴ Incia mopewauna manga giu inda momentela,
 kaasina abakaa sa'umurua.
- ⁵ Incia mopadhaangiana laiana tee kalapena bu-
 dina,
 kaasina abakaa sa'umurua.
- ⁶ Incia mobhakesakana ati i bhawona uwe,
 kaasina abakaa sa'umurua.
- ⁷ Incia mopadhaangiana manga kainawa mo-
 maogena i laiana,
 kaasina abakaa sa'umurua;
- ⁸ matanaeo to akuasai eo,
 kaasina abakaa sa'umurua;
- ⁹ bula tee kalipopo to akuasai malo,
 kaasina abakaa sa'umurua.
- ¹⁰ Incia mopekamatena manga anaana tumpe i
 Mesir,
 kaasina abakaa sa'umurua;

- 11 tee o miana Israel apalimbaia minaaka i Mesir,
 kaasina abakaa sa'umurua;
12 tee limana momakaa tee kuasana momaoge,
 kaasina abakaa sa'umurua.
13 Incia aweta Tawo Towu Lambe apaporuawe-
 taia,
 kaasina abakaa sa'umurua;
14 tee apapolimba miana Israel adhala i tanga-
 tangana,
 kaasina abakaa sa'umurua;
15 maka Incia apatondur Firaun tee tantarana i
 nuncana Tawo Towu Lambe,
 kaasina abakaa sa'umurua.
- 16 Incia akapalai uumatina alaloi tana matuu,
 kaasina abakaa sa'umurua.
17 Incia apekatalo manga raja momakaa,
 kaasina abakaa sa'umurua;
18 tee apekamate manga raja momulia,
 kaasina abakaa sa'umurua;
19 siitumo Sihon, rajana miana Amori,
 kaasina abakaa sa'umurua;
20 tee Og, rajana Basan,
 kaasina abakaa sa'umurua;
21 tee adhawuakea o lipuna manga incia
 apamembalia pusakana uumatina,
 kaasina abakaa sa'umurua;
22 amembali pusaka to miana Israel o bhatuana
 sumai,
 kaasina abakaa sa'umurua.
- 23 Incia inda mangamalinguaka wakutuuna tee
 masa'alata,

- kaasina abakaa sa'umurua;
²⁴ tee mangarambasaka minaaka i limana musu,
 kaasina abakaa sa'umurua.
²⁵ Incia mopakandena bhari-bharia mahaluku,
 kaasina abakaa sa'umurua.
²⁶ Sukurumo i Aulata'ala moparintana i laiana,
 kaasina abakaa sa'umurua.

137

Kaporona Inca i Bhiwina Umala Babel

137:1-9

- ¹ I bhiwina umala Babel,
 iwe sumakomo ingkami tauncura tee tatangi
 ande taudhani Sion, mbooresana miana Is-
 rael.
² I manga puuna gandarusa i tampa sumai,
 ingkami tapaloe kecapimami
³ roonamo iwe sumai manga miana Babel man-
 gataangi
 tee atumpu ingkami talaguakea,
 mia mopisakina ingkami manga tumpu
 talaguakea manga lagu kaunde-unde,
 pogauna,
 "Laguakamo to ingkami sala saangu lagu
 minaaka i Sion."
⁴ Tuaapa amembali ingkami talaguaka lagu to
 KAWASANA OPU
 i lipu dhaga?
⁵ E Yerusalem, ande kumalinguakako,
 taroakamo limaku indamo amembali ama-
 gasiaaka kecapil!
⁶ Taroakamo dhelaku indamo amembali alagu

ande kumalinguakako,
tee ande inda kupamembali Yerusalem
tampa ikaunde-undeakaku mpuu.

⁷ E KAWASANA OPU, udhania o miana Edom,
i wakutuuna Yerusalem atopahancuru,
manga incia apogau,
"Patobhatamea! Patobhatamea sakawana i
tana!"

⁸ E ra'eatina Babel, ingkomiu bheutopabinasa!
Amasanaamo mia mobalasina ingkomiu
roonamo pewaumu momadhaki i ingkami.

⁹ Amasanaamo mia morakona manga anaana
maidhiidhimiu
tee arambitakea i bhatu!*

138

*Do'ana Kasukuru roonamo Katulungina
KAWASANA OPU*

138:1-8

¹ Zaburuna Daud.

Iaku bhekusukuru i Ingkoo, E KAWASANA OPU,
tee mpuu-mpuuna incaku.

Iaku bhekulaguaka manga lagu kapujia to Ingkoo
i aroana manga malaa'ekati.

* **137:9 137:9** Amasanaamo mia morakona manga anaana maidhiidhimiu: Rua giu molaengana imatau. Bhaa-bhaana, manga lipu modhaangiana i saripina lipu Israel padhamo apewau giu mopokana to miana Israel. Sapadhana sumai, Kawasana Opu afirmani ande o Babel bheanamisi giu mopokana to amembali kabalasina pewauna manga incia.

² Iaku bhekusuju tee kusomba kupoaro i Bhanu-
amu momangkilo
tee kusukuru poose kupuji saromu
roonamo kaasimu molagina tee umembali
utoparacaea,
sababuna Ingkoo padhamo ususuaka
saromu tee janjimu alabhi minaaka i
opeopeapo uka.

³ I eona kugora, Ingkoo ulawaniaku,
tee Ingkoo upekatangka incaku tee kakaamu.

⁴ Bhari-bharia raja i alamu bheapuji Ingkoo, e
KAWASANA OPU,
roonamo manga incia padhamo arangoa
manga janji ipakawaakamu.

⁵ Manga incia bhealaguaka opea mopadhana
ipewauna KAWASANA OPU
roonamo amaoge o kamuliangina
KAWASANA OPU.

⁶ Moomini KAWASANA OPU sumai amalanga,
maka Incia akamata mia momaidhiidhi,
sainamo mia mosombo akamatea minaaka i
karidhoana.

⁷ Moomini kudhadhi i nuncana kanaraka,
Ingkoo upotaangiaka dhadhiku;
Ingkoo upaulu limamu to ubhali pamuruna
manga musuku,
tee o lima kaanamu mopasalaamatiaku.

⁸ KAWASANA OPU bheapamando haejatina to
dhadhiku;
E KAWASANA OPU, kaasimu abakaa
sa'umurua;

bholi uunto upewau sagala giu mopadhana
ipewaumu to uumatimu.

139

*Do'a i Aroana Kawasana Opu Momatauna
Sagala Giu*

139:1-24

¹ To kapalana molaguna. Zaburuna Daud.

E KAWASANA OPU, Ingkoo utilikiaku tee
umatauaku.

² Ingkoo umataua bhari-bharia ipewauku,
tee Ingkoo umatau opea ifikiriku minaaka i
karidhoana.

³ Ingkoo utilikiaku wakutuuna kulingka tee
kupertidhole,
tee umataua bhari-bharia lingkaaku.

⁴ Moomini indapo kupogau,
satotuuna Ingkoo umataumea bhari-bharia
bheipogauakaku, e KAWASANA OPU.

⁵ Ingkoo ujuganiaku minaaka i bhari-bharia
singku,
tee ujuganiaku tee kuasamu.

⁶ Tee katau incia sumai inda amentela mpuu to
karoku,
tee inda akawa i fikiriku sababuna amalanga
mpuu.

⁷ Iapai bhekulingka mamudhaakana kumaridho
minaaka i rohimu?
Iapai bhekupalai mamudhaakana
kumaridho minaaka i karomu?

- 8 Ande kupene i laiana, Ingkoo dhaangia iwe sumai.
Ande kukole i duniana mia mate, iwe sumai uka Ingkoo udhaangia.
- 9 Ande kupene i laiana kupolaka tee panina matana eo wakutuuna abhete,
tee kumboore i tampana matanaeo atondu,
- 10 iwe sumai Ingkoo upobhawa tee iaku,
tee o lima kaanamu bhemopekatangkaaku.
- 11 Ande kupogau, "Satotuuna o kalalanda bheasalibumbungiaku,
tee o kainawa i saripiku bheamembali kalalanda,"
- 12 sumaimo o kalalanda uabhia mencuana giu momalalanda to Ingkoo,
tee o malo mboomo kainawana pontanga eo, roonamo kalalanda uabhia mboomo kainawa to karomu.
- 13 Roonamo Ingkoo mopadhaangiana bhari-bharia parewana badaku;
Ingkoo mopebhanguiaaku i nuncana kadhumana inaku.
- 14 Iaku kusukuru i Ingkoo roonamo upadhaangiaaku tee cara inda momentela.
Bhari-bharia ipewaumu inda amentela,
tee atotuu-totuu kumataua o giu incia sumai.
- 15 Manga bukuku ukamatea,
wakutuuna upadhaangiaaku i tampa rahasia,
tee upebhanguiaaku i wetana alamu mopori-tambena mpuu.
- 16 Ingkoo ukamataaku wakutuu dhaangiapo kumembali satongka raa,

tee i nuncana kitabimu bhari-bharia giu incia
sumai padhamo atoburi
to eo-eona mopadhana ipatantuakamu to iaku
wakutuuna indapo aumba saangu eo minaa
ka i manga incia.

17 Amarasai mpuu o fikirimu, e Aulata'ala, soo
mpuu amarasai kuma'anaia!
Abhari mpuu o fikirimu!

18 Ande amembali kugagaria,
kabharina alabhi minaaka i kabharina
bhone,
tee wakutuuna kuunto kugagaria,
iaku dhaangiapo uka kupobhawa tee Ingkoo.

19 E Aulata'ala, maasangia Ingkoo upabinasa
manga mia madhaki,
tee upekaridhoakaaku manga pande peka-
matena mia!

20 Manga incia apogauakako madhaki,
tee asia-sia asomboaka karna to aewangiko.

21 E KAWASANA OPU, kubancia o mia mobanciko,
kumarikaia o mia moewangiko!

22 Manga incia kubancia! Kubancia mpuu
tee kuabhia mboomo musu!

23 E Aulata'ala, parakisaakumo tee umataumo
ngangarandaku;
ujiakumo tee umataumea o fikiriku.

24 Kamatamea ara dhaangia o kadhaki* i nuncana
karoku,
tee ususuakaakumo dhala mobakaa.

* 139:24 139:24 *kadhaki*: Atawa uka "giu mopekapiina."

140

Do'a Emaniana Peulusa minaaka i Manga Mia Madhaki

140:1-14

¹ To kapalana molaguna. Zaburuna Daud.

² E KAWASANA OPU, maasangia
utulungiaku minaaka i mia madhaki,
tee ujuganiaku minaaka i mia masega.

³ Manga incia ahaejatiaka kadhaki i nuncana
ngangarandana,
tee saesaeo apadhaangia manga potimbea.

⁴ Manga incia apektadha dhelana mboomo ulo,
pogauna manga incia mboomo racuna ulo
mokobisa.

Sela

*

⁵ E KAWASANA OPU, jaganiaku minaaka i
kuasana mia mokodosa,
tee ujuganiaku minaaka i mia masega,
mohaajatina to apekandawuaku.

⁶ Mia mosombo abuniaka katapu to iaku.
Manga incia abhakesaka jarina i bhiwina
dhala,
tee sakaaratea dhala manga incia ataakaaku
katapu.

Sela

140:4 140:4 Rom. 3:13. * **140:4 140:4** Sela: Aipomo tandana to aunto wakutuuna lagu sumai atolaguaka, atawa o tanda to ahanda apekaogea o suarana, atawa onina gambusuna. Amembali uka to tanda to morangoa mamudhaakana asuju.

⁷ Iaku kupogau tee KAWASANA OPU, "Ingkoomo
Aulata'alaku,
perangoimea opea iemaniku e KAWASANA
OPU!"

⁸ E KAWASANA OPU, e Aulata'alaku, Ingkoomo o
kasalaamatiku tee kakaaku,
Ingkoo padhamo ujagani bhaaku i eona po-
timbea.

⁹ E KAWASANA OPU, bholi uose peeluana mia
madhaki,
bholi uperangoia o haejati madhakina
manga incia, mamudhaakana inda
asomboaka karonā.

Sela

¹⁰ Maasangia o racu mominaakana i bhiwina
apatondu manga mia madhaki molibuaku.

¹¹ Taroakamo manga incia apakowaoakea weona
waa,
tee abhanakea i nuncana waa tee i bhalo
mandala imateaka,
sabutuna inda amembali alimba pendua.

¹² Manga pande fitanaa inda bheadhadhi malape
i dunia,
tee o mia mopewauna kasega bheaosea
balaa.

¹³ Iaku kumataua ande o KAWASANA OPU bheae-
waaka hakuna mia motopisaki,
tee adhawu ka'adili to mia momisikini.

¹⁴ Atantumo o mia mobanara bheapuji saromu,
tee o mia momakatena totona incana bheam-
boore i aroamu.

141

Do'a i Wakutuuna Kapancoba

141:1-10

¹ Zaburuna Daud.

E KAWASANA OPU, iaku kugora i Ingkoo, um-bamo pekadhei!

Rangomea o do'aku wakutuuna kugora i Ingkoo.

² Maasangia o do'aku amembali pasombaa mboomo dhupa i aroamu, tee limaku motoangkana mboomo pasombaa i wakutuuna konowia.

³ E KAWASANA OPU, jagania muncuku, tee kamatea bhiwiku.

⁴ Bholi utaroakea incaku aose giu momadhaki to kupewau manga giu mokodosa tee manga mia mopewauna kadhaki; bholi utaroakaaku kukande kinandena kariaana manga incia.*

⁵ Taroakamo mia mobanara atapaaku to audhaniaku; taroakamo mia mota'atiko ahukumuaku ande kupewau kasalaha, ancosala o bhaaku amendeu atarima mina minaaka i mia mobanara. Maka iaku sadhaadhaa kudo'a kuewangi pe-wauna momadhaki manga mia madhaki sumai.

141:2 **141:2** Wah. 5:8.

* **141:4** **141:4** *kukande kinandena kariaana manga incia:* Aipomo ipogauakana iwe sii o kinande ipasombaaka i barahala i kariaana agama.

- 6 Wakutuuna haakimuna manga incia
atudhaakea minaaka i pimpina gunu
bhatu,
sumaimo manga incia bheamataua ande
manga pogauku abanara.
- 7 Mboomo bhatu apaporua wetaia tee apahancu-
rua i tana,
mboomo sumai uka bukuna manga incia
bheamantale i ngangana koburu.
- 8 Maka, matakua atonto i Ingkoo, e KAWASANA
OPU, Aulata'ala isombaku;
Ingkoomo peulusaku, bholi utaroakaaku ku-
binasa!
- 9 Maasangia ujuganiaku minaaka i katapu itaana
manga incia,
tee minaaka i katapuna manga mia mope-
wauna kadhaki.
- 10 Taroakamo manga mia madhaki sumai apesua
i nuncana katapu itaana karonu,
sainamo karoku samia kulaloia tee inda
akangkanaiaiku.

142

Do'ana Samia Motopajere

142:1-8

- 1 Lagu kaadharina Daud wakutuuna incia
apalaiaka Saul tee aopo i nuncana lia. Saangu
do'a.
- 2 Tee suara makaa kugora i KAWASANA OPU;
tee suara makaa kuemani kaasi i KAWASANA
OPU.
- 3 I aroana kupeenci,

- kupaumbaakea bhari-bharia kanarakaaku i
Incia.
- ⁴ Wakutuuna amate akalaku,
Ingkoo umataua o dhalaku.
I dhala bheilaloiku
manga musuku abuniaka katapu to iaku.
- ⁵ Poilimo i weta kaanaku tee kamatea,
inda samia uka mokamataaku.
Inda dhaangia tampana peulusaku,
tee inda samia uka mofaduliakaaku.
- ⁶ E KAWASANA OPU, iaku kugora i Ingkoo.
Pogauku, "Ingkoomo tampana peulusaku,
tee tangkanamo Ingkoo ifaraluuku i nuncana
dhadhiku sii."
- ⁷ Perangoia o do'aku
roonamo indamo tee kakaana o bukuku.
Pasalaamatiaku minaaka i manga musu mosik-
isaaku
roonamo manga incia alabhi kakaana mi-
naaka i iaku.
- ⁸ Palimbaaku minaaka i katorongku,
mamudhaakana kumembali kusukuru i In-
gkoo.
Manga mia mosaalihi bheaporomu tee iaku to
tapuji saromu,
roonamo Ingkoo padhamo upewau malape i
iaku.

143

*Do'a Emaniana Kasalaamati minaaka i Musu
143:1-12*

¹ Zaburuna Daud.

Maasangia urangoa o do'aku, e KAWASANA OPU!

- Perangoia iemaniku roonamo umembali
utoparacaea;
lawaniaku i nuncana kabanaramu.
² Bholi ubhawa bhatuamu i pangadila,
roonamo inda dhaangia mia inda mosala i
aroamu.
- ³ Musuku apajereaku tee apatidhomuaku i tana;
incia adhikaaku i tampa momalalanda
mboomo mia momangengena momate.
- ⁴ Sababuna sumai, amate akalaku,
tee ngangarandaku ameri mpuu.
- ⁵ Kutoudhanimo tee zamani momangenge,
iaku kuudhania bhari-bharia ipewaumu,
tee kufikiria bhari-bharia ipadhaangiamu.
- ⁶ Iaku kuangka limaku tee kudo'a i Ingkoo,
ngangarandaku apemeliliakako mboomo
tana matuu apemeliliaka wao.

Sela

- ⁷ E KAWASANA OPU, maasangia ulawaniaku
madhei,
roonamo amatemo akalaku.
Bholi ubuniaka karomu minaaka i iaku
mamudhaakana iaku inda mboo manga mia
mosapona i duniana mia mate.
- ⁸ Parangoakaaku kaasimu molagina i wakutuu
saeona,
roonamo kuparacaea i Ingkoo.
Susuakaaku dhala bheilaloiku,
roonamo i Ingkoomo kupasaraaka ngan-
garandaku.

- 9 E KAWASANA OPU, pasalaamatiaku minaaka i
manga musuku,
i Ingkoomo tampaku kupalai to kupeulu.
- 10 Adhariaaku kupewau opea ipeelumu,
roonamo Ingkoomo Aulata'alaku.
Taroakea o rohimu momalape sumai
akapalaiaku i tana morata.
- 11 E KAWASANA OPU, padhadhiaku roonamo
saromu,
tee i nuncana kabanaramu pasalaamatiaku
minaaka i kanarakaa.
- 12 Roonamo kaasimu molagina, pahancurumea
manga musuku,
tee pabinasamea bhari-bharia mia mopa-
narakaaku
roonamo iaku o bhatuamu.

144

Lagu Kasukuruna Raja

144:1-15

¹ Zaburuna Daud.

- Atopujimo KAWASANA OPU o gunu bhatuku,
moadharina limaku to apotimbe tee kauna
limaku to apoewangi.
- 2 Incia momaasiakaaku sa'umuruu tee o bente
potaangiaku,
kota benteku tee mopabebasiaku.
- Incia o katangkesiku, Incia o tampana peulusaku,
Incia apekatalo manga lipu tee adhikaia i
tambena kuasaku.

- ³ E KAWASANA OPU, incema buaka o maanusia
sumai mbakana uudhania?
Incema buaka o maanusia sumai mbakana
ufaduliakea?
- ⁴ Maanusia sumai mboomo wiina ngalu,
tee o umuruna mboomo ngkamia-mia mo-
lalo.
- ⁵ E KAWASANA OPU, bungkalemea o laianamu
tee usapomo,
dhingkumea manga gunu mamudhaakana
akoombu.
- ⁶ Pasapomea o bhibhitomu mamudhaakana o
musu apogaa-gaa,
rambasakamea o panamu mamudhaakana
manga incia amambura.
- ⁷ Paulumea o limamu minaaka i kalangaana;
pabebasiaku tee upasalaamatiakumo mi-
naaka i uwena mawa,
tee minaaka i limana manga mia dhaga!
- ⁸ Manga incia kapeeluana apektipu,
tee agau-gau wakutuuna aposumpa.
- ⁹ Iaku bhekulaguakako lagu bhaau, e Aulata'ala,
tee bhekulaguakako manga lagu kapujia
poose kutikiakako gambusu sapulu tal-
iana.
- ¹⁰ Ingkoo modhawuna kamangantalo to manga
raja,
tee upasalaamati Daud o bhatuamu.
- ¹¹ Rambasakaaku minaaka i hancuna mia
masega,

pasalaamatiaku minaaka i kuasana manga
mia dhaga.
Manga incia kapeeluana apektipu,
tee agau-gau wakutuuna aposumpa.

¹² Maasangia manga anata umane
mboomo penembula motuwuna amembali
amaoge,
tee manga anata bhawine
mboomo manga arii makesa
mobhelokina manga singkuna malige.

¹³ Maasangia manga kampirita abukeaka
sagala giu hasilina alamu;
maasangia manga dumbata i tana mokorumpu
amembali rewuna mbaa,
tee ajulu o kabharina amembali puluna rewu
mbaa o kabharina.

¹⁴ Maasangia manga sapita ahanda ajulu o kao-
gena badana
tee inda dhaangia momadhakina i nuncana
kadhumana atawa amambuu.
Tee inda atorango suara motomaporoakana
inca i dhalana manga kotata.

¹⁵ Amasanaamo o lipu ibarakati mboo sumai!
Amasanaamo mpuu o lipu mosombana
i Aulata'ala, siitumo mosombana i
KAWASANA OPU.

145

Lagu Kapujia to Kalapena KAWASANA OPU
145:1-21

¹ Lagu kapujiana Daud.

E Aulata'alaku, e Raja, iaku bhekupekalangako,
tee bhekupuji saromu to sa'umurua.

² Saesaeo bhekupujiko,
tee bhekumuliangia o saromu to sa'umurua.

³ Tapanamo kalanga o KAWASANA OPU tee
alaenga mpuu atopuji!
Inda bhari-bharia sifatuna momaoge amem-
bali ama'anaia maanusia.

⁴ Manga mancuana bheapuji opea mopadhana
ikarajaamu i manga anana sakawana
bhari-bharia siwuluna amataua,
tee bheapogauaka ande Ingkoo momakaana.

⁵ Manga incia apakoleleaka kaogesamu momu-
liana
tee pewaumu inda momentela bhekufikiria i
nuncana ngangarandaku.

⁶ Mia bheapetulatulaaka manga ipewaumu mo-
makaana,
tee bhekupakoleleaka kaogesamu.

⁷ Manga incia bheakaunde-undeaka kaogesana
saromu roonamo pewaumu momalape,
tee bheasambo-sambo roonamo
kabanaramu.

⁸ KAWASANA OPU sumai abukeaka kaasi tee
rahumati.
Incia asabara mpuu tee o kaasina molagina
amaoge.

⁹ KAWASANA OPU sumai amalape i bhari-bharia
mia,
tee rahumatina to bhari-bharia mahaluku
mopadhana ipadhaangiana.

- 10 Bhari-bharia ipadhaangiamu sumai bheasukuru i Ingkoo, e KAWASANA OPU,
tee bhari-bharia mia mosaalihi bheapujiko.
- 11 Manga incia bheapogauaka kamuliangina pamarintamu,
tee apetulatulaaka kakaamu,
- 12 sabutuna o maanusia amataua o kaogesana
manga pewaumu,
tee kamuliangina pamarintamu amalanga.
- 13 Pamarintamu o pamarinta mobakaa,
tee o kuasamu asadhaadhaa to sa'umurua.

KAWASANA OPU amembali atoparacaea i nuncana bhari-bharia janjina
tee bhari-bharia ipewauna abukeaka rahumati.

- 14 KAWASANA OPU atulungi bhari-bharia mia monarakaa,
tee apekatangka bhari-bharia mia motungku.
- 15 Bhari-bharia matana mia aantaantagiko,
tee Ingkoo uka udhawua kinande akawa wakutuuna.
- 16 Ingkoo ubungkale limamu,
tee upadhaangiaaka opea ipeeluna bhari-bharia mahaluku mokoinyawa.
- 17 KAWASANA OPU abanara i bhari-bharia dhalana,
amalape tee abukeaka rahumati.
- 18 KAWASANA OPU atulungi bhari-bharia mia mogorana i Incia,
bhari-bharia mia mogorana i Incia i nuncana kabanara.

- ¹⁹ Incia apadhaangiakea bhari-bharia ifaraluuna
mia momaekana i Incia;
Incia uka arangoa o pekeena manga incia tee
apasalaamatia.
- ²⁰ KAWASANA OPU ajagani bhari-bharia mia mo-
maasiakea,
maka Incia apabinasa bhari-bharia mia mad-
haki.
- ²¹ Iaku bhekupuji KAWASANA OPU,
tee bhari-bharia mahaluku bhepuji saron
momangkilo to sa'umurua.

146

*Tangkanamo KAWASANA OPU Mangatulung-
ina*

146:1-10

¹ Pujimo KAWASANA OPU!

E inyawaku, pujimo KAWASANA OPU!

² Iaku bhekupuji

KAWASANA OPU sa'umurua dhadhiku,
tee bhekulaguaka manga lagu kapujia to
Aulata'alaku kangengena dhaangia kud-
hadhi.

³ Bholi uparacaea i manga mokokuasana,
i maanusia inda momembalina mopasalaa-
mati.

⁴ Wakutuuna inyawana amabhotu, manga incia
ambulimo i tana,
tee i eo incia sumai uka bhari-bharia ihaeja-
tiakana ailamo.

- ⁵ Amasanaamo mia motarimana katulungi mi-naaka i Aulata'ala isombana Yakub,
modhikana harapuna i KAWASANA OPU,
Aulata'alana.
- ⁶ Inciamo mopadhaangiana laiana tee alamu,
tawo tee bhari-bharia antona,
tee sadhaadhaana akeni janjina to
sa'umurua.
- ⁷ Inciamo moewaakana hakuna manga mia mo-topisaki,
tee adhawu kinande i manga mia momaara.

KAWASANA OPU apabebasi manga mia
itorongku;

- ⁸ KAWASANA OPU abungkale matana manga
mia mawilo.

KAWASANA OPU aangka manga mia motungku;
KAWASANA OPU amaasiaka mia mobanara.

- ⁹ KAWASANA OPU ajagani manga mia dhaga;
Incia apambuli kadhaangiana manga ana
maelu tee iaiaro,
maka Incia apakacau haejatina mia mad-
haki.

- ¹⁰ KAWASANA OPU bheaparinta mboomo Raja to
sa'umurua.

E ra'eatina Sion, Aulata'alamu akokuasa
sa'umurua zamani.

Pujimo KAWASANA OPU!

147

*Kakuasa tee Rahumatina KAWASANA OPU
147:1-20*

- ¹ Pujimo KAWASANA OPU!

Amalape mpuu talaguaka manga lagu kapujia to
Aulata'alata;
umbe, amalape mpuu tanamisia tee alaenga
to tapujia!

² KAWASANA OPU apabhangu Yerusalem,
tee aromusaka manga miana Israel mopad-
hana ibhanakana.

³ Incia apaunto manga mia momaporona incana,
tee atange kambelana manga incia.

⁴ Incia atantuaka kabharina manga kalipopo,
tee sumbe-sumbere adhawua saro.

⁵ Kawasana Oputa amaoge tee kakaana
ataralabhi-labhi,
hikimatina inda atokera-kera.

⁶ KAWASANA OPU atulungi manga mia mo-
topisaki,
maka Incia apaporitambe manga mia mad-
haki sakawana i tana.

⁷ Lagumo tee usukurumo i KAWASANA OPU!
Laguakamea manga lagu kapujia tee uma-
gasiaaka kecapi to Aulata'alata.

⁸ Inciamo motutubhina laiana tee manga ta'ina
ngalu,
mopadhaangiana wao i alamu,
tee apatuwu rumpu i manga gunu.

⁹ Incia uka modhawuna kinande i binata,
tee i manga anana manu-manu tongkaa
mokaoni-onina.

¹⁰ Mencuana kakaana ajara ipeeluna Aulata'ala,
tee uka mencuana suludadu momakaa
imasinaina;

¹¹ maka o KAWASANA OPU amaasiaka manga
mia momaekaia,

tee manga mia moharapuakana kaasina molagina.

¹² Muliangia o KAWASANA OPU, e Yerusalem!
Pujimo Aulata'alamu, e Sion!

¹³ Roonamo Incia apekatangka manga kapasona
bhambana lawamu,
tee abarakati ra'eatimu tee manga giu momalape.

¹⁴ Incia adhawu ka'amani i lipumu,
tee apekambosuko tee gandum momalape.

¹⁵ Incia apakawaaka parintana i alamu,
sumaimo firimanina lausaka atopewau.

¹⁶ Incia apasapo salju mboomo buluna dumba,
tee o alo mokobhatu akamburakea mboomo rapu.

¹⁷ Incia apasapo waona esi mboomo katongkana
roti;
inda dhaangia momembalina motaraina kagarina.

¹⁸ Incia apakawaaka firimanina, sumaimo ar-
eremo o esi sumai;
Incia atowii ngalu, sumaimo o uwe asiwulumo.

¹⁹ Incia apakawaaka firimanina i Yakub,
tee manga katotapuna tee manga tuturana to Israel.

²⁰ Incia inda apewau giu mboo sumai i lipu
mosagaanana iapaipo uka;
manga incia inda amataua manga tuturana.

Pujimo KAWASANA OPU!

148

Laiana tee Alamu, Pujimo KAWASANA OPU!

148:1-14

¹ Pujimo KAWASANA OPU!

Pujimo KAWASANA OPU minaaka i sorogaa,
pujimea i tampa momalanga!

² Pujimo Incia, e bhari-bharia malaa'ekatina,
pujimo Incia, e bhari-bharia tantarana!

³ Pujimo Incia, e matanaeo tee bula;
pujimo Incia, e manga kalipopo
momainawana!

⁴ Pujimo Incia, e laiana momalanga,
tee uwe i bhawona laiana!

⁵ Taroakamo bhari-bharia apuji sarona
KAWASANA OPU
roonamo minaaka i firimanina Incia apad-
haangia bhari-bharia.

⁶ Incia uka motantuakana bhari-bharia giu i soro-
gaa tee i laiana to sa'umurua;
opea ipatotapuakana abakaa.

⁷ Pujimo KAWASANA OPU minaaka i alamu,
e manga nagana tawo tee saangua andala
oge;

⁸ e waa tee waona esi, salju tee ta'ina ngalu,
tee garura* moosena parintana Kwasana
Opu;

⁹ manga gunu tee bhari-bharia kabumbu,

* **148:8 148:8** *garura*: Ngalu momakaa mpuu.

- manga puuna kau mokobhake tee bhari-
bharia puuna aras;
- ¹⁰ binata maila tee bhari-bharia kadhambaaka,
bhari-bharia binata mopondele tee manu-
manu mokopani;
- ¹¹ manga raja i alamu tee bhari-bharia lipu i
dunia,
manga kaogesa tee bhari-bharia haakimu i
alamu;
- ¹² manga anaana umane tee kabuabua,
manga mancuana tee anaana apoose apuji
Incia!
- ¹³ Taroakamo bhari-bharia apuji sarona
KAWASANA OPU,
roonamo tangkanamo sarona molaengana
motopekalinga!
Kalangana alabhi minaaka i kalangana
alamu tee laiana.
- ¹⁴ Incia padhamo apajaea uumatina,
tee apamembalia giuna kapujia to bhari-
bharia mia mosaalihi,
siitumo miana Israel, uumati momakasuna
tee Incia.

Pujimo KAWASANA OPU!

149

Lagu Bhaau to KAWASANA OPU
149:1-9

¹ Pujimo KAWASANA OPU!

Laguakamo lagu bhaau to KAWASANA OPU!

Pujimea i nuncana poromusakaana mia
mosaalihi!

- ² Taroakamo Israel akaunde-unde roonamo
Kawasana Opu mopadhaangiakomiu,
tee taroakamo ra'eatina Sion akaunde-unde
roonamo Rajana.
- ³ Taroakamo manga incia amanari to apuji
sarona Kawasana Opu,
tee alaguaka manga lagu kapujia apoose am-
agasiaaka ganda-ganda tee kecapi to apuji
Incia,
- ⁴ roonamo KAWASANA OPU amaasiaka
uumatina,
tee Incia apakanaakea o mahakota kasalaa-
mati to manga mia mopaporitambena
karona.
- ⁵ Taroakamo uumatina akaunde-unde i nuncana
kamuliangi,
tee alagu asambo-sambo i kolemana.
- ⁶ Taroakamo manga incia apuji Aulata'ala tee
ngangana,
apoose akeni hancu momatadha ruaanguana
matana i limana
- ⁷ to abalasi pewauna manga lipu i dunia sii,
tee ahukumu manga ra'eatina lipu i alamu
sii,
- ⁸ to abhokeakea ase manga raja,
tee abhokeakea rante ase manga kaogesana
lipu,
- ⁹ to ahukumu manga lipu mboomo mopadhana
ipatotapuakana Aulata'ala to manga incia.
Giu incia sumai amembali saangu giu momu-
lia to bhari-bharia mia mosaalihi.

Pujimo KAWASANA OPU!

150

Pujimo KAWASANA OPU!

150:1-6

¹ Pujimo KAWASANA OPU!

Pujimo Aulata'ala i tampana momangkilona!

Pujimea i sorogaana momakaana!

² Pujimea roonamo pewauna mosusuakana
kakaana.

Pujimea apokana tee kaogesana inda mo-
mentela!

³ Pujimea tee onina torompe,
pujimea tee gambusu tee kecap!

⁴ Pujimea tee ganda-ganda tee umanari,
pujimea tee gambusu tee suli!

⁵ Pujimea tee ceracap mokonduu,
pujimea tee ceracap mokondii!

⁶ Taroakamo bhari-bharia mahaluku modhadhi
apuji KAWASANA OPU!

Pujimo KAWASANA OPU!

Kitabi Momangkilona Wolio

Wolio: Kitabi Momangkilona Wolio (New Testament+)

copyright © 2024 Wycliffe Bible Translators, Inc.

Language: (Wolio)

Contributor: Wycliffe USA

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-07-10

PDF generated using Haiola and XeLaTeX on 10 Jul 2025 from source files dated 10 Jul 2025

7df9af1f-1c49-59d2-a164-bde0a20127b3